


Theodore  
Besterman










F 7  
11





IUSTI LIPSI  
EPISTOLARVM  
SELECTARVM  
CENTVRIA PRIMA  
MISCELLANEA.



ANTVERPIÆ,  
EX OFFICINA PLANTINIANA,  
Apud Ioannem Moretum.  
cId. Idc. v.  
*Cum Privilegiis Casareo & Regio.*

THE EPISTOLARY

OF THE

AMERICAN

MISCELLANEA

BY THE

REV. JOSEPH M. MORTON

1830

NEW YORK: G. & R. B. 1830



AD PRÆTOREM,  
CONSULES,  
ET  
SENATVM REIP.  
VLTRAIECTINÆ.

*Viri Nobiles, Viri Prudentes,*



PISTOLAS meas aliquot, quas  
his diebus collegi, & errantes  
redegi sub vnum huius Cen-  
turiae velut signum, visum mi-  
hi in lucem dare: idque sub tu-  
telâ nominis vestri. Caussam  
habui duplicem. Prior est, quia lucem aliquam  
tenui huic, & per se obscuræ scriptioni, con-  
ciliare conatus sum à luce vestrà: quorum an-  
tiqua, potens, & amœna vrbs splendet inter  
Belgica primas: vósque in eâ, per prudentiam  
& virtutem. Caussa altera. quòd beniuolen-  
tia vestra huc me impellit & comitas, quâ pu-  
blicè ac priuatim insigni semper in me fateor  
esse vfos. Omitto amicitias, quæ mihi cum  
plerisque vestrorum ciuium artæ: sed pedem  
numquam in urbem vestram posui, quin cla-  
ra mihi signa semper exhibueritis eximij cu-  
iusdam

iurisdam adfectus & cultus. Cum honore & amore venientem excepistis, hærentem habuistis, abeuntem dimisistis. Quo meo merito? nullo, fateor: sed solo impulsu beneficæ & humanæ naturæ. quæ velut fato aut Genio, inter adfuitas omnes gentes, propriè est vestra. Quod eò maius beneficium interpretor; quia tam munes fuistis, in re & verbis hactenus immunem. Id autem ne vltra sim, verborum ecce saltem & scripti munus hoc capite: Epistolas inquam meas, nouum & veterem ingenij partum. nouum dispositu, compositu veterem. sed partum profectò infirmum aut informem: & quem, per diuturni hoc morbi tedium, nec fingere nec polire mihi mens, quémque abiecisse veriùs videor, quàm peperisse. Vos ei tutores, imò patres aduoco: tangite, tollite expositam hanc prolem: & inprimis auctoritatis vestræ scuto defendite, contra maligni liuoris dentem. Ita deus vos & vestram urbem ciuiliū hac bellorum flammâ aliquando eripiat, quâ vndique nunc estis cincti. Lugd. Bat. Id. Nouemb.

LECTO-



# LECTOREM MEVM

SALVERE IVBEO.



**E**N tibi Epistolas nostras, mi Lector, sed in parte : & eam ipsam partem, nō mentior, trepidē emissi, & quodammodo volens nolens. Volentem me sanē volentia tua facit. cuius fauoris aura suauiter adhuc mihi spirat: nolentem, ipsum argumentū. Primū, quia id tenue: nec famæ ab eo magna spes aut seges. Epistolas enim meras damus: id est, diales nostras nugas, iocos, lusus, & cū amicis garritus. Quid serium hīc magno opere, aut cultum? quin epistolę esse desinunt, si nimis tales. Ordinem aut dilectum in materiā, curam aut limam in stilo, quispiam expectat? à me frustra: quia in blandiente illā heresum, vt epistolas sub manu nasci debere censeam, & sub acumine ipso stili. Atque adeò (dicam verē) bis non scribo, bis vix eas lego. Profluunt mihi ex liquido quodam canali pectoris: & vt animus aut corpus meū est cū scribo, ita illæ. Victor meus solitus dicere, indices ei semper valetudinis nostræ meas litteras, etiam cū indices non essent. Benè. languent enim illæ, excitantur, dolent, gaudent; calent, frigent mecum. Vt verbo dicam, affectus animi corporisq̃ue mei in hāc tabellā. Quòd si quēdā in his serię, tamen pauce: & præponderat, vereor, leuiorum multitudo. Nam nullas esse, falsò dixerim. quia interdum intercurrent totæ, & ex professio tales, philologæ aut philosophæ, & salubriū aut docentium præceptorum. Consulimus, monemus, cauemus, apud iuuentutem præsertim: quam cura mihi semper ad vtilia, non solum ad amœna ducere, & animo ac robore ponere supra vulgum. Quas ipsas si paullò diligentius scripsi, & velut percolui digniōri quadam sermonis veste: nihil, credo, peccaui. quia hoc quoque sine curā meā magnā, sine ambitu. cuius manus facilè mentem sequitur: & cū impleuit eam materies grandior, chartam mihi vltro verba. Famam igitur siue laudem sperē hīc haud magnam. atque adeò infamiam quā nō timeam, cū oculos siue ad æuum hoc flexi, siue ad rem ipsam? illud quidem, proum ingerere calumnias vtraque manu; hanc, natā accipere toto sinu.

Detegimur enim in epistolis, & subijcimur oculis penè nudi. Nos-  
se me, aut alium vis? epistolas lege, quæ depingunt. Ingenij mei,  
adfectus, iudicij, imò & vitæ, non vana imago istic. Alibi fucus  
& simulatio habitat: hîc candor, hîc veritas, & non nisi natiuus  
ille color. Quî simulet in subitâ illâ, & sæpè calidâ, scriptione ani-  
mus? non potest. quî apud amicum, & se alterum? non vult, non  
debet. Reuera enim deprehenditur aut emicat, priusquam se  
componat: nec velum ei ducere succurrit, quo tam citò, & apud  
tales, se regat. Protrahit igitur hominem maximè hæc scriptio: &  
idèò iudicijs calumnijsque exponit. De te tuîsq; memoras? quod  
carpant reperient, vt vanum, aut iactabundum. De alijs? hîc quo-  
que, quod carpant. Illi in laudes nimis pronus videbere, alij in re-  
prehensiones: huic ad superbiam vergere, alteri in adulationem  
proclinare. Denique in publicâ & civili re, sub cineribus qui oc-  
culi ignes? Pietatis mihi rem alibi tange: apud hanc aut illam  
partem peristi. Reges aut status: cadauer es & funus. Atqui hæc in  
epistolas sæpè intercurrent neceffe est, aut illæ ne currant. In qui-  
bus omnibus etsi nos (quantum prudentia quidem mea tulit)  
temperauimus: tamen vereor vt temperet sibi à me quoque in-  
temperies quorundam. Voces iam audio, & prævideo. quid ad  
me? ego à verâ culpâ tantum abesse me scio, quantum captores  
illos à verâ laude. Improuidè fortassè alibi aliquid dictum emis-  
sitij illi oculi reperiât: at nihil impiè aut malignè. Hoc testor, hoc  
profiteor. mali iuris, mali moris ille, quisquis aliam mentem mi-  
hi affinget ex suâ mente. Nec hoc te lædat, quòd vnum aut alte-  
rum alibi læsi: apertè, fateor, nec tamen nominatim. Se ille qui-  
cumque est priùs prodat & accuset necessum est, quàm me. Cur  
autem non liceat? Pestes & vitia hæc hominum detegi, ex vsu ho-  
minû est: etsi non apertè ipsos. Peti se illi sentiant, alij suspicentur.  
In hoc tamen quoque, sicut in ceteris, siquid peccatû: post emen-  
dabitur. quia nunc vnicum hunc librum, velut in gustum, da-  
mus, & periculi faciendi causâ. Emitto, inquam, hanc Centu-  
riam, aut præmitto veriùs, ex Epistolari meâ legione, tanquam ad  
incerta itinerum exploranda: & si nulli aut pauci hostes, fidenter  
omnes copias producam in hunc Famæ campum. sin laquei &  
infidiæ; quiescam, & tenebo me iure in fidis silentij castris. Tu  
ô bone, fauc, ama, fauentem, amantem.



I N D E X  
E P I S T O L A R V M  
S E L E C T A R V M  
C E N T V R I Æ I.  
M I S C E L L A N E Æ.

<b>A</b>	<b>BRAHAMO</b> Ortelio epi- stola liij.	Francisco Raphelengio xxxv.
Adolpho Metkercho	xciiij.	Francisco Raphelengio Francisci
Alexandro Ratloni	xij, xxxiiij.	Filio lxxvij, lxxxij.
Amico cuidam	lxij.	G.
Andrea Dudithio	xcij.	Gabrieli Roelandio xlviij.
Andrea Schotto	xlvi.	Gaspari Schuermanno xliij.
Augerio Gisleno Busbequio Casa- ris Legato xiiij, lxiiij.		Georgio Benedicti lxxiiij.
		Georgio Ratallero Præsidi Ultra- iect. xxxv.
<b>B.</b>		Gerarto Falkenburgio iiij.
Bonauentura Vulcanio lxv.		Godschalco Steeruechio xlv.
<b>C.</b>		Gulielmo Breugelio viij.
Carolo Clusio xlviiij, xcj.		Gulielmo Cambdeno xxiiij.
Consulibus & Senatui Antuer- piensi lvj.		H.
Cornelio Prunio lix.		Hadriano vander-Burchio lviij.
Cornelio Valerio j.		Henrico Ranzouio lxxxviij.
<b>D.</b>		Henrico Viltio lv, xcviij.
Dominico Lampsonio lx.		Hieron. Berchemio xxj.
<b>E.</b>		<b>J.</b>
Errico Memmio lxxxviij.		Iacobo Cuiacio lxviij, lxxvj.
Euerardo Pollioni xvj, xlviij, lxxiiij.		Iano Douſe iiij, xv, xxiij,
		lxxj, xcviij.
<b>F.</b>		Jano Grotio xviij.
Florentio Thinnio xc.		Iano Grutero xciij.
Francisco Bensio liij.		Iano Gulielmio Lubecensi, xj,
Francisco Modio xxviij.		xxxix, lxviij, lxxiiij.
		Iano Hauteno l.
		Jano

Iano Lernutio	x, xiiij, xx,	P.	
	xxxiiij, xl, lj, lxxx-vj.		
Joachimo Camerario	lxxv.	Paulo Busio	lxxxix.
Ioanni Ionsfano Scoto	xxxviiij.	Paulo Melisso	lxxxiiij.
Ioanni Moerentorfio	lxxij.	Petro Egmondo	c.
Ioanni Rotario	xcix.	Petro Pythæo	ciiij.
Joanni Sambuco	xxxviij.	Philippo Lanoyo Nobiliff. iuueni	
Ioanni Viniano	xlix.	xxij.	
Josepho Scaligero Iuli F.	vj.	R. Pincao	lxxxv.
Josie Mercero	xxxij.	Rolando VVincelio	lxxx.
	L.	S.	
Lauino Torrentio	lxiiij, xcviij.	Stephano Pighio	v.
Lernutio & Gifelino	xxviij.	T.	
	M.	Theobaldo Teelingio	xxix.
Marco Antonio	liij.	Theodoro Cantero	xliij, lxxxiiij.
M. Valerio Collino	xcv.	Theodoro Leervvio	xix,
Martino Antonio Delrio	xiiij.	xxvj, xxxj, xxxviij, xliij, lxj,	
Martino Lydio	lviiij, lxix, lxxxix.	lxviij.	
	N.	V.	
Nicolao Biesio Cesareo Medico		Victori Gifelino	ij, ix, lxx,
xxx.		lxxxj.	



IVSTI LIPSI  
EPISTOLARVM  
SELECTARVM  
CENTVRIA PRIMA  
MISCELLANEA.

EPISTOLA I. *Louanium.*  
CORNELIO VALERIO S.D.



ITAE genus, quod à reditu elegeram & indicaui præfens tibi mi Valeri, & probaui: quietum istud, modestum, latens, remotum ab ambitu & à curis. Et iam ingressus serior eram: cùm (ecce subitam vim fati) vereor vt subito id mutem. Nam tempora quæ impendeant, vides; & quæ tela improvisò exorsa ciuiliū bellorum. quæ si pertexitur, & nisi stamen eius ac subtemen pax aliqua abruptat, stare mihi diutiùs non licitum in hoc loco. Quomodo enim? exposito cottidie non rapinis solùm militum, sed iniuriis: quorum quàm libera licentia sit, nosti. Heu vitæ legem! cui annexum, angi & dolere in omni sorte. Itaque agellos istos mente iam defero, & specto Grudios vestros. non planè inuitus, fateor, cùm te cogito & Canterum nostrum: quem tamen audio & doleo in lento esse morbo. Quid autem tabes ea est & marcor? an quis alius languor? De illâ, visus mihi dicere medicus Gemma. quod Musq̃ tamen prohibeant, & diurnare paullo magis in terris velint Parnassium hunc alumnum. Sed causâ morbi quæ? studia, an curæ?

\* Τίναται γάρ τοι καὶ νόσους διανομαίαι:

ait Tragicus. De studiis tamen magis credo: quæ calidè ille nimis habuit & intentè. Numquam vidi tam indefessum ingenium, & laboris huius Musici aut appetens magis, aut ferens. Semper ille in libris, chartis; noctu, diu; assiduus, accubus:

A

nec

\* Morbos enim producere & curare solent.

\* Epist. v.  
lib. III.

nec dies solum omnes appensi & numerati ad hanc curam, sed horę. quas singulas ad clepsydram diuidere, & attribuere ille solitus huic lecti oni, aut huic scriptioni. De Plinio suo scribit & iactat alter \* Plinius? atqui torpor ille hominis & desidia mera, si cum hac assiduitate comparatur. Nos, mi Valeri, remissiores: & si per hanc viam mors, sum immortalis. Vis scire, quā ignauiter cessem? Tot protela adinonitionum tuarum nondum effecere, vt vel manum admouerem Commentario Corneliano. ita subiit me ignauia huius dulcedo: &, quod ille ipse Cornelius ait; *inuisam primò desidiam, cœpi amare*. Mutabo fortasse, cum loco. Tuus certè non sermo solum excitabit me, sed vultus. quem iure vereor & veneror, ductorem doctoremque meum in meliore hoc animi cultu. Vale. In Iscano meo. a. d. XII. Kal. Decemb. ∞. IO. LXXV.

## EPISTOLA II.

*Brugas.*

VICTORI GISELINO S. D.

**R**ARAS à te litteras, mi Victor, accipio: sed certè caras, stillantes mero melle & amore. Vellem vtrumque. vt & diligentiam tuam amare possem, & adfectum. At principium tuum vanum, de habitu meo Coloniam. Vnde hoc autem? ab amico aliquo, an à famâ? non enim à me certè, aut meis litteris: nec vniquam mihi fuit in mentem. Apage illud scelus (ita loquor) vt pedem hac prouinciâ efferam, non visis vobis. Et sanè paullum modò hic morbus perseuerasset, veniebam ad te non solum corporis, sed animi medicum mei. Nunc, cum deo fauente, reualui: & gallum debeo Æsculapio tuo. O diecula illa, quam vnà mecum exoptas, quando exoriere? quando te & Lernetium, in Iscano isto, complectar & fruar? quando in pergulâ illâ ad Lunæ lumen garriemus, viuemus, imò & bibemus? DI amicitia præfides, repræsentate mihi hoc votum. Festino enim. quia vt cogi nubes has video, breui dabunt tempestatem. Circa nos militares globi: qui vereor non vt interpellent, sed pellant. O locum hunc beatum, absque metu isto sit! A Samboco herè ad me litteræ, sanequā amicæ. Humanissimum virum coram repperi, non pro opinione meâ (tecum hoc sit) litteratum. Ita in his quoque rebus, ludit & illudit illud siue Fatum publicū siue

For-



Fortuna: & quidam merentur famam, quidam habent. Inter illos, in eâdem Germaniâ Andream Ellingerum noui, deus bone, virum magnum & penitus doctum! at ille pænè ignotus latebat & fallebat inter suos. Ita fatua sæpe huius æui iudicia, aut iniqua. Et nos quid speremus, aut laboremus? dormiamus potius, aut cucurbitas pingamus. quorum alterum ego quidè iam facio. Scripsi enim hæc ipsa ad lychnum, labente manu, prementem somno. In Iscano meo. III. Non. Octob. ∞. IO. LXXVI.

## EPISTOLA III.

Lugdunum Bat.

IANO DOVSAE *amicissimam salutem mitto.*

**E**CQUID tinnunt tibi aures, mi Doufa? ita multus non in sermonibus meis solum es, sed in litteris ad amicos. Vel nunc cum Rogerio nostro, quàm multa, quàm suavis, de te fabulatio! Adest enim mihi, ne nescias, hoc ipso tempore, & quidem in mensâ. Ita dico, in mensâ & in eâ mihi hæc scripta. Abituriebat enim ille. nec fas certè sine meâ manu: pænè scripseram animo, què ille, à me exsulem, auferet ad te secû. Non sum ex iis qui

*Composita dicta pectore euoluunt suo;**Quæ cum componas, dicta factis discrepant:*

ut ait Attius. audi, Doufa, veram vocem: mens omnis & adfectus apud te est, ex quo legi suauissimos & felicissimos Genij tuos versus. O te magnum, & mei stomachi vatem! Non Musæ ipsæ Lipsium magis ament, quàm ille te. Itaque non vltrò fero desiderium. &, nisi res nostræ turbidè porrò turbauerint, cis paucos dies excurram: & vsurpabo istis oculis, quem nunc animo, auribus, linguâ. De Gisellino nostro & Lernutio, omnia recta. nisi hoc tamen, quòd vterque nuper in vincla coniectus (percutio te? pone metum.) nuptiarum. Etiam ego in hoc carcere. si vir es, veni, & lunones nostras vide. Salue mellitissime. Louanij, Nonis Aprilibus ∞. IO. LXXVII.

## EPISTOLA IV.

Vbios.

GERARTO FALKENBURGIO S. D.

**M**VNVS vestrum accepi egregium, mi Falkenburgij, in id regium. Et cur non vestrum? ego scio Redigerum caput

huic dono fuisse, te pedem: nec tam beniuolo conciliatori minus debere me, quàm datori. Animus enim est, quem in his talibus specto: nec pretium iis vñquam à se facio, sed ab adfectu. qui in te certè maior. Aurum autem ipsum, quid nisi splendens quædam terra, & nitidius paullò lutum? Iudicium tuum de libellis nostris mihi gratum: sed vtinam iudicium! siue tamen amor, is quoque gratus, quia magnus: nec aliter vñquam tam rectam certamque mentem cogeret in errorem. De lapsu memoriæ quod submones, verum est: corrigam libens. Quod autem his & ad Pulmannum litteris iteras & pungis de seruitute: audi quæso liberè & diffusius paullò meum sensum. Ego qui status patriæ huius sit, nec ignoro mi Falkenburgi, nec nego: (aspera in eo multa, intenta, rigida, præter mores, aut præter leges:) sed hoc quoque scio, qui meus. Apud me ecce, & in rusculo meo viuo: cur angar, quid Cotta aliquis aut Carus moliantur in aulâ? Vim aliis inferunt? nondum mihi. opes delibant aut diripiunt? pereunt eadem absenti. ad impium aliquid adigunt? numquam. Mentem enim istam liberam quis tyrannus mihi artat? internam sententiam quis cogit? cultum metumque diuinum è pectore isto quis eripit? Et si velint: ecce sacram ancoram,

\**Quis feruus est, perire modo qui non timet?*

\**Τίς ἐστὶ δῆλος τῷ θανάτῳ ἀφροντίζει ὧν?*

Hoc enim firmum aduersus externa omnia telum, non timere propter quod timentur. Sic Socrates adfectus, qui Athenas non deseruit, in seffas non vno, sed triginta tyrannis: sic Seneca, qui sub Nerone, imò cum Nerone vixit: sic Heluidius, sic Thraseas, & magna illa sapientum manus. Me cur in alia vocas? Animo diffidis, aut annis? noli. Ego enim mi Falkenburgi in iuuenili hoc pectore sic sum adfectus, vt deum, virtutem, & me constanter colam: non aduler imperantibus, sed nec irrîtem: & cum Corneliano illo \*lepidò, *inter abruptam contumaciam & deforme obsequium, pergam iter ambitione ac periculis vacuum.* Periculis inquam, quorum non ego (homini quantum licet) occasio sim aut causa. Quod si aliunde & ab externâ vi ingruant, quomodo aut vbi excludam? Non Vbij vestri ab iis me liberèt, non liberet omnes Imperij vrbes. Sed reuerâ (dicendum est) peccamus multi in hanc partem. prouocamus pericula, & lacessimus sepe imperantes, vanâ quadam specie aut superbæ libertatis, aut incautæ pietatis.

\**De cuius causâ prudetia apud Tacitum, Annal. i. v.*



tatis. Modestia autem est quæ Deo placita, & his qui dii in terris. Reges ut fulmina esse didici: dura frangere, mollibus plerumque illasis. Itaque hæc tempora, ut nimbum, habeo: donec defæuierint, larito & me tego. Nec nimium tamen de sæuitiâ illorum queror: quia scio exoriri posse deteriora. Rusticulus ille mihi in mente. qui de Antigono rege viuo questus, cum obiisset successore peiore: terram laboriosè inuertens, & votorum iam pœnitens, *Antigonum*, inquit, *refodio*. Faxit & ille deus, ut hîc turbæ nostræ stent, neu breui procellæ ingruant sæuiiores. Sed hæc magis seria fortasse, quàm pro epistolâ. occasio tamen iis ex iteratâ tuâ accusatiunculâ: & gaudebo, si consilij mei ratio proba iam apud te probû. Talem enim non minùs repperi, quàm amicum mihi: qui ut esse perseveres, rogo. Ad Redigerum ipsum scripsi seorsum. In Ilcano meo, Kal. Sextilibus. Anno ∞. IO. LXXV.

## EPISTOLA V.

*Viemam.*

STEPHANO PIGHIO.

**F**IDEM meas culpas? audi. Prandium mihi hodie apud herocem nostrum (nō enim virum dixerim) Busbequium. post prandium longiusculæ etiam fabulæ: sed de litteris, ut apud illum solet. Hæc res diem mihi abstulit, & me tibi. Ignosce, & iam etiam cognosce. Nam de Prætorum lictoribus, lictulæ nescio quid adfero ad te nostrum Prætorem. Vulgus & auctoritas veterum sex eos facit. loca & testes tibi noti. At duos fuisse tantum, lex vetus mihi ingerit, apud Censorinum ista. *Prætor urbanus qui nunc est, qui que posthac fuerit, duos lictores apud se habeto. usque supremam ius inter ciues dicito*. Cauillari poteram & effugere, tamquam minimum duos lictores lex esse veller; de pluribus non vetaret. sed ligauit iterum meus Plautus: apud quem in Epidico clarus ab hac re iocus,

*At enim vnum à Prætura tua Epidice abest. EP. quidnam? TH scies.*

*Lictores duo, duo viminei fasces virgarum.*

Inter ornamenta ecce Prætoria discerni duos lictores numerat, duosq; fasces. Hac reprehensione, huc ibam: ut censerem Plauti & veteri illo æuo haud plus duos sanè fuisse, at numerum postea auxisse, splendoris maioris causâ. Sed hoc quoque diuerticulum

interclufit mihi importunè tuus Valerius: in quo lib. i. cap. i. lego de Furio Bibaculo: *Prator sex licitoribus precedentibus arma ancilia tulit.* quod factum notæ tuæ Chronicę referunt in annum vrbis DXVI: id eft, ante adultum Plautinum æuum. An Pratori urbano & peregrino fi fortè bini tantum: aliis extra vrbeim, & ad auctoritatem apud fubditos, plures? Iuua, iuua: angor ego & refifto. Præmium tibi opere, cænula cras apud me in diuerforio noto. fed eâ lege, vt ambulatiuncula præcedat ad filuulam noftram Querquetulanam. Salue à tuo Lipfio, & dormi. Viennæ, Idibus Iuniis. ∞. ID. LXXII.

## EPISTOLA VI.

In Pictones.

IOSEPHO SCALIGERO IULI F.

S. &amp; amorem nuntio:

**Q**UOI verè erga te magnus. Nam iam antea, mi Scaliger, cum veneratione quadam amabam te paternæ & tuę virtutis cauſâ: nunc magis, cum te quoque video conſpirare mecum in hoc adfectu. Nam, quâ de me erant, litteras tuas Plantinus mihi legit: & amicas valdè, & honeſtas. Atque in amore quidem tuo, gaudeo: in iudicio, triumpho. quia (verè, & ex animo) fi quiſquam eſt proborum cui probare me meaquę velim: iſtu es, inter probiſſimos primus. Nam hunc vulgum, morus ego ſi morer. Epistolicas his diebus emiſi: rude opus, nec iſtarum aurium. Vide tamen: & agnoſce nos in litteris multa velle, te poſſe. De Plauto quod item ad Plantinum: apage. egone ante te? Iamdiu librari hoc onus, cui impar iſta ceruix. Tu hic vnus Hercules ſiue Atlas nobis, & fulcire debes comicum iſtud cælum. De Nonio etiam cogitare te audimus. verone & feriò? item de Manilio. ſed litteræ tuæ nihil tale nunciabant. Credimus tamen: quia hæc omnia per iocum & ludum te poſſe ſcimus, in quib; alij ſudant. Aquila in nubibus, quod Græci dicunt, verè tu es: vides, imò peruides omnia; & quidquid venaris, capis. Sed deſino huiuſmodi ſermonum: quia reuera

\* Lette donum, ſapiēti pro multis laboribus dicere laudes.

\* Κῆρα δόσις ἀνδρὶ σοφῷ

Ἀντὶ μόχθων παυροδαιμόνων ἔπος εἰπῶν ἀγαθόν.

Tu ſalue, & me ama, qui te æternum. Louanij, a. d. vi. Kalendarum Decembrium, CLO. ID. LXXVI.

EPI-

EPISTOLA VII. *Lutetiam.*

PETRO PYTHOEO IC. S. D.

**P**LANTINO nostro elapso ex Troiano casu, id est incendio suæ urbis, & ad vos abeunte : iure mihi amplectenda occasio fuit, mi Pythæe, compellandi tui. quem iamdiu (verè tibi, & in os dicam) inter paucos Gallos amo & admiror. Ignotum, fateor : sed à vultu, non ab animo. quem politissimum exosculatus sum sæpe in tuis scriptis. Nec blanditiæ apud te sunt. testantur id publicè Epistolice meæ, per hunc tumultum ausæ adspicere lucem : in quibus, si erit tanti, reperies cum beniuolentiâ memoriam tui. Te pariter quæso, vti hunc eundem affectum erga me aut sumas, aut retineas : & , vt planè pleneque me bees, mutuis eum litteris foueas atque alas. Litteris, non rerum grauium, aut de arcanis regum (quid ad me ista?) sed quæ alucinantur liberè & vagè per studia nostra : quid tu, quid Scaliger, quid alij vestri Galli meditentur, eiusdem nobiscum Musæ. Vale, & me ama. quod valdè facturum te scio, si scias quàm valdè ego te. Fratri tuo Francisco, lectissimi ingenij iuueni, à me salutem dicito. Louanij, xvi. Kal. Febr. ∞. IO. LXXVII.

EPISTOLA VIII. *Bruxellam.*

GVILIELMO BREVGELIO REGIO CONSILIARIO  
*cognato meo* S. D.

**M**AGNUM, sed amicum mihi dissidium tecum est, de agro deque vrbe. Tu istam præfers, ego illum : & rationes mihi, nisi fallor, magis firmæ. Quas quoniam herè inter differendum leuiter libauimus, vísne hac epistolâ (otium enim & libentia mihi) promam accuratiùs & diducam tibi per partes? Scio velle. aurium tantum, vt sic dicam, vacuas ædes mihi aperi : & admitte, sodes, peregrinantē veritatem. Agrum & in eo cultum, meliorem Vrbe esse aio, ad Sapientiam, ad Mores, ad Voluptatem : addo & Fructum. De Sapientiâ : non negabis, quin illi aptior ad eam animus, vbi is liberior & magis sui iuris. talis autem in agris est. Opida vife & adi : non effugies, quin vnà tumultus,



multus, procellas, turbas. Circumstrepent enim te subito res hominesque: & negotium tibi non solum tua negotia facient, sed aliena. Ut difficile est in conuiuio lauto & opiparo solum esse siccum & sobrium: sic vacuum, inter tot occupatos. Ille ad spon- sionem te trahet, & ad forum: ad nuptias alius, & ad tem- plum. In ipsâ viâ, clamores alibi & lites: pugna nonnullibi & arma, & mox iudex, liCTOR, carcer. Domum ipsam tuam cum veneris: ne in secretum venisse te cense, aut penetrale. Irrumpent ecce salutatores, inuisores, & nomine amicorum quidam fabu- las, inopè epulas, captantes. Hos nullum lumen submouet, nullum velum: & per omnes rimas inuolant importunæ illę muscæ. In- ter ista & inter istos, quis libris liber locus? quis cogitationibus? sine quibus an vlla legitima ad Sapientiam exercitio aut via sit, haud equidem cerno. Et tamen, fac te felicem, aut fortem: otium aliquod in ipsâ vrbe diu luctatus tibi vindices: nego id liberum, firmum, aut aptum animo vegetando. Spernit enim naturâ suâ includi cælestis ille ignis, & aërem amat ac campos. Ut genero- sas feras cauea domat & frangit: sic altas mentes vrbicus ille car- cer. Equum ad cursum apertus & liber circus prouocat: animum ad studia, vagans vacansque aura. Siluam illam viridem videt? hîc carmen auet, aut hymnum deo pangere. Horti illam purpu- ram? hîc cum libellis suis decumbere. Aquæ illud murmur? ad eam altiori cogitatione abiici. Et nocte ipsâ aut sub eam, pictum illud patensque cælum eum capiet: & inter tot stellas errantes, aut inerrantes, à curis terrisque erro, mente scandet super illas. Adde quod hîc altum securumque otium: nemo qui appeller, aut interpellet: & amicissima semper studiis, solitudo & quies. Vides igitur quæ in hac parte ager ante urbem habeat: nec vanè à Columellâ scriptum, *Vitam rusticam proximam & quasi consan- guineam sapientiæ esse.* Quod si nunc ad Vitâ me vocas & ad Mo- res: bonâ fide, vtrubi, te quoque iudice, illa innocentior, & hi puriores? veritas tibi exprimet quod in agris. Oculos paullisper coniiice in magna illa & commerciis crebra opida: mentior, nisi ambigas cœtus illîc hominum, an confluges vitiorum. Adfert enim seorsum quisque suas culpas: quas mixti vulgant, & velut contagio, tradunt inuicem capiuntque morbos animorum. Quin ut flumina per se dulcia, cum in mare venerint, flescunt: sic ho- mines

mines haud mali, ex agris in urbem redacti, tactu inquinantur & mixtione. Illic enim ambitio, avaritia, libido propriè habitant: & fons omnium vitiorum, depudere. cui origo, non negabis, ex crebro illo inter se adspectu occursumque. Itaque prudentes olim legistatores & qui semina iecere boni status, ciues suos plurimum ab urbe & conuentibus abductos, habere voluerunt in agris: quos ad probitatem, modestiam, robur, gymnasium censuere & palæstram. Romulus ille æterni auctor imperij, in duas classes cum ciuem diuisisset, Seruos ac Liberos: istis duo tantum studia Militiæ & Agri dedit; illis artes reliquas, quæ ad Mercurium & ad lucrum. Ita enim est. mercatura & quidquid artium ad opes ducit, ducit ad vitia: nec animum solum emollit & effæminat (verè Sallustio dictum) sed corpus. Quis vires & viros unquam in opidis quæsiuit, aut inuenit? adeò vetus illud verum in omni gente & quo est, *Optimum militem legi ex agris*. Parthi olim belli potentes: sed sparsi in agris. Scythæ: sed in tuguriis oberrantes. Germani: sed priusquam urbes coluissent. Turcæ hodie: sed minimùm dediti in amœnitatibus opidorum. Quin illud ipsum Genitiferorum agmen, iure terror orbis, non ex agris solum, sed pænè dicam haris collectum, & mapalibus pastorum. Nam Romanos tibi quid ingeram? Curios & Fabricios nosti ferentes, occantes: Quinctios arantes, & Dictatorem induentes: & vno verbo, non milites solum ab agris, sed duces. De Moribus ergo vides. qui si vsquam etiam hodie prisca integriusque quærendi sint, vestigia reperies in agris. vbi apud se quisque: & ideò pudor, innocentia, simplicitas manet, & vita malarum fraudium artiumque expers. Sed quid possim in hac parte magis verè, magis ampliter dicere, quàm Hippolytus ille apud Senecam? quem, quæso te, audi.

*Non alia magis est libera & vitio carens  
Ritùsque melius vita quæ prisca colat,  
Quàm quæ relictis mœnibus campos amat.  
Non illum auara mentis inflammat furor,  
Non aura populi, & vulgus infidum bonis,  
Non pestilens inuidia, non fragilis fauor,  
Non ille regno seruit, aut regno imminet,  
Spei metusque liber.*

B

&amp; adde

& adde plura pulcherrimi cothurni, quæ omitto. Ad Voluptatem enim transeo: quæ tamen hîc tam obuia, vt indigner super ea moueri mihi litem. Elementa omnia intueor? vim suam vsuque palàm & toto, vt ita loquar, sinu in hoc rure nostro effundunt: obscurè & parciter in tuâ vrbe. Solem vide: melius hîc nitet. Aërem: lætius latiusque diffunditur & ridet. Aquas: purius bibuntur. Terram: hîc tantum cernitur in vero suo vultu. Alibi in planitiem effusè porrigitur: alibi in collem placidè adfurgit, aut magis rigidè in montem. Illîc herbis & sponte natis arbutis vestitur: hîc, fruge fructibusque, & feliciore ligno. Quem non delectet tam varius adspæctus & cultus magnæ matris? cuius apud vos vna facies ædibus pressæ aut pauimētis. Iam domum si venisti, hîc prorsus gaudiorum & amœnitatis vera sedes. Manè surrexisti? ad musicam quidem & circumsonant te ac velut salutant chori illi alitum, suauiter fritillantium, trutillantium, minurientium. ad quos non æquiparent se tibiæ, citharæ, aut ex arte vlli cātus. In hortum prospexisti? oculorum aciem tibi præstringet illa ipsâ nocte exortum agmen florum & herbarum. In pratum? occurrent Vere nouo arbores odorâ quadam & canâ niue perspersæ: eædemque sub Autumnum, aliâ pomorum purpurâ siue cerâ distinctæ. Propius easdem adspice. insitiones mirabere & matrimonia: adulteria etiam, & suppositos fætus, insciâ matre nec inuitâ. Quam lasciuam cōprehensionem fæcunditatemque quisquis in ligno non miratur; ipse profectò lignum. Iam ad agros diuertisti & tua rura? illîc boues lentè pascuntur & oberrant; hîc pecudes magis vagè lasciuunt & hœdi. Porcus alibi volutatur & grunnit: alibi cristata cohors cugurrit & scalpit. Segetes illîc tuas vides, & filiginis, farris, hordei vberes fasces: siluam istîc, & ad hiemem lignorum strues. Vitæ denique alibi florentem aut maturescentem: & spe iam præbibis sacrum illum alibilemque liquorem. Quorum omnium quæ copia in vrbe sit? quin ne imago quidem satis certa & expressa. Sed vt ij qui parietem intuentur, ex leui linearum ductu, animalia in eo & facies sibi fingunt: sic vos harum rerum futiles quasdam umbras. Ita viuitis in pulcherrimo hoc mundo, mundi exsules: nec bona aut dona eius plenè vmquam nostis. Postremum Fructus mihi superest. de quo quid ambigimus? cùm non solum cultus



cultus & ornatus plerisque vitæ ab agris sit, sed vita ipsa. Agricoltio enim moriatur: & vnà humanum genus. Adde illa com-  
moda. agnum aut hædum à stabulo, pullum è corte, porcū ab  
harâ, & tot dapes inemptas: quas vos ægrè & carè præstinas  
à foro aut macello. Quòd si opes omnino quæris & aurum: ri-  
deo ego & sperno. & tamen si quis hæc quoque ambiat, non ali-  
bi parandorum vberior materia & seges. Non palatia, non fora,  
non fœnora plures ad opes euexere: quàm beati isti agri. & addo  
rei caput, quòd tutò euexere: quòd citò, quòd innocenter. Tha-  
les ille olim anno vno diuitias amplas corrogare potuit, emptu  
prospero omnium oliuarum: & viro prouido sapientique non  
hodie idem fas, in segete, pecude, siluà? Sed de his quia non li-  
benter, nec ampliter quidem dissero: & mitto te, si voles, ad ve-  
teres rei rusticæ scriptores, à quibus disciplinam eam petas. Nam  
ego fastidio. sicut & illud, quod crebrò ac pertinaciter mihi ob-  
iicit de dignitate. Dignitatem ea mansio non habet, inquis: imò  
nec pietatem, quia patriam is desertum. Dignitatem? me iudice,  
amplam: qui Reges & Principes fuisse scio in hac parte. An illud  
dignius, in foro latrare, tribunal siue aulam lambere, fastum in  
æquales, adulationem in superiores exercere: quàm Sapientiæ  
sacrum colere, Naturæ opes lustrare & promere, denique placidè  
vivere, placidè mori? Nam de patriâ, quid ais? In hac confusio-  
ne rerum ad clauum ego sedeam: vbi nemo auditurus, non ne-  
mo etiam irrisurus rectè gubernantem sit? Sæculum hoc paulli-  
per vide. quo noxæ integritas, contumeliæ pudor, ludibrio fi-  
des est: & aude suadere vt iis præsim, quibus, hoc ipsum (pænè  
dicâ) ægrè mihi est, quòd intersim. Concludens voueo, vt pro-  
cul ab vndoso illo vrbium mari, in hoc tràquillo & rurestri por-  
tu quiescam & consenescam: vbi Deum inprimis piè pureque  
venerer, deinde Sapientiæ studia & Musarum tractem, & quid-  
quid propriè ad vsum aut cultum animorum. Vbi classica nul-  
la aut tubas audiam, vbi coruos aulae aut fori non videam: sed  
modestè tranquilleque mihi & mecum victitem, experts ambi-  
tionis & pallentium curarum. Cumque vltimus ille & decreto-  
rius dies venerit, spiritum hunc, sine metu, sine motu, emittam:  
& apud notos ignotosque memoriam mei relinquam bonam  
potius, quàm magnam. Habes quæ pro agro, in agro scripsi. quæ

si approbas, tandem etiam hoc institutum meum: neu vltra  
commouendum me cense ex beatâ istâ fede. Ita Deus beatum  
aliquando te faciat, cum vxore liberisque: quos saluto. In Ifcano  
meo III. Kal. Octob. ∞. ID. LXXV.

Carmen ecce etiam adiunxi, quod eidem argumento, calore  
isto effudi.

LAVS ET VOTVM VITAE BEATAE.

**I**LLÉ est par superis deis,  
Et mortalibus altior,  
Qui fati ambiguum diem,  
Non optat levis, aut timet.

Quem non ambitio impotens,

Non spes sollicitat lucri:

Quem non concutiunt metu

Regum præcipites minæ,

Non telum implacidi Jovis.

Uno sed stabilis loco,

Vulgi ridet inania:

Securoque oritur dies,

Securo cadit & dies.

Vitam si liceat mihi

Formare arbitriis meis:

Non fasces cupiam aut opes,

Non clarus niveis equis

Captiua agmina traxerim:

In solis habitem locis,

Hortos possideam atque agros,

Illic ad strepitus aque

Musarum studiis fruam.

Sic cum fata mihi ultima

Pernèrit Lachesis mea;

Non ulli grauis aut malus,

Qualis Langius hic meus,

Tranquillus moriar senex.

## EPISTOLA IX.

VICTORI GISELINO.

**L**EGI tuas, ad os appressi & ad pectus. O quæ penna tibi mensistat! Ego ille constans deiicior vnâ cogitationis hac plagâ. Scripta mea desideras & nugas: ego te, te. Sed quî agis? vt ex nuncio intelligo, perbellè. Gaudeo. nam timebam, ob substractum tibicinem Moufflinum celeri casu. Nos fluctuamus, vt qui maximè. sunt qui ad arma inclinant, sunt qui ad Irenen. Aiunt & apud vos puncta esse pro istâ. Quidquid est aut erit, ego te non amo sed pereo. De scriptis, scripsi ad Ocellum nostrum. non inuidebit. Propriid. Kal. Septemb.

## EPISTOLA X.

IANO LERNVTIO S. D.

**H**AFTIVS apud nos est, ille cuius tu sororem. Eum rogavi de te multa, & rettulit omnia quæ vellem, excepto silentio: quod causam habeat necesse est vel ab obliuione nostri, vel quod malo, ab inertia tuâ. Et quis insolitus hic torpor? Tu ille qui laceßere me soles, taces ad meas binas? *Omnia mutantur*, ait ille: non enim addam vel ominis causâ, mutari amores. melius de te sentio. & tamen si amorem non deseris, non etiam debes officia amoris. An etiam nunc te angit nupera mea fuga? Peccas: & emenda hanc culpam, vt in amicitia sis sine mendâ. Amicum nostrum audio adscitû in aulam, & in medicum Ducis. Gratulor: & magis, siquid is titulus ad Plautinam aulam. Nam si nomen tantum, & nihil ab eo vncti: sperno. Nos hîc in alto otio (Nemesis non audiat:) & te istuc inuitare audemus vel habitandi causâ. Multi certè vestrates oculos flectunt ad hunc portum. Plantinus ædes hîc habet, Typographiam instituit. Quid multa? viuimus & vigemus. Tu vicissim, quid valeas, quid facias, cum Victore, cum vxore, cum amicis, nisi significas: scito serio me. sed deleo. nec cadat in amorem nostrum vquam hoc verbum. Vale, Lugduni Batauor. Pridie Idus Sept.

∞. IO. LXXXII.



## EPISTOLA XI.

IANO GVLIELMIO LVBECENSI S. D.

**A**D FIRMO tibi Iane Gulielmi : pauca munera iamdiu gratiora mihi fuisse, & animo tuo, & versibus, quorū vtrumque tam benignè offers. Ille enim amoris plenissimus, isti elegantia : & cogor ( nisi ab ingenio meo abeam ) valde redamare illum, istos æstimare. Hoc magis, quod vltro prouocas, quod ignotum, quod immerentem. Nam quod beneficia quædam mea in publicum profers & prætexis : desine. hoc ipso video quàm me ames, qui non admodum laudanda laudes, & per adfectum recedis à certissimâ iudicij tui normâ. Itaque hoc ex fide tibi respondeo. vicissim amari te à me, vero honestoque adfectu : quem dies ipsa augebit & accendet. ea est eritque tua virtus. Lugduni Batau. III. Eidus Sextil. ∞. ID. LXXX.

EPISTOLA XII. *Gandam.*

ALEXANDRO RATLONI S. D.

**R**ARÒ scribis. sed nescio an ideò litteræ tuæ desiderio ipso cariores. His quidem postremis fateor me non voluptate solum perfusum, sed gaudio : si verbo eo vti nobis fas in tristitiâ hac rerum. Nam de Antuerpiâ, quæ monstra audimus ? Deus bone, huccine tandem erupisse tot mensium consilia malè sana, malè cocta ! O factum à regio iuvene minimè regium ! Ersi nobis adhuc tenebræ, nec de re totâ satis certis nec de causâ. Eiusne fraus siue error ? an vulgi consternatio & furor ? Quiduis enim potius, quàm vt perfidiæ noua hæc macula inuratur laudatissimæ olim optimæque genti. Sed hæc publica videbit publicus ille Rector. Tu in re tuâ quid ? etiâ ne fluctuas ? sic appâret. atqui statuendum semel aliquid est, cui firmiter inhere scas. Mutatio quidem hæc crebra, & desultorium, vt sic dicam, genus vitæ, non ex vsu tuo, non ex famâ. Pessimæ, & Græcorum quoque prouerbio damnatæ sunt, nutantes & \* *δισταλὰι* illæ *γνώμαι*. Litteraria hæc vita & otiosa tranquillitas, quid non habet commodi ? Non externa illa fortasse. sed nec terra quæ aurum aut argentum gignit, res alias producit : nec animus, qui se colit, & virtu-

\* Vroque  
claudican-  
tes senten-  
tiæ.

virtutem. Cetera, ille ferè sterilis. Quid tamen præferas huic vni? cui honos, cui salus comes, cui externa & interna quies. Militiam gustasti: & vides quàm non ea suaui. Itaque, mi Ratlo, huc redi: &, si me audis, in Musæo hoc portu nauim tuam defige & liga semel sacro morfu. Ad circumfusa illa & vana bona si abis, quis finis? iactabere, & natabis semper inter cupidinum no- uos fluctus. Non enim ratio, sed opinio tibi illas ingeret: cui in- sitū, variare & pænitere. Vt chamæleon, quoniam aurâ (vt aiunt) non cibo vescitur, hianti semper est ore: sic illi cupidine, quos ventus inflauit vulgarium opinionum. Hoc volunt, hoc nolunt: hoc hodie spernunt, cras appetunt. &, vt resculæ, quæ fluminibus innatant, temerè impinguntur in hanc illâ inue partem. Hinc perpes illud tædium in nobis, & velut nausea omnium rerum. damnamus parentum & nostra vota; & tam cupidè quæsitâ quædam deserimus, quàm antè quærebamus.

*Certa amittimus, incerta appetimus, atque hoc euenit  
In labore atque in dolore vt mors obrepât interim.*

exclamat verè meus vates. Ecce ille ad aulam adspirat, & intra- uit? rursus fastidit, & beatos censet qui latent. Alius priuatim victitat? ægrescit, & inuidet purpuratis. parique leuitate togati ad sagum properant, & hi rursus ad togam. Et quis non de La- chesi suâ quæritur? reges ipsi de suo regno. At tu inter eos esto, quos Ratio, quos Sapientia firmavit: nec circumagere mihi vul- garium iudiciorum omni vento. Vt Vlysses ille donec Leuco- thea velum ei supposuit, natat nigrum pôtum: sic tu hoc vitæ sa- lum, donec pectus tibi præcinxerit candida illa diua. Constan- tiam dico. quam, audi, admitte, serua.

\* Η δὲ ἐμοὶ καὶ θυμὸν ἀρίστη φάινετο βελή.

Vale. Lugduni Batauor. x. Kal. Octob. ∞. ID. LXXXIII.

\* Hoc mihi  
ex animo  
visum op-  
timum  
consilium.

## EPISTOLA XIII. *Brugas.*

IANO LERNVTIO *meo salutem mitto.*

**Q**VAM recepi iam ipse. Hinc enim iure ordior: & gaudere te iubeo, mi Lernuti, quia à molestissimo morbo reualui, imò reuixi. Ad fauces Orci destitutus mihi hos menses fuisse vi- deor: ita me oppressiunculæ & obstructiunculæ illæ internæ pes- simis

simis adfecerant modis. Et audésne credere? non leue momentum ad valetudinem meam habuerunt & litteræ tuæ, & carmen: illæ amicissimæ, hoc scitissimum. nec fuerit vmquam vt tam pias, tam disertas preces non audiuerit illa Dea, cuius sedem aptè in Fortunatis insulis ponis. Quæ autem illa tam auida Parca, quæ vincla inter nos abrumperè non parcat sanctissimi amoris? Quin audi me, & securus animi es:

*Dí me tuentur, dí pietas mea*

*Cura est:*

& porro, vt spero, erit. Turbæ apud nos ingrauescunt, abiectâ spe pacis. quæ vereor, vereor autem? imò spero, vt breui eiiciant me ad vos. procul enim futuri videmini ab hoc belli nimbo: qui imminet prorsum capitibus nostris. Sed quid ais? Doufâne nuper apud vos? nec ad me? ô factum ab amico non amicû! Quod dixerit, subita res fuit, necessarius reditus: nihil audio. nuncia illi à me sodes, sexcentis versibus non luet hanc culpam. In Statium aliquid meditari te suadet mihi noster Modius. vix persuadet. cur enim celes? & quidem cum tuo damno. Nam & mihi notata quædam ad sublimem illum & celsum poëtam (ita censeo & appello, non herclè tumidum) & libri apud nos veteres, qui te iuuent. Innue, mittam. Epistolicæ nostræ nondum emissæ. sed vix eas teneo: ita ituriunt. De quibus quid iudicaturi sitis, timeo. Alia enim quædã à prioribus meis hæc scriptio. cui nitor ille abest, & luxuria, & Tulliani cincinni: pressa ubique, nec scio an quæsitâ nimis breuitas. Quæ me tamen nunc capit. Timanthem pictorem celebrant, quòd in eius operibus plus semper aliquid intelligeretur, quàm pingeretur: velim in meâ scriptione. Magni Scaligeri ad Amorum illos \* Triumuiros vidi, legi, probaui. In Propertio tamen traiectiones illas veruum crebras, mirari malim quàm imitari. Tu quoque non ita sentis? scio. sed quis Polydamas aufit illum Hectorem? qui dís hominibusq; fauentibus tenet profectò, & tenebit hoc regnum. Itali eum quí deiiciant? silent. nec iam à multo tempore quidquam ab eâ gente litteratum. excipio Quæsitâ Aldi per epistolam, & Fuluij de Nummis. Muretus noster Orationes pangit & edit, & dat se in floridum illú eloquentiæ campum. ad famam consultè, imò & ad quietem. Nam Criticæ istæ tricè quàm non late

\* Notae eius ad Ca- tullum, Ti- bulli, Pro- pertium.



latè se spargunt ! quàm laboriosè colliguntur, & scribuntur ! In quibus nos tamen etiam, nescio quo fato an morbo, insanimus. Pergebam in hoc garritu. sed alius mihi in auribus garritus, nuncij ad excubias trahentis. Arma capio, pono stilum. Quid ais ? satin' tuti Belgæ, hoc milite ? Ite, dormite in vtramque aurem. Louanij Idibus Iuniis. ∞. IO. LXXVII.

EPISTOLA XIV. *Louanium.*

MARTINO ANTONIO DELRIO  
*Consiliario Regio S. D.*

**M**IRA tua fides in me, mira pietas. amoris enim certè verbum leue est, in re quam rari pro fratre fratres audeant, pro liberis parentes. Me meaque absentis defendisti : & obiecisti te non molestiis solùm sed periculis, in hac flammâ rerum. Venisti vtrò ad meos, erexisti, securos esse iussisti : hoc tantùm questus, quòd non indicassent. Itaque quòd res opesq; meæ saluæ, quòd scripta & libelli (id est, vita ipsa:) beneficium est vnus tuum. Quid scribam? gratias agere me? ne concipio quidem: & affecisti me in summo beneficio vnâ hac iniuriâ, (quod olim ingeniosè ille ad Cæsarem) vt viuendum & moriendû mihi sit ingrato. Gaudere me tantùm nuncio, meâ causâ, tuâ, sæculi. Meâ, cui is amicus obtigit; tuâ, cui ea virtus; sæculi, cui hoc exēplum. Mea salus salue. Antuerpię a. d. iv. Non. Mart. clo. IO. LXXVIII.

EPISTOLA XV. *Vltraiectum.*

IANO DOVSÆ *méo S. D.*

**S**ILENTIVM tuum mihi, Doufa, molestum : absentia multo sinagis. Vbi autem fides ? intra dies octo expectari volebas te : menses ecce labuntur. Statueras hoc iam antea ? an quid interuenit ? an placent tibi nouitij isti & fallaces mores ? An potiùs vxoris partio te detinet ? quæ genuit tibi (ita audio) decumam iam prolem. Maecte hac fortitudine dicam, an fortunâ? vtrâque certè opus. nec minùs hîc, quàm in agricultu, Labori & Euentui litandû. Sed tibi quidem propitiùs vterque deus : & gloria Masaniissæ te manet, si sic pergis. Vide tamen ne dum assiduus nimis in illis vallibus, desertû eas nostros montes. Suspicio: & iure.

C

Vt quid

Vt quid enim procaces illæ antea Musæ tuæ tam diu silent? cur tribus his mensibus gutta nulla nos irrigauit poëtici tui humoris? Emenda: & hîc & ibi vir esto. Libelli etiam tui addicti Plantino, vbi sunt? Solue fodes, aut Prætorem expecta & suspensum capiti tuo libellum. Non enim differo, non protollo. Indicem Francoforto en habes. sed sterilem bonarum rerû: & nihil nundinæ istæ ad Phœbum. Melleri tamen Spicilegia edita, acutissimi ingenij iuuenis: vtinam rectissimi, verè addam! Sed profectò aut fallor in hac omni litteraturâ: aut ille valdè in censendo, & scribendo. Quales pleræque eæ coniecturæ? quàm non callidæ solum, sed calidæ? imò quàm audaces? Mihi crede, corrumpendis ista, siue perdendis potius libris litterisque sunt: si dimanat hæc labes. Et dimanabit. ita iuuentutem hanc video: & tantum ingenij specie blanditur hic calor. Iam stilus ille quis? doctus, antiquus, arcanus, inquires. Scio. sed quò tam doctus, antiquus, arcanus? Ego ille ipse qui aliquid hîc capere me puto & sapere, sæpe quæro aut non video eius mentem. Quæso mittamus tenuem nimis subtilemque hunc colorem, & Apellæas, vt sic dicam lineas: & Venus nostra inspiciatur etiam à vulgo. Vt nihil minus expedit, quàm agrum optimè colere, (aiebant veteres:) sic censuerim de stilo. Nimis ornas? fucus & adfectatio apparet. Nimis attenuas? tenebræ & squallor. Modus autem in omni re optimus: etiam in epistolâ. quam finio, & te saluere iubeo noue Hercules Musarum, noue matrum. Lugduni nostræ, a. d. III. Nonarum Aprilium. ∞. IO. LXX.

EPISTOLA XVI. *Ultraiectum.*EVERHARDO POLLIONI *meo* S. D.

**A**MEA enim velut manu es, à domo, & à disciplinâ. Vt statuarium opus suum delectat, si laudabile: sic in te iure mihi placeam, si tu bonis. Quod futurum omnino est, mi Pollio: si non audies solum præcepta quæ crebrò dedimus, sed obaudies: eaque admissa in hoc pectus, re exprimes & factis. Ad virtutem ante omnia te hortamur: cui litteras istas seruire volumus, magnum vel in parandâ eâ adiumentum, vel paratâ ornamentum. Non enim solum pulchrior comptiorque per doctrinam virtus, sed fortior: nec colorem modò ab illâ ducit, sed sanguinem & robur.

robur. Egregiè noster Seneca : *Et si magis refert nostrâ fortiores fieri, quàm doctiores : tamen alterum sine altero non fit. Non enim aliunde animo venit robur, quàm à bonis artibus, quàm à contemplatione naturæ.* Quod ita verum scito, si doctrinam non hanc mollem & amœnam solùm intelliges, quam φιλολογίαν haud malè appellamus : sed virilem illam magis & robustam, quæ in naturâ aut animo occupatur, quamque φιλοσοφίαν propriè indigetamus. Illa enim sola, tantum abest vt tutum securumque te præstet inter hos vitæ fluctus : vt moueat sæpe excitetque in ambitioso animo cupidinum nouas tempestates. Itaque vt nautis solitarium Helenæ sidus non placet : non item mihi ista. Gemini illi sunt, qui cùm apparuere, tranquillitatem nautis nunciant : tibi hæc duo, si iunges. Quod voueo ex animo : & in firmâ hac spe saluere te iubeo carum mihi caput. Lugduni Bataur. iiii. Nonas Octobr.

60. ID. LXXXII.

## EPISTOLA XVII. Delfos.

IANO GROTIO.

**A**T tu quasi ad Collegium etiam scribis : cui vitam fuisse te nescis, & obiisse illud te abeunte. Certè à nuptialibus tuis facibus, funereæ accensæ sunt Musis & quidquid hîc fuit Musicorum. Rem dico. solutus dudum ille cœtus : non tamen etiam vinculum amoris, quo inter nos ligati. Tu mihi sæpè in mente, rarò in oculis : nec leporem & virtutem tuam deleuerit ex animo meo vlla dies. non magis quàm tuo litterarum studia exciderint, etsi callidè id præ te fers, & negas agnoscere te Deas, idque carmine, quod agnoscant ipsæ Deæ. Abi Socratice noster εἶρων, & apud tam fidum age ex fide. Tu Musas, te illæ amarunt, amant, amabunt : & cum illis ego. Carmen totum approbum : nec Critica illi à me nota. Rem ipsam & argumentum vt meliùs nôrim curabò : & legam quæ scripsit Belgicus hic Euclides. Nos Pindaricus ἀλέκτωρ ille νύσσειν respicere cœpit in parte. vtinam diffusiore paullò vultu, vt sanitas apud me sit læta, plena, firma. Quam tibi, vxori, liberis (nónne rectè ita loquor?) opto. Lugduni Bataur. postrid. Kal. Sextil.



## EPISTOLA XVIII.

Lutetiam.

AVGERIO GISLENO BVSBEQVIO,

*Cæsareo Legato S. D.*

**N**OMEN ipsum tuum in litteris ante legendum me adfecit, & lectio multo magis. Iudiciû talis viri meritò magnum apud me est: & hæc tam proluxa beniuolentia, quam solo animo meruisse me scio. Nam rem quidem tu auges: & facis tam liberali beneficij interpretatione, vt vltro obliger, & nouam gratiam debeam tibi. Quam vt prorsus soluam, ne expecta. non est istarum virium; non item animi. qui magis magisque illigari tibi cupit, & numquam dependere, vt pendeat à te semper. Liuij variantes lectiones ex codice Puteani quas submittis, gratæ mihi: etiam vtilis spero, post perfectum cõmentarium Cornelianum, in quo vnus nunc sum. Absoluto enim eo opere, libens sanè manum & limam adiecerim vberimo historicorum. Permittit iam valetudo: quæ non paullò melior, post iter Antuerpiense & haustum auræ ficcioris. Nam marina ista & palustris, nescio quomodo corpori huic non amica. Sed quis in Belgicâ alius angulus ad quietem? Itaque ferimus, & hîc hæremus: donec Deo visum pacem huic Belgio reddere, & nobis veterem sedem. Quod, vt res sunt, vouemus potius quàm speramus. Amplissime & Nobilissime Vir salue. & inter cultores virtutis nominisq; tui Lipsium non falsò cense. Lugduni Batau. Non. Mart. ∞. IO. LXXX.

## EPISTOLA XIX.

Hagæ.

THEOD. LEEWIO *Consiliario* S. D.

**I**N silentio tuo, mi Leewi, mirabar, & (hanc enim libertatem amicitia mihi dat) indignabar. Sed indignatione tibi non ingrata, cuius fons ab amore. Iniuriam mihi ferre videbar, quia priuabas me hoc alloquio: quod etiam in negotiis occupationibusq; meis vsurpo cum libentiâ & voluptate. Veluti hoc ipso tempore, quo Plantinus cum genere apud me est: & eripit mihi non inuito optimam diei partem. Ego tamen scribo. de re priuatâ, valere me non optimè, vt hoc anni labentis tempus fluxionibus

nibus meis ferè est infestum. De repub. nec multa nec bona. Hostis Ninouiam obsidere dicitur, & imminere meæ Bruxellæ. certè copias colligit circum illam. Galli lentè & frigidè agunt; nec pro ingenio gentis. Ita vides, mi Leewi, in longum trahi rem, & produci calamitates patriæ iam exhaustæ. Nec abiiciendus tamen animus. quem si ratio non adfectus subegit, ille est eritq; in firmâ arce, quam nulli insultus, nulla vis perfringent. Sed opinio nobis hæc facit magna & metuenda, quæ ratione si examinâs, leuia sunt. Bellum metuimus. ita enim accepimus à parentibus, ita à nutrice, ita à publicâ vulgi voce. Sed imponunt. Cur enim bellum malum? nempe quia vastitatem inducit, quia pauperiem, quia mortem. Atqui hæc ipsa mala non sunt, nisi malis. Quot viri boni beatique paupertatem appetiere vltro? Litteræ ipsæ diuinæ eam nobis conciliant, vt rectâ ad cælos viam. Mors autem quid? metuenda viro? optanda potius: quia finis huius miseræ, & principium melioris vitæ. At enim hæc Philosophorum sunt, inquires, dictu pulchra, re & vsu asperrima. Imò, mi Leewi, communis hæc vox totius generis humani: quotiens abstersâ adfectuum illâ nube radius diuinæ mentis illucebit. Sic tu, sic ego loquemur inuiti, si rem pendemus ad veri iudicij lancem. Signum vis? Ecce pone mihi ex illo ipso corrupto & corruptore vulgo aliquem in morbo. spernet diuitias, spernet opes: sanitatem dumtaxat vouebit corporis & mentis. Scilicet seriò cogitare iam de se cœpit admotus ad extrema: & inanium obliuiscitur, cùm periclitatur de salute. Exfulant adfectus, cùm ratio rediit: & erigit attollitque se animus, corpore iacente. Tamen sani redimus ad eadem omnia: quia litigium illud cum adfectibus fuit, non diuortium: nec proposito aliquantis per boni, sed metu sumus. Quare maneamus in hâc viâ, quam institimus, segregandi nos à vulgo: nec id sermone tantum, & velut in pompam fiat, sed reipsâ, & quod dicitur, Bonâ fide. Vacillamus, imò cadimus interdû? Surgamus, & citâ celeritate corrigamus, quod temporis ereptum lapsu. Viden' vt miles quoque, si cecidit, surgat alacrior, & animos irasque sumat à casu? Idem nobis sit, & constanter pergamus ad illum Tranquillitatis internæ portum, qui verè efficit beatos. Vale. Lugduni Batauor. I I I. Idus Noemb. ∞. IO. LXXXI I.

## EPISTOLA XX.

IANO LERNVTIO *meo* S. D.

**D**IMISI nuper à me Oudermannum vestrum sine litteris, valdè præter meum votum. Sed mihi crede, ita distinebar, ut eius rei facultas mihi nulla. Nec nunc magna: (Plantinus enim apud me cum amicis est, quibus dies dandi panè toti: ) tamen erigit & conari me iubet epistola tua, siqua alia, plena suauitatum. Vel illud de SVAVIIS tuis quàm mihi spirat! crede, quòd omnes Arabum diuitiæ, imò quòd illeipse halitus à suaviorum deâ. Tu tantùm perge, & damna me huius voti, ut citò teneam amplectarqûe libellum, & te in illo. Sed de titulo cur mutasti? Mihi simplicius suauiusqûe inscribi SVAVIA videbantur, quàm funereâ & atrâ voce SECVNDI MANES. An frontes seueras metuis, & consultum tibi is modestiâ inscriptionis? Frustrâ. quatenus ego gustum sumpsi, pura illa basia tua: quæ & Catones capere possint, & dare ipsæ Vestales. Denique quousque scribimus istis? paucis nobis potius. & da quod in sinu tenere Scaligeri possint & Turnebi. De Plantino, verum est. ædes hîc conduxit sanè amplas, & partè vacantem Typographiæ transferet istuc. Aliquid ea res fortasse me excitabit ad lucubrandum: cùm interesse editioni libellorum nostrorum licebit, imò præesse. Nam aliàs, & valetudo sæpè illud igneum, quod in nobis, retundit: & iudicia hæc multorum aut maleuola, aut malefana. De Germaniâ quidem audistin? Proscribere misellam Satyræ nostram nuper voluere, & eiicere edicto extra imperij fines. O pisces, pisces! non hæc aqua, in quâ vos natetis: & magis vobis faciat ille ab Cithærone liquor, quàm hic ab Helicone. Sed feramus: & quoniam cœpimus, aremus etiam hoc litus. De Venatione in manus iam sumpseram, & eram in secundo libro: reieci, & iterùm daturus me videor in torporem. Catarrhi mei id faciunt, statim mihi sub hoc tempus & sollennes. A Scaligero nuper literæ editæ De Emendatione temporum, & promittit breui exemplar. Vale mi anime, cum animâ tuâ, & cum iis qui ex felici vestro cœtu. Lugduni Bataur. III. Id. Nouemb. ∞. IO. LXXXI.



EPISTOLA XXI. *Antuerpiam.*

HIERON. BERCHEMIO IC.

**N**IMIVM vr̄ges, mi Berchemi, de Imitatione. nuper omnibus sermonibus, nunc epistolis hoc agis. Quid censes? aliquos thesauros mihi esse doctrinę reconditę? erras. siquid in hoc genere posse tibi videmur, magis à casu siue naturā est, quā ab arte. Et tamen quidquid illud est quod sequor, quod teneo; non vltrā celabitur. & proximā epistolā pręcepta aperiā, ad quę stilū meum fingo & conformo. Tu Minerual, sis, para doctori novo. Scaligeri ad Ausonium en tibi. O virum, ô filiū à patre magno magnum! ——— *meritò cui doctior orbis*

*Submissis desert fascibus imperium.*

Enimverò ille vnus est, quem miramur, quem æmulamur, imò ne mentiar, cui invidemus. Felicem Galliam hoc sole! cuius claritas non ad eos solū qui nunc sunt, sed ad posteros diffundetur, quamdiu quidem erit in terris nomen litterarum. De rep. quid scribam? manus mihi labat, & ingemisco. Carcer ille novus tot Lentulorum quò erumpet? de quibus ambigua hęc fama. alij emissos dicere, alij artius teneri: hi culpam affingere, illi demere. Omnia incerta mihi, pręter illud: quod omnino futurum video, vt plebecula illa aliquid plus faciat. Habet hoc semper noua libertas, vt ad licentiam facilè deflectat: quid censes de vrbe, cui insitum & fatale, turbare? Vt fistulę diu interclusę aut interceptę turbidiores aquas emittunt: sic isti actiones, aliquamdiu pressi. Sed nos quoque hęc in metu. Quidam inter optimates partium non optimatum: qui, vt cum Pindaro dicam, \* & δῖνος \* Non in-  
τῆχ' ὁ ὕψιον, ἀλλὰ σχολιᾶς ἀνιβαίνουσι ἀπ' ἄλ' αἶας. Plebs ista mollicula. *stizia rell' i murum,*  
quid augurer? hostis tantū adueniat: ego tibi spondeo, non *sed obliqua*  
fore hęc Numantiam aut Saguntum. Cometam & nos per hos *fraudis*  
dies vidimus: immanem, dirum, & facie haud sæpè visitatā. *scandunt.*  
Quid portendat, quęris? Chaldæus non sum, nec cęli signa cognoui: tamen hoc vetus noui,

*Οὐδεὶς κομήτης ὅστις & κακὸν φέρει.*

cui versui magis quā Aristoteli credo, qui hęc talia ad caussas fortuitas refert & infernas. Quid tamen aut quibus minetur, distincte

distinctè nouit ille *Prudens futuri temporis arbiter* : ego communiter, non referre eum aureum sæculum. Vale. & illustri Comiti tuo à me salutem. Louanij III. Id. Octob. ∞. IO. LXXVI.

## EPISTOLA XXII.

*Duacum.*

PHILIPPO LANOYO, *Nobilissimo iuueni* S. D.

**I**N Italiam cogitare te audio, nobilissime iuuenum : & audio volens. Placet ea mens, quam agnatam scio non nisi optimæ cuique menti. Humiles istæ & plebeix animæ, domi resident & adfixæ sunt suæ terræ : illa diuinior est, quæ cælum imitatur, & gaudet motu. Itaque siue prisco siue nostro æuo, peregrinati ferè sunt viri magni. Sed ista hîc cautio : vt id fiat non cum voluptate solum, sed cum fructu. Vagari, lustrare, discurrere quiuis potest : pauci indagare, discere, id est, verè peregrinari. Vt tu id possis, finem verum fructumq; ante omnia mihi propone, quem is petiturum. Vt enim ij qui iaculum mittunt, non in vanum dirigunt, sed scopum præspeculantur ad quem collineent : sic tu præfini, quid peregrinatione istac quæras. Duo, nisi fallor : vtilitatem, & voluptatem. Non enim hâc solum. nec vt coronarij bellissimas saltem herbas floresque struppis aut coronis innectunt, salubrium nullâ curâ : ita hîc tu. Quin contrâ potius, plura ad mentem ac salutem referes quàm ad sensus aut aspectum. Ac de voluptate aliquid dicere vacuum sit : cum ea sponte obuia : nec quisquam tam lapis aut frutex, quem non titillet ac flectat amœna illa variaque spectio gentium, urbium, locorum. Natura scilicet illuc aurigatur, nec duce opus vllâ ratione. At in vtilitate laborandum est. quam nec secuti omnes, nec qui secuti, adsecuti. Eam tibi ingero, & triplici hoc limite designo, Prudentiæ, Scientiæ, Morum. Hæc enim omnia peregrinatio adferre debet ; si consilio, si ritè instituta. Ac Prudentiam ab eâ peti, Homerus nobis satis auctor ; ille non poëtarum solum eximius, sed, me iudice, sapientum. qui cautæ illi Vlyssæ prudentiæ quam aliam causam vbique tribuir, quàm quod πολυτροπος : quodque, vt ipse ait,

\* Multorum  
mores ho-  
minum &  
simul opi-  
da vidit.

\* Πολλῶν ἀνθρώπων ἰδὲν ἄστα καὶ νόον ἔγνω?

Et verè. Instituta enim illa varia gentium, ritus moresque hominum, formæ ciuitatum, incredibile est ad iudicium & prudentiam

tiam quàm potenter possint. si tamen non visa aut libata ea leuiter; sed admissa, retenta, & collata inter se examinis quadam lance. Quod ante omnia tibi censeo faciendum. Vide inquam, audi, iudica: nec conquire solùm hæc talia, sed in ea inquire. Et inquisitio quidem à te & tuâ mente erit: conquisitio ab hominibus esse debebit, aut à libris. Nam & libri ferè siue historiarum peculiare suis quibusque locis & linguis sunt quas indagabis: & homines auro & usu prouecti non deerunt à quibus percontando discas. Et si enim modestiam & silentium iure tibi suadeam: tamè nihil abnuo quin per iter fræna sepè laxes effræni illi membro. Ius tibi sermonis non in viâ solùm (siqui eiusmodi comites) sed in hospitio sit: nec ante mensam modò, sed in eâ, & post eam. Sed sermonis ius intra hos fines, quærendi de moribus, legibus, facie cuiusque vrbs. addo & de Principibus, bellis, casibus, aut siquid euentuum magis insigne. Hæc notabis, hæc sepones. certus ex iis ciuilem illam prudentiam inseri, tacitâ quadam vi & viâ. Vt enim herbas, vt arbores, crescere non cernimus, sed creuisse: sic factam hanc prudentiam potius, quàm fieri. Atqui incrementum & irrigatio illi, ab his inquisitorij, vt sic dicam, humoris guttis: quas altè perbibit melior animus, & paullatim madescit sapientis iudicij succo. Atque hæc de Prudentiâ dixerim: verbis parcè, rebus ampliter, si rebus experiris. Ad Scientiam te nunc eâdem manu duco. Quam mirèrè fortasse, quòd peregrè quæram. cum domi illi sedes potius, & hæc litterarum studia quiete secretoque magis gaudeant, quàm motu aut discursu. Sed defines huius admirationis, si animum flectes ad duplicem, qui ad Scientiam, modum. Aut enim ab Auribus ea, aut ab Oculis est: à Doctore dico, aut à Libris. Et de libris quidem, nemo ita negatum quin domi habeantur, tractenturque melius: in doctoribus, aliter esse ratio suadet mecum. Quæ enim illa, obsecro, tam felix regio, quæ felicissima omnia ingenia includat? Quin sparsa illa: &, deo dispensante, sua cuique terræ velut gemmula quæ illustret. Hanc adi, hanc audi: & è sacris illis pectoribus, hianti ore bibe abditæ doctrinæ fontes. Quis non à Turnebo aliquo doctior redeat? prudentior à Sigonio? disertior à Mureto? quorum ego non auditum solùm magno emerim, sed visum. Quòd si notitia etiam aliqua tibi cum



iis accedet (& id pronum apud tam humanos: ) deus bone , quæ occasio hîc tibi discendi & ditescendi ! quot gazas legere & recondere cottidie poteris latentium litterarum ! Mecum vides. tu arripe tantum: & me auctore, in vsum eiusmodi virorum omni arte irrepe, vi irrumpe. Nusquam meliore damno frons ponitur. Hæc Platonis , hæc Pythagoræ , Democriti , & aliorum sapientium mens fuit: qui relicta pœnu artium Græcia , non ad cultos solùm, sed ad barbaros peregrinati, acri quodam cupidine discendi. Iam & alia ab Oculis utilitas: qui hîc tibi soli & nudi ad Scientiam sæpe duces. Italiam ecce nunc adis. illam frugibus, viris, opidis cultam, illam famâ inclutam scriptisque. In eâ non vestigium vsquam pones, non oculum flectes; quin monumentum aliquod premas, aut memoriam vsurpes, ritus siue historię priscæ. Illîc Thrasymenum miserantibus oculis subiicies, aut æternum imperij vulnus Cannas: hîc magis lætis, Albanum, aut Tybur, aut nobiles Baias. Plinij alibi mansio, & Virgilij aut Propertij patria tibi ostendetur; alibi rudera Varronianæ aut Tullianæ villæ. Quanti & quàm arcani gaudij ista visio? cùm non animo solùm, sed pænè oculis sese inferunt manes illi magni, & sola premimus pressa toties ipsis. Iam coloniæ illæ veteres, iam templa, theatra, arcus, sepulchra, lapides, quem non & doceant mirificè & delectent? Doceant dico. quia reuerà notata aut exscripta hæc talia, mirum quantâ luce mentem perfundant, trepidantem per veterum scripta. idque experti dieimus ipsi. Vt omittam etiam. illud commodum, quòd nescio quomodo attollatur & grandior sese fiat animus, ad spectu tot sublimiũ & grandium rerum. Cupidinem veræ virtutis & gloriæ ingenerat, visa toties aliena gloria & virtus. Ad Mores iam venio, qui postremus mihi locus; tibi, siquid sapias ô adolescens, primus. Ab hoc enim scopo si aberrasti, aberrasti ab aliis: & inutilis, imò noxia, scientia omnis prudentiaq; est, secreta à probitate morum. Cetera speciosa puta, hanc necessariam: illa ad ornatum adhibe, hanc ad salutem. In moribus autem duplex mihi præceptio: & vt bonos rectosque vbique adnotes, & fugias malos & detortos. Sed in bonis, ne mentiar, haud magna fortasse peregrè copia est. Latent enim plerumque verè probi: & in pectore intimo domiciliũ Virtus habet, non in vultu aut fronte. atque inde

vt extrahatur, vsu opus & notitiâ quadam propiore: ad quam peregrinantibus rarò accessus. Tamen elegantia quædam morum & comitas, & externa quædam, vt sic dixerim, virtus, quin apud exteros iure quærat, non negabis. Quid in cultu, vestitu, actionibus deceat; quæ Veneres & lepôres in sermone aut gestu; docere te ritè politiores illæ gentes possint, Itali, Hispani, Galli. atque ita rus illud nostrum aptè sæpè diluas quæsitâ istâ vrbinitate & peregrinâ. Sed quæsitâ, non adfectatâ; vsurpatâ modicè, non ostentatâ: alioqui nihil comptu eo incomptius, elegantia ineptius. Risimus non semel eiusmodi histriones, qui ab Italiâ aut Galliâ noui, gestus nescio quos mimicos molestè vsurpabant, & delicias parum non dicam ciuiles, sed viriles. Tu hæc fuge. & inprimis vera & interna animorum vitia, quorum vbi-que larga & obuia seges. è quâ ne quas spicas improuidè colligas, magna mihi pro te cura, imò metus. Admittimus enim nescio quomodo & combibimus faciliè peregrinas illas culpas; siue quia nouitate aliquâ blandiuntur, siue quia specie virtutû. Atque vt venena vinis admixta, medicorum scito, perniciousè & peccata hæc adsita virtuti. Ferè enim ita fit: vt in quâ gente vitia certa increbuerè, mores iam vocentur, nec in veniam modò veniant, sed laudem. Adde, quòd naturâ ipsâ proniores nos ad mala imitanda. Vt pictor, leui manu, & volante penicillo, rugas, verrucas, næuos in facie exprimit, haud tam faciliè ipsam: sic probitatem laboriosè imitatur, nullo negotio maculas illas animorum. Aduigila hîc igitur: & iam-antè seriò provide, quæ vitia cognata vel amica cuique genti. Quis enim neget? vt hominibus singulis, sic populis suæ laudes, suæ labe. Galliam ecce cogitas? leuitatem & vanitatem etiam, quæ in plerâque eâ (omni, falsò dicam) gente. Italiâ? proteruiam in eâ & libidinem. Hispanias? typhum quemdam & Africanum fastum. Germaniam? comestiones & ebrietatem. Quæ velant illi, scio; & comitatem, fiduciam, grauitatem, hilaritatem interpretantur falsò. at tu vitabis, nec in venas rapies peruersi iudicii aurâ blandientem pestem. De moribus tantum est. & pertexui hanc telam: nisi quòd leue parergum illi addam de Italiâ ipsâ. Laxat enim nescio quomodo vela huic stilo, prouehitque longius amor & cura tui. In terram is igitur terrâ istâ

melio<sup>rem</sup>, fateor: gentem gente nobiliorem: haud scio an probam magis, an fidam. Ingenium, & subtilitas, & magni erecti-  
 que animi in illis locis habitant: non semper puri, simplices, &  
 ad Gallicā istam niuem. Ideoque incautis & apertis nobis non-  
 nullum ibi periculum, & quidem à duplici telo. Nam & inter  
 viros multi recti, callidi, periti simulare: & inter fœminas, formæ  
 conspicuæ, sed lasciua & procaces. Hic Scylla, ibi Charybdis: &  
 duo hæc discrimina vt enauiges, opus non prudentiâ quadam  
 solum, sed dicam fortunâ. Prius tamen illud me angit minùs.  
 quod amoliri magnam partem posse videor cauentibus quibus-  
 dam præceptis. Nam contra insidiantes illos aut simulantes,  
 quidni firmum scutum à simulatione item aliquâ sit? Cres mihi  
 esto inter Cretas. Nec viam tibi tamen ad fraudes præeo. absit.  
 sed vt medici, venena quædam venenis pello, in salutem tuâ non  
 in noxam. Ad minutas & innocentes quasdam simulatiuncu-  
 las te voco: nec ad alienas insidias, sed ad animi tui opportuna  
 regumenta. In Italiâ totâ tria hæc mihi serua. Frons tibi aperta,  
 lingua parca, mens clausa. Comis & communis vultus aduersus  
 omnes sit, animus externo nulli pateat: & velut in thecâ clau-  
 sum eum habeas, dum redeas ad notos animos & verè amicos.  
 Epicharmæ sapientiæ ille neruus hîc valeat, nulli fidere. Nisi  
 facis: non vnus Vlysses Aiacem te circumueniet; & dolorem no-  
 bis debes, illis risum. Atque hæc tamen cautio mea propriè in  
 vulgus Italorum dirigitur. Nam de nobilibus cur diffitear? reue-  
 rà optimates illi plerumque optimi: celsi, alti, sinceri; virtutis,  
 gloriæ, litterarum amantes. In vulgo aliter esse obseruauimus,  
 qui fex & limus, & verè vulgus. Itaque in illis, vetus Italicus aut  
 Romanus sanguis ferè apparet: in istis, peream, nisi claræ re-  
 liquiæ (fidenter dicam) Gothorum, Vandalorum. Iam contra  
 telum alterum quî muniam te, aut moneam? Ita sim saluus,  
 vt opto potius quàm spero te hîc planè saluum. Tantum mi-  
 hi metus & ætas tua facit, quæ in ipso æstu: & illæ non dicam  
 fœminæ, sed Veneres, Venetæ aut Romanæ. In naturâ tantum  
 tuâ spes omnis præsidij hîc, & voluntate. Quarum si alteru-  
 tra ad calidas & callidas istas Solis filias inclinât: quis hominum  
 te seruet? certè rues: nec vllo præceptorum sufflamine te sistam.  
 Tamen ne nihil dicam aut addam: ecce armaturam à me dupli-  
 cem,



cem, Oculis, Auribusque. Oculos inquam, primum mihi claudere, & auerte longè ab illecebroso hoc aspectu. Aditus enim mali morbi hinc est: nec amor aut cupido facilè irruerit, nisi per geminas has fenestras. Sed & aures etiam muni, contra omnes non Venereos solum, sed paullo magis venustos sermones. Ij sunt enim qui titillant, qui excitant: & vt cupere ab aspectu est, sic velle ab auditu. Igitur vt athleticis olim, munimenta quædam aurium adponi mos (*ἀμφοτέρωθεν* vocabant) ad vitandos ictus: sic tu hoc firmum contra amatoria vulnera habe velamentum, Amatorium nil audire. De hominibus dixi (quæso ne cum inuidiâ cuiusquam aut irâ: quia liberè aliquid protulerim fortasse, nihil acerbè aut malignè:) adiungam & aliquid de locis. Qui varij in Italiâ omni & pulchri: vt non iniuriâ deliberes, quem præferas ad videndum, siue habitandum. Et meo quidem sensu (vidimus enim plerosq; omnes, & triuimus) prima tibi vel antiquitatis causâ, adeunda Roma est: adeunda tamen, non habitanda. Confusio enim ibi & σύγχυσις, aëris & morum haud pura puritas: & quod verissimè à Varrone dictum, turba turbulenta. Loca igitur illa prisca & vetera, monumenta ac rudera,

— & campos ubi Troia fuit,  
cùm lustratus satis & veneratus fueris: Neapolim mihi abi, & paullisper inside illam nobilem, illam cultam, illam amœnam. Per quam viam deliciæ locorum multæ, quas omitto. sed si inhabitanda diutius Italia est, in Thuscum mihi redi, & illos incole, linguæ, aëris, morum causâ. Omnia hæc ibi pura. Quod si de opido etiam quæris: Florentia mihi aut Senæ placeat: & magis istæ. At iam in ambitu & reuerfione, Bononiam amicam studiis libens videbis, & eâdem laude insigne Patavium. quibus cùm dies aliquot dederis, non pigebit in vrbe maris domina (Venetias dico) lustrandâ ponere septimanas. Heu ad inuidiam pulchra, opulens, felix vrbs! minùs tamen ad nostrum Genium, quia Mercurio amicior quàm Mineruæ. At in exitu grande illud & diffusum Mediolanum te capiet. in quâ sine Italię finis mihi epistolæ. Deum supplex precabor, vt te seruet, & tu ista. Vale nobilissime iuuenis, vale, vale. nec Deus mihi \* auguria perficiat, quæ in tristi mente. Antuerpię III. Nonas Aprileis, ∞. IC. LXXVIII.

\* Certè uolens  
ra. obituem  
nim enipsâ  
peregrina-  
tione, prin-  
ceps nostra  
sumensit.

- EPISTOLA XXIII. *Vltraicelum.*

IANO DOVSAE S. D.

**H**EVs tu, sacrifica. Lipsius etiam viuit. Discrimen igitur tibi? inquires. Grande, capitale, mi Doufa: & quidem sine crimine discrimen, à scriptis iterum meis, non à factis. Satyram ego nuper scripsi, & illa me pænè proscripsit. Iocari me putas? verò, seriò, à grauib, imò à grandibus viris res agitata: à proceribus imperij: tamquam in læso aut turbato publico statu. Suspendo adhuc te: rem habe. In iocis illis Menippææ nostræ, aliquid est de lauru poëtarum, quam largitur Cæsar: & ab eâ iste ignis. Aiunt, ignominiâ à me affici vniuersum id genus: aiunt, Cæsarem ipsum aspergi iniuriâ, quasi non id ei ius per me aut potestas. Itaque à Legatis ipsis Cæsaris litteræ subitò Francofurtum, quæ grauitèr me accusarent, minarentur: & Satyram ipsam priuatum irent publicâ luce. Hæc audis? hæc credis? non ego ipse: nisi litteras eas vidissem his oculis, tenuissem hac manu. O sæculum, ô viri! Ite vos docti, vigilate, scribite: & pro famâ, subite hanc flamam. Et tamen vtcumque calumniarum ferax æuum: quis materiam iis censuisset in re tam leui? Nisi si hoc proprium mihi fatum, vt ex candore istarum niuium oriatur semper aliquis ignis. In Epistolicis meis nōne simile? Benè certè sperare de iudiciis posterorum debeo: cui tam iniqui sunt viui. Tu vide, ride, & si vir es, pro Satyrâ nostrâ Satyram in saturos illos scribe. Nōne enim nostrâ? tu certè eius magna pars es. Vale mi oculissime. Lugduni Batauor. III. Kalend. Iulias. ∞. IO. LXXXI.

EPISTOLA XXIV. *Londinium.*

GVLIELMO CAMBDENO.

**M**VNVS à te accepi, Vir ornatissime, per mihi gratum, Britanniam tuam: quam illustrasti ingenij & industriæ clarâ face. Multum patria tibi debet: multum exteri nos, qui per te pulcherrimam insulam videmus, etiam cū non videmus. Perge in hoc & simili studiorum genere, quod abesse non potest quin tibi famam, posteris æternum ferat fructum. Lugduni Batauorum. IV. Kal. Sextil.

EPI-

EPISTOLA XXV. *Vltraiectum.*GEORGIO RATALLERO *Præsidi ibidem**Consilij Regij S. D.*

**V**ALDE alienus à gratiis omnibus sit, Vir Amplissime; cui non & litteræ tuæ gratæ, & hæc ad amicitiam inuitatio, tam amica, tam honesta. Quam quòd prior, quòd vltro suscipis: iure magni facio, qui scio quàm tu sis magnus. Et amaui quidem te, imò colui iam pridem, tacito quodam sensu: qui diu inclusus, libens nunc se promit & expirat, ad hanc suauem beniuolentiæ tuæ auram. Cui tamen non dicam paria, sed maiora facio: quo plures mihi ad amorem & æstinium tui causæ. Doctrina, dignitas, virtus, & ante omnia hæc humanitas: quâ trahis & necis me tibi, adamantino quodam vinclo. Quod nulla vis, nulla fraus, laxabit aut soluet; donec

*Lumine adempto animam moribundo corpore fundam.*

Idque tibi non per epistolam scriptum, sed velut per syngrapham volo sponsum. Tu mihi quæso responde: & hunc, vt sic dicam, amoris noui fruticem, quem tam amanter eduxisti, euocasti, alere & fouere perge beniuolentiæ tuæ radiis, ô Belgij & meus splendide sol. Lugduni Bat. postrid. Kal. August. ∞. ID. LXXX.

## EPISTOLA XXVI.

*Hagam.*THEODORO LEEWIO *Consiliario S. D.*

**M**AGNUM illud Antuerpiense facinus, magnum: dicerem & malum, si de causâ mihi liquidò constaret, aut fine. Sed tamen hoc ipso malum, quòd malum imò exitium patriæ trahet secum. Heu, quæ videmus! quæ audimus! quàm inopinata! quàm obliqua! quàm non pro veteri fide & more regum! Nec tamen, mi Leewi, deiicere. erige te potius: &, vt palma, attollat se animus contra nouum hoc pondus. Inspice ludibria rerum humanarum, & aleam ambiguæ Fortunæ: quæ gaudet iactum aliquem ex occulto iacere. nec expectandum. Hinc ille vulgi stupor & querela, Quis putasset? quæ non cadit in mediocriter sapientem: qui iam antè ita meditatus, vt sciat hæc & deteriora posse euenire. Vt in bello, etiamsi hostis absit,



absit, semper excubiae: ita vigilat ille contra improuisum omnem ictum. Quis fuit ille dies, cum hîc & alibi insulæ totæ aquis absorptæ, aut vrbes terræ motu? Quis eorum, qui tam magnâ ruinâ perierunt, id putasset? Nec exempla nobis desunt istarum, quas patimur, cladium: sed ipsi nobis. qui, insito à naturâ vitio, proni semper ad spes meliores. Quas coërcere tamen potius sit, & laxiores habenas permittere timori. Non deerit consilium aut solatium illi animo, qui timuit quidquid potuit timeri. Iure à Romano sopho laudatur is versus,

*Cuius potest accidere, quod cuiquam potest.*

Quem velim impressum tuæ menti, vnâ cum amore mei. Vale.  
Lugduni, Prid. Kal. Febr. ∞. I. D. LXXXIII.

## EPISTOLA XXVII.

*Brugas.*

LERNVTIO, ET GISELINO.

**S**ALVETE meæ animæ. ita enim meritò vos appellem, quia quamdiu istic fui, vixisse videor: nunc vitâ frui quasi per vmbra. Circumagunt me hæ turbæ in Numidæ morem: & adhuc discurre sine lare, sine certis sedibus. quas tamen positurus in Batavis videor, Ordinum vocatu, & stipendio sanequàm honesto. Sed temporaneas, non perpetuas: saltem,

*Dum hæ conflescent turbæ, atque iræ leniunt.*

Aliter videtur quibusdam è meis, qui in mutatione hac rerum ad dignitates & splendores vocant. videatur: mihi stat vetus illud decretum meum, reipub. tam confusæ non misceri. Orpheus ille vester Lugduni est, & (inuideo vobis hunc risum) partes has simulat, & ambit professionem. Exambiétne? non, si Batauos noui: in quibus certè plusculum, quàm pro veteri verbo, auris est & cordis. Eurydice etiam eius hîc: & illa professionem. O Doufa, viuis & Satyram non scribis? Sed ridebimus coràm. Ita enim de vobis recepit mihi Winterus vester, adolescens adprobus & perhumanus. Facite, & properate ad hæc Neptunia loca: in quibus ego cum Dousâ tam arctè, tam auidè, vos amplectemur, quàm Amymonem suam illeipse Neptunus. Sed hospitium quidem vobis (ita iubeo) apud me erit: familiare scilicet & sobrium, nec propter vos maiorem fumum

vicinia

vicinia videbit. Properate tantum, quod ut magis faciatis, nuncio accepisse me nunc nuper Luteriâ à Pythœo Trochaicum vetus, cui titulus Peruigilium Veneris, elegans & scitum carmen, & dignissimum illâ ipsâ deâ. Plura non addo. venite, videte, valete. Lugduni Bataurorum, Kalendis Veneris ∞.  
 IO. LXXIX.

Sed heus tu, Lernuti! est quod à te seriò petant mei horti. non magnum aliquid, sed illud idem quod hortus tuæ, Seminari. Itaque siquid semini tibi superest, non illius Plautini (apage nuptiales nunc nugas) sed istius horrensis: quaeso, hoc nuntio mitte. Habeo enim & colo hic in ipsâ vrbe hortum, amicum potius quam grandem, cõcessu nostri Hauteni. Pro eo, ad Venerem natum mihi herè hoc Carmen. quidni enim friuola mea mittam, ut eliciam gemulas tuas? Ita callidè captator sum: nec nego.

AD STELLAM VENEREM PRO HORTO.

**A** LMA Venus, quæ calorū colis ardua templa,  
 Quæ maria ac terras vitali semine complex:

Quæ sine nec flores hortos, nec gramina campos  
 Vestierint, neque frugiferas animalia terras,  
 Quæ ve solum pedibus sulcant, quæ ve aëra pennis:  
 Tu dea, tu faulrix hortorum in cultibus esto,  
 Adspiresque meo numen genitale labori.

Nam sine te nil Flora potest, nil flaua Segeſtis,  
 Nodutisq̃ue, herbæ pubenti optabile numen.

Pelle malum virus à floribus, imbricatorque  
 Ne noceat Aquilo, neu grando, neu robigo,  
 Effice. diua potes. Solis Lunæque potestas  
 Te superà: sed consensu tua tertia regna.

Nec tibi Mercurius certauerit, aut tibi Maiores:  
 Ipse tuo fascēs submittit Iupiter igni.

Intereà, dum nos fera mœnera militai  
 Exercent, lruique vocant ad cinica bella:  
 (Patria dà veniam) Hauteni securus in hortis  
 Ipse habitem, fallatque meos cultura dolores.

Non ego Bellonæ sim victima, non ego Marti  
 Miles: nascentique alius mihi risit Apollo.

*Sat patriæ Belgisq̃ue datum, si fama Camœna  
Nostra erit, atque aliquis venienti Lipsius awo.*

## EPISTOLA XXVIII.

Herbipolim.

FRANCISCO MODIO S. D.

**E**RGONE viuis Modi, & nos amas? De vtroque enim ambiguo reddebant & locorum interualla in quibus agis, & silentium quo tamdiu non iustè vfus. At nunc emendasti, & longâ epistolâ cessionis culpam eluisti in parte. nam totam tum demum, si perseuerabis. Et quamquam remotum te dolco seiunctumq̃ue à nobis: tamen quòd in ijs locis, & apud eum virum es, lenit desiderium, & gaudio pænè mutat. Amo enim, amo, Germaniæ illum tractû, in quo beatè viximus olim ipsi: & gratulor de hospite, qui, vt scribis, tam benignus est in meliores Musas. Sæpè apud notos prædicaui, sed parùm credulos, Homines etiam illa tellus alit ingenio doctrinaq̃ue pares nobis, fide & virtute meliores. Experiris ipse: & magis experieris cotidie, si omisâ inanium specie, de re iudicabis ex re ipsâ. Interea vides portum aliquem & receptum in his studijs esse, per res adfectas: nec vanum illum quicumque scripsit,

\* *Artē  
mūtā terra  
quāuis  
auicat.*

\* *Τὸ τέχνην γὰ πᾶσα γαῖα ἀντρέπει.*

Ego quidem auctor tibi sim nō commouendi ex ijs locis, donec Belgio huic fiducia status melioris. Nam nunc quā fluctuemur, vides. Fœdera, & domini noui: & omnino aut mutatio, aut interitio rerum. Sed malo aliquid de studijs. Tacitum ad me, siue Eclogas potiùs tuas in Tacitum, si mittes, gratum: & vtar, non sine memoriâ eius, per quem vtar. Paramus enim iterùm vulgare Commentarium nostrum, sed auctiorem. Habemus & libros duos de Venatione iam adfectos, Saturnalium priorum (quæ dilaudas) titulo & exemplo. Sed & de Epistolis meis edendis aliquid cogitabam, si quas colligere aut seruare potui in hoc naufragio nostrarum rerum. Quæ mens iniecta mihi nuper, non nego, per Italos: quorum epistolas ambitiosè editas vidi, & (liberè dicam) non inuidi. Quid enim? à verbis cultas eas censeas? sæpè nec Latine sunt. à sententijs acutas? torpor & tepor merus est. O Italia, vbi Politiani tui, aut Barbari? defecisti: & hoc sæculum ambi-



ambitionis & fuci aliquid fortasse plus habeat, re deferitur & scerâ illâ doctrinâ. Etiam Agellius nobis nuper in manibus: deposuimus, postquâ alijs audiuius eam esse curam. De Matulis illis & Petreijs, iam aliquid inaudiuerâ. sed quid? etiam illæ nitedulæ extrahi volunt è suis senticetis? à me frustra. Tu tantum purga me calumniarum eiusmodi apud Posthium: & animum hunc illi aperiri candidiorem vestrâ huius. De poetis Germanis aliquid dixi aut scripsi: at non de germanis, inter quos mihi ipse. Fucos & de-honestamenta poetarum saltem tetigi: quorû fertilis sanè illa ora. Vidimus nos, & vides ipse. Quis non ibi somniasse vult in bicipiti Parnasso? Itaque vates omnes audiunt, & prodeunt: & compiti sublimesque multi, cum Cæsareâ suâ lauru. Quos non equidem sperno aut rideo: hoc tantum ijs instillo, *Laurigeri multi, pauci Phæbi*. Quin re plerumque didici, animè re poetas, qui titulo illo sunt & nuncupatione. Extrema tua epistola pupugit me de M. Antonio. Itane est? abijt? certè doleo. Nam æmulatiunculas illas eius (ita appellare malo, quàm calumnias) nihil moror. Habere hoc scio ista studia, vt nescio quomodo facilè pariant rivalitatem. quam ego seriò contemno: sed & hoc mihi seriò dolet, contemni per hanc illa. In contentionibus enim istis quis risus sæpè vulgi? & iure, cum tam pueriliter desipientes eos videant, qui ad sapientiam alijs magistri. Ratallerum Præsidentem quod saluere tu patronusque iubexis: ille verò saluus. iam pridem enim à nobis abijt ad beata illa loca: idque præcipiti quodam fato. Nam benè valens ad curiam cum venisset, subito deliquio animi concidit, nec surrexit. Ita creptus patriæ optimus ciuis, nobis amicus. Hoc ante septem menses accidisse scitote, & mecum dolete. Vale mi Modi, & magno illi patrono tuo à me salutem. Lugduni Bata-uor. Nonis Augusti. ∞. Ip. LXXXII.

## EPISTOLA XXIX.

Hagam.

THEOBALDO TEELINGIO.

**A**PPELLA me verò, & litteris, & sermone: nec excusa. vaco semper ingenijs, quibus discere vacat: quale est, & spero erit, tuum. Hoc excusa, quòd ad epistolam profanâ, carmen non addideris: nam id te decebat. An alienum ab Musis me censebas?

E 2

non

non sum. amaui adolescens & nunc amo, & scio eas esse, quæ lato & læto limite ad sapientiam & virtutem ducunt. Lasciua modò caueatur, & obscenæ illius dex laquei, quos in Musicis illis arbutis sæpè textit. Tu redux me appellabis reducem, (nam & ipse iam in vltiorem Batauiam excurreram:) & hoc mihi semper gratior, quò maior in te ardor ad discendum. Ætatis tuæ florem cogita, & æui huius fluxum: quod quæ Æneas ille Homericus aurigæ suo dixit, tibi ego:

\* Verum,  
age, nunc  
manibus.

flagrum &  
splendentia  
frana Acci-  
cipe.

\* Αλλ' ἄγε νῦν μάστιγα καὶ νῖνα σπυλόντα

Δέξαι.

Atque vnà salue. Lugd. Bat. postrid. Id. Sextil.

### EPISTOLA XXX.

Vienna.

NICOLAO BIESIO *Cæsareo Medico.*

**N**os quoque, mi Biesi, Legatum Budensem vidimus. Magna pompa, multi comites: vestis & mores nobis exteris mira. Pellis illa iniecta puerorum anteuntium humeris, numquid abest à prisco Scytharum ritu & habitu, qui pelliti? non videtur. Vestis illa laxa à Braccis? nihil. Sed & honoris habendi ritum, quem Cæsari retrogradiens exhibuit (sollen ne id genti) odoramur esse à Persis. Animianus suggerit lib. xviii. de Antonio quodam, qui transfuga ad eos eorumque mores: *Simul hoc dicens è medio prospektu abscessit, non aduersus, sed dum euanesceret, verecundè retrogradiens, & pectus ostendens.* Garritum hunc præmisi. plura, si voles, in cenâ: ad quam bonâ fide me sistam. Salue.

### EPISTOLA XXXI.

Hagam.

THEODORO LEEWIO S. D.

**I**TA certè oportuit. in viam, inquam, officij redire, à quâ exorbitauimus vterq; nimium diu. non negligentia aliquâ, vt scio, aut contemptu: sed fortasse dulcedine cessationis, & fiducia amoris. Id enim de me fateor; de te opinor. Quin sæpè sic afficior, vt quemadmodum mulieres, quæ vterum ferunt, ad omnia nau-  
seant: sic mihi nec feribendi libido vlla sit, nec legendi. Mare quoddam mortuum esse aiunt, sine vento sine motu: sic sæpè ego.

Sed

Sed tu me excitasti: præsertim illâ parte epistolæ, quâ consilium à me petis de summâ vitæ. Deliberas de coniugio, aut cœlibatu. Difficile mihi sententiam interponere, præiudicio iam pænè deuinctam. Vides enim quid ipse fecerim. Ita nisi à coniugio dixerò, damnem me ipse necesse est aut inconstantia, aut erroris. Sed seponam tamen paullisper eam cogitationem, & de totâ te videbo quasi liber & exsolutus. Ac principio coniugium si quis damnet, impius sit in vtramque legem, & ciuium, & naturæ. Stare genus humanum non posse omnes scimus, sine viri mulierisq; cœtu. Non ergo vniuersè id quæris, credo, an coniugiû probandum: sed strictius, an sapienti, an hoc tempore, an tibi. Sapientiæ studia & vitæ quietem si sequeris, nescio an ducenda vxor. Exempla veterum sapientû in vtriuus sunt: ratio magis est vt neget. Si enim liber animus, Deo & sibi vacans; ad sapientiam & tranquillitatem requiritur: non video quomodo adsumenda illa cura, quæ noctes diesque adhæreat, angat, coquat. Si satis molestiæ in te tuisque cupiditatibus regendis, frænandis: quid aliunde accerfis, cui imperes & moderêre? Cymbam nostram difficulter gubernamus: ecce nauim adiunctam volumus, cum tot armamentis? Et fero adhuc, si reges. sed quid si regere illa vult? si fulmenta lectum scandunt, vt vetus verbum est? quid? nõnne bellum tibi non ciuile, sed familiare sumendum est de principatu? At enim moderatam audientemq; tibi speras. Ita censeo, & opto. sed quâ in re vniquam magis spes & vota sefellerût? An ex composito illo vultu, oculis, verbis, toto corpore ad modestiam ficto, vxorem eliges? crede mihi, nulla fides. Proprium hoc & velut innatum illi sexui, vt crudæ adhuc & vix pueritiâ egressæ simulent, fingant, fallant. At enim fidè & commendatione aliorum, inquires. Nolim equum sic emere aut agrum. Et quâ in re libentiùs, aut minùs cum periculo, fallunt amici? Si in equo aut agro imposuerunt, expostulandi mihi saltem ius est: at id non in isto. Canetur tibi illud comicum, *Habeas vt nactus*: & querelæ tuæ in ventum ibunt, imò in irrisum. In genere hoc prædixerim de sapiente: iam tempora ista videamus. Si res lætæ & prolixæ: magis ferrem te ligari hoc nexu. Nempe publica solarentur: nempe in spem honorum & felicitis æui liberos susciperes, educares. At nunc quid nisi communes calamitates & bella? ne domi tu quæras. *Quid*



nisi exilium, exitium, imminet, & mutatio vniuersi status? ne ad aureum sæculum liberos procudi à te censeas. Denique te ipsa (quod tertio posui) intuere. Animus tibi ingenuus, & corpus: id est vires valetudoq; parùm firmæ. Ætatis quidem bona pars superest; sed & bona elapsa. ingenium tibi come, molle; quod ferre iniuriam potius possit, quàm inferre. Hæc omnia vide sis, an apta ad mores famineos nostri æui. Et Diogenes quidem ab omni ætate coniugium remouebat, satis scitè: *Nam iuueni, inquit, nondum ducenda est vxor: seni numquam.* Græcè hoc sonat melius *τὸ νεὸν μὴδε γάμω, τὸ γέροντ' οὐδε γάμω.* At ego certè non vanè id restrinxi ad statum mediumque hoc æuum, quod velut vinum iam deferbuit, & quale, mi Leewi, est tuum. Hæc in parte vnâ dici possunt, nec pauciora in alterâ: quæ quoniam scio subijci & à te tibi & ab alijs cortidie, laborem non sumam in ijs recensendis. Eò minùs, quòd frustra scio suaderi coniugia aut dissuaderi: quæ à cælesti nutu & à fato haud vanè esse dicuntur. Benè Euripides,

\* *Fatalis  
est viro at-  
que fami-  
næ thorax.*

\* *Εὐρίπιδος ἀνδρὲς καὶ γυναῖκες μορτώματα*

idque didicimus nos ipsi. Bina Socratis monita tantùm addam. Primum, iuvenes cælibes similes esse piscibus, qui alludunt circumnassam & gestiunt inire; contrà, qui iam inclusi, exire: simile in matrimonio esse, quod ambiunt liberi, damnant capti. Alterum, Sciscitanti cuidam Vxorem an non duceret? *Vtrumuis, inquit, feceris, pœnitebit.* In quo verè oraculo concludo, & ambiguum te sententiæ meæ relinquam, non amoris: qui tam verborum à me Epistolam expressit. Vale.

## EPISTOLA XXXII.

*Lutetiam.*

IOSIAE MERCERO S. D.

**A**D me verò sæpè eiusmodi muscæ aduolent (ita per iocum te appellas): imò apes. quoniam tu & litteræ tuæ plenæ suauitatum, & meri mellis. Ipsâ quidem causâ scribendi quid mihi gratius? Appetere te amicitiam meam: quæ si vltro offerenda sit tam benè natis ingenijs, nihil abeam à decoro. Tu tamen antevertisti. etsi non ignotus planè, vt ais: quia famæ aliquis radius te quoq; illucet à magno illo patre: cuius eruditio, & virtus, clara apud

apud omnes. Et tu succedes, imò præcedes: si pergis modò in hoc laudis stadio, quod currere cœpisti recto & felici pede. Nam notæ tuæ ad Cornelium nostrum quas mittis (verè, nō blandè dicam) vix tuæ ætatis. Macte hoc acuminet quod vide te, quæso, ne ambitio deprauet aut calor. Nam illud nisi ad rectum maturumque iudicium dirigis, nocet, non iuuas, & infligis scriptoribus vulnera, non fanas. Nos Tacitum vulgare iterum paramus, cum Commentarijs nostris (siue Notæ erunt) ad omnes libros. Nam priores sanè illi ad Annales, refingendi etiam sunt: quia & lapsus alibi sum, & quædam mihi elapsa. Cur negem? semitam sæpè ingredior, cum maximè censeo viam: & gratiam seriò habeam, si quis corrigat, dirigat, reducat. Ad P. Pythæum litteras iam nuper dedi- accepitne? inquire obsecro. Nam ipse quidem silet: at non in illum meus amor, quod indicabis, & salutè à me nunciabis ipsi & fratri. Vale. Lugduni in Batauis. Idibus. Martijs. ∞. IO. LXXXII.

## EPISTOLA XXXIII.

Gandavum.

ALEXANDRO RATLO *amicissimam salutem.*

**L**ECTIS litteris tuis, mi Ratlo, & dolui dolorem tuum, & gauisus in constantiā sum: quòd videam te quæ euenerunt ita terre, vt ferenda humana sunt, & vt dignum est ijs sapientiæ studijs quæ tractas. Nam reuera hæc bella, hæc turbæ, hi discursus, quid aliud quàm ludi: cruenti fateor, sed tamen ludi, quos instruit ambitio & sequitia nostrorum regum. Itaque non ferenda solum ista, sed ridenda. Et vidēsne cum nuces sparguntur, vt currant pueri, & rixentur? idem isti, qui oppida & arces rapiunt, diripiunt, alieno malo & suo nullo bono. Atqui ea ipsa quæ tanti faciunt, propter quæ sudorem sanguinemque fundunt, si dimotâ vulgi nebulâ consideres, nuces sunt. Quare mi Ratlo mittamus ista, & habeamus eo loco quo sunt: id est, pro nugis. Ad nos redeamus, & ad eum quem dicis \* *τετραγώνιον λίθον*: in quo solo quies & tranquillitas firma: *cetera fluminis ritu feruntur*, vt canit Poëta <sup>\* lapideus quadratus.</sup> ille inter verè sapientes. Senecam nostrum tibi placere ex animo gaudeo. Scio non alios è priscis magis consentire cum Christianâ pietate, quàm eos qui è Stoicâ domo. In quo numero etiam Arrianus est, qui digessit Græcè dissertationes Epicteti, mihi valdè proba-

probatas. Quære, moneo, & lege. Nos hîc turbæ iterum exercent, quæ sub discessum tuum sopitæ. sed sopitæ tantum: nam euigilant iterum & viuunt, metuo ne in reip. malum, & scholæ nostræ exitium. Nisi fallor, ea imminet, vt non discessisse à nobis videre, sed nos præcessisse. De Gallis mihi quidem ænigmata. Veniunt; non veniunt; volunt, nolunt: audent, timent; & omnia ancipiti metu. suspensa. & suspecta. Turcaram princeps aliquid in Africâ mouet: & ager is saltem bonâ fide. Mitto ad te Saturnalium in eorum primam partem De Gladiatoribus, vt videas cruentas etiam illas in pace pugnâs. Salutem quibus dici voluisti, dixi: iidemque te resalutant. de patris tui morbo doleo: quem à me saluta, & tu vale. x. Kal. Feb. ∞. Id. LXXXII.

## EPISTOLA XXXIV.

*Brugæ.*

IANO LERNVTIO.

**S**PE s iterum me fefellit. quid fecimus, quod totiens in nos vana ista dea? Mercurialis ille hodie ad me rediit, negauit posse. Rem dicam: poscere volebat, nec audebat: quia collybum vulgò iam dinumerant trium florenorum in centenos. Id lucellum inhiabat; nec petere scilicet ab amico volebat, nec ego dare, te inconsulto. Tu dispice illuc. aut, si vis, Atuaticum excurrere in hoc statu abeuntium, redeuntium, transferentium, reperies qui velit. Loquere cum Moreto, efficaci ad res tales. Sed quid me celasti? tunc Grudios? Pream, nisi adprobo: ad quietum locum, amœnum, & quod caput, amicum Paci, & eximium à milite ac Marte. Si expedire te vinclis possessionum tuarum potes, abi, curre, vola. Ego nonne aliquando vicinus? si dî me, & mihi Iscanum meum seruant, quam sedem destinaui reliquæ huic vitæ. Cum lege, si securitas illuc; si status, quem Modestia & Probitas non spernat. Parère boni possunt & debent; seruire, ancillari, adulari, non nisi vitiorum ancillæ. Valeat autem æternum mihi patria, si valebunt in eâ ista. Tu quoque, mi Lernuti, (sed ab alâ mente) mihi vale. i. Octob. ∞. Id. LXXXV.

EPI-



EPISTOLA XXXV. *Antuerpian.*

FRANCISCO RAPHELENGIO.

**D**ILATVM mihi responsum ad superiorē epistolam tuam, non dimissum. Dum enim cotidie discessum sororum tuarum exspecto, atque aliud ex alio interuenit; septimanæ aliquot in hoc silentio exactæ, vt vides. Ceterum grata mihi tua scriptio, vti & amor: cui à me cum fide respondebo. Filius tuus in studiis perseuerat, & effecimus ne quid Typographia auocaret illum aut impediret. Cursum certè hunc studiorum interpellari aut sisti, non erat è re eius. De filio altero tibi agnato, gratulor: etiam filius tuus, vt videbis è carmine Genethliaco, quod credo illum iam misisse. In Constantiâ nostrâ pergitur: sæpè negotiis, sæpè valetudine, retardati. Iuuat tamen opus argumentum saltem vtile futurum hodie multis. Nubem enim hanc temporum vides: nec Solem aliquem qui pellat. Ille quidem Gallicus, qui \* DISCVSSVRVM se promiserat, videtur FOVISSE. Et Austri isti cum Circiis mixti & iuncti, vereor vt dent mage maiores tempestates. Omnia hodie Principum, infida, intuta: nec veri solatij vsquam spes, quàm in se cuique. Firmemur iam antè contra hæc omnia, quæ euenire homini non solum possunt, sed communi quadam lege debent. Ciceronis falsi Consolationem vidimus, quæ me quidem adeò non erigit, vt deiciat potius: scripta videlicet frigide, solutè, & verbo dicam, ineptè. Quis ille tam stultus, qui sperauit se posse imponere nobis falsâ hac persona? sub quâ latet aliquis ne superioris quidem, vt suspicor, æui. Bardi Typographi, qui tam ambitiosè hæc diuulgant! sed credo in nostrum risum, & suum quæstum. Valdè me Ciceronis poeniteat, si ille vel in medio dolore tam elumbis. Nusquam nerui, nusquam sententiarum sanguis: ne color quidem verborum, nisi cum cerusâ & fuco. At tu vale, & sine eo me ama. Delphis. huc enim sorores tuas abeuntes deduximus. III. Idus Septemb. ∞. IO. LXXXIII.

\* Ad dictū  
eius allu-  
sum:  
*Discutit,  
& fouet.*

## EPISTOLA XXXVI.

*Viennam.*

IOANNI SAMBVCO S. mitto.

**D**IV mihi nullum alloquium apud te, ne per litteras quidem. causâ & temporum horum, quæ nos turbant: & locorum, quæ seiungunt. Nam nos, vt audisse te credo, in Batauis agimus, apud Oceanum verè vndosum: & iactamur ciuili tempestate, tibi non ignorâ. At nec loca tamen, nec tempora, gratam mihi memoriam Sambuci excutiunt: quam testari volui per hanc occasionem, primò nunc datam. Qui enim illuc viam affectaret, præter hunc adolescentem, nactus sum neminem: & nuncij illi ordinarij, ordines deseruere per hæc bella. In studiis, dum Mars hîc feruct, languidè versamur: ita tamen, vt cogitemus editionem nouâ Taciti, cum plenò iustoque Commentario in eius omnes libros. Eâ in re iuuari me à te posse sentio, vsu libri manuscripti, quem memoriâ teneo Viennæ olim vidisse. non illum quidem antiquissimû: sed è quo tamen non dubiè aliquid eruamus, & Criticâ istâ sagacitate indagemus. Quare si eum ad tempus gratificari mihi volueris; amorem in me ostenderis, & simul morem tuum tenueris rei litterariæ adiuuandæ. Videtur sub has nundinas turò transmitti ad Plantinianos posse: quibus mandata dedimus accipiendi, adseruandi. Velim voluntas tibi & occasio in mittendo non desit: nobis fides constabit in remittendo. Salue ab eo qui meritissimò te amat, Iusto Lipsio. Lugduni Batauor. Kalend. Mart. ∞. Io. LXXIX.

## EPISTOLA XXXVII.

*Hagam.*

THEODORO LEEWIO S. dico.

**S**EMPER amo litteras tuas, præsertim eas quibus (vt sic loquar) nota aliqua impressa est bonæ mentis. Vel hæc postremæ quàm sine adfectione prudentes! quàm verè Philosophû referebant, & sine vllò fūco! Itaque vt calebant adhuc à meâ latorisque manu, iis rescripsi. Melonis tui odor vel hucusque nares meas adflauit; & mentior, nisi saluam mihi mouet & desiderium

fiderium gustandi. Sed cohibe tamen. & vide ne gnatum illum, qui vnicus nobis, nimium properè auellas à matre. Auster saltem & imber hic abeat, & soles aliquot videat puriores. tum licebit,

*Extremum hoc oculis lumen radiatum rape.*

De Alenconio me herclè quid dicam nescio: ita ænigmati similis res est. Venit, non venit: accessit, recessit. Credo non illum Callipidem, qui prouerbio locū fecit, tardius ambulasse, quàm hunc subnixum tot equitum alis. Nec aliud tamen adhuc audimus quàm, Veniet. Si seriò hæc aguntur, facile præfagio difficile & diuturnum bellum: cuius exitus Deo in manu est. Ad nos quidem quid ista? non magis quàm si Æthiopes inter se beligerent, aut noui Indi. In animo nobis pax sit, cum affectibus concordia: & ecce omnia tranquilla. At enim patria periclitatur. Fateor. sed quis nostrum iter præcludet publicis fatis? Habent ista transitus suos, imò interitus: quorum tempora cum venerint, nulla vis aut consilium ea firmet. Et tamen illi ipsi patriæ, cum res feret, non manu, non mente, decrimus: atque hoc scilicet agemus, vt non solum boni viri simus, sed & boni ciues. Vale mi amicissime. Lugduni Batauor. xv. Kalend. Septemb.  
 00. IO. LXXXI.

## EPISTOLA XXXVIII. *Rostochium.*

IOANNI IONSTONO SCOTO.

**Q**UOD & me amas, & Constantiam meam laudas, mi Ionstone: alterum valdè amplector & approbo, alterum timidè, quia scio reipsâ non attingere me culmen hoc laudis, in quo collocat me tuus affectus. Etsi tamen non nihil blanditur, quòd David Chytræus (quis ille vir?) pariter tecum, vt ais, siue iudicat, siue errat. Quidquid huius est, amo iam, amo Constantiam meam, quæ tam multos mihi conciliat amicos. In quo numero vt fidenter te deinceps censeas, mi Ionstone, iubeo, non solum rogo. Quòd si Deus mihi tangere & videre Germaniæ solum iterum dederit (fiet fortasse voto citius, vt res hîc fluunt.) te videbo, & dexteram iungam, tesseram Fidei & Amoris. De Carmine gratiam tibi habeo, magis magisque habiturus,



biturus, si crebrò me epistolis tuis salutaueris, in quibus notas claras video elegantiae praeclarae & doctrinae. Lugd. Bat. xi. Kal. April. ∞. MD. LXXXVIII.

## EPISTOLA XXXIX.

*Lotetiam.*

IANO GULIELMIO, S.

**L**IBENS vidi Quaestiones tuas Plautinas, mi Gulielmi: in quibus non doctrinae solum notae vberes & acris cuiusdam iudicii, sed etiam amoris in me tui. Partem enim mihi inscribis. cum magnâ meâ gratiâ (liberè profiteor) vel quia scriptoris eius res est, quem amo vnicè, vel quia beniuolentiae hoc testimonium me delectat ab eo, quem aestimo, quemque amo. Ego profectò si umquam occasio erit, praestabo me ad gratiam referendam non modio, sed horreo toto. At in libro eo tuo, magnae mihi voluptati non semel interpositum iudicium, de studio Sapientiae & Morum. Maeste hac sententiâ! Obsecro enim, ut quid ista humanitatis studia tam ambitiosè adfectamus, tantum propter ipsa? Abutuntur plerique ad malam & vanam pompam, ut scis, verè cum Appione illo cymbala quaedam inanis iuuentutis. Tibi melior, ut video & gratulor, mens: atque ut porro sit, quaeso & horror. Nostrum illud de Constantiâ censeo vidisti. nunc damus De Amphitheatro, & cis paucos dies habebis: etsi opus ludicrû, & natum mihi per remissiones, ut stilus ipse indicabit. Dedi litteras ante septimanas sex ad Egmondum, quibus inclusae alterae ad Busbequium de te, inò pro te. quid iis factum, nescio. quia haecenus nihil inaudiui. Quaeso inquire. Ille quem tangis, quid & ubi agit? Utinam in gratiam cum virtute redeat! nam mecum tunc ut volet, & quando volet. Busbequium si conuenis, salutem illi à me dicito: & è iuuentute selectâ, Iosiae Mercero, si nosti. Passeratio item doctori publico, & si quibus aliis ex eo numero procerum innotuisti. Vale.

EPI-

## EPISTOLA XL.

Brugas.

IANO LERNVTIO S. D.

**C**ISTAE tuæ hesternò die ad me perlatae binæ. hoc ante omnia scite te volui: sed perlatæ benè madidæ, per continuum iumbrem. Itaque valdè veremur, si quid in iis sit, quod pericliteretur ab vdore, ne purifcat: præsertim si quid è lino aut lanâ. Cogitet tua vxor: & si videtur, aliquem fidum huc mittite, qui inspiciat, aperiat, euenilet. Nos quidem amicam & sedulam omnem operam custodiamque pollicemur: quantum id pote. Collocabimus etiam eas bono & aërio loco. Scripsi bis ante septimanas aliquot, & valdè fallor si meas non accepistis. Carmina tua adhuc apud me sunt. Doufam enim exspecto in horas, cui velim ostensa. Ego, nisi quid interuenit, intra septimanas duas aut circiter Antuerpiæ ero. velim sapè te videre & amplecti: & si illuc venis, posses mecum pergere in Batauos: atque ita ipsum iter nobis non sine gaudij & amoris fructu. De Gifelini re, omnia hactenus nequiquam, & non nihil turbellarum inter Magistratum & Curatores, occasione professoris cuiusdam admissi Senatu inconsulto. Priuata profectò & publica turbant. quid refert? si quies modò apud nos & in hoc animo sit: ex quo puro siue impuro, liquidum omne aut turbidum manat humanarum actionum. Vt in corpore ægro & corrupto, quidquid infertur, alimentum est morbi, atque ab it in noxam: sic in homine, qui internum illud non depurauit, pectus dico, fontem & originem cupiditatum. Opes adfluunt? auaritia te torquebit, & angor seruandi, dispensandi. Desunt? inopiam non feres, & quæres eas per vndas & per ignes. At mortus ab animo petendus est: cui composito semel & securo, numquam superest aliquid aut deest. Sola, mi Lernuti, quies est & internæ illæ opes,

\* Οἷον τ' εὖ ζῶσι, καὶ ἀνείδι καλέονται,

vt ait Homerus. Vides philosophari me tecum: nec excuso. amplius dico, Sæpè faciā. Valdè enim te tuamque egregiam naturam trahere ad hæc alta velim (quò scio propendes:) & collocare te supra hominem, etiam dum es in humanis. Et enitèris, si nitèris. Vale, & salueat à me virorum optimus noster Gifel-

\* Qui recte viuunt homines, diuiseque præcantur.

linus, à quo responsum exspecto, sed non lentum ut solet.  
Lugduni Batauor. III. Non. Feb. ∞. IC. LXXXIV.

EPISTOLA XLI. *Pontem-Museum.*

GODSCHALCO STEEWECHIO S. D.

**M**IHI & scriptio tua grata, & magis Coloniam reditio: quam extra noxam fuisse gaudemus, etsi non extra metum. Scinus quàm intux viæ his temporibus: quibus ad iniuriam omne ius prædonibus non militibus, dant hæc latrocinia non bella. Tu quoque gaude. portum enim iterum attigisti, in quo acquiescere possis, Musarum suauiter adspirante aurâ, sine vento vilo aut nimbociuilis huius tempestatis. De promissis Plantini, securus es. hominem non nosti, si ambigis: & credi illi potest, tamquam Fidei ipsi. Nec tamen deero submonere, cum redierit: quod fiet cis paucos dies. De Modio, certè amicus ei sum. (ingeniû & adolescens eius virtus ita merentur.) ac valdè auctor tibi, sic rem in scriptis tuis temperes, ut nequâ parte eum aut stringas aut lædas. lædas autem? laudes imò volo. Ita de illo ipso Vegetio meruit: & sepone mihi, sodes, omnes istas æmulatiunculas, quæ intercurrent hæc studia malo iure, malo more. Inuidet quispiam? hoc ipso inferiorem se ostendit. quia apud humiles dumtaxat animos habitat, & in altos dirigitur liuida illa dea. Sed tu non talis. moneo tamen vel ex superuacuo, quia peccatum hoc in litteratorum nostrâ gente peccatur hodie nimium crebro. De Vegetio ipso sic sentio. scriptorem non malum potius, quàm bonum esse: & hoc tamen quod in eo boni, deprauatum & pollutum à patribus variâ labe. Creber enim in illorum manibus: quæ nec innoxæ vsquequaque, nec puræ. sed nec oculatæ. Itaque non iniuria ad perpurgandû cum tu Modio nostro velut optio succedis: & opto ut cum publico fructu, cum tuâ famâ. Quod fiet, si stilum manumque modestiâ quâdam temperabis & diriges: malisque ambigua quâdam vlcera relinquere, quàm districtè auferre omnia, & præcipiti quodam ferro. Medicos in Criticâ istâ ferre possum: sectores ad Matrem deûm ablegem, procul à virginali nostro choro. Vale  
mi



ini Steewechei, & mutuiter me ama. Lugduni Batauor. Po-  
strid. Nonas Octob. ∞. IO. LXXXII.

## EPISTOLA XLII.

Vltraiectum.

THEOD. CANTERO S. D.

**I**TANE Dalius noster abiit? abiit, non visurus amplius, non videndus. Sanè dolui: eò magis, quòd subita ea plaga, & præter expectatum. Nā letalis quidem ille morbus ( phthisis enim vera erat: ) sed quis putasset tam præcipitis eum fati? Trahere, vt scis, plerumque solet, & lento passu ducere ad Orcium illum thesaurum. Sed nimirum vt nauim interdum improuisus vortex absorbet: ita homines nigra dea. & præsertim eos, quibus indoles melior, & ingenium supra annos. Quod in Dalio planissimè fuit. Claudium Quadrigarium scribere memini: *Hac maxime vexatur deorum iniquitas, quòd optimum quemque non sinunt inter nos diurnare.* Aptè & verè. nisi quòd iniquitati impiè tribuit, quod est æquissimæ æquitatis. Cur enim cælestes illæ animæ diu in hac fæce: abeant imò, & euolent ad suū cælum. De Arnobio, vrge cœptum. Quis post Tertullianum inter sacros scriptores doctior? ideoque doctorum limâ dignior? Etsi bona sanè in eo opera Gelenij: quamquam interdum ( quis non Criticorum? ) exeret per acumen nimium aut calorem. Satyrâ quam vulgavi his diebus, en tibi. Nomen te terret? frustra. edentula est, & vt antiqui nostri loquebantur, planè innox. Lasciuia alibi agnoscas, nusquam morsum. Artemidorum tuum totum auide legi, & velut *ἀμύσλ*. Nescio quomodo non sperno totum hoc diuinare ( id quoque fortasse à nostrâ porticu: ) & eam rem visus mihi ille com-  
modè & acutè tractasse, ex ipsis fontibus naturæ. Salue. & salutem à me, vt Comicus noster ait, plenis faucibus propina Lamberto Burchio Decano, viro qui litteras & litteratos vnice amat, ideoque digno qui ab iis vnice ametur. quod me bonâ fide facere ei nuncia, imò sponde. Lugduni Batauorum, quo die Cæsar olim in Curiâ Pompeij. ∞. IO. LXXXI.

In Arnobij tui isto loco, libro I. *Et tamen, ô isti, qui pollutas res nostras vitiorum criminamini: sribiligenes & vos istas in libris illis*  
maximis

*maximis atque admirabilibus non habetis? Nonne aliud hæc vtria, aliud dicitis hos vtres? calus, & calum? non item filius & filum? crocus & crocum? fretus & fretum? sanguis & sanguen? Odor duplex vitium. Ac primum scripserim, res nostras vitio verborum criminamini. Fugit enim omnino prior illa verbi syllaba, retrahenda ex Arnobij ipsâ mente. Hoc scilicet politi illi & docti Romani obiciebant nostris, solæcismis obfitas res nostras, vitiorum deformitate pollutas, ut ipse præmisit. Respondet: variari sermonem pro arbitrio, & illos ipsos veteres à talibus solæcismis non abfuisse. Nam, inquit, aliubi hæc vtria, aliubi dicitis hos vtres. Ita enim alterum vitium tollo; Aliubi, inquam, scribo, non Aliud. Clamat res, & sequentia exempla. An enim aliud sanguis, quàm sanguen? fretus, quàm fretum? Minimè. Variatum tantum licenter genus ostendit, & modò Vtres positos ἀντὶ τοῦ ἀσυνων, modò Vtria. Ecce in Nonio: Vtres vsu generis masculini tantum. Neutri, Liviæ Andronicæ: Flacci teget vtria.*

## EPISTOLA XLIII.

Hagam.

THEODORO LEEWIO S. D.

**T**E verò laudo, non imitaris meam pigritiam, & quamquam ad binas tuas iam filui, tamen tertiis etiam lacescis. Etsi, mi Leewi, nulla hîc pigritia ignoscas aut miserearis potius, si scias quàm per omnes hos dies distrahar & distinear negotiis nec seriis nec bonis. Amici & alieni adpellant, interpellant: ad conuiuia vocant: & hoc putant comitatem, auferre mihi vsum veræ vitæ. Pareo tamen, & quamdiu in hoc proscenio sum, sustineo personam. Mallem ad interiora illa gaudia diuertere, studia dico & sapientiæ exercitationes: à quibus non per hæc solum acerbissima tempora, sed etiam lætiora, veros petam quietis & gaudij fructus. Sed differo sæpè illa, non dimitto: quod tibi etiam vsu venire certò scio. Plantinus nunc adest, ferò à me monitus de\* Thalete illo Gallico, ferò ad suos iterum scripsit: & illi responderunt iam Lutetiâ se petiisse. apud nos scilicet sapientia illa non habitat. De adolescente quem nuper mihi commendaras: seîs quàm omnia velim tuâ causâ. Hoc tamè nolo. & si rationes omnes meas audias, scio, ipse non velles me velle. Multis iam recusavi. quos omnes offendo, si vnum admit-

\* Ita indigetani Michaëli Montani libri Gallicum Gustuum titulo: primum, sapientem, & valde ad meum gustum.

admittam. denique rimam aut fenestram hanc si aperio, toto ostio admittendi alij sunt. Quies autem mea id non patitur, & ratio vitæ quam per silentium ago. Peto ergo ut id excuses: & maiora aliqua à me petas, cum opus erit, non neganda. Institutum tuum de omisâ domo, hætenus probo si in eo perseveras. Semel enim constituendum est quod vitæ genus eligas, solitarium an sociabile, illud cum paucis & sapientibus quos melior Deus adspexit, commune tibi futurum; hoc, cum multis. Et vtrumque tamen illi rectum, qui incommoda vtriusque fert. nam ut omnia tollas, vanè cum vulgo speres. Siue vxor ducitur, siue omittitur: habebis quod doleas, quod querare. nec in hac omni vitâ tam optabile aliquod bonum est, quod non mixtum poculo aliquo mœrorum. Hæc publica & æterna lex: cui, improbus & refractarius est, quisquis repugnat. Ut athletis olim fors non electio aduersarium dabat, cum quo certarent: sic cuique nostrum vitæ suam conditionem fata, cum quâ luctemur. Hanc vincere oportet, id est ferre. Huius enim pugnæ robur omne in patiando est, & victoria in cedendo. Res publicæ non in bonâ spe. Præcipuæ aliquot Flandriæ & Brabantia: vrbes nauseare incipiunt, & fastidire præsentem hunc statum. siue diuturnitas belli id facit, siue gubernatio non vsquequaque inculcata. Consilia arcana agitare dicuntur de paciscendo cum hoste. quidquid horum est aut erit, nos pessima timere nihil nocuerit: & ut pugiles, iam nunc parari ad strenuam cum omni sorte pugnam. Paupertas imminebit? exsilium? carcer? proponamus interdum animo has imagines; & persuadeamus illi quàm nihil in his aut certe non multum mali sit illis, qui mala ea non putant. Reuerà enim uti opinio diuitias bonum fecit, sic eadem inopiam malum. Sed hæc facilia dictu videntur: fortassis etiam factu, si quis conetur. Nunc plerique eò stultitiæ venimus, ut nec aspirare audeamus ad bonam mentem. Sicut ij qui phrenesi laborant, irrident aut verberant suos medicos: ita nos. Vale. & me amantissimum tui, ama. de hortulo tuo nihil narras noui. meus in eadem causâ. qui iam pridem animâ agit, aut potius egit. Credo enim per huius ipsius diei æstum ablatum illi omnem succum & vitam. Hoc quoque feramus. Leidæ. VIII. Kal. Iun. ∞. IO. LXXXIII.



EPISTOLA XLIV. *Antuerpiam.*

GASPARI SCHVERMANNO IC. S. D.

**L**ITTERAS tuas, mi Schuermanne, libens vidi: at nondum sororem, quam ne frustrâ mihi commendaueris efficiam, si quâ in re operâ meâ illi vsus. Constantiam nostram quòd laudas amasque, gaudeo: complecti magis te velim & amare virtutem ipsam. quâ certè in omni æuo, & hoc nostro in primis, opus. Hostis, vt audio, vicinus vobis, perfidiâ eorum in quibus numquam fuit eritque fides. qui vt trutina in eam partem vergit, in quâ plus ponderis; sic ipsi in eam, vbi plus æris. Pestis iam olim & calamitas nostri fundi. sed quâ auertas? cum etiam nunc immixti nobis, nec longè à clauo, quibus idem morbus. Ambitio aut Auaritia multa regna & opida euerit: vtinam ne vtraque hunc Belgicæ statum! Horraris me, vt iuueni. votis possum, non consiliis: quis enim audiet? Publicè dico. at priuatim si quosdam possim erigere, & in singulis ciuibus de totâ patriâ benè mereri; non immunis hæc mea quies. Conati id sumus in postremo hoc scripto, & conabimur porrò, si Deus mihi dat vitam. Nam otium ipse mihi parabo, etiam in æstu negotiorum. Gabrieli Roelandio, ad finem tuo, velim ex me nunties beneuolam salutem. Verè cum amo & æstimo inter paucos meos Belgas. Vale. Lugduni Bat. posttridie Non. Nouemb. ∞. IO. LXXXIII.

EPISTOLA XLV. *Toletum.*

ANDREAE SCHOTTO.

**C**ARVISSE me alloquio litterarum tuarum tamdiu, mi Schotte, non re solùm, sed cogitatione molestum fuit. Illud, quia priuari voluptate eâ mihi durum: istud, quia trahebatur animus hoc silentio in varias suspitionum partes. Quid censerem? mutatum esse te? non fidei tuæ videbatur, non amoris. Offensum? verebar. vtrique cum oculos flecterem ad illum, qui non mihi, non bono cuiquam satis bonus. Sciebam litteras te crebrò commutasse cum eo, & sermones: sciebam & hominem duplicem, cuique (sed non mente Ennij) *plures linguæ & plura corda.*

In

In aliis didici, quàm illi volupe disjungere & soluere, qui mihi iuncti. At rursus tuæ prudentiæ videbatur, non temerè ei credere, qui aliarum rerum apud te sæpè vanus. & vt video ac gaudeo, haud planè credidisti. Litteræ hæ tuæ mihi testes, scriptæ ex veteri more & amore. nam binas alteras, quas dedisse dicis, non vidi. Istæ me delectarunt; & te mihi restituerunt, me tibi. De mansionem in Toleranâ vrbe, & in illustri domo, gaudeo. eò magis, quoniam splendorem hunc cum fructu video, nec interiora illa tua studia interpellari aut abrumpi: quod sæpè in illis aulis. Senecam patrem quòd paras, approbo. Vnicè me sapientia in filio delectat: in patre comitas, lepos, & facundia quædam profluens ac simplex. Sanè Controuersiarum illi libri mirificè non corrupti solum, sed abrupti: atque opus in eliminandis ingenio meliore, sed inprimis libro. quem valdè veterem & integrum si repperisti, vt ais, apud Couarruiam; vt ere, sodes, & adnitere. nos iuuabimus in parte. Nam quæ notata mihi, quidni transmittam libens? De Lanoij nostri morte, valdè mihi acerbum. Amabam adolescentem altæ indolis, niuei pectoris: & destinabam eum olim in corruptâ hac nostrâ nobilitate velut geminam. De Papio etiam, vt video, inaudisti: qui inersus Mosâ flumine, dum in eo iuueniliter ludit & natat. Sed hæc tristitia. illud lætius, quòd amicum mihi te interprete & tamquam parario conciliatum video Ant. Couarruiam, virum à stirpe, à fratre, à se verè illustrem. Deus bone, quæ illa ad me epistola! mentior, si ab aliquot annis litteras vidi magis littératas. Imbutum profectò arcanâ doctrinâ pectus illud oportet, quod promittam docta. Quidni ita iudicem? facile nobis \* *ἐν τῇ χειρὶ τοῦ ὀφθαλμοῦ γινώσκων*. Veterani venatores ceruum ex impresso vestigio dinouerint: ego ex scriptiunculâ virum. Saluta quæso à me: & quoniam te ferente, & sub tuâ velut manu, hæc amicitia surrexit, effice vt eodem te irrigante, augeat & crescat. Libellos nostros misimus, & in his Electa: in queis reperies amicam memoriam tui. Iure. quia amamus te, & æstimamus: quod velim à te mihi fieri, alterum certè. Vale. Nonis Iulij. ∞. IO. LXXXII.

\* 2 simbria  
de veste indicare.

EPISTOLA XLVI. *Vltraiectum.*

EVERARDO POLLIONI S. D.

LITTERAS tuas & adiunctum Carmen, Euerarde, legi lūbens. Alteræ memoriā mei; alterum diligentiam tuam testabatur: quam te non remittere in ipsis remissionibus, lætor. Et ita te dignum est. Quid ætatis sis, vides. in hoc vere, nisi virtutis doctrinæque feceris sementem, frustrā cū ætas erit, expectaueris fructum. Indoles tua ingeniumque ad alta te vocant, & sæpè Homericum illud instillant:

¶ Omnis  
virtutis  
memor  
est.

— Παιδείας ἀπὲρ ἡς μὴ μόνον:

nec nos monitores tibi defuimus aut doctores. Nisi sequeris & adsequeris, præter ipsum te, quem culpes? Feriæ nostræ finem habent cum ipso Caniculæ fine. Sub id igitur tempus te expecto: sed ad Valerianum scitum: *Vegeta ingenia quò plus recessus sumunt, hoc vehementiores impetus edunt.* Vale. Lugduni Batauorum. VI. Idus Sextil. ∞. IO. LXXXI.

EPISTOLA XLVII. *Antuerpiam.*GABRIELI ROELANDIO IC. *mitto salutem.*

GRATAE mihi tuæ gratiæ: quas tamen ita ad me mittis, ut ipse eas non dimittas. Habitant enim apud te illæ Diuæ: nec aliud pectus magis amant, scio, inter meos Belgas. Fama ita mihi antea dixerat: nec mentitam eam, firmant lepidæ istæ litteræ & litteratæ. Atque vtinam post hos nimbos lux & sol aliquis tranquillitatis; in quo apricari nobis liberè liceat, & sermones sæpè miscere, non solum scripta. Voueo. quid sperem tamen nescio, cū oculos deflexi ad hunc rerum statum: qui indies minùs stabilis, & nisi à Deo aliquo fulciatur, (non enim à Gallo illo tibicine) ruet. Iani Guilielmi litteras accepi: paullò antè etiam librum Questionum. quem ego ita probo, ut negem aliquid melius in hoc genere vidisse ab aliquot annis. Rectam viam adolescens ille ingressus est: & ingenium in eo ac iudicium pariter magna. At tu mi Roelandi salue, quod ut mihi quoque magis magisque sit, litteris me tuis sæpè appella. Doufa, nisi fallor, scripturus



rus est, quem scire debes tui peramanter. Adfinem tuum  
Schuermannum saluta. Lugduni Batavi. Non. Maijs. ∞. IO.  
LXXXIIII.

## EPISTOLA XLVIII.

*Viennam.*

CAROLO CLVSIO S. D.

**E**T salutem à te accepi, mi Clusi, & munera quæ Plantinus  
noster reddidit; bis mihi grata, quia & à te missa, quem taci-  
to quodam sensu dudum amo, & quia missa in optatum mihi fi-  
nem. Vis enim ea sancientiæ amicitia esse, & offers velut arras:  
quas libens accipio, & restipulor tibi sanctè, eâ fide & officiis cul-  
tum à me iri hanc nouam amicitiam, quæ sunt inter verè bonos.  
Talem enim te scio, nec minùs integritate & ingenuâ quadam  
virtute clarum acceptumque, quàm doctrinâ. Atque vtinam  
tempora aut conditio nostra permittant, minùs longè vt absi-  
mus: non litteris solùm beniuolentiam hanc foueremus, sed allo-  
quijs & adspectu. Sed istud quoniam non datur, nec fortassè citò  
dabitur (augefcunt enim hæ turbæ, & in isto mari cottidie maio-  
res fluctus: ) quod relictum est alterum amplectar, & te amicif-  
sime Clusi per chartaceum hoc æquor (vt cum poëtis loquar) sæ-  
pè adibo, sæpè salutabo. Vale. Lugd. Bat. Non. Maijs, ∞. IO.  
LXXXIV.

## EPISTOLA XLIX.

*Antuerpiam.*

IOHANNI VIVIANO S.

**V**TRVMQVE libellum carminum tuorum accepi, mi Viuia-  
ne: gratissimum mihi & argumento, & tersâ (ita sentio)  
versione. Sciunt experti, quàm arduum sit in talibus & mentem  
scriptoris exprimere, & non abire à proprietate aut, venustate pri-  
sci sermonis. quod vtrumque egregiè es adsecutus. Atque meo  
voto, poëtæ nostri alij laborent in similibus argumentis: quibus  
non oblectari tantùm animi possint, sed instrui & iuuari: pietas  
& mores inferi, qui nimium exsulant ab hoc æuo. Itaque Pro-  
uerbia eiusdem regis, hortor te, accelera & vrge; quibus ne in  
externâ quidem sapientiâ melius aliquid apud omnes Sapien-  
tes. Otium nōne adest? Mercurius certè vester non calet. Mars

vobis ante portas, & hactenus non nimis felix. Deus tamen ille noster iuuabit : quem bonum & propitium semper scimus bonis, vtcumque externa ista cadant. Remitto muneri Constantiam nostram recusam, cum Epistolæ nouæ additione ad Lectorem. Doufæ non libellos tuos offerre potui, non salutem. abierat enim à nobis in Angliam peregrinandi causâ. De loco Iosephi nihil mihi in mente, præter adfentiri Ortelio. Sed nec in Serrato nummo iuuo multum : de quo tamen quid sentiam, iam dixi in Notis meis ad Tacitum, qui tantum non absolutus. Vale mi Viuiane, & pariter me ama. Lugduni Batauor. ∞. .IO. LXXXIV.

EPISTOLA L. *Lugd. Batauor.*

I A N E H A V T E N E

**A**LIPSI O tuo salue. Suaues herè conuiuias habuimus (auribus enim meis inerrat ille sermo) elephantos. Multa de ingenio eorum, de quæ mirâ indole, garriuimus : omnia iucundè, nisi quòd in plerisque indignabar haud plenam mihi esse fidem. Quid censebatis? madidum esse me? non fui. Quin siccus nunc & sobrius ingeram tibi eadem : & laudum hunc campum stilo paullò certius decurram, quàm linguâ. Nónne Hilariùm isti dies sunt? lubet ludere hunc lusum. Sed fides mihi priùs stabilienda veterum, quibus præcipuè innisa mea fides. Non nemo enim eam herè eleuabat : & nimios harum rerum aiebat fuisse, aut vanos. Itáne? quibus igitur hæc res notior? Nobísne, qui omni hoc nostro æuo vix \* vnum vidimus, eum quæ pusillum, iuuenem, bonarum artium rudem : an illis, quibus cottidiè bellua ea in ore, in oculis? quibus tam crebra de ingenio & moribus eius pericula facta, in bellis, in ludis? Habebant enim & docebant magnâ curâ, Afri, Asiani, Græci, ad prælia : Romani magis ad spectacula & Venationes. Quamquam Europæis tardè sanè innotuit ; & \* *ἐλέφαντας* (Pausaniæ verba sunt) *ἔρωτ' ὁ ἴδ' ἐκ τῆς Ευρώπης Ἀλέξανδρος ἐκτίσται* : qui victâ scilicet Indiâ, intulit siue immisit. Sed ab eius tamen morte statim crebri : & transportauit in Italiam ipsam Pyrrhus, bello quod cum Romanis. Hinc quoque iam Romæ nobiles. & magis per Punica bella : quibus tanta copia, vt vno tempore centum quadraginta duos ceperit & in urbem miserit L. Metellus.

\* Illū, qui  
anno LXII.  
donū Cæsari  
missus  
ab Hispaniarum rege.

\* *Elephantos primus inter Europæos Alexander habuit.*

tellus. Nam Critolaus apud \*Plutarchum apertè mendax; qui à <sup>\*In Paral-</sup> Paulo Æmylio, bello Pyrrhi, centum sexaginta Romam missos <sup>lelis.</sup> vult, & quidem turritos. At postea sanè Romæ semper: siue capri, siue magis pretio parati ad populi voluptates. Vides initia, vides frequentiam. quæ magis expressa apud Plinium: quem, si voles, lege. De fide igitur veterû cur ambigimus? Nõnne nouerunt hoc animal? intimè atque optimè. An fallere nos vulerunt de compacto? nec potuerunt quidem, in re cottidiè omnium oculis sensibusque expositâ: & in quâ miracula milleni aliquot homines simul viderunt, id est theatra tota. Istâ ipsa ætas fidem fidei illorû struit, etsi in alio illo orbe. Lusitani nauigationibus suis terras eas aperuerunt, in quibus animal hoc crebrum. Insula Madagascar eos habet, & quidem Indicis maiores: habet Zeilam, vbi vanales sunt miro modo. ad mensuram enim admetiuntur, vt pannos, aulæa, telam: tanti palmos singulos. ita cum magnitudine pretium crescit. Habet prouincia Malabar, Goa, & tota illa ora: itemque regnum Beniamen inferioris Æthiopix, sed omnes (quod notes) albos. Qui adierunt, qui viderunt, eadem aut similia narrant de ingenio bruti huius non bruti. Quæ vt seriò aliquando noscas ac credas: cape à me de naturâ eorum & moribus. quæ nihil aut paullum ab homine abire, miretur aliquis, imò indignetur. Sed priùs vniuersè commemorabo elogia de iis veterum: inde facta ipsa distinctè, & exempla. \*Aristoteles inter alia <sup>\*Lib. ix. Hist. cap. xlvj.</sup> de elephante: *ἔστι δὲ καὶ διαίτητον, καὶ τῇ σωφροσύνῃ ἀλλήνῃ ὑπερβαλλόν:* est autem apprimè bonis acutisque sensibus, & cetero intellectu excellens.

\*Cicero: *Elephanto belluarum nulla prudentior.* \*Idem: *Elephantum acutissimis sensibus.* Quin homini ipsi adiungunt passim. \*Cicero: *Esse illi bellæ quamdam cum genere humano societatem.* \*Strabo: *ἰγρύς ἐστι λογικὸν ζῷον. adsidere animali ratione prædito.* \*Philostratus: *τὸ τοῦ ζῷου δὲ ὅτι ἐστιν αἰθρῶτα τὰ πάντα, καὶ ἐνέσθιν τε καὶ βέλτερος:* hoc enim animal proximum ab homine colloco, prudentiâ & consilio. Plinius: *Animalium maximum elephas, proximumque humanis sensibus. quippe intellectus illis sermonis patris, & imperiorum obedientia, officiorumque quæ didicere memoria, amoris & gloriæ voluptas. imò verò, quæ etiam in homine rara, probitas, prudentia, æquitas, religio quoque, siderum solisque ac lunæ veneratio.* Et Plinius sanè effusè: tamen verè. ad cuius accuratam laudationem, videor non ineptè diducere posse & adducere



cere lecta mihi testimonia aut exempla. Tribuit primò,

*Intellectum sermonis patrij.* ] Quod mireris. Nam cum duo velut limites sint, quibus Hominem à Bruto disparamus, Sermo & Ratio: prior iste vide quàm vacillet. Sermonem patrium ait ab iis intellegi: id interpretor, Indorum, Æthiopum, Afrorum, & ubi-

\*Lib. IV.  
cap. XXIV.

\*Libro  
XLVIII.

\*Li. XIII.  
cap. XXII.

\*Lib. XV.

\*In libello  
De Aro-  
matibus.  
\*Plinius &  
Aristot.  
meminere  
eiusdem  
morbi, sed  
Plinij locus  
malus, cui  
corrigen-  
do non hie-  
cus.

cumque nati. Præter Plinium, \*Ælianus : *συιαῖσι γδ ἐλέφαντες, καὶ γλώττης ἀνθρώπωνος τὸ ὅτι χωρία: capiunt & humanum sermonem elephan-  
tes, sed indigenam.* Etiam \*Dio: *ἤδη καὶ ἐκείνο εἶπον, τὸ φωνῆς τὸ πατρῴϊον οὐκ ἂν τοῖς ἐπαίειν: Etiam hoc aiunt, eos patriam vocem audire atque intellegere.* Nec alia res certior. Institutionem eorum vides? linguâ fit. Domitiram? linguâ. Incitationem, reuocationem? linguâ. Denique vt clauus nauim: sic animal hoc impellit dirigitque, quò libitum, humanus sermo. De institutione, \*Ælianus audi: *Docentur, inquit, atque instituuntur ad varia φωνῇ τιμι ἐπιχωρίῳ, ἡπασθευῶ ἐπαίειν εἰδήχασι, φύσει τῇ ἀπορήτῳ & μάλιστα γὰρ ἰδίῳ τῷ ζῷε τῷδε, sermone vernaculo, cuius miro quodam & ineffabili modo ac velut peculiari naturâ sunt capaces.* De domiturâ, \*Strabonem: *Primum, ait, captos vinclis ac fame domant, καὶ δὲ ταῦτα πειθαρχεῖν διδάσκουσι, τὰς μὲν δὲ λῶδα, τὰς δὲ μελισσοῦσιν καὶ τυμπανισμῷ κηλύντες, deinde cicures eos reddunt mansuetosque, hos sermone, alios cantu aliquo aut tympani sonitu delinientes.* De regimine toto: cottidiana olim exempla in bellis, in pace. atque item hodie. Quin furere etiam cum incipiunt & à se abire, ad mentem reducuntur oratione. Credere ita seriò Christophorus Acosta me iubet: cuius assertioni præstruenda breuiter fides. sæpius enim testimonio eius vtat. Is gente Hispanus, professione medicus, ad nouū illum orbis tractum abiit, quem Orientalem Indiam vocamus. Diu illuc egit, lustrauit, scripsit: & inter alia de elephâtis non pauca, visa sibi aut à visoribus accepta. Crebrum enim valdè & cottidiani vsus, animal in iis locis. Is igitur \*refert: Genere morbi tentari elephantos quotannis, quod haud distat à \*furorc. caussam, amorem esse, & venire cum venit ad eos Venus. Tum bacchari eos, furere, lædere, incurrere: nisi quidem vinclis coërceantur. quod fit ab incolis studiosè. *Sed eum morbum haud fermè aliter tolli, quàm pharmaco verborum. Adstipere belluæ magistrum, increpare acriter, & ostendere fœditatem. Tantâ mne belluam & reginam aliarum ita dementire per adfectum? Vilitatem eam esse, degenerationem à naturâ & à stirpe. Rediret ad sese, & conculca-*

ret

ret amorem, qui turpiter nimis ipsum. Et his talibus, quæ etiam homini vtiliter adhibentur, fieri medicinam. Quomodo autem possunt ista, nisi si non audit solum, sed imbibit, & capit? Nec verò, ut aliquid mirius dicam, audiunt solum sermonem, sed edunt. Oppianus disertè Elefantos colloqui inter se vult:

Φήμι δ' ὡς ἐλέφαντες ἐπ' ἀλλήλοις λαλέουσι,

Φθογγὴν ἐκ σώματων μεροπωνίδεα τρυφίζοντες.

Fama est inter sese sermonari elephantas,

Distinctasque susurrare atque emittere voces.

Acosta ille idem nihil acceptius in regno Malabar esse ait, quàm quòd hæ belluæ communicent inter se sermone. Denique vis in hacre aliquid mirissimum? (ignosce. tanta nouitas egebat nouo verbo.) edunt & loquuntur etiam humanam vocem. Boues inter prodigia Romæ locuti olim: iunge & elephantem. Atque audi ipsum Acostam: *Erat, inquit, in urbe Cochim elephas, qui operas diurnas præbere solitus ad portum & res marinas. Eum fortè iam fessum urgebat nihilominus Urbis eius Præfectus, ut Liburnicam quam communere cæperat, deduceret porrò in mare. Ille abnuere. instare alter multis blandisque verbis, & ad extremum in gratiam Lusitani regis ut id vellet, orare. Hic (immape dictu) elephas motus, clarè hæc duo verba ingeminat, Hoõ, hoõ: quod Malabarum lingua est, Volo, volo. ac sine morâ nauim traxit in mare. Trepidat ad hæc, & nutas? Age, age, mouebo tibi in isto exemplorū mari magis maiores fluctus: & ambiguum relinquam, non dicam an hominem capiant, sed ad hominem imò supra hominem sapiant elephantas. Dixi enim de priori limite, qui discriminat obscurè: alterum vide, Rationem. quâ ego omnino carere me fateor, si prorsus ille. Audi igitur è Plinio, quæ huc spectant. Ait:*

*Imperiorum obedientia.*] Clara, & quam nemo neget. Semel domiti, omnia ab homine, & pro homine perferunt: & tanta illa moles vel à \* pusione regitur ac dirigitur tredecenni. idque sine vi, bacillo tantum (καλαύροπι in Philostrato scriptum) aut \* leui ferro. Et quid non imperentur? etiam iugum subiêre, & traxêre currum. Oppianus id tradidit, & Romæ primus ostendit Pompeius, ac postea sæpè Principes secuti. Nummi docent. Tertia in Plinio laus;

\* Philostr.  
tradit lib.  
11.

\* Falcè siue  
δρεσανον  
Aristoteles  
Elephan-  
tistæ attri-  
buit: Ae-  
lianus eâ-  
dem mète  
ἀντιπ.

*Eorum quæ didicere memoria.*] Tenax sanè memoria, & ad hu-

H

manam,

manam, vt mox dicam. Sed ingenium Plini cur omittis? Præuaricaris in hac causâ: quia si vlla propria & magna iis laus, hæc est acuminis & ingenij. de quo, te silente, non ego silebo. Ingenium igitur iis docile, facile, flexile, aptum ad omnes artes: & artes Belli dico, siue Pacis. Quod vide mihi, & disce, è paucis his effectis. Ac de bello, quis non ingenium eorum admiretur: siue cum bel-  
 luis pugnam, siue in homines iussu hominum habent? Dirigunt enim velut \* consilio aciem, defessos aut infirmos in medium agmen recipiunt, in \* fugâ ipsâ suos non deferunt, sed gregatim abeuntes circumdant & propugnant. Iam læsis medicinam faciunt: spicula aut infixata tela leniter manu suâ extrahūt, & \* vt Plutarchus ait, ἀνδρῶν παρὰ ἑαυτοῦς ῥαδίως καὶ ἀελαβῶς, sine conuulsione, facile & sine damno, prorsus vt \* peritissimi chirurgi. Quin & proprium medicamentum, aloës lacrimas, instillari vulneribus ab iis, Philostratus adscuerat. At pro homine quis homo nescit acres eorum pugnas? Instituuntur velut milites ad prælia; bellatores non dorso solum ferunt, sed & ipsi bellant: propugnant suos, impugnant hostes: deniq. cò veniunt, vt munia etiam omnia militaria vsurpent. \* Ælianus quidem mihi auctor, *Elephantos decorè etiam motus bellicos edere: ex iis vigintiquattuor Indorum regi adfistere, & excubias agere, vt fidissimos quosdam corporis custodes. atq. ita agere, vt alternis in stationem succedant, sine somno quidem aut conuiuentiâ oculorum.* A peritissimo milite, dic fodes, quid aliud exspectes? Iam quanta fides eorum in dominos, quàm ad extremum spiritum pro iis pugnent; satis tibi claruerit vel ex vno elephanto illo Pori. qui decantatus: & ab eo disce omnes. Hæc de belli artibus. At in pacis; quid hominem doceas, quod non istos? Quorum tanta in discendo (\* Æliani verbis & sententiâ vtar) \* ἐν παιδείᾳ καὶ ἐν κοίτῃ, vt eas disciplinas artesque hauriant, quas ægrè homo ipse. Circa corpus, circa animum hoc considera. De corpore: conformant id ad omnem ex arte motum aut gestum. Ingeniculare, submittere, & adorare reges docetur. \* Aristoteles: πολλὰ γὰρ καὶ παιδεύει καὶ ξυμπίπτει καὶ περὶ καὶ περὶ αὐτῶν διδάσκον τὸν βασιλέα. *multa erudiuntur & sciunt. quando & regem adorare condiscunt.* Saltare etiam & choræas ducere. \* Plutarchus: ὀρχήσεις τε μανθάνει, καὶ χορείας, & περὶ αὐτῶν διδάσκει. *salutationes discit, & choræas, & adorationes.* Ad scopum iaculari, armis uti, natare. Strabo: ἕως δὲ ἐπιθασεύτης ἐστὶν, ὥς τε καὶ λιβάζειν ἐπὶ σκοπὸν μανθάνειν

\* Plin. viii.

cap. vii.

Ælian. vi.

cap. lvi.

\* Ælian.

vii. cap.

xxxvi.

\* Libello,

πότερ' αὖτ' ὅν

ζῶν.

\* Ælianus

libro vii.

ἀντιπρὸς

ἐκείνους

ἐπιστήμονες.

\* Lib. xii.

cap. xlii.

\* Lib. i.

cap. xi.

\* Obtem-

peratio &amp;

facilitas.

\* ix. Histor.

cap. xlv.

\* περὶ τῶν

ἔργων.



θαίνεν καὶ ἐπ' αἰσιν χρῆσθαι, νέειν τε κάλλιστα: adeo autem mansuescere, ut & lapides ad scopum iacere, arma usurpare; & natare optimè discant. Vbi tamen τὸ νέειν siue Natandi verbum mihi anceps: quia nec alteri id traditum, & alienū à naturā elephantis qui aquas profundiores horret. Ventilare, gladiatorios militareſque motus edere docentur. Plinius: *Vulgare erat arma per auras iacere, non auferentibus ventis*, (ut scilicet iterū iacta reciperent.) *gladiatorios congressus edere, aut lasciuiente Pyrrhice colludere*. Denique in theatris eos gestus effingere, quos vix Pylades aliquis aut Bathyllus. \* Plutarchus: ἐν τοῖς θεάτροις ἐπιδείκνυσι χημιάτων εἶδη καὶ μετεβολὰς, ὧν ἐδὲ ἀνθροπότηται μελέταις ζῶσι. τὸ ποικίλον καὶ πρὸς τὸν ἐν μνήμῃ καὶ καθεξῆς γινέσθαι παντὶ ῥαδιόν ἐστιν. in spectaculis ostendit elephas eas gestuum figuras & varietates, quarum copiam atq; concinnitatem difficile sit humanæ ulli industriæ exprimere aut memoriā complecti. Itaq; & funambuli elephantis reperti sunt, irrisum vobis herè & explosum. \* Plinius: *Postea & per funes incesse*. \* Iterū: *Mirum maximè, & aduersis quidem funibus subire, sed regredi magis; utique pronis*. Quorum verborum mens: quod & ascendant per extensos funes aduersi: & regrediantur etiam per eosdem proni. \* Seneca: *Elephantem minimus Æthiops iubet subscendere ingenua, & ambulare per funem*. Suetonius Nerone: *Notissimus eques Romanus elephantis insidens per catadromum decurrit*. id est, per funem in theatro extensum; interprete Dione de hac ipsâ re: καὶ ἐλέφας, inquit, ἀνέχθη ἐς τὴν ἀνωτάτω τῆς θεάτρης ἀψίδα, καὶ ἐκείθεν ἐπὶ χορῶν κατέδραμεν, ἀναβάτῳ φέρων: *Elephas ad superius theatri fastigium conscendit, atque illinc per funes decurrit sessorem ferens*. Quod genus spectaculi primū exhibuisse Galbam, qui postea Imp., Suetonius idem monet: *Prætor, inquit, commissione ludorum Floralium nouum spectaculi genus, elephantos funambulos dedit*. Et quæ frons vltiâ obduret contra tot & tales testes? Atque hæc tantâ curâ & intentione discunt (id quoque valet ad vim testandam & indolem acrem animi:) ut sæpè deprehensi sint noctu velut dictata sua ruminantes & meditantes. Plutarchus cum Plinio mihi auctor, quemdam tardioris ingenij, & verbis verberibusque malè sæpè acceptum, inuentum ad Lunam gestus illos & motus præscriptos exercentem. Grandia hæc, grandia: ramen de illis artibus quid dices, quæ non nisi propriæ videtur humanæ mentis? Legere aut scribere, quis ab homine sciunget? ego: nisi si elephas inter

\* Libro,  
π' αἰσιν τῶν  
ζῶσιν.

\* Lib. viii.  
cap. i.  
\* Eod. lib.  
cap. i.

\* Epistolæ  
lxxxvi.

eos. Nam is quoque scribit. Rides? time potius æmulus mi Hau-  
tene repertus muneris tui, & tuæ artis. Plinius è Muciano clarè  
adfirmat: *quemdam Græcas litteras pingere didicisse, eaquæ lingua  
scripsisse. IPSE EGO HÆC SCRIPSI, ET SPOLIA  
CELTICA DICAVI.* Et Philostratus: *Scribunt igitur, atque  
tripudiant, & ad fistulam saliant.* Quòd si hos duos testes eleuas  
(herè ita memini) \*Æliano quid facies, qui oculis suis id spectasse  
pænè per oculos suos iurat? *Vidi, inquit, ego ipse quemdam in tabulâ  
litteras Romanas promuscide scribentem,\* rectè & non contortè. Quin-  
etiam cum scriberet, oculi eius cum rigore deiecti in tabulam erant: ut  
planè intentos diceres & scriptitantes.* Sed iam concludam hæc de  
artibus, insigni & nimis certo exemplo, cuiquæ milleni aliquot  
oculi spectatores: munere, quod Romæ publicè dedit Germani-  
cus Cæsar. \*Plinius tågir, & magis vbertim narrat\* Ælianus: exq.  
iis ego. *Ludis igitur illis, Tiberio Principe, duodecim elephantum theatrum  
inducti sunt siue Circum, induti floridas & histrionias vestes. Ac pri-  
mum ad vocem Magistri diuidebantur in diuersas Circi partes, inter  
eundum molli & saltatorio gressu inundates: iterumquæ ad eandem vo-  
cem coibant, & efficiebant saltatorium quemdam orbem. Sed & flores  
spargebant, & corollas, & ad cantum terram pedibus leniter & nu-  
merosè pulsabant, & omnia præstabant quæ peritissimi ludiorum. Iam  
iidem (quod insanum mirum) docti mensas accumbere, cibum potumquæ  
sumere, parcè, modestè, ordine, humanum in modum. Lecti erant humiles  
(agnoscis Romanum ritum) instrati purpurâ & auleis: mensæ ad  
eos, vario & dapili instrumento: disposita pocula aurea, argentea, minu-  
ta, grandia: cibi in lancibus, panis, caro, fructus. Ecce ingressi duodecim  
elephantes, sex mares, totidem femina: illi togati, hæ stolatæ. Decorè &  
verecundè in lectis se reclinant, mensam accumbunt. tum signo dato (non  
enim antè) in mensam promuscides siue manus suas extendunt: summâ  
modestiâ cibos capiunt, delibant. non voracitas vlla in iis, non auuiditas  
visa, non maioris meliorisve partis appetitio, præreptio. denique cum bi-  
bendum, pateram pueri porrigebant: uquæ promuscide eandem genialiter  
hauriebant & (iucundæ potioni hoc adnexum) reliquiis vini cir-  
cumstantes aspergebant, velut cottabum facientes. Hæc meis verbis  
texui, sententiâ germanissimâ Æliani. Et effare. potuîne specta-  
culum magis ad Gratiâs, ad Venerem, ad Naturam? cui vtinam  
his oculis arbiter paullisper ego i id mihi ante omnes theatrorum  
opes,*

\* Lib. II.  
Var. cap.  
XI.

\* ἀποκρίσεως  
καὶ ἀποκρίσεως  
πρὸς τὸν

\* Cap. II.  
\* Lib. II.  
cap. XI.

opes, luxum, nugas. Atque hæc nisi promptissimi cuiusdam & acutissimi ingenij signa sunt, tardus valde & cæcus ego. Quid illa, quæ non à doctrinâ insita sunt, sed emicant & subsiliunt naturæ ipsius sponte? Cuiusmodi spectata in iis sæpè, ad prodigium usque, sagacia & acuta. Quale illud \* Plutarchi: *In Syriâ elephas quispiam aiebatur. seruus curator additus, cottidiè de dimenso subtrahabat, & dimidio belluam malo furto fraudabat.* Fors fuit, vt hero præsentem cibum daret: & admensus igitur est totum. Elephas vt iniuriam diu sibi factam, quâ posset, detegeret, accuratè hordei partem separat: dimidium sibi seruat, altero repulso. quid nisi clamans, callidissimo inuento, illud diarium sibi hæcenus fuisse? Alius (refert idem scriptor) cum rudera & terram magister ad explendam mensuram pabulo idemtidem misceret: fraude fraudem hanc ultum iens, in ollam eius carniū plenam, è foco correptum cinerem iniecit. Sed exemplū quod ab Acoštâ, fidem omnem superat, etsi scriptum ex fide. Palàm enim & spectante populo res gesta est. Elephanti cuidam in vrbe Cochinchin ad horam cibus non oblatus. Queritur, & barrit. Magister excusat, & vas æneum eius cibarium ostendit perfluens & pertusum: causam hanc moræ esse, quòd cibi non vltra tenax. iubet igitur, si esse velit, ad fabrum ærarium ferat reconcinnandum. Ille paret, promuscide aufert, fabro offert. Faber siue per negligentiam, siue ludos belluam faciens, infideliter reparat atque obstipat. Elephas refert, herus vitium videt, & indignatur. inclamat illum absentem, hunc præsentem: denique redire iubet cum illo ipso vase. Facit. & fabro querulus impingit. Ille homo suavis iterum imponere conatur, & admoto malleo claudere rimam simulat, non claudit. Nec tamen imponit. nam ille catus lebetem resumptum ad flumen defert, immergit, & aquâ implet periculi faciendi causâ. Videt effluere. Plenus igitur irarum ad fabrum recurrit, intonat magnâ voce. Confluunt vicini, & inter eos Vicarius regis. Faber blandis verbis demulcet (nescio an vltra audeam dicere) belluam: vas denique sumit, & refingit probè atque ex fide. Sed ille ne tum quidem fidens, iterum ad flumen, & ad haustum. dum contineri aquam videt, vertit se ad adstantes & ostendit, velut testes eos aduocans in hoc factum: ita demum abiit domum. Quid addam? nec verbum: quia reuerà datus sum in stuporem. Et cur iam \* Æliano non credam, qui iure optimo duplex cor tribuit tam cordatis? Sed satis ad ingenium ista: redeo ad Plinium meum, qui suggerebat

\* Libello,  
πρόσφατος  
ζώου.

\* Lib. xiv.  
cap. vi.



*Memoriam.*] Ea autem pars tam magna in hoc anim ante, vt homini nō dicam nihil cedat, sed eum excedat. Vnū exemplum vetus dabo, pauca noua. Michaël quidam Glycas inter Græcos, Annales scripsit haud improbè nec indecenter. Is in parte primâ prodidit: *Elephantum quemdam cū in Circum deduceretur, sedentem in foro ad Milliarium aureum Magistrum ferarum, subitâ irâ atque impetu interfecisse. Causam non aliam violentiæ fuisse, quàm quod ante annos totos decem, eodem illo loco, idem Magister, eundem elephantum ferro percussisset. quam iniuriam tot annos recondens, tunc demum iniisse vltum.* Aliud ex Acoſtâ: Miles quispian in vrbe Cochī elephantum, per lasciuiam, in fronte putamine nucis percusserat: (grandem illam Indicam intellego, quam incolæ Coccum appellant.) *Elephantus putamen studiosè tollit: illud, atque iram, recōdit. post dies plures, in viâ quapiam publicâ obambulanti militem conspicit. accedit, & elatum ex ore putamen, promuscide suâ acriter in illum coniicit. tum exultabundus abiit, quasi talione illâ iniuriam probè vltus.* Iterum ex eodem: Miles elephantem in eādē vrbe cum rectorē obuuiū habuit. noluit decedere. elephas suam & rectoris contumeliā id interpretatur: vlcisci tamen à rectorē prohibetur. Post dies aliquot, in ripâ Mangatæ fluminis (id urbem alluit) militem fabulantem otiosè repperit. Cum rector non adesset, corripit illicō hominem, in altum tollit, nec precibus nec clamore adstantium motus, aliquotiens flumine mersit, alleuans subinde & demittens. Cumque lusum eum satis diu lussisset, contentus hâc vindictâ, hominem vitæ suæ iam diffidentem, rectum & illesum destituit eo ipso loco vnde sustulerat. Sed hæc in deteriolem & vindicem partem Memorix exempla: ecce etiam in beneficam & benignam. Acoſta idem mihi suggerit: *Elephantum in vrbe Goā fuisse, qui annuo illo & sollenni furore correptus catenas abruperit & vincla. Fugientibus omnibus, seruulum quempiam qui vlnis infantem dominicum gestabat in ades properè irrupisse, oblitum sarcinæ quam deposuerat in illâ trepidatione ante ades. Elephas adest. mortem omnes & obtritum pueri exspectant. Ille contrâ, manu suâ leuiter attollit; in humile tectum, quod è regione adium, collocat, respectans curiosè, satine puer illic sine damno. Dein furibundus cursum suum exsequitur. Id datum omnes interpretabantur veteri beneficio; quia mulier earum adium domina & infantis mater, elephantī transeunti sepius panem aut fructus obtulerat. Et alia quædam legere tibi fas, si lubet apud eundem*

dem Hispanum. Ego in Plinio pergo, qui admonet

*Amoris.*] Quod ipsum iure mirum. Nam sicut Sermo & Ratio homini pecularia videtur, sic certi quidam Adfectus. Inter quos audus ille & varius amor, pro leni tormento, soli huic animantium datus. Sed abnuat elephas, & hac quoque parte sociat se nobis. Serio enim amat. Trita & nota<sup>\*</sup> historia est illius qui Aristophani Grammatico praebebat se riualem. *Uterque enim Alexandria*

*in Aegypto corollariam quampiam amavit. nec minus studij aut ingenij elephanto fuit ad declarandam & mitigandam suam flammam, quam illi*

*acuto & litterato. Forum, in quo ea desidebat, crebro adire: adfistere,*

*suspirare, poma aut flores offerre: manum intra sinum blandè penetrare:*

*& ea omnia, quæ Venerus aliquis nepos. Alia similis in Æliano.*

*In Antiochiâ urbe Syria, elephas inter cicures more suo ad pastiones iens,*

*vidit fortè mulierem haud inscitam, pariter corollariam. Vidit, periit.*

*Assiduus ille apud eam; promuscide faciem, manus, lambere, tergere;*

*& quacumque poterat, blandiri, insinuare. Quin & illa redamavit,*

*corollas & flores aliasque amoris illecebras sæpe offerens. Cum pers-*

*seuerasset mutuus hic amor, mulier ecce ad plures abiit. elephas deside-*

*rium non tulit, nec mentis suæ ultra compos datus est in furorem. Sed &*

*honesti fidiq; amoris non deficient in exempla. Habe vnum.*

*\* Antigonæ regi elephas femina fuit. Evénit vt in obsidione opidi Mega-*

*rensis, puerum pareret vxor Indi elephantista. Is suâ linguâ commen-*

*dat infantem inter bellicas turbas elephantæ ( ita nomen eius fuit ) Ni-*

*cææ. Caput illa serio in fidem: & omnia officia exhibet, quæ piissima ali-*

*quanutrix siue mater. Infans ante pedes eius deponi debebat. nisi fieret;*

*cibum non capere, iram omnibus signis ostendere & dolorem. Gaudere*

*contrà, eo adiacente. & tum cunas mouere ad oblectandum, aut som-*

*num conciliandum, tum ventilare & pellere muscas. quod faciebat sanè*

*scitè, arundinis ramum promuscide suâ motitans. Atque hac officia in-*

*terdum etiam vsurpabat elephas maritus. Pergit Plinius, & addit*

*Gloriæ cupiditatem.] Qui sanè ipse affectus hominum proprius;*

*& inter eos, animæ cuiusque maximè sapientis. Exempla eius in*

*hac belluâ pluria. tu vnum vetus à Plinio cape, nonitium alte-*

*rum ab Acoftâ. Plinius: Erat, inquit, Antiocho regi elephas, cui (ita*

*enim hominum canumque exempla distinguuntur) nomen Ajax. Is dux*

*plerumque agminis, generosus, celsus, & velut rex in regio illo grege.*

*Evénit vt flumen transmittendum esset. renuit infelix, & malâ suâ*

*sorte*

\* Narrata  
Plinio c.v.  
& Plutar-  
cho, in li-  
bello de s.  
cap. 7. & 8.

\* Lib. vii.  
cap. xliii.

\* Athenæus  
lib. xiiii.  
cap. xxx.  
Aelianus  
lib. x. cap.  
xiiii.

sorte *Aiax*. Pronunciatum enim illicò à Magistris, Principatum eius fore qui prior transisset. Intellexit, & arripuit *Patroclus* (& hoc elephantum alteri nomen) fluviumque transmisit. Premio igitur donatus est; phaleris argenteis, quibus mirè gaudent, ornatus, & velut in possessione positus principis loci. At *Aiax* noster properè ab hoc *Vlysse* circumventus, satum etiam quâ potest, illius veteris exsequitur: & mortem ignominie præferens, inediâ se confecit. Acosta autem inquit: In litore vicino urbi *Goæ* tormentum grande æneum commouendum erat. conatur elephas: non potest. Instigante magistro & duos iuniores elephantos ostentante, qui id facerent ni ipse faceret: iterum iterumque conatur, tantonisu, ut medius illicò creparet. En! dum gloriam illam præreptum alteris iuit, miser sibi vitam. Sed prosequitur laudationem suam *Plinius*, & adiungit magis alta. Est enim, inquit, elephantis, quæ etiam in homine rara,

*Probitas.*] Ergone virtutes elephanto? virtutes. ut nequid scilicet ad perfectum, omnibusque numeris hominem, desit. Et de probitate, planè verum est. Innoxium enim, pudens & pudicum hoc animal: probæ mentis, probi oris. Vis ei ut omnibus noceat; ut nemini, voluntas. Homini occurrit? vitam non adimit, ostendit viam. Færæ alteri? transit. Quin nisi irrites & impugnes, nec in Arenâ quidem excitabis ad lædendum. In magistros rectoresque suos mira illis pietas. \* quos aliquando per calorem aut furorem interfectos, ita luxêrunt, ut inediâ interfecerint sese ipsi. Eadem in natos: quos, \* vrgentibus venatoribus adeò non deferunt, ut millies capi, cædi, malint, quàm ipsos. Adde reuerentiam in grandiores & senes. quibus de \* loco, de potu, de cibo iuvenes concedunt, bonæ suæ Naturæ legibus, non *Lycurgi* vllis minis adducti. Adde pudorem, & castitatem. quia non nisi occultè & filius recti coeunt, & sanè rarenter. Nam quod *Plinius*, & ex eo *Solinus* prodiderunt, non amplius quàm semel parere, nec plures singulis: validè refutat ratio. quia si vnus saltem è duobus: iam diu, minuente numero, defecerit id genus. \* *Ælianus* tamè vsum *Veneris* semel item iis tribuere videtur. Sed ea ex *Aristotele* hausta, malè aut lecto aut intellecto. Nam \* ille hoc tradit: *Marem quam semel inierit, non vltra tangere. interposito tamen triennio coitum repetere, sed nimirum in aliâ. Fæminam vterum biennio gerere, parere singulas.* *Strabo* etiam de initu eorum & partu, magis cautè & verè.

Adte-

\* *Plinius*  
cap. iiii.

\* *Strabo*  
tradit, lib.  
iv.

\* *Aelianus*  
lib. vi. cap.  
xv.

\* *Aelianus*  
ibid.

\* Lib. viii.  
cap. xvii.

\* Lib. v.  
Hist. Animal.  
cap. xiv.



Adrexitur in Plinio.

*Prudentia.*] Quam non dilato, satis mihi in Acumine & ingenio dictam & doctam. Ostendunt tamen & hanc propriè in Acie instruendâ, in tardandis secutoribus fracto abiectoque dente, in flumine transmittendo. quæ apud Plinium, Philostratum & Ælium vide. Sequitur.

*Æquitas.*] Quam in se, quam in aliis amant. In sese, exemplum à Petro Bellonio narratum Clusio nostro. In Asiaticâ, inquit, peregrinatione nostrâ hospitium diuertinus medio iam die, & acri æstu. In comitatu nostro elephas erat: in hospitij stabulo viatoris alicuius asinus, quo ipse vectus. Comedebat fortè hordeum, magno illo ingrediente: qui famebat. Itaque stimulo illo impulsus, asinum pellit, ipse hordei reliquum avidè inuadit & vorat. Superuenit mox elephantum dominus; dimensum suum hordeaceum, de more, elephantum offert. Ille, spectante Hero & ipso Bellonio, memor iniuriæ & rapinæ, reparatum statim it, & diuiso in duas partes promuscide suâ hordeo, alteram asino procul stanti & mustanti offert. Atque ille & iste suas deinde partes edunt. Vis æquius aliquid: aut iustius? sed amplius, retegunt scelera, amore isto iustitia, & alienas etiam iniurias vlciscuntur. Historiam Æliani duplicem te non celo. \* Narrat Romæ euenisse, Imperatore Tito: *ut vxor elephantistæ malo iure cum altero mæcharetur. Videt elephas; non fert domini hanc iniuriam: irruit, & in ipso complexu, vtrumque dentibus transfigit. Denique prouide ita copulatos relinquit, stragulo tegit. & cum dominus aduenisset, stragulo reiecto facinus ostendit, & se vltorem.* Hoc pro magistro, sed probo. Narrat iterum in illum, sed improbū. Fuit

\* Lib. x.  
cap. xv.

\* Lib. iiii.  
cap. xvii.

*Religio.*] Quam veteres omnes tribuunt consensu. Lustrari aquâ, orientè solem ab iis adorari, \* Plutarchus & \* Ælianus mihi auctores: Lunam nouam, Plinius, & \* Ælianus. Sed & hoc ad Religionem, quod mortuos è suo genere sepeliunt, & prætereuntes iniiciunt humum. Ælianus ille idem hoc tradidit

\* Libello,  
πέρηπα.  
\* Lib. viii.  
cap. xlii.  
\* Lib. iiii.  
cap. x.



primam dico partem, quæ de Gladiatoribus. Nam reliqui sunt aliquot libri, De Venatione, & Circo: in quibus etiam tuus sermo. Iudicia vestra liberè, liberè, velim adscribi: vt mutemus, si quid tale erit, iteratâ editione. Iubebo enim, si otium aut valetudo mihi constar, simul exendi omnia quæ ad ludos Romanos. Nunc molesti mihi quidam nomine Ordinum, vt Grammaticam conficiam, quæ legi possit in Belgicâ vniuersâ. Ride, si sapis: & vide quò me vocent isti. Apud vos miles, vt audio, & turbæ. Si ita est, quid si expedias te ab eâ vrbe, & secedas in hæc loca sub Neptuni regnum? Nam terrestres dii, parùm nobis æqui. Cautè id fiat tamen, & circumspectè. Nam & apud nos nescio quid turbellarum, ab iis qui pax deberent esse mundo: at illi fax sunt. Vale mi suauissime, & aut me exspecta sub æstatem, si quies illic; aut ego te, si hîc. Vxorem saluta à me ex animo, & tua pignora disluauia. Victorem nostrum silere ita miramur, vt suspicio sit ne & ille penetrauerit ad loca silentium. At tu eum saluta, & è veterno excita. Salutat te Dusa, Hautenus. x. Kalend. Feb. ∞. D. LXXXII.

## EPISTOLA LII.

Romam.

FRANCISCO BENSIO S. D.

**D**EVm ego tellor, vir optime, vt in solo nomine tuo lecto exsilij: quanto magis in commemoratione amoris, quem integrum inuiolatumque seruari apud te cognoui! Ita enim ad me scribit P. Egrmondus: quem certum mihi, amatum antea, vel nuncij huius causâ, magis amare. Non enim dissimulo. verus & verus mihi in te adfectus est, hæresq; mihi in arcano isto penetrati. Genus vitæ mutasse te audiui: quod salutare tibi futurum omnino confido. Et reuerâ, mi Bensio, quid hæc humana sunt, nisi iactationes & fluctus? in quibus nihil firmum sit, nisi ad anchoram ea alliges veræ Pietatis. A me quoque abiit illa iuuentus: & vna mihi hæc cura, vt quidquid hoc est æui, in virtute & seriis iam studiis traducam. Publicè id testari cœpi: & edidi nuper. De Constantiâ libros duos, qui pietatem (nisi fallor) aliquam præferunt, etsi priscae Philosophiæ velo. quos ad te mitto, nò vt inspicias modò, sed iudices: & liberè me moneas, si quid



si quid exorbitans in iis aut minùs rectum. Nec amantis adfectu iudicabis, sed vt apud Pindarum est,

\* Sententiis  
reitis et vi-  
gidis Rha-  
damanthi.

\* Βυλαίς εν ὀρταίς Ραδάμανθος.

Hoc omnino peto. M. Antonium Muretum (ex animo dico) amo æstimoque. minùs promptè id ostendo, quia quædam in me ab illo non amica. Ita enim moneor litteris multorum. Quo meo merito? nam ego te iudicem non defugio, qualiscumque ea est, litis. Tacitum edidi. quid ergo? an illius? quæ hîc iniuria est, si campum eundem Famæ decurri, sine fraude? Sed mihi iam ista non magna: & reuerâ pudeat me verba consumere in talibus rebus. Nati ad maiora & meliora quædam sumus, & ego & Muretus. Quem tu quidem à me salutabis, & animum hunc illi firmabis volentem semper eius & amicum: Ita me posteritas amet siue æstimet, vt ego illum. Constantiam nostram vt cum eo communices, volo siue iubeo: cuius exemplar etiam à me exspectet. iam enim recuditur. De Amphitheatro ante paucos dies edidi: & mittam. Tu quæso me ama, & interdum solare & erige in his turbis & confusione rerum. ix. Kal. April. ∞. IO. LXXXIV. Si quid ad me voles, mites tutò ad Plantinum.

## EPISTOLA LIII.

Romam.

M. ANTONIO S. dico.

**C**AVSSA mihi scribendi nata ex tuis ad Plantinum litteris: quas cum gaudio vidi, cum motu animi legi. Vel in manu tuâ conspectâ lætabar: quanto magis in hoc animo, & tam insigni testimonio amoris? quem si à quoquam mortalium, à te certè volo. Ita adolescens iudicavi, ita nunc, consensum quemdam esse conspirantis iudicij nostri & naturæ. qui ad coniunctionem, quæ fore, valeat, non ad æmulationem, aut, quod pudeat me dicere, similitatem. Et fuere tamen improbi homines, qui id sperarent: à quibus alia quædam ad me delata olim, non nego. sed vana, falsa, vt nunc video; & quibus caput homines non profesti solum, sed vtrique nostrum infesti. Ea, per communes deos deasque, oblitereinus mi Amice: & beneficiis inter nos certemus, non querelis. Electorum librum iam nunc vulgaui: paro Saturnalium sermonium, & de vitâ ac scriptis An-

næi

næi Senecæ, quem nec inuitus ad te miserim, quasi vadem amicitiae cœuentis & sanescentis. Etsi quid in eâ ægrum? nec aliud peccatum vtrinquē, quàm celsatione, & amicitiae; vt sic dicam, inusu. Quod ipsum emendemus. Viximus amicissimè vnâ, viuamus porrò & moriamur. En ego ille, cuius ingenium & os coram probasti: nec amorem absentis requires profectò aut fidem. Te vt eumdem sperem, faciunt paucula, sed impressa & signata epistolæ tuæ verba: quæ ruminor idemtidem & examino, vt solent amantes. Vale. Lugduni in Batavis, ad magnū & sine terminis mare. III. Kal. Decemb. ∞. MDLXXXI.

## EPISTOLA LIV.

ABRAHAMO ORTELIO S. *precor.*

**P**ER fidem, Orteli, vt tu vtrunque largus es, & amando, & donando! Miseram ad te nescio quid munusculi nuper; Amphitheatrales meas nugas: tu rependis illicò & reponis, sed verum amplumque donum, THEATRVM tuum. Ad tutelam Prætores ibimus? Profundis enim tua, & quidem valdè  
 \* ἀμέτρω μέτρω: cùm pro libello, libros; pro ludis, seria: pro orbiculis Arenarum, diffusum istum terrarum Orbem admetiris. & cum ipsum in triumphali veste, purpuratum auratumq;. Quid censes? donis magnis capi me? non magis quàm numina (si comparare fas: quæ vt voluntatem solam in oblationibus meriuntur, sic ego. At ea in te magna: & ideò munus tuum iure mihi magnum. Vtinam hic quoque animus aliquà tibi liqueat! in quo acris flamma, sed per nullam occasionem erumpendi, adhuc clausa. Quod vereor, mi Orteli, vt breui quoque vestræ vrbi sit. Quæ enim istæ pontium moles, quas audimus? aut quid parat nouus ille Xerxes? Non ego  
 \* κέρκω σάινων, cum Aristophane: sed maior profectò est & prudentior opinione nostrâ ille Princeps. Hoc ipsum opus quanti animi est? prisca, & Romanani. Ac compedes profectò Poliorcetes ille iniiciet indomito vestro Scaldi, nisi quid subueniant filij isti Neptunini. Batavos & Zelandos dico. qui tamen lentè accurrunt, nec vt ad socialem flammam. Heu  
 \* κρατὴρ κακῶν! & falsa vobis vita, si auferatur hoc salum. Quid suadeo igitur? fugam. sed non ab vrbe,

\* Immensâ  
mensurâ.

\* Caudâ  
blandiens  
sive adu-  
lans.

\* Crater  
malorum.

mi Orteli, aut solo patrio, tantum à vulgo. Ad Constantiæ nostræ asylum te voco, & ad arcana illa Sapientiæ templa. Cuius tectum si semel subis & penetras, tectum ego sacrumque te habeo ab omni vi, ab omni hoste. Salus missa à Dudithio, Cratone, Monauio, mihi grata: quæ tres stellæ in vnâ iam vrbe, valdè illustrent Germaniæ illum tractum. tu quoque à me remitte. Viuiani nostri poëma vidi: valdè mihi tersum & probum. Sed Itinerarium vestrum quando ad nos? Ne preme. & quod boni prouidique patres, si tibi obsideri visum, emitte saltem hanc prolem. De Chirio Fortunatiano, indagatio tua noua. adeo autem mihi ille non visus, vt nec auditus. quin ipse vltro peto, si alicunde cruïs, concede vsuram. Ad Scottum nostrum scripsi. en litteras, quas mittes, & amorem nostri non dimittes. Lugd. Bataur. iv. Kal. Ianuar. ∞. 10. LXXXIV.

\*Scriptis  
de Impp.  
olim, &  
exempla-  
ria in Ita-  
liâ edita,  
sed per-  
pauca.

## EPISTOLA LV.

HENRICO WILTIO S. D.

**V**ERE existimas. officium mihi fuit tua scriptio, imò beneficiū: quia & amoris tui in me index, & diligentia, quam intermitteri à te in hoc orō gaudeo, non dimitti. Adde amicam inuitationem tuam: cui quod hoc tempore non parco, ab occupationibus meis est, non à voluntate. Nam animum si consulo; reuerâ ambit esse isthic, & regustare humanitatem vestram, quam anno superiore pleno ore hausi. Sed ita conditio mea est, vt mos mihi potius alienis cupiditatibus gerendus sit, quàm meis. Impedimenta, quæ defubito mihi nata, scripsi ad Pollionem: nec hîc iterō. Itaque quod benigni creditores solent, voluntate meâ sustentaberis, & illam nunc accipies ipse solutum. At te, mi Wilti, hortor (quod in extremâ epistolâ tuâ prudenter scriptum) cogites, quàm in præcipiti cursu ætas tua sit: nec facile facturum te mensem, si in hoc iuuenili vere neglexeris facere sementem. Sementem dico, & virtutis & doctrinæ. Ad utramque enim te voco. quod hæc sine illâ damnosa: illa sine hac, parum decora aut ornata sit. Aures tuas sæpè insonet illa Democritici, vt opinor, laudata vox: *πολυτέλεστον ἀνάγκη χρόνου*. Vt in flumine vnda vndam trudit, nec vinqvam reuocas clapsam:

\*Sumptuosissima  
ædura tem-  
pus.



elapsam : sic in tempore dies diem, nec reparas amissam. Cogita, & vale. Parens tuus à me saluebit, & noster Canterus. Lugduni Batauorum III. Idus Sextiles. ∞. IO. LXXXII.

## EPISTOLA LVI.

CONSVLIBVS ET SENATVI  
ANTVERPIENSI S. D.

**N**OBILISSIMI & Amplissimi Domini, Munus accepi, non meo munere, sed splendore vestro dignum: Pretium in eo respiciam, siue artem; omnia eiusmodi, quæ animum vestrum abundè declarent, & quæ me deuinciant nouo vincolo. Cuius si non soluendi, at laxandi saltem aliquo genere officiorum, vtinam facultas mihi vinquam sit! Intelligeretur profectò æstinare me munera posse, & accipere: non tam propter ipsa, quàm eos qui adfectu tali dederunt. Ingenuè dico. Aurum illud aut argentum nihil me mouet, aduersus talia satis firmum: mouet prolixa hæc vestra humanitas, quæ omnia non impetrare solum à Lipsio potest, sed imperare. Valete Amplis. Cos. & Senat. urbemque vestram regite inter hos fluctus, præeunte & gubernante supremo illo Nauclero. Lugd. Batauor. IV. Idus Ianuarias. ∞. IO. LXXXIV.

EPISTOLA LVII. *Vltraiectum.*

HADRIANO VANDERBVRCHLO V. C.

**E**T litteras tuas nunc accepi, & nuper carmen. vtrumque gratum mihi fuisse scire debes, etiam me silente: quidni enim testimonia hæc à pectore tam amico? At tu etiam Valerium Max. vltro submisisti: in quo priuatim mihi, & publicè non nihil litteris etià contulisse te, re (spero) ostendam. Maneat feliciter hic cœptus amor inter nos, qui Genio ingenioque non dispares; & his solatiis vtamur in mæstitiâ publicâ temporū & infelicissimi æui. Nā vt sol aliquis alius tenebras & turbas istas pellat, videonondū. Ligna & oleum ad miserum incendiū hoc Belgicæ suggerunt passum. & nos ardemus: vicini alij rident, spectant;

stant; alij miserantur, sed miserantur tantum. Deus scilicet ille est qui punitum it iure veterem nostrum luxum. feramus; aut ne feramus, emendemus. De munere apto ad valetudinē meam firmandam, habeo gratiam. ego quid mittam? animum & verba: cetera immunis. Vale. Lugduni Bataur. v. Kal. Febr.

EPISTOLA LVIII. *Amstelrodamum.*

MART. LYDIO S. mitto.

**N**EC epistolā tuā quidquam mihi potuit accidere grātius, nec admonitione siue censure. In vtraque amor tuus elucet: in hac magis. quam nisi libetē in amicitiam admittimus, tollimus pulcherrimum eius fructum. Ego de meo sensu noui & attestor, libentissimē me sicubi deflexi, non corrigi solum, sed corripī: certē cū de animo mihi constat corrigentis, quem totum candidum purūque in te scio, mi Lydi, & famæ ac salutis meæ amantem. Itaque nec excusatione nec tergiversatione istā opus: quā (verē dicam) gratiam admonitionis corrupisti in patre. Ego enim me ab amicis non blandē amari velim, sed fortiter; id est, ut viris ac sapientibus est dignum. Sed de notā ad verba illa paginæ 66. \* Constantiæ meæ: sententiā meam breuiter sic habe. Cū ea scripsi, ad peccatum & ad malum respexi: quod Deo sanciente & præscribente euenire, durum mihi videbatur dicere. Fateor eam vim esse Prouidentię diuinæ, ut nihil in minimis maximisque eueniat, quod à filo illo non pendeat: tamen cautionem cautissimam in verbis & effatis adhibendā censeo, vulgi inprimis causā. Itaque Damasceni verba hoc fine adiunxi, Νᾶ ἀρρηγοῦσιν, ἀρόνοισιν, ἀεθροεσμὸν, ratione quādam distingui ab hominibus, & causā hominum, non ignoras: nec temerē dixerim, Peccata euenire Dei præfinitione. Nec tamen certamen hīc mihi vllum tecum: sed rem altam, intricatam, & vereor ut homini semper obscuram, sic explico. Definitum à Deo omne agnosco, quidquid euenit: trepidō tamen dicere, peccata ipsa. quorum fontem à solā malā voluntate nostrā esse censeam, supremā illā voluntate permittente. Exempli causā. In Tarquinij adulterio, in cædibus ab Herode innocentum, duo specto: factum ipsum, & crimen. Factum à

Deo

\* Lib. i.  
cap. xx.  
Vidit, non  
cogit: sci-  
uit, non  
sanxit. &c.

Deo definitum fateor, & comprehendo sub fatali illâ lege: crimen, quod soli voluntati inhæret, non videor fateri posse, sine iniuriâ Dei. Causam omnium rerum diuinam voluntatem statuo, omniumque euentuum etiamsi mali sint: at non causam causæ mediæ, quoties ea mala. Alias quomodo effugimus, vt non auctor ille sit mali? vt non adprobator? Itaque ea quæ ex \* Actis ap-  
tissimè adducis, huc accommodo. Mortem Christi destinatam  
ab æterno, prædictionem Iudæ ab æterno, mediæque omnia quæ  
ad salutare illud opus ferrent: sed non crimina adnexa ipsis factis, quibus fundamentum in impiâ tantum voluntate. Quod  
si tamen satis habemus generaliter & vniuersè dicere, omnia non præscita solum à Deo, sed præscripta, hoc respectu, quod illa ipsa  
facta sine peccato euenire non potuerunt: ego non pugnaciter  
pugnaero, & fatebor fortasse (cùm omnia examinauimus) vim  
hanc inesse cathenæ illi & nexui Prouidentiae immotæ & æternæ.  
sed differi tamen ea in vulgus, periculi inuidicæque plenum existimem: vulgo autem scriptus meus liber. Habes strictum mentem  
mei scripti. Tu si quid aliud obseruas, aut si quid etiam est in quo  
ambigis, valdè à te peto ne me celes. Non delectabunt me solum  
eiusmodi iudicia & indicia, sed docebunt. In istis ipsis quæ nunc  
scripsi, si quid aberro, dirige: reipsâ videbis, me non admoneri  
solum posse, sed emendari. De misso ad me Heroldo, habeo gratiam.  
remittam cum fide, vbi legero. Quamquam de Germaniâ  
Taciti, nescio an hac editione emoliar accuratè. Occupationes, &  
valetudo, & Typographi festinatio, sæpè nobis impedimento.  
Quod pag. eiusdem Constantiæ meæ 131. in margine positum  
est, \* *Davidis adulterium*: facile obseruasti peregrinationem esse  
meæ mentis. Itaque velim pro eâ notâ hanc in libro tuo substitui,  
\* *Quâ populum ambitiosè recensuit*. quod alios etiam monui.  
Vale. Lugduni Batavor. XIII. Kal. Decemb. ∞. I. O. LXXXIII.

\* Acta A.  
Post. c. 12.  
vide.

## EPISTOLA LIX.

Antuerpiam.

CORNELIO PRVNIO S. D.

**L**IBROS hos de Constantiâ cùm ad Senatum vestrum, Vir  
Clarissime, mitterem: valdè peccassem, si nō ad te vnâ. Nec  
enim Senatus solum ipsius magna pars es: sed & mei, qui amo te,  
K qui



qui ahs te amor: nec cùm Antuerpiam veni, facile pectus reperio magis promptum in me aut pronum. Addo & causam tertiam, quia prudens tu & doctus: cuiusmodi lectore, imò iudice, opus mihi in nouitio hoc scripto. Parùm adhuc tritum istud ad Sapientiam iter: nec scio an ipse id peragrauerim vsquequaque pede recto. aut si; an alijs videbor. Sæculum enim & mores non ignoras, quamq; in re quæ pietatem tangit, varij hodie sensus & dissensus. Non sententia, sed verbum aliquod à calente calamo anceps fugiat: ecce calumniarũ subitus & magnus ignis. Quæ causa abstinuit me, fateor, ab altiori initu in sacrarum illud rerum mare. quò materies alioqui & ingenij ventus vocabat: sed repressit hic metus, & ad nauigare iussit litus. Elephantibus aiunt, etsi omnibus impensè delectentur, haud temerè tamē eos ingredi, cùm inscij sint natandi: idem in Theologiã mihi. quam amo, quam æstimo; & tingo salubribus eius aquis libens animũ, non tamen mergo. Quæstionum enim vortices illos horreo: ijsque ne inuoluatur, adsideo & obambulo salten reius ripas. Et hinc tamen haurio & ex tuto fumo, quæ ad vsum. Nã acumina aut dissertatiunculæ quid inuent? Quod ille de Virtute censeret, rem eam esse non verba: iustius ego de Theologiã. cuius verum seriumque finem censeo, Vitam. Vt melior, non vt doctior fiam, sacra illa volumina tango: vt pectus instruam, non vt acuam mentem. Procul à me isti, qui alti & subnixi ambulant, \* μέλλω πρὸς ἡ κατ' ἀρθροπον σοφίας σοφοί: quique, quod Socrati obiectum olim, \* ἀπειργάζων ἔντητες, τὰ τε ὑπὸ γῆν καὶ τὰ ἐπερὰ ναι. Et cùm omnia tamen subtilis ingenij alã peruolarint; miselli, præteruolant ipsi sese. Reliqua sciunt: illud vnum quod scitu necessarium est nesciunt, vt se fiant. Sed hos mitto. te Vir amicissime quæso, vt gratum hoc munus animumq; nostrum habeas: & istum ames, illud examines. quo fine præcipuè scito à me missum. Siquid alibi aliter dictum: hoc magis mihi amicus, quò liberiùs monueris. quia inter eos ego qui labi & errare possunt, sed & inter eos qui resurgere & emendari. De Amplissimi Torrentij valetudine & statu, gratum mihi si per te cognouero. Iure nobis carus, rarus ille vir. Vale. Lugduni Batavorum xviii. Kal. Nouemb. ∞. Io. LXXXII.

\* Maiorem  
quàm pro  
homine, sa-  
pientiam  
sapientes.

\* Satagunt  
inquirentes,  
& qua ter-  
ram infra  
& quæ ce-  
lum supra.

EPISTOLA LX. *Leodium.*

DOMINICO LAMPSONIO, *Leodiensi Episcopo &*  
*Principi à Secretis, S. D.*

**D**IV est cùm scripturio ad te, Vir clarissime, sustinui me dum scriptum illud promissum exspecto, materiæ scilicet vberiore respondēdi. Nam lata & lata illa epistola, quid ferè aliud habet, quàm adhortationem & laudes? Quæ amplector vtraque, quia in ijs amorem tuum agnosco, sine labe, sine fūco. Non merui. quid refert? hoc ipsum delectat, talibus viris & iudicibus meruisse videri. Non enim fallacia tua verba, sed prompta è pectore, & vt ille ait \* ἐκ φρενῶν μουχῆ. Itaque calcar mihi addis ad decurrendam reliquam hanc viam: quod detrahunt mihi sæpè iudicia quorundam, qui θεολόγων, vt volunt, παῖδες. Miseri enim hæc nō sunt: & satis esse puram illam à Christo doctrinā, sine mixtione vllā Sapientię humanæ. Nec acriter ijs sanè pugnem: nisi quòd nescio quomodo apud homines vim aliquam habeant & iuuet etiam ista externa. Quis veterum Theologorum Philosophiam spreuit? vsurparunt imò & Græci & Latini, sed suo quodam fine. Ego ex vsu non iuuentutis solùm nostræ, sed generis humani putem, trahi & cōduci omnia ad metam hanc pietatis: modus teneatur tantùm, & vt hæc diuinis litteris seruiant, non vt contrā. De Amphitheatro, philologū aliquid nuper edidimus: & exemplaria mitti iussimus ad Clariss. Torrentiū, vnā tecum. Nunc feriamur: nisi quòd Taciti Commentarium recensemus, & in quibusdam refingimus, sed leui manu. Ximenio tuo, imò nostro, velim à me multam salutē dici. quem virum olim penè puer Colonia vidi & audiui, sed numquam pernoui. Doleo, & excitor, non in amorem solùm eius, sed amplexum: ita multa à multis audio de sincerā illā & doctrinā & pietate. Tu si mihi interpretes & conciliator amicitię illius es, magno me beneficio deuinxeris. Otho Venius à nobis abit, sed inuitis: insignis moribus & arte adolescens, & cuius mantus vsui mihi esse poterat ad multa Antiquitatis illustranda. Eum commendatum tibi, tamen cōmendo. etiam me: quem scire certò debes tui ex animo amantem. Salutat te I. Doufa. Lugduni Batauorum Prid. Kal. Iun. ∞. 10. L xxxiv.

## EPISTOLA LXI.

THEODORO LEEWIO *Consiliario* S. D.

**H**AVTENVS noster ad te venit: cui vtinam ego comes! Sed valetudo validè verat: quæ semper anceps, nunc acerba, tener, ligatq. me domi. Alioquin in votis mihi prorsus, te videre, te solari, & officium exhibere quod eiusmodi tempora exigunt ab amico. Litteris id feci antea: sed nescio quomodo momentum hîc magnum habet frons ipsa & ipse vultus. Euripides non vanè mihi visus scribere, Non ferenitatem nautis gratiorem in tempestate aduenire, quàm lugenti amico amicum. Sed & hoc breui, vt spero, fiet. Interea mi Leewi, firmare quæso paullùm, & frigus illud tenebrasque dolorum calface & illustra ad Rationis solem. Ante omnia nouitatis opinionem hanc exue, quæ luctui tuo malè fauet. Miserabili, inquis, genere mortis periit, & quod luctu municipium omne nostrum compleuit. Scio, & adfectu aspectuque primo ipse misereor: sed hîc quoque paullùm te attolle, & fecerne à vulgo. Quid illud miserabile? cum omnia circumspexeris, Mori. Varia ad illam metam via fert, cliuosa, plana, breuis, longa: eadem tamen omnibus quies, cum peruenère. Tua per difficilem partum, & velut per nimbos fluctusque delata est in Beatum illum portum: delata tamen. & præteritus labor adeò non grauis illi nunc, etiam gratus. Tu tantùm ne miserare, imò nec mirare. Scilicet id genus Fati non cadit in hunc sexum? non communis ille omnium prægnatum timor? Imò non crebriores alios sermones audias, si in confessum aut conuentum venias muliebre. Attamen hic nostrum omnium error: cum triste aliquid accidit, etiamsi non nouum, habere id vt nouum. Per circumstâtias quasdam augemus, polimus, & velut fucum ac lenocinium circumponimus dolori. Peruersi mortales! contra oportuit: & in omni casu oculos flectere ad communem dispersamque legem. Non Hagam solùm aut Bataviæ hunc angulum intueri, aut quid pauculis ibi annis gestum sit: sed diffundere cogitationem per sola hæc terrarum. Conditionem tibi pono. Iure non lugebis solùm, sed indignabere vt in nouo fato: nisi alibi terrarum, hac ipsâ horâ, idem ille aut acerbior casus. Et tamen cur peregrinè?



nêre? reperies exempla eadem, si quæres, in finitimis istis locis. Quamobrem exsurge, & contra leuia ac luforia hæc Doloris arma, arripe vera. Quid vita, quid mors, quid fatū sit, seriò cogita: scio placari posse implacabilem etiam dolorem. Quid enim hæc vita, quam eripi lugemus: ludibriorum scæna, miseriarum mare. per quod vt maximè ex voto tibi feratur naui, tamen in multos scopulos impingas, multis vadis obhære scas necessum est. Quid ipsa mors, quam timemus? requies, gaudiū, & vera vita: aut si quid in eâ mali, malis tantum. Quid miseraris traductam ad hanc, optimam matronam, & per fidem salutis suæ velut certam? Iam Fatum quid æterna, ab æterno, in æternum, dei lex: quam adeò non abrogare fas, vt nec obrogari ei liceat aut derogari. Si ab æterno & immobilis: stulte, quid cum Necessitate pugnas? hoc vnum vinces, vt pluribus plagis cōtusos vincare. Si à deo: impie, quid queris? Culpare nō potes aliquid malum aut acerbum in eo & ab eo, qui Bonitas & Benignitas est totus. Naturam eius si exprimere vales, non meliùs aut magis propriè expresses, quàm per eas voces. Mortua igitur tua est: debuit. illo tempore, illo fati genere: debuit. Lex ita lata: quam frustra sollicitant & exagitāt acumina hodie ingeniorum: non enim moriebunt. Quin nos, qui sapimus, pareamus potiùs; & quod necessariò patiendum est, etiam libenter patiamur. Leuamentum aliquod miseriarum est, non reniti. Cur autem renitamur? Non Deus solū est, quia ita de nobis statuit: sed & pater. Salutare igitur, bonum, prosperum: quidquid sensibus oculisq; nostris aliter videatur. An illi curæ aut amoris nos esse non putas? magis quàm nos nobis. Sed & pueris parentes multa præter votum imponunt, idq; tutelæ aut salutis causâ: item ille nobis. Hæc mi Leewi seriò discute & bonâ fidè. leuaberis, si ostium pectoris seinel Rationi aperies, remoto repagulo isto vulgarium opinionum. Plura me Hauteni discessus vetat addere: iubebat tamen amor, qui magnus mihi in te semper & sanctus. Vale. Kal. Martijs. ∞ Io. LXXXV.

## EPISTOLA LXII.

AMICO cuidam S. D.

**I**RASCI debebam mi\*\*, si possem. Tu ne vt iter vllum susceperis, non dicam sine comite me, sed sine conscio? Hoc verum

fuit? Pectus tuum roga: non dicet id esse pro veteri illo & fido inter nos amore. Caput meum hoc tango & testor, nullum mihi caput carius fuisse tuo. Quid autem suspicer? arcanam aliquam causam huius consilij fuisse? non inquirō. & si ea aperienda mihi non fuit totâ fronte, saltem vestigijs & sub personâ ostendenda. Ego te in meis rebus tale aliquid nūquam celassem. An subitò hoc tibi natum, & per mortem vnius illius viri? Hoc potius credo: quia reuera causâ tibi temporanei alicuius secessus hîc non iniustâ. Noui collegas tuos, scio quibuscum res & consilia miscenda fuerint: homines & actiones, parum ad tuum stomachum aut ad nostrû. Intereâ tamen (quæso hoc volens audi à volentissimo tibi amico) nec nos omnino eam rem celandi eramus, nec certè vxor: quæ misera se afflictat. Quamquam nos solamur & erigimus: certi, nō aliud latere sub hoc instituto tuo, quàm secessum aliquem ab his turbis. Tamen mulieres nosti; (etsi tua sanè prudens, & mariti ex animo amans) & linguas siue malas, siue vanas. Quibus, oro te, in tēpore medere: & ad nos redi, qui manere tecum parati, abire, parè dicam perire. omnia, vt feret res & tempus. Quæ enim tibi causâ eximij alicuius consilij, aut singularis? Confusio hîc & discrimen? scimus: sed & animum tuum nouimus nihil horum metuentem. Denique inter homines istos dum viuimus, obsecro vitam etiam instituamus humanâ hac & communi viâ. Pax aut bellum erit? communiter consilium aliquod capiemus, quod paci huic attemperemus siue bello. At ego tamquam seriò scribo, & quasi monendus mihi sis: quem liquet vsurpasse hanc profectioem animi causâ; etsi cum angore aliquo tuorum. Quibus etiam, mi \*\*, consule. & ad suauitatem conuictus illius nostri redi, sine quo tenebræ nobis in mediâ luce. Verè dicam etsi vulgariter, Vita sine te nobis non vitalis. Res adhuc hîc quietæ: sed Brabantia tamen & Flandria raptantur, vt audire te credo etiam istîc. E Gallijs litteras iam bis accepi, & quædam in ijs noua. vt de Reaccipitrariâ carmen, subtilis & nouitiæ inuentionis. Veni & vide, & (quod Constantiam tuam meamq; decet) ride. cur enim non spernamus hæc circumfusa & externa, iure ijs altiores? Nobiliss. VV. Philippum Sidnæum, & Dierum, si vides, saluta à me quæso: & ijs indica, per te stetisse quòd eos non viderim tecum. Certè enim inuitis meis omnibus iuissem.

Tui

Tui valent: vale & tu, & fac vt breui te videamus expectatum. Salutat te Hautenus noster, qui hilariter herè apud me in prandio fuit, ad funus Melonis. Inuideas illis exsequialibus epulis, si in tam albo pectore liuor. Lugduni Batauorum x. Kalend. Septemb. ∞. IO. LXXXIV.

EPISTOLA LXIII. *Eutetiani.*

AVGERIO BVSBEQVIO *Cæsaris Legato, S. D.*

**P**ERIISSE litteras meas nuperas ad te, minùs doleo, quòd de officio meo tamen tibi constat. Nihil enim in ijs magnum aut serium. hoc tantùm, adfectus mei & cultus significationem continebant: quem à iudicio susceptum, constanter seruo. At tuæ istæ litteræ, quàm mihi gratæ, & in medijs his molestijs iucundæ! Præter enim amorem (qui largiter appâret) etiâ grauissimi testimonij tui pondus continêt & iudicij de meis scriptis. Quod amo magis, quàm probo: quia mihi virium mearum cõsciis ego sum, & modicæ laudis. Fuimus his septimanis aliquot in Taciti Commentarijs refingendis, & nouis quibusdam attexendis, vt videbis. exemplar enim Antuerpiâ iussi mitti: si tamen commodè id poterit per has turbas. Nam caput illud Belgij à corpore nostro scemi-auulsum. Ripas obsident, & tormentis aditû nauibus arcent: etsi nautæ adhuc perrumpunt. Nobis mutatio non impendet iam, sed adest: faxit ille Deus vt in bonû. Quamquam hæc sunt illa, aduersus quæ Constantia nostra nos armauit: quæ hoc saltem mihi profuit, quòd ab eâ scriptione impressum animo meo sensu aliquod robur. Plures hîc imperant. nec vidi eam rem benè vniquam cessisse in bellis. Discidium etiam animorum præfagio, & motus fortassis in ipsâ plebe. Nobis tamen decretum patriam non mutare, si mediocris aliquis in eâ status. si nullus, & si confusio tantùm & raptus: quæcumque terra dederit nobis aliquam sedem. Nec enim liberi prægrauant, & sola mihi vxor. Iannum Guilielmium commendaueram tibi superioribus meis litteris, adolefcentem, si quid video, probi ingenij, animi, iudicij. Ei si quid benignè facere potes aut dicere, quæso ne grauère. Ex istâ iuuentute nō est aliud, de quo meliùs sperem. Itineraria tua Plantinus si accipiet, edet. nos qualecumque augmentum auidè expectamus.



spectamus. De Thraseâ meo poliendo cogitabam, vereor vt tempora permittant. Quidquid tamen ea permittet, mihi certum conferre ad hanc meliorem curam: & quod in me est, fugitiuas virtutes retrahere in nostrum æuum. Valdè me huc incitat etiam tua admonitio, & votum, quo honorificè nimis epistolam tuam claudis. Vale Amplis. Domine. Lugduni Batavor. x. Kalend. Septemb. ∞. IC. LXXXIV.

## EPISTOLA LXIV.

Leodium.

LÆVINO TORRENTIO V. *amplissimo* S. D.

**I**TA Salus aliquando serio me respiciat (nam hætenus quidem adit, abit, & vacillat) vt mihi insigni gaudio imò robori sunt tuæ litteræ, tam amanter ad Plantinum de me scriptæ. Te noui, me noui: & hoc scio, hunc tam prolixum adfectum non meruisse à tali viro. Quid dicam? me meaqué offerrem & addicerem, nisi iam pridem addicta tibi, nexu quidem & vinclo, quod non nisi atra mors rumpet. Commentatiunculas nostras semestris hic morbus valdè tardauit: morbus, qui per interualla duxit me ad Fatilimen, & reduxit. Nec nunc optimè: etsi in optimâ spe, vt medici volunt, & iam in abscessu atque inclinatione sit morbus. Absque eo, iam & Suetonium meum haberes (meum? imò verè tuum, cum tuo integro Commentario, meis tantum ad oram Notis: præterea, votum tibi & dicatum:) & Dialogos nostros De Rectâ institutione iuuentutis, quibus sermonis partes do Philippo Lanoyo & Papio nostro. Amo enim & amaui rectissimum ingenium adolescentis, dignissimi hac vitâ, nisi meliorem ei Deus destinasset. Plura iubet amor meus, imò ardor: vetat languor, & serum hoc diei, quo litteræ tuæ conspectæ nobis. Excusa. & apud Dominicum Lampsonium item nostrum, cui cis paucos dies vbertim scribam. Officij enim aliqua cessatio apud me per hos menses, non amoris: qui mihi æternus in tales viros. Vale, & salueat à me Læuineus tuus. Lugduni, vt volunt, Batavorum. Postrid. Kalend. Ianuar. ∞. IC. LXXXV.

EPI-

## EPISTOLA LXV.

Lugd. Bat.

BONAVENTURA VULCANI, Vir &amp; collega amice,

CALLIMACHVM, Bionem, Moschum, iam nunc à te accipi:  
 Vno partu trigeminos, rarum & felicem ingenij tui fatum.  
 Publicâ causâ (verè dicam) tibi debeo: priuatâ magis, quia duos  
 ex ijs mihi inscribis, hoc est, immortalem me facis. quo quid ho-  
 mini ab homine maius dari potest? Viuent enim amœnissimi  
 poëtæ illi, quamdiu Musæ: & cum ijs tuus labor: & cum labore  
 tuo meum nomen, quod Musæo illi peplo intexuisti amicâ &  
 doctâ nimis actu. Gratias agam aut habeam? referre malim. & ta-  
 men verbis quoque nunc dicam, sed paucis & fidis. Emptum me  
 tibi hoc munere; mancipio tuum. & addo improbi hominis pri-  
 fcas illas voces, sed probè & sinceriter: *Quid concupiscas, tu videris:  
 quod concupiueris, certè habebis*. Libros nouitios, quos è diuite bi-  
 bliothecâ tuâ prompseram, per hunc puerum recipe. De \*\* Col-  
 lectaneis iudicium quæris? illud Iuliani scitum profero: \* *ἐργον, \* Vidi, legi,  
 αἰσέρον, κατέργον*. Magis ad gustum meum Conuiuialia Stuckij, ex  
 eâdem gente, nō ab eâdem mente. Firmiora hîc omnia & lectio-  
 ra. De Sigma, quod obiter querebas & videras, ille nihil noui: for-  
 tasse nunc ego. Nam quæ in antiquis scripsi, vacillantia aut falsa.  
 Non enim Sigma antiquis Biclinium propriè, vt sensi ego: non  
 diæta aut cænatio tota, vt Cælius: nō mensa ipsa, vt Brodæus: sed  
 nisi fallor, certa in cænatione pars seorsum erecta & exstructa ad  
 recipiendum lectum. idq. hemicycli aut lunatâ formâ, quâ litte-  
 ra illa Græca passim hodie in lapidibus & priscis libris. Suggestû,  
 inquam, quoddam ligneum (siue quâ meliore materiâ, non im-  
 pedio) semirotundum: in quo perpetuus vnus lectus, ad sex se-  
 ptem conuiuas recipiendos. Quod velut dimidiatum triclinium  
 repertum inferiore æuo, ad facilem & magis aptum vsum. Ab  
 Apuleio hîc mihi prima lux, & à me illi. de Psyche, lib. v. *Visoque  
 statim proximo semirotundo suggesto propter, instrumentum cænatorium  
 rata refectui suo commodum, libens accumbit*. Non nominat Sigma,  
 fateor: sed auribus oculisq; ingerit quasi nominasset, ita clarè. Se-  
 mirotundum suggestum ponit, & Instrumentum cænatorium  
 appellat. quid capere aliud est, quàm hoc Sigma? Triclinij enim  
 certè non illa forma. Radium mihi etiam aliquem, etsi à tene-

broſo tuo ſcriptor, allucet Ditmarus Epiſcopus libro IIII. Chroni-  
cor. De Othone Imperatore: *Imperator*, inquit, *antiquam Roma-*  
*norum cupiens conſuetudinem reuocare, magnâ ex parte iam ſuis deletam*  
*tēporibus, multa faciebat quæ diuerſi diuerſè accipiebant. Solus ad men-*  
*ſam quaſi ſemicirculum factam, loco ceteris eminentiore ſedebat. Quod*  
libens item rettulerim ad Sigma: ſicut illud ad Principalem mo-  
rem, quòd ſolus, quòd loco eminentiore. Sed menſam ipſam  
ad Sigma, lunatâ item formâ fuiſſe hinc diſcis. parte dico eâ, quâ  
conuiuas tangebatur: nam illâ, quâ alios, fuerit lineâ ſanè rectâ,  
ad miniſterium & adſtitionem puerorum ſcilicet aptiore. Et  
quamquam de menſâ hîc Ditmarus: non tamen eam ſolam ve-  
niſſe in id nomen (eruditifſimo Brodæo ſcriptum:) peruenit Si-  
donius, qui in his verſibus diſcriminat clarè:

*Non tibi gemmatis ponentur prandia menſis,*

*Aſſyrius murex nec tibi ſigma dabit.*

Ita omnino lego, non *Signa*, vt vulgò. Idem alibi nominat, &  
oſtendit duplex fuiſſe, Æltium & Hibernum.

*Cominus aſpicitur vel prima vel extima turris:*

*Mos erat hic dominis hibernum Sigma locare.*

Vbi Locandi verbum refutat item Cælium, Diætâ capientem  
ipſam. At ea non transfertur; nō locatur in turre. Cetera, quæ huc  
faciunt, aut ego aut Stuckius iam diximus. De Antecanâ etiam  
ambigo, quòd ad vocem. Macrobius ſanè ita: ſed in Apuleio &  
Iſidoro tuo Antecanium, ſive multitudinis caſu Antecania re-  
perio. quidni rectè, quo flexu à Scænâ Proſcænium? Ille libro II.  
ſic: *Prorſus gladiatorie Veneris antecania*. Alter lib. xx. *Merenda*  
*eſt cibus qui declinante die ſumitur: quaſi poſt meridiem edendus &*  
*proxima cæna*. vnde & *Antecania à quibuſdam dicitur*. niſi ſi hîc  
vtrouique Antecæna reponenda: quod haud temerè putem. Sal-  
ue iterum mi Vulcani: iterumque tibi à me gratiæ. quas promam  
ſemper & recondam, habebo æternum & debebo.

## EPISTOLA LXVI.

*Lutetiam.*

IANO GVILIELMIO S. D.

**S**ERIO ægrotabam, mi Guilielmi, tamen expreſſit amor vt  
ſcriberem: non miraberis, ſi paucis. Hepatis enim acer nec  
ſine



sine discrimine morbus est, qui me septimanas iam aliquot adfligit: quam partem ad vitam eiusq; munia principem esse, non ignoras. Litteræ tuæ nuperrimæ suaues. celasti in ijs me de Epistolâ in Sigonium, quam missam tamen è Britannia vidi. Gaudeo conspirare te mecum: cuius iudicium super eâ Consolatione credo te iam vidisse. Sed tu, fodes, cur non acrius paullo egisti hanc causam? Debebas. & sine adspectu illius, quem nimis attollis, falsæ huius prolis patrem. Agnosco stilum, disunctum, otiosum, lentum: & illam (audeo apud te dicere) Sigoneitatem. Quid sibi volunt Itali? Transalpinos omnes esse fungos? Scilicet nemo nostrum inter oletum illud dijudicet, & Tullianam myrrham. De Re Accipitrariâ nouitiæ & acutæ inuentionis carmen accepi: legi mihi iussi per hunc ipsum morbum. placuit. Gratias quæso à me auctori & datori nuntia. cuius mihi laudes gratæ, eò inprimis, quod iunxit me laudatissimis illis viris. De P. Fabro: gaudeo mihi impositum. Tamen scripseram etiam aliquid ad Cuiacium. tu purga. Tacitus noster prodit, & nouæ ad Historias reliquosque libellos Notæ. sed Notæ tantum. plura valetudo vetuit, & hæ turbæ, quæ rerum & mansionis nos faciunt incertos. Saluta Brissonium, Memmium, Scaligerum, & tu salue quidquid me erit. Constantia nostra iterum prodit, cum Præscriptione aduersus quosdam, qui in *Docteurz auctoris*. Critica omnia nostra imprimuntur vno volumine iunctim, quibus noua quædam addeimus, si valeo & viuo. Lugd. Bat. XIII. Kal. Octob. ∞. 15. LXXXIV.

## EPISTOLA LXVII.

IACOBO CUIACIO IC. S. *dico.*

**S**ÆPE mihi de te sermo, Cuiaci clarissime virorum: apud te adhuc nullus. Hoc pudor vetuit: illud iussit amor & admiratio tui. quæ nō apud me solum, sed apud omnes in quos scintilla aliqua diffusa lucis melioris. Et eualuerunt tandem hæc duo, vt abrumperem ingenitum mihi modestiæ vinculum: & iter ad amicitiam tuam struerem, sine vllis cuniculis, apertè. *Perit enim procari, si latet*, aiebat ille: & sæpè iam litteris nec vnus nec vnus, spes imò fiducia mihi facta mutui tui adfectus. Quæ non me faller: si noui humanitatis veræ genium, qui spirat in tuis scriptis.

De rebus meis si in hoc aditu amicitiae aliquid quaeris: cetera commodè agimus, nisi quod inter eos, quibus rerum bonarum nō magnus sensus. Bella etiam & tumultus, quibus inuoluimur, fieri non potest quin interdum & turgent nos & angant. Si de studijs: Commentarium Cornelianum vulgamus iterum, sed pleniorē. addimus enim in Historias & adiunctos libellos. Vtinam autem fas polire mihi eum praesentis tui limā! Quia non licet, velim tibi animus otiumque sit vel per litteras dirigendi me, corrigendi. Labimur enim, Cuiaci, in hoc genere ego alijque: & illa tua velut propria laus, exacta certaque esse quae semel ex adyto tui pectoris profusa. Paramus etiam de Amphitheatro seu Venatione libros tres, ut fiant legitimi Saturnales quinque. Nescio quid praeterea in Liuius nuper exorsus: quod pergam detexere, si auxilium mihi paullo firmitus librorum. Duo tresque apud me sunt: sed quasi de compacto consentientes. Tu, Vir maxime nostri aui, si dignum me habes quem redames, quem rebus item tuis consilijisque (de litteris loquor) participes, in caelo me collocabis nouā apothecōsi. Ios. Scaligerum quem scio me tantum amare quantum tu, & quantum te (liberè enim addo,) ex animo salutes velim: cuius libros De emendatione temporum auidè, auidè exspectamus. Nisi ambitiosum sit, includam in eandem salutem magnum Brissonium, Puteanum, Fabrum, Pythaeosque, viros clariss. & ideò mihi quoque famā notissimos. *Amare autem liceat, si potiri non licet.* Vale Vir clariss. Lugduni, ut volunt, Batauorum. III. Non. Octobris.

## EPISTOLA LXVIII.

THEODORO LEEVIO *Consiliario* S. D.

**D**ISTVLI ad te scribere, Vir clarissime, non libens. Morbus meus hoc fecit, qui non sine discrimine etiam nunc me vexat. Ego fero: & æquissimo animo exspecto illum diem, quo Imperator hoc corpore, imò carcere, me soluet. Obstructiones sunt quae me tenent, internae inflammationes, nescio quae arcana alia symptomata, ad quae medici ipsi trepidant & caligant. At non ego. scio hanc legem vniuerso humano generi datam: nec magis mirum aut nouum mori hominem, quam nasci. Denique quid

quid est quod in sæculo hoc me teneat aut delectet? Publica video: pessimè habent. Priuata: etiam in ijs suæ cruces. Melonem nostrum tibi gratum fuisse, mihi gratum. Sanè bonos & eximios aliquot habui hoc anno. sed quid? ego, velut Tantalus sitit inter suas vndas, esurio inter medios melones. Nec gustare quidem mihi fas, ob hunc morbum. Constantiam nostram recudit Plantinus. pauca mutata aut addita præter Epistolam, quam videbis. Exemplar Latinum Seb. Gryphio nostro dabis, cui ex voto debeo. Belgicum vxori tuæ feruiet: si tamen hæc ad sapientiam illius sexus. Sed tu, si tanti est, interpretando iuuabis. Ego te illamque saluere ex animo iubeo. nam longior scriptio mihi non facit. Valete vterque. Leidæ, ix. Septemb. ∞. IO. LXXXIV. hodiè paullò rectiùs valere visus sum.

## EPISTOLA LXIX.

MARTINO LYDIO S. D.

**V**ALDE me, Lydi, de scriptiunculis meis vrges: vtique de Thraseâ. quod nollem. Cur enim eæ tanti? & si essent, non certè differrem, si otium aut vires mihi tempora darèt & hæc valetudo. Quæ nunc quidem (deo magno gratia) præter spem melior: sed infirma tamen ancepsque: & quam fouere ac vegetare per quietem debeo, quàm meditatione aut scriptione infringere. Paratus sanè magnâ ex parte Thraseas, fateor: sed limam tamen exspectat & extremam illam manum, quæ mihi quidem maximè in labore. Cetera enim impetu & calore quodam scribimus: iudicij hîc res est, & acrimoniæ, & intentionis. Materiam ipsam vide, grauè, seriam: an præcipitanda tibi ea videtur, & in pugnam aut aciem vocanda mea fama? Futurum id enim certè in rebus illis sublimibus, nisi omnia non benè solùm dicta, sed etiam cautè. Sæculum hoc noui, cōtentiones & variantes sententias, quæ vbique vigent. & vt veram liberè maximè exprimam (non enim vîquam deterrebor:) videndum tamen vt verbis & tempore id faciâ opportunè. Festinare in alio quouis scripto possum fortasse, & debeam: hîc non nisi maturare. At de Agellio, ecce magis me tibi facilem. Etsi enim H. Stephanus iam nunc eum dedit: tamen non spicæ mihi solùm multæ, sed fæces reliqui,



quos carpam ex Attico eo agro. Itaque Plantino vltro iam locutus sum: nec differemus, si cursum typographiæ eius non sistent aduersi isti venti. Nam Antuerpia si amittitur, optimi viri res in arcto: nec facîle de sumptibus expediat aut papyro. Quamquam id quoque curabimus. Sed tu mi Lydi, quando in Frisiam? Gratulor enim tibi hoc otium, non otium: honestum tibi, vtile futurum iuuentuti. Meo voto & electione, iam pridem tibi is locus apud nos fuisset, & Douſam habeo crebri iudicij huius mei testem. Sed Deo aliter visum: qui te meque ad salutem foueat & firmet. Vale Vir amicissime. Lugduni Batauorum. IIII. Kalend. Iul. ∞. ID. LXXXV.

## EPISTOLA LXX.

*Brugas.*

VICTORI GISELINO S. D.

**I**TANE litteræ à Victore? tandem, tandem. Quod in gaudio improviso, vix credidi ipse meis oculis cum legerem, manibus cum tenerem. Itaq; verè scribis, pro bono tibi cessit peruicax cessatio: quia in more abisse videbatur, & desijisti flagitari. Imò præscriptio tibi iam pænè proderat (si Iurisconsultus esse vis) nisi hæc interrupisset scriptio. Sed vide vt non specimē solum emendandi nobis præbeas, sed re emendes: nec gustū modò, sed rectam plenamque cænam. Aliàs, quò arenti mihi & sitienti pauculæ istæ guttæ, si venâ tu iterum interclusurus es huius suauitatis? Sed non facies: quia non vltà ego facilis in ignoscendo, vel te auctore. Quod si iram etiam meam contemnes: quid? quid? Veniam videlicet ipse, & iterum te mihi adseram subtractum non bonâ fraude. Trellæo illi dii omnes benefaciant: qui adiutor tibi, vt opinor, & interpreſ honestissimi muneris. Sed ad carmen eius suadéne rescribam? nec enim hominem satis noui aut mores. De scidis reciperatis, noua & mira. Sed siue illum pœnitentia (non enim pudor) furti subiit: siue cum apud quem deposita: tibi quidem ex animo gratulor de receptis. Vide, vt te vnâ cum illis. Nam certè, mi Victor, indignantur iam pridem nostræ deæ desertas se à te, illo militiæ suæ principe olim & antesignano. Purga: & ostende emanſionem hanc fuisse tantum, alendis ingenij viribus, & velut quiete irrigandis. De Plinio, ego quidem valdè  
sum

sum auctor. Nec excusa. velis modò, fides mea interueniet de  
 suecessu. Plantinus ades hîc emit, Typographiâ instituit, & vi-  
 demur effecturi vt stipêdium ab Ordinibus accipiat honestum.  
 Fortassis ea res eriget excitabitque me ad studia, aliàs sæpè lan-  
 guentem. Laco noster, vt audio, planissimè periit: nec deseruit  
 illum præeuntem Nemesis, etsi pede claudò. A Cuiacio benigna  
 multa ad me & honora. Gifanij Agelliû excudi audimus. quem  
 ego scriptorem ante quattuor menses ad Plantinum miseram,  
 seuerè & anxie correctum: curq; omiserit aut dimiserit, ne nunc  
 quidem scio. Nec quæro sanè aut curo. Nam si mens aut otium  
 mihi, fatis multa in alijs scriptoribus quæ agamus: ne eripiâ hanc  
 patri prolem, iam certè nubilem & plus quàm quindecennem.  
 Scis quid ille semi-Italus questus de filioliâ suâ nuper: non sine  
 risu meo, credo etiam vestro. Quem mihi commendasti, cupio  
 omnia: sed nihildum ego aut Dusa extricamus. Nam de Plan-  
 tino quam ei spem ostenderam, profertur in eius aduentum, id  
 est ad initia veris. Antè nihil statuere de domo suâ vult, aut po-  
 test. Dusa noster Commentarios ad Petronium scripserat, nunc  
 totus in Historiâ concinnandâ suæ gentis.

## EPISTOLA LXXI.

*Londinium.*IANO DOVSAE V. N. *Salutem opto.*

**A**N potiùs linguam ista enim deest, qui tamdiu files. Vin-  
 dictam talionis merebare: sed noster amor si non maior,  
 certè acrior: procatur, & laceffit te vltro. Valemus ego, tui liberi,  
 tua vxor. non meæ Musæ, quæ frigent absente suo Sole. Exorere.  
 & aut vultu tuo coràm calface; aut illinc saltem radios & stric-  
 turas aliquot per epistolam mitte.

## EPISTOLA LXXII.

*Antuerpiam.*IOANNI MOERENTORFIO S. *dico.*

**V**XOREM ad te redeuntem, mi Moerentorfi, quî dimittam  
 sine litteris? Ægrè eas scribo, fateor: sum enim in alienâ vr-  
 be & domo: scribo tamen. siue quia debeo, siue quia valdè volo.  
 De filioli tui apud nos obitu socer, credo, iam scripsit. Ego te so-  
 ler?

ler? animo facio: verbis nunc non licet, nec opus est, si firmitudinem animi tui probè noui. Sæpè eam in litteris ad socerū adspexi, sed in alienis rebus: te illa deferet in tuis? Non opinor. præsertim cùm ita placita tibi ea virtus, vt per eā Constantia etiam nostra: quam non legis solùm auide, sed vertis. Vidi enim specimen, & probo. illud vellem, plus aliquid tibi permitteres, nec vestigia vsquequaque sermonis Latini premeres pede tam certo. Arta per hanc curam versio, astricta, tenuis, sæpè obscura. Est suus videlicet cuique lingue Genius, quem non auellas, nec temerè migrare iusseris in corpus alienum. Quàm multa Latinè breuiter scripserim; quæ si totidè verbis transferas, sententia nec plana satis, nec plena sit: Quàm multa rectè & altè: quæ in aliâ linguâ iaceât, aut vacillèt! Quod ijs præsertim euenit, quorum stilus paullò magis ab eruditione habet & à curâ. Iam allusiones illas, annominationes, flexus, & in vno sæpè verbo imagines, quæ tam dextra mens vertat, vt eadem vis ijs aut Venus? Exorbita igitur: & hoc erit rectam in vertendo viâ tenère, viam non tenère. De pecuniolâ Facuens si grata tua cura. expediemúsne aliquid à nûmario hoc tricone? quidquid erit, tibi debebo. De cistâ scriptoriâ, ô gratum & opportunum tuum munus! planè eâ egebam. gratiam tibi meæ Musæ. Tu tam benignus in nos salue; & vide vt validū te reperiat valentula iam tua vxor. Delfis, III. Idus Sept. ∞. IO. LXXXII.

## EPISTOLA LXXIII.

GEORGIO BENEDICTI.

**E**T carmen tuum valdè mihi gratum, mi Georgi. & beniuola memoria mei. sed illud longè gratissimum, quòd valens & incolumis appuleris ea loca, ad quæ missus es velut ad mercatum artium seriarum. Philosophiæ dico, & inprimis Theologiæ, ad quam postremam, non actiones solùm omnes tuas, sed cogitationes necessum est collineare. Quæ tamen ipsa, quoniam sine pietate & puritate nulla est; caue, te quæso, ne quid labis aut maculæ trahas ex cœtu iuuentutis maculosæ. Fuge illos, fuge, qui liberioris vitæ obtentu ad licentiam trahunt: quæ vna ianua & aditus ad omne scelus. Magna nō frustrâ nobis de isto ingenio tuo pollicemur: tu vide sollicitè, ne id deprauent prauī. In flexu ipso  
ætatis



ætatis es: in quo si non laberis, speramus te inoffenso deinde cursu pertingere posse ad metam. Vale. Lugduni Batauorum.  
 ∞. IO. LXXXIV. Deus te seruet, in quo & à quo omnis salus.

## EPISTOLA LXXIV.

Lutetiam.

IANO GVILIELMIO meo S. D.

**E**GO verò Quæstiones tuas iam antè videram, & legeram cum curâ. An geminæ hæ non luceant? an nos celentur? itaque non itero apud te iudicium meum, quod apud alios nusquam celo. Si tamen de alterâ editione cogitas, sunt minuta quædam quæ te monebo. Quid ni moneam? amici hoc est: & vti nam id mihi iuueni factum in meis scriptis! Quamquam reuerà tua iuvenile nihil spirant, matura, adstricta, grauia: nisi quod à iudicio tuo abeo in pauculis locis. Itaque abi, nec festinationem mihi excusa, quâ nihil peccas. Noster, ille noster, etiamnum Lutetiæ? & quando tandem videbimus in luce illas Noctes? sanè longa & difficilis satio in hoc Agello. & metuo vt acerbi etiâ fructus, incusante & incurstante Oberto. Doleo. sed videor tamen de his studiis nostris posse dicere

\* Δίκη δ' ἔκιν' ἔτιπτε, καὶ βλάβην βλάβῃ.

Impudentiâ id fit & scævitate quorundam, qui perfudère animum scientiâ, non imbuère. Gulielmi Furnerij, ad De verborum significatione, vidimus: probum, & sine ambitione doctum planè opus. Fauco, admiror, amo. Petri Fabri Ad Regulas auidè exspecto: nec inducor vt lædi me credam posse ab eo viro, non certè si me nouit. Quid tamen eius sit (nam è Coluio nostro inaudiui aliquid) liberè, vt oportet, scribe. Ego æquiter punctiunculas aliquot stili eius feram, qui sæpè me iuuat. Errico Memmio viro summo, (ita dudum sentio) meo nomine indica: scriptum ad me ab Egmunro de oblatiis Notis aliquot in Tacitum. sed litteras eas tardè, imò serò redditas: itaque non postulasse eas me, habere tamen ei gratiam, proinde ac si impetrassem. Dicare me ipsi hunc animum, & sine fuce amorem. Clarissimo viro Claudio Puteano, iam diu etiam laboro, vt animus meus innotescat. scio illum esse inter lumina illa Galliæ: & velim valdè eum à me saluere. Sed tu, mi Guliel-

\* *Litem pæ-  
vis lū, noxā  
iem noxā  
serit.*

M

mi,

\* Inuulne-  
rabiles deo-  
rum liberi.

mi, quid agis? quid cedis? ut enim vegetum ingenium tuum est, non cessas. Perge quæso te gnauiter in hac viâ, quam ad æternitatem tibi strauisti. De Scaligero, doleo siue indignor esse nebulones, qui conuicjentur & obstrepant viro, quem non lædant (\* ἀρρωστοί γὰρ θεῶν παῖδες, ait Pindarus: ) sed nos per eum, & cursum illum impediunt benè monendi & scribendi. Et quis, obsecro, ille Insulanus, qui iactat etiam reges? Me pariter morantur interdum, & turbant hæ pestes. De Iosix Merceri Nonio, gratum. vrge ut promat. Ad Augerium Busbequium credo me nunc aut certè breui scripturum; cum testimonio quod tibi debeo. Nicolao Fabro, Pythœis, Passeratio, multam à me salutem dicito. Vale; & saluè à Dousâ nostro. Lugduni Batorum xv. Kalend. Iunias, ∞. ID. LXXXIV.

## EPISTOLA LXXV.

Noribergam.

IOACHIMO CAMERARIO *Doctori**Medico, S. M. precor.*

**E**XHILARARVNT me litteræ tuæ solo nomine & adspectu. Grati mihi semper Camerarij, ob vnum illum virum, quem Germania vestra habuit sine pari: & tu meritò inter eos, cuius beniuolentiæ in me olim signa non obscura. Libellum à te missum falsi Ciceronis, cum iis quæ adiuncta, accepi & legi lubens. O duram frontem Sigonij, qui hoc pertendit! sed sentire eum ita feridò, vix fides. Quid autem ais de altero illo Riccoboni responso, si vidisti? satin' ut acriter & veris armis in Sigonium itur? Ait non obscure, illum ipsum auctorem esse laudatæ Consolationis. Vide & ride hoc bellum Italum, cui me non misceo. Ut quid enim? mihi tam clarum est quàm Solem illum lucere, scriptum hoc nouitium esse & improbæ nimis spei. Nec dissentient, scio, docti. Sigonio ignoscere possumus, si agit suam causam, etsi metuo ne labecula aliqua ab hac re offusa priscæ illi gloriæ. Ita fit, si quis eam non habet cum modo. Nos Tacitum recudimus, & Constantiam in quâ Notas aliquot adiunximus, ad reprimēdas calumnias quorundam: quarum hoc sanè sæculum ferax. & eâ re tardari nos ad nouum aliquid pangendum non negamus. Andreæ Duthij

dithij per te litteras accepi: viri magni, alti, & de quo illud possim

—— \* πεπλασμένον ἐκ Διὸς ἔργον.

\* *Effectus*  
ex ΙΟΝΕΥΑ-  
ΝΙΩ.

Salueat à me, & tu vnà amicissime Camerari. Lugduni Bataur.  
xvi. Kalend. Iun. ∞. IO. LXXXIV.

## EPISTOLA LXXVI.

Biturigas.

IACOBO CUIACIO IC.

**N**ON ipse contentus in amicitiam tuam penetrasse, alijs ecce fores aperio, quasi in eâ vetus. Iuuenē hunc tibi commendo, familiarem nuper meum, oris & ingenij probi. Commendo autem ita, non vt ad interiorem illam amicitiam tuam admittas (aliis seruetur aditus ad illa adyta) sed ad externam hanc notitiam, quæ in adfatu posita & adspectu. Hæc enim illi sufficit: & adolescentibus id ætatis satis gloriæ, Vidisse, Conuenisse. Quamquam hic etiam Audisse referet: quæ vnica illi causa Biturigas, imò Galliam, petendi. Tu mi Cuiaci illum, vel meâ causâ complectere, & me omnino, qui æternū tuus. Lugduni Bataur. Non. April. ∞. IO. LXXXV.

## EPISTOLA LXXVII.

Lutetiam.

FRANCISCO RAPHELENGIO FRANCISCI F. S. D.

**I**AM vir es, laudo. Binas à te litteras accepi, tu à me nullas: non culpâ tamen nostrâ (scripsimus enim vbertim nuper) sed Legatorum qui diem ex die ducunt, & more suo morantur. In eorum enim comitatu I. Esychius noster est, cui fasciculum dedimus. Valetudo nostra infirma, incerta. non etiam animus, cui fixum parère & sequi magnum illum Deum. At rumor ille falsus, qui vos terruit de meâ morte: qui tamen idem Brugis & Leodij sparsus, ne mirer apud longinquiores Gallos. Homines de meo capite possunt ludere, statuere tantū supremus ille Princeps. Ego mortem non timere dudum didici: quin vt hæc tempora & languores mei sunt, propior sum appetenti.

M 2

—— \* Κρείσσον



\* melius est  
semel mori,  
Quàm cō-  
tinenter in  
diem affigi  
malè.

\* Κρείσσον ἢ σ' ἅπα' δαεῖν

Ἡ τὰς ἀπάσας ἡμέρας παθεῖν καλῶς,

ait Æschylus. In studiis quod pergis & perseveras, gaudeo. quid sequendum tibi, reperies in litteris meis primis. Passeratio sedulam operam da : qui vna columna labenti nunc Scholæ. Nam verus sanè Parisiensium doctorum gloria valdè flaccuit & imminuit. Sapientiæ studia & virtutis ne omitte. Pietas tibi in mente, modestia ante oculos, & demissio animi : ad quam nunquam satis te horter. Illa fundus bonorum omnium & fundamentum : nec pestis alia plura ingenia abripuit, quàm Confidentia & æstimatio sui. Tu abstine. Reuerà enim quid sumus? quid scimus? Quò longius progredi in scientiæ veræ viâ, tenebras, & circumfusam caliginem magis cognosces ingenio humano. De me ne labora, si quidam inuideant aut carpant. An ego eximius sim inter homines qui sunt, qui fuere? Omnes qui excellere aliquâ in re conantur (non enim dicam qui excellent) statim adfluit & adussit malevolentiae ista aura. Citâ veteres, reperies. circumspice hodie nostros : idem. Quid miraris si Marculus aliquis hoc in me faciat, aut Lacon? Mihi sententia de me, non nisi apud me fertur : nec quis sim, alium rogo. Interno isto iudice si probus audiam : quid addent aut dement mihi hi sermones? Nec famam tamen sperno, aut neglego : sed hoc de te moneo, non esse eam nostræ potestatis. idè inter externa habendam, & in momentum nullum ad beatam tranquillamque vitam. Quis sim, in me situm est : qualis audiam, in vano isto vulgo. Sed ad te redeo. Iuxta Sapientiæ studium, stilum cole & exerce : qui diuæ illius fidus & necessarius administer. Quid enim recôdita illa aliis proderit, nisi spargere & emittere ad plures eam poteris felici quadâ pennâ? Stilum autem, meo iudicio, Plautus & Cicero tibi perficient : aptâ quadam, & quâ ex me sæpè audisti, mixturâ. Æuum tuû vides? propera. non aliud magis idoneû disciplinæ. Auum tuû vides? itè propera. infirmus enim ille tibicen, qui te sustentat. Morbi & languores cottidiani illum vrgent, facturi aliquando quod minantur. Quis autè studiis tuis gubernator, amisso illo? Nā & ego sanè infirmus. quo tamè viuo haud spero quidquâ tibi deerit. Vale. & veram virtutem nosque ama. Lugduni Batauor. xvi. Kalend. Ianuar. ∞. lō. LXXXIV.

EPI-

EPISTOLA LXXVIII. *Aurelianum.*

EVERARDO POLLIONI S. D.

**E**RGÓNE in Galliâ tam diu es, & files? Siue adfectum meum in te respicis, siue consuetudinem quâ domi meæ vsus: peccas. Nam me certè vel morbus excusat, qui quattuor iâ menses perpetim me vexat. Et tamen cum miti arbitro tibi res est. scribe, & excusasti. Loca illa quâ placent? quâ homines? Probi illi, scio, improbiq̃ue: sed hos, mi Pollio, vita: & in primis si qui nequiores aut leuiore. quæ vetus gentis illius nota, & nunc per bella, per tumultus, auxit valdè. At illos (probos inquam doctosq̃ue) elige & excerpe: his adhære: linguam ab iis disce & mores. Vt aromata odorem semper aliquem adfricant tangenti: sic boni & modesti, auram aliquam suæ virtutis. Inter hos Aureliani (illî enim agere te censeo) Furnerium antecessorem habeo: quem virum probum esse audio, penitus doctum è scriptis scio. Si potes, illi innotesce: & si gratum esse putas, à me saluta. Pestè in iis locis sæuire accipio, nisi si iâ defæuit hoc frigore & hac hieme. fuge contagem illam, quantum humaniter potes: sed ante omnia pestes illas animorû, sodales malos, qui fraude & arte inrepunt & inrumpunt. Plura, cùm rescriperis. Nos enim adhuc in morbo: nec sine discrimine, nisi clemens ille Deus auertat. qui virtutem modestiamq̃ue tibi seruet, & nostri amorem. Lugduni Batauor. XVI. Kal. Ianuar. ∞. ID. LXXXIV.

## EPISTOLA LXXIX.

MART. LYDIO S. *dico.*

**S**OLICITVDO tua de valetudine meâ, non magis mihi no- sua, quàm amor tuus, quem iamdiu ostendis. Vtraque grata. consilium etiam, quod amicè adiungis contra vim melancholici morbi. Sed mihi, mi Lydi, non planè capitalis ille morbus, non inquam vera Melancholia; sed tantum suboles eius, flatuosa illa hypochondriaca adfectio, longa & sæua nihilominus, nisi quòd cerebro & menti adhuc parit. Quæ constant mihi, nisi erro. Nam in hoc ipso morbo illud mirum, quòd cùm

maximè deficiunt, ſapere maximè ſibi videntur : & ita aberrat à ſe mens, vt ſe non quærat. Libellum quem dicis Aloyſij Luiſini, vidi numquam. argumento certè iannunc placet, neſcio an tractatione. De Thraſeâ meo aliſſq̃ ſcriptis, quæſo minus vrge. In morbo hoc niſi morbidum quid poſſim ? & ego me ne ſanum quidem ad ſcribendum ſcio accedere, niſi cùm vegeta mihi mens & acris. Cum calore quodam noſtra illa pangimus, non minùs quàm poëtæ. At nunc frigeo & rigeo, anni tempore & morbo. Ego mortuus in Galliâ & alibi dictus ſum, vt ex litteris non vnus intellego: falſò. Vtinam tam falſò I. Guilielmus noſter, quem emiſſiſſe ſcies Iulio menſe Auarici Biturigum, correptum ardidâ febre. Item C. Sigonius in Italiâ abiit, reliquum in eâ gente lumen. Herè mihi dictus Cuiacius idem feciſſe, nec tamen certò. Quid ais ? nōne funeſtus & fatalis ingeniis hic annus ? videtur. De me, Deus ille & ſeruator meus videbit : qui nec præter mentem meam hac in re aliquid ſtatuet, nec præter votum: Obſecro enim quid nos teneat aut liget in hac facie ? Nihil me : qui magis magiſq̃ in dies video & rideo furorem Principum & vulgi. Etiam priuata ſi introſpicias: miſeria, & angor, & languor : & cum Homero

\* *Maror*  
subit ex  
*marore.*

—\*δέχε[ι]ται καὶ ἐκ κακῶ ἀεί.

Quæ tamen Christiani meritò ferimus, quamdiu Deo illi visum, qui explorat & expurgat nos per hunc ignem. Tu vale.  
Lugd. Batauor. xvi. Kal. Ianuar. ∞. 10. LXXXIV.

EPISTOLA LXXX.

*Roman.*

ROLANDO WINCELIO S. *mitto.*

**M**E quoque certè accendit ad redamandum amor hic tuus, cuius scintillæ exsiliunt & emicant in omni epistolæ tuæ parte. Quem quod meritum meum siue aluit, siue accendit? Nam quod magni æstimas hoc nescio quid litterularum, quod in nobis est; vide mi Winceli, ne abducatur & seducat te adfectus. Voluimus sanè quædam in publicum; sed adolescentes, nec annis aut iudicio satis adhuc firmi. Quibus, benignè mecum agitur, si venia à Lectore tribuitur; nedum ut cumulus iste laudum. At tu tamen ea extollis, & cum aliis quibusdam

errorem



errorem erras, quem negare mihi non possum esse gratum. Posteritas saltem (ut ille inquit) ita de me meisque aut erret, aut iudicet. Nam viuus certè iudicia multorum experiri valdè in me prona. Quorundam etiam aduersa, fateor. & cur offender? scio quòd sæpe meritò. Lapsi enim non semel sumus, præsertim in iuuenilibus illis scriptis: quæ tamen nunc reprehendo & retracto, & à postremâ hac incude firmiora erunt, nisi fallor, contra malum dentè. Sed cur tamen in me iniqui? Dent mihi aliquem ex omnibus tuo nostro Criticis, qui nō peccent; & flageller ego solus. Sed hos omitto. illud tantum instillo: si temerè arroserint,

— καὶ μὲν δ' αὖ καὶ ἀνδραγαθῶς.

\* Etiam  
mihi mo-  
rderis  
virum im-  
probum.

Sed libentiùs ad beniuolas & amicas animas deuenio, in quibus te auctore dehinc censeo Illustrem Gondosaluum Pontium, Neapolitani Proregis nepotem: cui quid nisi gratias agam pro adfectu? addo etiam redamare me iure, etsi ignotum. quomodo enim non, qui tam benignè prouocat? De Mureto summa mea opinio est, & erit: & felices vos sanè illo doctore. Patria nostra porrò turbat: nec scio quando nobis adfulgebit tranquillitatis ille sol. Itaque nos etiam sæpè frangimur: nisi quòd conatus solari me meosque Belgas sum nupero De Constantiâ scripto. quod scire equidem velim, quâ faciat ad Italorum tenebram saluam. Vale mi Winceli. iam enim interpellor, imò auocor. Non. April. ∞. IO. LXXXIV.

## EPISTOLA LXXXI. Rhotomagus.

VICTORI meo S. dico.

**Q**UOD deficientibus aspersa frigida, hoc mihi vestræ litteræ. Releuant recreantque labentem me, & virium adspirant nouam auram. Hem, amor quid potes! tu honestè, tu verè, & qui semel in puro amicitia solo egisti radices. Intemperies mea adhuc me tenet. ita enim veriùs appellitare videor posse, quàm morbum. Cetera valeo: calor tantum molestus in hepate, mesenterio, & pænè dixerim venenatis in eo venis. Eæ sunt, eæ venulæ, quæ pugnam mihi cum stomacho mouent: quæ calorem eius succumque ad se trahunt, malâ vi aut fraude. Caputne alterum de Melancholiâ Rondeletij tui legisti? is purus putus

putus meus morbus. Myrchialem Arabes, nisi fallor, appellant. Pugno sanè cum eo strenuè; & abiēcisse sæpè videor, sed vt Antæus quispiam, virescit & refurgit. Frigidis iuuari imprimè videor: sed crebra & continens eorum vsio, scis quàm non ventriculi ex vsu. Hic nodus. habes ei cuneum? an tu quoque cum veteris Scholæ medicis obhæres? Dico, veteris. nam isti noui à Paracelfo, auxilium pollicentur ab Vitrioli aceto. Frigerare id aiunt, penetrare, aperire; & simul robur addere visceribus & membris. Et sanè (iram & vocem comprime) iam victor, successu non infelici. De exitu videbo: si iuuare ita porrò pergit, ego inuentorem hunc deum. Phlebotomiâ nuper etiam vsus eram, & iuuit valdè. sed quid dicam? Vt ille in Ætnâ ignis interualla sua habet, & cùm defœuissè creditur, redit: ita meus iste. Quem nisi breui tollo, me tollet. Quid refert? generosa & Herculeæ hæc ad cælum via est, per æstum & per ignem. Ego, mi Victor, iamdiu paratus ad hoc iter: nec cum alio adfectu minor mihi pugna, quàm cum metu mortis. Vitam habeo, velut hospitem. si manet, non eiicio: si abit, non teneo, nec penulam scindo. De Modio, grata mihi narratio. Fauco & faui iamdudum illi ingenio: nec (cùm à paucis vobis abij) in Belgio habeo, cui factum velim magis. Placent mores & indoles, & (constet sibi tantùm, nec transuersum eum abripiat aliquis Lacon) fructus, scio, dabit studiorum. Sed cur ad me non scripsit? cur ne salutem quidem adscripsit? Peccatum largum; siue illius qui dicere omisit, siue tuum qui scribere. De Lacone quid? trepidas in aduentum eius & palles? Sta tantùm: spondeo tibi, fugit. Nihil eo homine \* *περνοδείλοτερον*. Scelera hoc faciunt, & occultum illud in pectore flagellum: quod commouet, quisquis eum constantiùs aspexit. De Apuleio & Pintiano, curæ habebō, imò iam habui: & indica si quis alius tibi à viuo mortuoque me vsus. Doufa in Angliam abiit legatus. Mihi, si vires paullò magis firmæ, (nam atrophia quædam coniuncta cum hoc languore) decretū Vbios excurrere, priuatæ meæ rei causâ: & illinc Eburones, ad acidos fontes. Mira iis vis dicitur & propria in hunc morbum. Videbo. & pro valetudine omnia faciâ, pro vitâ haud multum. Mori enim mihi non graue, graue tabère istud & languere. Tu salue, cum tuâ. Fratri tuo, si iam adest, amicissimam salutē: quem tuâ,

\* *Crocodilo  
similium.*

tuâ, & magis morum eius causâ, seriò amo. Rubicatum nostrum valere audio, sed calere totum in rebus. Dea Lua eum adiuuet, & nexibus illis malarum litium exsoluat, quibus implicatur. Valdè eum saluta, & iube (ita loquor) amantem me amet. In Batauis, xi. Kalend. Sextil. ∞. IO. LXXXV.

EPISTOLA LXXXII. *Lutetiam.*

FRANCISCO RAPHELENGIO FILIO S. dico.

**G**RATAS expectatasque nobis fuisse tuas litteras, nihil opus est scribam. scio te id scire. etiam adfectum tuum amaui, qui & in epistolâ se ostendit, & in carmine quod adiunxisti. Tu verò & in amore nostri perge, & in virtute ac modestiâ multò magis: sine quibus caue censeas, non dicam famam ullam tibi esse posse, sed vitam. Litterulæ enim, & aliæ elegantiae siue cultus ingeniorum, vacuæ ab istis, sordes sunt & deliramenta mera. Modestia est, quæ ad cognitionem nostri nos ducit: hæc ad virtutem & ad Deum, in quo omnis felicitas. De professoribus quod distinctè scripsisti, gratum. Ego audiendi tibi Genebrardii auctor sum in Hebræis, in Græcis Helix aut Gullonij, (nam magnus ille Auratus lectionem, ut audio, iam desit: ) ut res suadebit, aut scriptor aliquis quem legent. Philosophiam ante omnia non deferres: cuius fructus deum gustabis in progressu. At nunc obdura. Sed de litterariâ tuâ sarcinâ, quid peritine? insignem <sup>νετερίαν</sup> tuam: quam vide seriò emendes. <sup>\* neglegentiam.</sup> etiâ in eadem sorte meæ litteræ? Nam memini dare me tibi ad Memmium, & Pinxæum, & Faucerium. cur non scribis, ut saltem iterum scribam? Nam silentium meum trahi alioqui possit in culpam. Agellium (quandocumque difficilis ille parvus lucem videbit) fac habeamus: & si quid aliud prodibit, quo scias nos capi. Scribe de P. Fabri ad Regulas iuris, an prodierit; aut potius mitte. quod facile tibi per Somnium. Contagionem pestiferam valere istic audio: tu quantum in te est vita, & segrega à turbâ. Abstine à multiplici omni cursu, discursu: donec hiems & genu telum infregerint malæ diuæ. Valetudo mea nondum ex voto, melior tamen: sed ita, ut nec corpus nec

N

mens



mens mihi satis firma. non certè ad labores. Itaque studia nostra cessant. non tua spero : quæ nisi auidè, imò calidè prosequaris in hoc flore æui, frustrà postea quæres fructum. Hæc monita nostra tuâ sponte seruabis, confido : nequid tamen ea laxent alij, nonnullus mihi est metus. Quos vita, per Deum immortalem : & mala illa, soluta, & petulca ingenia, fuge supra ipsam pestem. Non enim hæc magis corrumpendo corpori est, quàm illi animo : cui per subdolas blanditias instillant & adfigunt venena. Euripidæum illud cogita,

\* Labor  
gloria  
genitor.

— \* πόνος δὲ κλέος πατήρ.

Auus tuus & auia valent. tibi volunt semperque volent, si viles ipse. Salue & vale. Vxor mea te resalutat. Lugduni Batavorum Prid. Kalend. Decemb. ∞. Iō. LXXXIV.

\* Ἐπεὶ  
ἀλάστω.

Ecce tibi ad Busbequium librum & epistolam. si ita Porreto visum fuerit, tu illi meo nomine dabis. Sed vide ut tales viros conuenias honestè & modestè. Hoc ætatem tuam, hoc institutionem decet. Inter loquendum (moneo enim nunc, quia fortasse non alius tibi monitor) caue tua verba præcipientes, ne sint cum Homero \* ἔπεα πτερόεντα. vitium tuum nosti : quod nunc aut numquam corrige, & effer sermones tuos, clarè, articulatè, distinctè. Sed heus tu. de sumptibus itinerarijs tuis quid audio ? valdè vos quidem largi. non conueniebat. An tempora hæc nescitis angusta, arcta ? Sed in posterum attentiores futurum te confido. Vale. III. Kalend. Decemb. ∞. Iō. LXXXIV.

EPISTOLA LXXXIII. Lutetiam.

PAVLO MELISSO S. D.

EPISTOLAM tuam, mi Melisse, quæ non amem ? indicem constantiæ tuæ in amore. & magis carmen, quod de morbo meo scriptum cum ingenio & adfectu. Gratiā habeo, & debeo. Sed te quis Deus, quæ Dea è Germaniā tuā mediā traduxit subitò in Gallos ! Amor nisi fallor, non ille à Cipride, sed hic à Phœbo, discendi, videndi, & doctos cognoscendi. Quorum omnium fores & pectora, non dubito, quin patefcent tibi. Nos etiam in morbo : contra quem animo magis, quàm corpore pugno.

\* Νόστος

\* Νόσος δ' ἀνάγκη τὰς θεηλάτας φέρειν,

\* Morbos  
necessum  
ferre cali-  
tus datos.

ait Sophocles. In I. Guilielmij morte valdè indolui. De vultu aut facie non eum noueram : optimè de animo. nec censeo melius aut rectius ingenium fuisse hoc euo. Sed Deo ita visum, optimos quosque traducere ad optimam illam vitam. ad quã in tot turbis & molestijs nos quoque adspiramus, & te saluere iubemus, optime poëtarum. Lugd. Bat. Kal. Decemb. ∞. IO. LXXXIV.

EPISTOLA LXXXIV. *Utraiectum.*

THEODORO CANTERO V. N.

**D**IV & sæpè ad te scripturio, mi Cantere: tardauit morbus, qui aliquoties minatus discedere, non discedit. Redit enim per interualla, & cùm seriò surrexisse me censeo, prosternit. Tamen nunc iterum meliusculè est, & omnino aut mensis huius genitalis aura me reficiet, aut nulla. Ad vos cogitavi sæpius. (inuitabat, præter amorem vestrum, aër) sed absterret via longior, imbecillitas, finitimi etiam nunc terrores. addere audeo, & conuiuia vestra : quæ lenta nimis apud vos & lauta. Librum II. Electorum nuper demum tibi per Vulcanium misi. credo accepisti. Cetera cessamus : & satis abundè habeo, si omni curâ corpusculum hoc sustento. Labores certè nec ingenij quidem fero aut subeo, sine manifestâ noxâ. Ferenda ista : don ec aliter visum magno illi & benigno Deo, qui te mi Cantere seruet, & me ( si ita expedit) aliquando firmet. Vale. Lugduni Batauor. Non. April. ∞. IO. LXXXV.

EPISTOLA LXXXV. *Lutetiam.*RENATO PINCAEO *Senatori regio S. D.*

**Q**VAE hæc tam obuia humanitas tua est, Vir clarissime? quod vltro appetendum mihi fuit, ipse defers vltro, amicitiam & coniunctionem tuam: quibus, moriar, si quidquã mihi gratus accidere potest à talibus viris. Splendor, fama, opes haud alitè me tangunt: iuuant & penetrant hæc iudicia, quæ proficisci scio à viris, mystis Virtutis & Doctrinæ. Quarum candidatum me non nego: sed hoc tantum. & vereor vt purpuram seriò vnam

\* *Honesti*

quàm induam tanti honoris. At vos ita benigni, vt non rem tantùm ametis, sed vmbra et speciem, omnesq; in quorum animis effulget aliqua \* *τὸ καλὸν* imago. Itaque mi Pincæ (amicè & familiariter iam nunc te compello) amorem meum vicissim seriò tibi offero: spondeoque futurum, priùs vt à me excidam, quàm vt ex animo meo illi, qui tã procliuës ad me amandum. Ampliſſimo quidem Briffonio, & Regij concilij & cœtus nostri Præsidi, publicè deuinctum diu me scio; priuatim nunc, hâc amicâ salutatione. quam meo nomine illi reddes, cumulatam adfectus tui aurâ. Vale vir Clarissime, & litterarum hoc iter si crebrò teris, gratum mihi: qui numquam vincar in officij aut fidi amoris cursu. Lugduni Batauor. ix. Kalend. Octob.

## EPISTOLA LXXXVI.

*Brugas.*

SALVTEM AMICISSIMAM IANO LERNUTIO.

**T**v certè, mi Lernuti, in amore iuxtà & in litteris prolixus. Nam Victor noster quàm breuiculus! In hac raritate nuntiorum, difficultate temporum, tribusne verbis ad Lipsium? Ita fecit. pro more suo, imò naturâ: quam quia nosco, ignosco. At effusione tuam amo & amplector: cum quâ iure pariabo. Valitudo nostra ne nunc quidem ex voto. Mensis Maius iuuisse aliquid & vegetasse visus, sed vt in floribus quoque, vigore fluïdo & haud diuturno. Anceps enim hæc sanitas, mi Lernuti, anceps. Hodie stare me putem? cras relabor. vires recepisse? amitto: & quod medici mecum mirentur, cæcis nec liquentibus caussis. Calores saltem viscerum sentio & nescio quos edaces æstus. Quid me aliosque fallam? tabes ea est, nisi erro, & certâ sed lentâ viâ eo ad mortem. Nec ingemisce. Deo ita visum: cui nos tam libenter, tam fortiter paremus, vt manum non verterim, hoc fiat an illud. Ennianum istud verè proclamo:

*Vivam an moriar, nulla in me est metus.*

Cur aliter adficiar? Æquissima hæc naturæ lex est, quæ pariter ligat omnes. Carnifex illud Fatum te meque expectat: & alium alio tempore duci iubet magnus ille Imperator. Ecce tibi plebeium aliquem tam constantem, vt lictorem suum sequatur, &

manum



manum vltro exposcat percussoris : aliena ab eruditis vis ea sit? Non à me : nec præibo ad molliem hanc exemplo. Vt fera auis, apertâ caueâ, non eiicitur, sed euolat: sic ego libens in apertum illum purumque campum. Atenim iuuenis. Fateor, sed vitæ huius tam satur, quàm Priamus aliquis aut Nestor. Quousque enim eadem? edere, bibere, legere, scribere: & ad demeritas, quas largiter suppeditat hoc æuum. Sed mitto hæc sophia: ad mattya venio tuarum litterarum. Electa nostra Secunda probari tibi ais vnice. Gaudeo. eoque magis, quòd serio verbar ne parum ad Genium priorum scriptorum meorum is fectus. In morbo quippe conceptus & editus, quid mirum si referat aliquid triste & morbidum, & tabeat ipse à spiritu hoc tabente? Quod si aliter; præter spem meam est, non præter votum. Epigrammata tua in impurum illum valde pura. Cur plura eius generis non mittis, reficiendi saltem mei? Pascor enim libens hâc ambrosiâ: quam per altum istud otium vbertim necessum tibi est gigni. Sed illa aspis etiâne Audomari? Æternum velim, necubi propinquior halitu suo vos afflet. Agellius autem eius tam ambitiosè promissus, vbi est? Stephanicum enim vidimus, & in eo scommata ac tela non obscure in istum. O improbum pariter & infelicem! Vbique vapulat, & corpus eius tot cicatricibus infamiæ iam occalluit, vt plagæ nouæ non sit locus. Et tu tamen hoc cadauer petis? me inuito: qui mucronem hunc acutissimi ingenij feruari & dirigi velim in digniorem hostem. Hic quidem calcandus est, non feriendus: & demittat atque abiiciat se necessum est, quisquis eum tangat. De Modio, gratissima. vos monete, firmate, & comitate vestrâ retinete, quæso, in hâc meliore viâ. Fax aliqua Belgis aliquando ab ingenio illo. Rubicasiû nostrum amo, & in pectore gero. Lirigatne etiam & tricatur? an Grudios nostros potius abiit, sedem illam Musarû olim & Gratiarum? Quæ breui assurget, nisi fallor, & virorem & calorẽ iterum ducet ab hoc Zephyro pacis. Ibi enim certè iam lucebit: si verû quidem est de Machliniâ, quam deditam nos audiebamus. Critica nostra en tibi. quibus\* versiculos de meliore venâ, Deo duce, audacter inseruimus, numero ccc. vtinâ comite Fortunâ! Spero. Vxori etiam Cilicis illius aliquid concedemus: nec de fide ambigimus, tantum de suc-

\* De auceis  
transmissi  
anigma est.

cessu. Di viales adeste, di præstites, di tutelares. En epistolam, an querelam? meri enim in eâ morbi & mortes, quæ non ingrata tamen tibi, siquid in Lipsio gratum habuisti, præter corticem hunc externum. Ille enim abijcitur. at Lipsius vester nullus moritur: cumque præire scitote, non perire. Longum mihi saluete, tu, vxor, liberi. Lugd. in Bat. Kalend. Sextilib.

## EPISTOLA LXXXVII. *Lotetiam.*

ERRICO MEMMIO. V. A. S. D.

**A**NIMVM sæpè corpori imperare, vir Amplissime, non vanè dictum: ego testis. Ecce enim cum Iapi Guilielmi epistola ad me venisset, amoris & iudicij tui de me index; etsi langueram ex acri & difficili morbo (nam hepar mihi laborat ex inflammatione & infarctu) tamen animum secuta hæc manus est, & per adfectum potui, quod vix per vires. Scribo igitur; & gratias seriò tibi ago pro amico isto in me animo, in eoque ut perseveres, si necessum est, rogo. Etsi cur necessum? quem ultro amandum delegisti, non spernes, ut opinor, cupientem iam, imò ambientem. Utar enim isto verbo, & ambio reuera amicitiam talium virorum & gratiam, quos velut sidera quædam huius æui habeo, & à quibus lucem conciliare me posse scio pallenti meæ famæ. Quam vulgarem, & à vulgo, nihil moror: bonam, & à bonis, numquam contemnam. Vale Amplifs. Domine, & à valente me litteras pleniores exspecta, & ut sic dicā, magis robustas. Lugduni Batavor. IV. Kal. Octob. ∞. IC. LXXXIV.

## EPISTOLA LXXXVIII. *In Holsatiam.*

HENRICÒ RANZOVIO, *Viro illustri, Vicario  
Regis Daniæ, Salutem mitto.*

**L**EVEM significationem animi & iudicij tui, Vir illustris, pro beneficio habuerim: quid censes hoc testimonium & litteras, tam amicè ad me, tam honestè de me scriptas?

*Omnes mortales sese laudari expetunt,*

ait poëta vetus: nō valdè tamen ego, nisi à laudatis. Inter eos autem, quis ante Ranzouium mihi sit? Genus tuum intueor? nobilissi-

bilissimus es. Famam? clarissimus. Virtutem & doctrinam? vtrâque maximus. nec facilè quem his iunctim rebus prætulerim tibi, reperiam in Europâ. Itaque beasti me hoc tuo iudicio, beasti. & iam demum Constantia nostra mihi placet, cùm illa vobis. Incitor ad scribenda talia: quæ apud rectas istas mentes sint recta. Tribuni illi, quos indicas, me absterreant? nihil. iactent se apud suam plebem: mihi adfatim satisfacitur, si eques hic plaudat & Senatus. Vt eadem purpura homines delectat & ad gaudium prouocat, tauros offendit & irritat ad pugnam: sic eadem veritas aut virtus intellegentes capit, lædit improbos & imperitos. Itaque scribere hæc talia (quidquid incurrant) nihil tardor. & vt Luna, quod luminis à Sole accepit, infero huic mundo refundit: sic libens ego dona, quæ à magno illo Deo. Qui te, Vir illustris, reip. & bonis feruet: & mihi hunc animum tuum, quem tam amanter defers. Vale. Lugduni Bata-  
uorum Idib. Februar. ∞. IO. LXXXV.

## EPISTOLA LXXXIX.

Delfos.

PAVLO BVSIO V. *Amplifs.* S. D.

**C**VRATOREM te (ita iam nunc intellego) huic Scholæ datum, Vir Amplissime, iure tibi, & magis nobis gratulamur. Tibi honorem aliquem: nobis grande beneficium, quod ab hac electione meritò speramus. Speramus? imò iam tenemus. ea voluntas tua est in iuuandis optimis studiis, ea facultas. Illa clara; qui omnia pro nobis egeris, laboraueris, re priusquam titulo Curator. ista etiam non obscura; qui magnus es inter magnos. Sedes in hac publicâ, vt sic dicam, naui, non inter remiges aut nauales socios, sed inter eos qui ad gubernacula & ad ipsum clauum. Vis igitur, & potes: & ideò adfirmatio mihi non iniusta, de adfectu optimo & simul effectu. Sed sub initia tuæ Curæ, ingerâ tibi maximè curas duas; de Collegio & Philosophiâ. Diu nimis dilata vtraque res, cum nostro, imò cum patriæ damno. Collegiū inquam ante omnia instituendum est, in quo ali iuuentus aliqua possit: certo numero, disciplinâ, lege. Domus ijs vna sit, vna mensa, vnum caput: lectiones variæ, pro capto cuiusq;, & pro iudicio Præfecti. cui hîc & alibi districtè parebunt.



rebunt. Numerum esse quàm maximum velim: certè non infra tricenos aut quadragenos. Sumptus in eam rem aliqui faciendi, fateor, sed exigui pro fructu. Hoc seminarium lectissimorum hominum erit: hæc seges eorum, qui ad Ecclesiam, ad remp. ad-mouendi. Nec alios legi quàm ex ipsâ patriâ velim, qui in eâ, pro eâ, & ab eâ alentur. Cur enim lac maternum hoc germanæ soboli præreptum, indulgeatur & imulgeatur exteris? ne facite: & sumptus cùm à vobis, ad vos etiam fructus redundant. Cetera quæ ad legem & disciplinam, tunc distinctè superædificabo & addam, cùm positum hoc fundamentum. Quod si Ordinibus de Collegio ægrè aut tardè persuademus, (tempora video & impensas:) age, inire saltem hanc viam alteram quæ impendij minus habeat, compendij non minus. Pro Collegio, substituite Mensam communem. Ita suadeo, ad Germanorum aliquot Principum exemplum. qui in Academiis (vtamur voce trita) subsidium hoc subtiliter & vtiliter inueniunt paupertinæ iuuentuti. Domum aliquam à se præbent, instruunt: nec eam nimis laxam. In hac Oeconomum cum familiâ collocant; cui cura nulla præter eorum, quæ ad victum. Conueniunt cum eo certis legibus: & ferè istis. Domum hanc, tibi & familiæ, habeto. frumenti annui tantum numerum, ad panem: tantum, ad zythum siue ad potum. Iuvenes cottidie ad mensam recipies quadragenos, quinquagenos. pro obsonio viritum quid pendent? Et ferè in septimanas conuenit, de pretio aliquo minuto: id quæ vnum onus (excipio quòd cubiculum sibi quisque parat) incumbit iuuentuti. Singuli inquam pro obsonio obligantur, cetera liberi & immunes. Sed id quoque leges suas accipit, quantum & quale ab Oeconomo detur. Iâ Rectoris & Professorum illa cura est, qui ad hanc Mensam admittantur, qui admissi reiciantur: & quater anno recensensus habetur & examen eorum, qui beneficio Principali digni siue indigni. Submouentur, retinentur, subrogantur, vt censoribus illis visum. Conuiuolum iisdem tunc, pro labore. Mihi crede, non alia res sumptum minùs grandem habet, fructum magis certum. Nam in ordinariis illis collegiis, scimus quàm multa ambitu peccentur, admittendo, reiciendo: scimus quàm verba ferè sint, præclaræ illæ de disciplinâ leges. Nescio enim quomodo, assidua conuictio illa & con-

tuber-

tubernium, non ex usu iuventutis : qui, vtrumque arceas aut se-  
pares, sermones communicant, consilia, vitia, sordes. Non id  
peccati in meâ Domo, in quâ, præter mensam, nil commune.  
Nec aliud ea est, quàm velut publicû Diuersorium : sed parcum,  
sed honestum. Cogitabis : & cùm voles, colloquemur. Iam de  
Philosophiâ, quàm turpe ! Ceteras hîc minores, & velut ancillas  
artes, coli & colere : negligi illam dominam & reginam ? locum  
ei non esse in proprio suo loco ? Quò enim aliter hæc omnis Aca-  
demiæ institutio, quàm ad Prudentiam Sapientiamque in-  
primis spectat ? Atqui ad eas Philosophia ducit : quam tu, Vir  
sapientissime, induce. Barbaries te terret, & spinosa illa via-  
rum ? Pelle illam, has purga : quas patres nostri malis tribulis,  
malis scrupis, impleuêre, per prauum acumen. Ipsam illam legi-  
timam Diuam reuocari à te volo : non hanc squallidam & per-  
fonatam. Nam Scholarum hunc, ante annos trecentos aut qua-  
dringentos, usum siue abusum cur teneas ? Sperne. & reduc om-  
nia ad veterem veramque formam : cui, præter fructum, maior  
sanè dignitas & venustas. Quis enim amcenior adolescens ad il-  
la tam inamœna veniat ? fugiunt imò, cùm aduenêre : & imbi-  
bere non iniuriâ spernunt tætrum illud absynthium doctrina-  
rum. Nos Aristotelem reducimus : sed ipsum &, si me audis,  
non solum. Ipsum dico, quia obscuro illi in eum & aculeati Com-  
mentarij, cui rei ? Detorquent rectissima ingenia, & in acumi-  
num flexuosos labyrinthos abducunt, à vero Philosophiæ fine.  
Ipsum legisse, & intellexisse, satis sit : & maximè in ijs libris,  
quos hi minimè legunt. Logica illa ætatem eos occupant : con-  
cepta ab Aristotele fortasse, numquam ita scripta. Politica quis  
tangit ? quis De animalibus ? aliaque diuina, ob quæ mirati il-  
lum nos & præsci sumus ? Nam Ethica ipsa, leuiter libant & velut  
in transcurso. Scilicet hoc iamdiu moribus his obtinuit, vt nulla  
pars minùs ad Philosophiam facere censeatur, quàm quæ ad mo-  
res. Atqui ea præcipua erat, vel veriùs sola. Iam, nec solum, ad-  
didi : & bono iure. Cur enim vni Aristoteli locus in hoc procin-  
ctu sit ? Ille signifer quidem aut Imperator, si volunt : commi-  
litent tamen alij, & in vnâ legione non vnus saltem Centurio  
aut Tribunus. Plato aliquod agmen mihi ducat, aliquod Epi-  
ctetus, Plutarchus, Seneca : & in opinionum nonnullâ varietate,

omnes tamen pro Sapientiâ & sub eâ pugnent. In Ciuili & Morali eius parte, an ille à Lycæo indignetur Platonem sibi apponi? fortasse nec præponi. ita diuinitus libri illi de Rep. & Legibus magnâ ex parte concepti sunt & conscripti. An Senecam sæpè & Plutarchum? Idemque de Physicis censeam: ad quæ & Senecæ Quæstiones Naturales, & Lucretij etiam liber sextus, aliquod, me arbitro, adferant momentum. Nec enim vel poëtas expunxerim ex hoc maniplo: & cum fructu hæc talia publicitus legi censeam in Scholis. Sed plura item & distinctè magis huius rei, coràm. Illud mihi non monendus es, sed rogandus, ne te aliorum trahant iudicia quorundam. Nouam viam noui homines incunt: & explosâ illâ sectâ veteri, sapientiæ frugem quærunt in agellis Rami, aut Philippi. Quid dicam? neutrum culpo. vterque doctus, sedulus, industrius: sed valdè erro, si errorem hunc errare nos voluerunt ipsi. Compendia perueniendi conscripserunt: an vetuerunt adire loca & templa ipsa? Atque isti ita eos complectuntur; vt non viam illos, sed metam censeant: nec per eos ad veteres transitum faciant, sed in his subsistant. De Philippo, vt vir fuit, aliam ei mentem fuisse planè scio: de Ramo, spero. Quod si alteruter hoc adfectauit: si ipse solum illud Sapientiæ infidère, priscais eicctis: ne ille apud sapientes omnes valdè insipiens. & quem isti ipsi tyrunculi Principatu mox deijcient, qui per prauam seditionem elegère. Puerorum enim ista (dicam liberè) illudia, & Saturnalia dierum aliquot regna. Nec rariè eos sperno aut refuto prorsus (scio, & fateor, multa in his breuitate & ordine bona:) manère tamen intra fortunam suam iubeo, contentos parietibus & auditionibus priuatis. Puluerem scholasticum & aërem adfectant? non ferent: obruentur ficulis & pugionibus istorum, qui prodeunt à Veteribus illis castris. Iuuentus nostra à me hoc audiat: Numquam ille magnus erit, cui Ramus est magnus. Pergebam in hac scriptio- ne: (vides quàm benigna materia:) reuocant me non meæ occupationes, sed tuæ. Eas aspicio: & in ambulatiunculam nostram vnâ, aut cænulam potiùs, hæc conferam, quàm vt manum tibi & mentem impleam epistolâ tam longâ. Quod initio dixi, repeto: gratulari me, & optare vt curæ has curas habere possis, non rogare. Cur enim rogem? scio te iuxtà ac me velle:

nec



nec penes te vñquam culpam futuram non impetrati huius aut non effecti. Deus illis, in quorum manu res est, tuam mentem det, tibi seruet. Vale Amplissime & amicissime vir. Lugduni Batauorum, IV. Idus Iulias. ∞. IO. LXXXIII.

EPISTOLA XC. *Ultraiectum.*

FLORENTIO THINNIO *Syndico reipub. eius.*

**S**ILVI aliquamdiu Vir amicissime : sed (dicam veram causam) fiducia solâ amoris. Oblivio tui fuerit? absit. hæres mihi tu & humanitas tua in medullis. Neglegentia mea? nec illa. quia alibi focors, numquam in hac parte quæ ad amicos. Amor, inquam, fuit, firmus inter nos amor : & ab eo fiducia, quia tam certus eram non irasci te posse Lipsio, quàm non amare. Et tamen siquid hîc quoque culpæ, morbus excuset : sub cuius vimbone sæpe nunc in his talibus latito & me defendo. Nam etiam nunc apud me ille hospes, lentus, deses, certus non abire. Vitrioli acetum à te nuper accepi, siquid acria eum fortasse fugarent : & vtor. Nam nec Heurnius noster improbat, medicus mihi in omni hoc morbo fidus, peritus, & (quæ laus ei propria) cautus. Refrigerat sanè aperitque insigniter : sed nocet exsiccando. Itaque nondum plenè iuuat. A Pollione nostro ante biduum ad me litteræ. Omnia, quæ volumus. Aureliani sanus agit : Furnerio innotuit : pecuniam accepit. Consulit super abitu, aut mansione. Illum ego suadeam, vt rem video & natas in regione eâ desubitò turbas. Et Basilcam (anteà mihi scriptum) cur non emigret? placet locus, incolæ, mores. Atque adeò si nulla vis alia aut metus expellat, suadeam Germaniæ tamen adspectum. Vtile enim & è re peregrinantium, qui Galliam insederint, in illam transilire : vt siquid ex gente istâ adhæserit exultans, diluant siue temperent Germanâ grauitate. Quærit & de Titulo, Vbi? Ego, dum rem adferat, Aureliani an Biturigis, non discernam. Et illam adferet, aut valdè me fallent semina, quæ hîc iecerat firmioris doctrinæ. De rep. non illa mea cura. Tamen excusso Palinuro nostro valdè fluctuatur hæc naus, nec Æneam aliquem promptum video, qui succedat ad

O 2

clauum.

clauum. Varij inter Ordines sensus : benè, si non dissensus. Deus videbit : ad quem confugio. quia, vt scitè Plinius, *tunc votorum precipuus locus est, cùm spei nullus est.* Quæ ipsa vota mihi interposita pro tuâ meaque (si ita expedit) salute. Vale. Lugduni Batavorum, a. d. xii. Kal. Iulias. ∞. Id. LXXXV.

## EPISTOLA XCI.

CAROLO CLVSIO V. C.

**M**i Clusi, & litteras tuas accepi, & cum iis thesaurum (ex animo sic appello) hortensem. Cariores mihi bulbi illi Tuliparum selectarum, quos ad me mittis, quàm si globulos totidem ex auro vel argento. Vulgus non credat? ego de meo animo & ex animo loquor. Grandes tibi gratias habeo : & cùm habeo, debeo : ac debebo semper. Infortunium quod in pede tibi euēnit, mihi dolet. sed quid? tu hanc sortem, ego aliam : & quemque clade aliquâ internâ siue externâ afficit Homericâ illa Ate. Dea tristis, amara, perambulat hunc orbem, nescio quomodo magis celeri pede, quàm candidæ Litæ. At tu quiescis, & id luges. Vtinam nobis domi illa desidia! Sed (en tempora, mi Clusi, imminet) iactamur & pellimur ad nescio quæ terrarum. Nam hîc palàm discidia. Tamen sermo etiam aliquis de Irene : sed vereor, vt sermo. Te vocaui nuper : nunc reuoco, cùm video instabilem statum. Nos in studiis agimus, & promouemus haud multum inter tot turbas : tamen his diebus feriatis nescio quid in Senecam adnotauiimus Tragicum. quæ mitto, si te fortè delectat ille poëta. Paramus Politica & grandiora quædam; sed quid mihi aut tibi spondeam, per hæc tempora & valetudinem hanc incertam? Hoc vnum. amare me virtutem, doctrinam, & amaturum semper : eosque qui eâ præditi. te, mi Clusi, inter primos. Vale. Lugd. Bat. vii. Kal. Nouemb.

EPISTOLA XCII. *Preslamiam.*

ANDREAE DVVDITHIO V. N.

*Cæs. Consiliario S. D.*

**I**n ruborem me das hâc humanitate tuâ, Vir illustis. Scribis vltrò, compellas vltrò : & promiss atque offers ea, quæ improbat

probæ pænè mentis sit à tali viro sperasse. Ego enim te noui, Dudithi. & quamquam inter nos multæ terræ, multi montes: tamen etiam huc penetrauit se dudum fama nominis tui & virtutis. Boni omnes ita me probent amentque, vt iam pridem ego te, etsi tacito dumtaxat quodam sensu. Quæ enim mihi occasio aperiendi? ad quam præiuisse nunc te, & velut strauisse hoc iter beniuolentiæ & amoris, sanè gaudeo. In quo sedulò & cum fide decurrendo, numquam erit vt vincar. Libellos nostros & Constantiam laudas. mentiar, nisi id mihi gratum: non quia laudes me capiant nimis aut titillent, sed quia testimonia talium virorum. Itaque addis ad reliqua calcar. quo egere nos interdum fateor, ob iudicia siue calumnias quorundam. Nam valetudo mea nunc (propitio Deo dixerim) nihil impedit: & querela illa, quam Constantiæ subtexui, scripta in morbo meo ante aliquot annos. De Amphitheatro librum edidimus: quem mitto ad te non vt munus, sed nouæ amicitiae velut arram. Superfunt Saturnalium aliquot libri: qui digesti, imò perfecti, nisi quòd aliquam exspectant iudicij limam. Quam haut facile adhibeo, partim negotiis districtus, partim his bellis: contra quæ etsi stamus erecti, tamen auocant sæpè hunc animum à talibus cogitationibus, & in se intendunt. Remedium tu amicè offers (scio enim quod domicilium, & apud quem, designes: & exosculor adfectum. Sed multa mihi nunc impedimento. familia, vxor, (nulli tamen liberi) parui è sorore nepotes, quibus tutor ego, illà nuper mortuà, imò velut pater. Sed nec corpus mihi nimis firmum ad longum iter: etsi integra adhuc & viridis ætas. Itaque non decretum mihi commouere ex hac patriâ, nisi fluctu aliquo maiore expellar: quod non semel nobis timendum videtur, in hâc tam diuturnâ tempestate. Alioqui beniuolè me habent Bataui, & stipendio sanè honesto. Nicassium Ellebodium ab adspectu numquam noui, optimè à nomine: iam tunc cùm Romæ apud Cardin. Granuellanum agerem, paucis mensibus post eius discessum. Nam ipse tunc Patauij: & scio me aliquando ad eum scripisse, Cardinalis nomine & iussu. Scire velim viuâtne, & ecquid agat. Idem de Michaële Bruto: quem ex Epistolis editis video tibi amicum, itemque ex Præfatione eâ, quæ in iudicio tuo de Cometis. quem libellum iam olim auide legi & cum



fructu. De \*\* Mathematico scripseram olim ad Ortelium, sed nescio reuera sitne futurus ad saluam vestram & gustum. Mathematicus enim merus est, sine aliâ arte, imò pænè linguâ: denique ex genere, qui *μηχανιστοί* potiùs quàm *θεωρητικοί*. Adde quòd ægrè nunc auellatur ab his locis, in quibus arti eius honos & vsus. Siquid de altero eruam, non grauabor indicare. Donellus Iurisc. amicè te resalutat: quem Norici abstrahere conati à nobis ad Altorfianam Academiam, frustrâ. Manet enim manfurusque est, quamdiu hæc schola. Valdè & tibi se insinuat noster Doufa: itemque Plantinus, qui apud nos nunc agit, & casu cùm has scriberem interuenit. Vale Amplissime & nobilissime Domine. Lugduni Batau. ∞. IO. LXXXIV. Saluto ex animo D. Monauium, si est istic.

EPISTOLA XCIII. *Middelburgum.*

IANO GRVTERO S. D.

**I**MPEDITVM in Galliam iter tuum molestè fero. & hoc tamen malo, quàm vt cùm perueneris, periculum tibi aut fuga. Quamquam rumores illi magis grandes fortasse, quàm graues. Sanè qui modestiores illinc veniunt, omnia magis placida nuntiant, nec de bello etiam nunc aperto. Suspectam tamen pacem esse fateor: sed quando non in illâ gente? vtrique hoc statu: quo de religione illud discidium malè factum malè coit. Consilium tamen à me si quæris: ego censeam per Galliam transire te posse ad Germaniæ fines. Basileam vel Argentoratum dico: atque illic velut è speculâ prospicere quis in Galliâ ventus. Si Zephyri pacati: redire. si Austri aut Noti: hære apud crassio rem, sed & quietiorem gentem. Omnino consilium non est, dare te frustrâ & cupidè in turbas. quarum si tibi amor: mane apud infelices Belgas. De Electis meis. si is, fer ad Brissonium vnâ: si manes aut aliud iter capis, remitte. Nam vt per nuntium, non sunt tanti. atque ego tantùm munus illud velut conciliando tibi viro magno dederam, & aditu muniendo. Vale, & salue à me nondum saluo. Lugd. Bat. xiv. Kal. Maias. ∞. IO. LXXXV.

## EPISTOLA XCIV.

*Antuerpiam.*ADOLPHO METKERCHO *Præsidi Flandriae* S. D.

QVOD rariùs te appello, Vir amplissimè, ab occupationibus tuis est, non à meis. Illis hoc largior : quas cùm in reip. curâ & patriæ nostræ salute defigas, non inscitus solùm sed impius sim, si temerè interpellem. Et verò quid magnopere ad te scribam, præter colere me & amare? neutrû ambiguum, qui deberi hoc tibi à bonis omnibus scis & iam reddi. Effecit enim dudum (rarum in \* πολιτοὶς) integritas tua & mira probitas, vt inuidiam odiumq; non minùs in aliis viceris, quàm auaritiam in te & ambitionem. Ad patriæ salutem consilia tua omnia diriguntur; ad tuam, ciuium vota. Sed hæc apud alios malo. Studia nostra per has turbas non vigent, sed nec planè cessant. Aliquid De Pronunciatione linguæ Latinæ meditabamur, vt tu de Græcæ : sed exemplo magis eodem, quàm curâ fortasse aut successu. Tenuis enim hæc materia : & quam vix impleam, nisi à suspitionibus & coniecturis. Nam auctoritatum nos hîc ferè inopes. Plantinus etiam ad Grammaticam concinnandam impellebat, quæ communis Belgio vniuerso esset. sperabat id enim Ordines decretuos. Vix ego. nec si faciant tamen, valde ingenio aut Genio meo scriptio talis. Quamquam fateor vtilissimi instituti rem fore : nec magis peccari in iuuetute instituendâ, quàm hac Grammaticarum varietate. Inter magistellos factionum res est : & quisque hanc aut illam præfert, quia posthabuit eam alter. Iam illi ipsi qui condunt, quid ? hoc vno reges. Mihi pucro triplex olim Grammatica prælecta, in triplici migratione. Ad annum decimumtertium nugæ illæ tenuerunt; & adfirmo tibi ab anno octauo eadem me tenuisse, etsi non eodem modo. *Quinque* illi anni si in stilo & grauiorum rerum scientiâ positi fuissent, quis mihi fructus? Et hæc peccantur cottidie, non tã imperitiâ, quàm ambitu docentium & prauitate. Cui vos quoque, velut publico malo, imederi par sit : si tamen à grauioribus illis respiratis paulùm & ad mortem morbis. Quos Deus aliquando à miserâ hac Belgicâ auerrat, & te Vir Amplissimè nobis illique seruet. Vale. Lugd. Batau. III. Idus Nouemb. ∞. IO. LXXXII.

\* *Admini-  
stris reip.*

EPI-

EPISTOLA XCV. *Lutetiam.*M. VALERIO COLLINO *S. multam precor.*

**N**ON largiter solum, mi Colline, sed, quæ maior laus, firmiter amas. Louanij cœpisti : comitatus te in Galliam adfectus etiam nunc non deserit, etsi in temporum & locorum grandi interuallo. Adde inter nos silentium : quod frigus inducere potuerit vel incitatissimo amor. At tuus nec intepuit quidem : & scintillas acres sparsas video, & colligo in epistolæ tuæ omni parte. Redamo, redamo ; & iure, pectus tam fidum, tam amicum. Locum sic satis honestum tibi illuc esse gratulor : nec, si me audis, muta. Ad patriam enim cur aspires ? Zephyri interdum aliqui melioris spei, fateor : sed turbant subito ex transuerso Noti. Cur autem iuuenilem hanc, ut sic dicam, nauim in feruidum illud fretum immittas ; cum statio tibi aliqua saltem, si non portus ? Obdura. credo aliquando, post tam diuturnas tenebras, miseris Belgis sol aliquis illucebit firmioris pacis. Nos quoque non mutamus : etsi exteri ianuam aperiant & inuident. De pugnis, quas in improbos quosdam pro me pugnas, ( ita scribis : ) gratum, nec gratum. Ab adfectu gratum : re displicet & effectu. Quid enim litigio isto vincis ? non illos meliores facis : non me honestiorem, quem nihil maculant linguarum illę sordes. Ita serio sentio. laudari me, cum culpant tam illaudati. Non virus illud homuncionis ego noui ? inter cuius minimas culpas est liuor. Alia peccata sunt, quæ ipsum eosque perdiderunt & perdunt, qui adhærescunt. imò qui tangunt. Tu fuge igitur, non pugna. Cessisse hinc præstat, quàm incessisse : quia nec vincis quidem ac repellis sine maculâ tam maculosos. De Hospitalij Epistolis editis, valde gratum. haueo inspicere : magis quàm illos ad Ciceronem Commentarios, famæ grandioris quàm rei. Quid refert ? emptores suos, imò & amatores reperient vana illa doctrinarum. Nos solida nihilominus amabimus, contra iudicium hoc vulgi ; & te vnâ, mi Colline, quamdiu tu me & virtutem. Vale. Lugd. Bat. Pridie Kal. Septemb. ∞. IO. LXXXV.



## EPISTOLA XCVI.

IANO DOVSAE *meo S. dico.*

**L**EGI ad vxorem litteras tuas, quâ de me erant. Bellum hominem & facetum! qui tam arguto schemate scribis ad me, & non scribis. Quid censes? excusatum iri te? Non debebas. præfertim cum nō alieni solū multi huē cottidie, sed ipse à te tuus homo. Et tamen excuso. non tam arte istâ captus, quàm inductus à naturâ tuâ: quam cetera efficientissimam, cessare plerumque scio & fastidire in scribendo. Culpa ea in amicitia, fateor: sed cui non sua labes? Nec circumfusa illa Thetys eam in te eluerit suis vndis: nedum vt ego me postulem minis. Taceo igitur, & patior. Emanatio vestra præter vulgi vota & nostrâ spem est. Etiamne in illâ aulâ tricæ & remoræ? nec tamen miror in re tam intricatâ: cui, in vrbe vrbium iam amissâ, nouus nodus. Multi apud nos concidunt, multi dilabuntur. è familiaribus tuis abit quantum potest *Jupiter ille Tonans*. Iam valedixit, iam sarcinas collegit, iam est in viâ. non tenuerint hominem Batauæ omnes quadrigæ. O vim metus, & verè \* *τὰ νύπτερον δέμα!* A quo pennas <sup>\* timor passis alia.</sup> etiam Hybrida noster sumit, ad eandem fugam. qui tamen dissimulat, & resistit, vt ait, hac hieme: scilicet cum ciconiis ad vos venturus, sub æstatem. Ceteri valemus, & stamus. Valemus. vt & me includam: haud planè etiam firmum, adsidentem tamen iam sanis, imò & accumbentem. Nam conuiuiola etiam obire hilariter audemus: quibus ades plurimum, & non ades. Nam mens nostra sæpè apud te, & de te lingua. At inuitatiunculâ tuâ, & illorum procerum, nunc non vtor. Di boni, quàm voluissē nobilissimam insulam! Sed antea languor impediuit; nūc hiems, quæ per continentes has tempestates occupat præmaturè. E Galliâ mihi litteræ; & hoc noui, Petronium ibi recusum cum tuis Notis. Apud me est, videbis redux. De Mureto, nunciant vixisse. antea tamen Senecam Romę edidisse castigatum & illustratum. Valdè velim vidisse. Rogertius noster istic quî valet? quem inuideo tibi, te illi. Fabulamini enim assidue, muginamini, & estis vnâ quando libet, quamdiu libet. ô beatum par! & quod vtinam per me impar! Saluta fodes, & excusa me de silentio iustissimâ morbi causâ. Sed heus tu! imitabor tuum *ὀφισμα*, & ad alium id

hac epistolâ scribam. Cognatus mihi illuc est in comitatu Busij, ..... appella hominem, saluta, (caue neglexeris.) dic accepisse vnas eius litteras, cupere plures. responsum me in breui: impeditum adhuc morbo. O velum mihi vtile, & hâc saltem parte salutarem morbum! patrocinator in omni culpâ. Tu ne inuide, cui frons tam dura, vt excusari etiam possas & possis sine illo. Nos editionem Epistolarum paramus (si quid fortè subitum in hoc morbo) & iam concinnauimus ad libros plures. Tardat, quod offensam alibi aut inuidiam veremur, ex candore & libertate. Quomodo tamen aliter ad amicos scribamus? Sed videbo, & incidam aut recidam: nequi noui in nos venti. Qui vtinam te referant, mihi, vxoriquè! quorum alter te amat, altera perit. Vale. Lugd. nostræ, Kal. Septemb. ∞. I. D. LXXXV.

## EPISTOLA XCVII.

*Leodium.*

LAEVINO TORRENTIO

*V. Amplissimo S. D.*

**L**ITTERAE tuæ quàm gratæ mihi acciderint, haud facile effabor. Mittentem intueor? scio ab eo viro, à quo nosci perhonestum, non dicam compellari. Ipsas? plenæ sunt fidæ cuiusdam beniuolentiæ, & salutarium præceptorum. Et fateor, de Constantiâ meâ iure ita sentis. Aptare enim veterem philosophiam ad Christianam veritatem volui: & in cogitatione eâ totus dum sum, illapsa & elapsa mihi quædam fortasse, quæ illam magis sapiant quàm istam. Non purgo. correctionem imò polliceor. & effecturum me vt ad culmen illud veniam, à primo isto velut gradu. Ego enim seriò scio & sentio, in vno Deo & Filio eius Christo, qui nos benignè redemit, liberauit, spem omnem positam humanæ salutis. Vias ad eam perueniendi, expressas in Sacris litteris. nec hæc externa omnia, & Philologa siue Philosophia, aliud esse quàm accessiones quasdam & ornamenta: folia inquam, non fructus. Quod iudicium meum in isto ipso de Constantiâ libro in fronte apparebit: qui iam iterum sub Plantiniano prælo. At Senecam & Stoicos admiratus sum. Certè. sed non vt qui verum, me iudice, viderint: sed qui paullò magis tamen in iis tenebris oculos aperuerint, quàm ceterum vulgus. De immortalitate

litate nostrâ aut malè aut timidè senserunt, & scripserunt: esto. (etsi disputari eâ de re potest) deum tamen adspice: quæ secta aut illum magis aperuit & homini inseruit, aut ea quæ ad ipsum? maiestatem dico eius, prouidentiam, gubernationem, & curam nostri. Quem primum limitem esse ad cognitionem & amorem veri dei, nemo negat. Hæc mihi sectam illam non probam prorsus fecerunt (absit): sed probabilem tamen supra ceteras, quæ magis humi & circa hominem repunt. Iam de moribus & animorum lustratione, quis Senecæ, Epicteto, Arriano (quamquam ille, Epictetus alter est, & loquitur ferè eius verbis) hac parte præponendus? Multa & præclara Plato, cōfiteor, multa Aristoteles: sed non robore eodem aut neruis. Spirat nescio quis calor in Senecæ aut Epicteti scriptis, qui ad lectorem quoque peruenit: nec differere illi magis de virtute videntur, quàm inserere & inculcare. Quod si vitâ eam & factis non expressere: quid miramur? Verè fidei & verè lucis fulcrum illud defuit: cui qui nō innixus, necessum est in partem aliquam ruat. Et tamen hîc quoque facîle peccari sentio, si quis eos nimis apud lubricam iuuentutem hanc miretur & laudet. Abstrahat enim à veris & legitimis illis animorum medicis, alliget ad agyras istos. quod cùm aliis, tum mihi quoque deinceps censeo cauendum. Non enim satis, ne ipse errem; sed ne alteri sim erroris causa. Itaque, vt illuc redeam, iure quædam in scripto illo meo desideras: & præsertim magis expressam pietatem. Quam ego, te hortatore & duce, non animo meo deinceps geram inclusam, sed proferam & præferam clarè in scriptis. Factum antè à me parcius, (si veram causam vis) in hoc ancipiti statu rerum & varietate iudiciorû, metu offensionum. At ego te sequor: nec inuitus in placidum illud mare rapior ab hoc Torrente. Quod superest, & te (vir maxime) ex animo amari & coli à me scito, & canam illam veritatem. De Dousâ hoc quoque confirmo, virum modestissimû optimumq; esse, & tui amantem. Plantinus ad nos redierat: è quo speramus aliquid audituros de tuis scriptis: quæ æstimari magis à nobis scito, quàm apud te promo. Vale. Lugd. Bat. Prid. Nonas Maij. ∞. IO. LXXXIV. Dominic. Lampsonium valdè velim à me salutes. cuius litteras accepi; at non illud quod in iis promissum. Item Læuincium, fororis tuæ filium.



## EPISTOLA XCIIIX.

*Lutetiam.*

HENRICO WILTIO S. D.

**Q**UOD salui adueneritis, idque ex litteris tuis intellexerim, valdè gratum. contrà molestissimum audire, de morte Sigonij & Guilielmij. Sed ille præter ætatem nihil passus est, (cannescebat enim:) & fructus vberes cepit & reliquit studiorum suorum: iste noster, extinctus in ipso æui & ingenij flore. Feramus, & vereor ut hic annus fatalis sit ingenio non vni. Me quoque carpit lentè morbus: etsi mitior nunc paullò molliorque. Lutetiæ, siue in plerâque Galliâ totâ, pestiferam luem vigere audio: caue & fuge, quantum humaniter licet. Abstine à discursu, ab intemperie, luxu, & inprimis ab insolenti illo Baccho. Nisi caues, factum tibi per illam viam. Melissum istic esse, gaudeo: & magis si vsus tibi cum illo. Velim te in hac peregrinatione innotescere viris; qui claritatis aliquid habent ab ingenio & scriptis. Hęc enim res ad tuam lucem. De Cuiacio quid est? Auaricîne agit? an Lutetiæ est in consilio Regis? ita nescio quis rumor ad me adfert. Tu hæc & talia scribes: quæ grata nobis scis intellectu. Eidem viro epistolam meam ostendere poteris ad Ianum Guilielmium (si tamen occasio erit) quia si memini, quædam in eâ quæ ad illum. Aperi prius, & vide: & quod videbitur face. Sed ô illius alumni nostri ignauam ignauiam! itan' eum perdidisse aut proiecisse commissas litteras? At ego de superbiâ & contemptu pericliter apud Memmium, Pincæum, Faucerium, quem Leidę olim nosti. Plura vetat languor: nec manus aut mens mihi satis prompta ad scribendum. Deum rogo te seruet, & augeat cum annis modestiam & virtutem. Lug. Bat. Kal. Decemb. ∞. IO. LXXXIV. I. Aurato, viro & poëtæ summo, item Passeratio à me salutem.

## EPISTOLA XCIX.

*Antuerpiam.*

IOANNI ROTARIO S. D.

**E**T ipsæ litteræ tuæ, Vir prudentissime, mihi grata: & gratior causa, quæ te impulit ad scribendum. Amor enim & humanitas est: quem nisi mutuuum amem, manantem à tam puro fonte, durus sum & inhumanus. Atque ego te, mi Rotari (verè  
& sine

& sine blanditijs dicam) iam antè inter iunctos habebam & inter caros: ita multa de virtute tuâ audiebâ, & studio sapientiæ & doctrinæ: quod rarum inter tui ordinis homines, quibus \*pen-  
\* Mercurius.  
 natus ille deus carior est quàm \*laureatus. Nunc autem à te lit-  
\* Phœbus.  
 teris tam amantibus prouocatus, sequar in hunc amicitiae campum, nec vinci me patiar officiis, quæ ab animo quidem sunt & adfectu. Constantiam nostram à te probari gaudeo, & magis illud, quòd significas te iam olim in studijs his Sapientiæ deditum: quæ sperni scio à quibusdam vt superuacua, & in quibus parùm ad virtutem sit momenti. Sed errant. quoniam etsi à diuinis litteris verum omne robur, & purâ luce nos perfundi fatear pietatis: sunt tamen hæc iuxta diuinum verbû adminicula quædam, quibus dirigi & firmari possint vacillâtes isti gressus. Nam quin castè & cautè Philosophiâ vtendum sit, non abnego: eaque ad normam & velut lapidem exploranda cælestis legis, cum quâ tamen consentire pleramque eam (dico quæ de Moribus est) quis item neget? in Platone, Trismegisto, Epiëcteto, Arriano, altas præclarasque multas voces reperio: quid refert à quo eæ profusæ, si ab vno illo spiritu veritatis? Quem inspirasse, vbi libuit, prisca illa etiam pectora, & oracula edidisse per homines vanos & profanos, nihil ambigo. Inter vetustissimos Iobum vide. quem è gente electâ fuisse non censent, & tamen scripsisse omnia electa. Mercurium illum ter maximum, quem dixi. mysteria in eo multa & arcana nostræ legis; etsi Ægyptium fuisse traditum sit, nec imbutum veris sacris. Idem in philosophis est, & omnî illâ scholâ quæ à Socrate: quorum scripta notas non obscuras & scintillas præferunt clari illius ignis. Itaque vt in prælio, non gladijs solùm & grauioribus telis res geritur, sed etiam funditorum quædam opera & leuis armaturæ est: sic in hac nostrâ contra vitia & adfectus militiâ, non solùm illo penetrante Verbi mucrone, sed etiam philosophorum hastis & sagittis aptè interdum & vtiliter pugnabimus. Sed digredior. & tu fortasse aliquid de repub. item nostrâ exspectas, vt remunerer te hâc quoque parte. Sed quid scribam? lenta hîc omnia, non læta: & videntur res nostræ velut in vado quodam adhærescere. idque eo tempore, cum velis & remis festinandum sit. Nam qui in nos pugnant, quos progressus cotidie faciant, vides. Reme-  
 dium

dium hîc mutatâ reipub. formâ & ab vno capite quaritur, vti-  
nam vtiliter! Sed vix spero. ita multi palàm, plures dissident oc-  
cultè. A labe eâ quæ Flandriâ corrumpit, immunis nostra Batauia  
non est: & hîc quoque varia iudicia & discidia animorum. Ita  
vereor ne rebus nostris fractis & labentibus *extremum malorum*  
(vt Tacitus noster ait) *discordia quoque accedat*. Quod si fit, con-  
clamatum est: & exsequias Belgicæ, quibus commodum est, ite.  
Sed hæc sunt illa, aduersus quæ Constantia nos munit: & in  
cuius præsidio ego quidem acquiesco. De falso Cicerone illo,  
gaudeo tibi probari iudicium nostrum. Illud miror, Italos fuisse  
tam obefæ naris: à quibus, si deo placet, aureus ille partus. De  
Boulenio & Panhuisio, faciam sedulò: & si quid aliud erit, in  
quo gratum facere tibi tuique similibus possim. Salue. & per te  
Iohannes Viuianus vir planè bonus & poëta. Lugd. Bat. XIV.  
Kal. Ianuar. ∞. IO. LXXXIII.

## EPISTOLA C.

Antuerpiam.

PETRO EGMONDO S. D.

**G**RATVLATIONEM expectas? increpabo. Tûne Româ re-  
cens redieris, & tribus verbis ad Lipsiû? idque post bien-  
nium, & illo ipso biennio per silentium elapso? Certè tuum. non  
enim ego etiâ silens, qui ad te crebrò, ad Bensium etiâ, & ad  
Wincelium dedi. At nunc, tamquam in oculis mihi & ore assi-  
duus, ita languidè scribis & quasi inops rerum. Quin si de te  
nihil & itinerum euentu: saltem de manu illâ nostrâ aliquid lit-  
teratorum? quid Fuluius, quid Muretus, quid meus Bensius acti-  
tent, & illi velut Patres litterarum ac Senatores? quid iunior alia  
soboles, qui succrescunt? Non enim effatam nunc ingeniorum  
Italiam censeo, illam nutricem eorum olim & parentem. Hæc  
peccasti. & vt spem imò viam veniæ ostendam, purga. Quod  
fiet vnâ re, si priores illas litterulas delebis & obrues grandi ali-  
quâ epistolâ, longâ, latâ; & quò magis latâ, magis latâ. Talibus  
enim alloquijs egeo nunc, ô Egmonde, in torpido hoc morbo.  
qui me, annum & tres ipsos menses, iam tenet; nec notus quidem  
adhuc planè medicis, adeò non remotus. Ardore viscerum sunt  
& interni æstus, haud procul ab Hypochondriacâ melancholiâ:  
nisi quòd mens & caput mihi sana. quæ tentari tamen & lèdi per  
eum



eum morbum non te, credo, fugit. Similis aliquis languor fuit, qui magnum Laurentium illum Medicē tenuit & citò abstulit, sed per imperitiam medicorum. Nam aliàs, ad mortem non ita præceps. Ego omnibus armis in eum pugno, & præcipuè auxilio Nympharum (frigida enim in potu & esu mirè iuuant:) & aliquid sanè proficio: nisi quòd ad extremum, vereor ut suppeditet me tam pertinax hic luctator. Victus enim aliquoties non vincitur, diectus non cadit, fugiens non cedit. Antæus aliquis est:

— ab ipso

*Sumit opes animūque casu.*

Et profectò Terræ illa progenies, ducet me ad terram. De me habes. nam de studijs, scilicet in languore hoc languent. Tu autem quid? Grudióne cogitas, & illíc honorem? Fauco, & voueo. illud miror, in eadem togâ candidâ tecum conspici tam nigros. Etiámne ille, ab Lutetiâ huc adspirat? O frontem, frontem! Nec tamen illum nimis culpo (perseuerat enim esse quod fuit:) magis illos, qui flectunt & inclinant se ad tales. O vrbs mihi olim amata & culta, misereor. tenebræ & infamia tibi, per tam obscuros, tam infames. Tu auté, si me audis, obdura & fortiter age: peruinces, si inter suffragatores aut arbitros, vlli erunt mediocriter boni. De migratione nostrâ: amicè tu, nescio an ex famâ meâ, aut ex vsu. Inter hirundines istas ego? æstates aliquot otij & pacis hîc egimus: vis mutem ad ingruentem primam nimborum hiemem? non decorè, fortasse nec prudenter. Perpetuum enim ferenum in illâ parte quis mihi sponder? Obscura, mi Egmonde hæc talia: in quibus vetus illud Tiberianum iure nobis placeat, ut *consilia, quibus impares sumus, fato permittamus*. Homo hîc quid videat? desipit maximè, qui sapit maximè. & solus ille æternus æthereusque oculus est, qui hos euentus cernit, & dirigit sæpè præter omnium mentem. Illi ego hæc & me permitto, & clamo ex animo hoc vetus:

\* *Αγὼ δὲ μ' ὦ Ζεῦ, ἔσθ' ἢ πεπορωμένῃ.*

Tu mi Egmonde vale, & Clarissimū Iurisc. & Antecessorem Iohannē Wamesium, si occasio tibi, à me saluta. virum prudentem, doctū, & (quod expertus sum) in virtutem & litteras valdè pronum. Idem cupio & censeo de Antecessore Philippo Suerio.

\* *Τῷ Ἰουπὶ-  
τερ με δα-  
cito, ὃ Εὐ-  
ταλίας.*

F I N I S.



IUSTI LIPSI  
EPISTOLARVM  
SELECTARVM  
CENTVRIA SECVNDA  
MISCELLANEA.



ANTVERPIÆ,  
EX OFFICINA PLANTINIANA,  
Apud Ioannem Moretum.

CLD. ICD. V.

*Cum Privilegiis Casareo & Regio.*



ИЗДАНИЕ

ПЕРВОЕ

ТОМЪ

ПЕРВЫЙ

*Ad Illustrem virum*

THOMAM BVRGIVM

B A R O N E M,

E T

BRIELANVM PRÆFECTVM.



LTERAM Centuriam episto-  
larum nunc emittimus, Vir il-  
lustris, & nomini tuo meritif-  
simo eam dedicamus. Si amor  
aut beneficia huc me vocant:  
ille in me magnus, & hæc cre-  
bra. si dignitas aut virtus: utrâque ornatus es  
inter gentis tuæ primos. Genus tibi nobilissi-  
mum, & antiquâ stirpe decorum: magnitudo  
animi & prudentia eximie, & cuius vtriusque  
specimen dedisti in his Belgicis quoque tur-  
bis. Ad arma quoties te hostis aut occasio du-  
xit, tu manu strenuus, consilio prouidus: &  
quies cum fuit, Præfectura tua te habuit cum  
ciuium militumque veneratione pariter &  
amore. Quinetiam in illâ nocte temporum,  
cum homines quidam maioris animi quàm  
consilij hæc nostra turbarent, & vno velut  
filo appenderent publicam salutem: ea mo-  
deratio & prudentia tua fuit, vt in mediis

Q<sub>2</sub>

flam-

flammis flamma te non tangeret, & panè  
 vnus firmus quietusque stares in communi il-  
 lo motu. Magna ista sunt: & maiora futura,  
 si maior aliquis aut latior virtuti tuæ campus.  
 Quod voueo: & te, Vir illustris, rogo, vti  
 inscriptionem hanc accipias velut animi cul-  
 tusque mei in te pignus. Vtriusque quidem  
 eximij exiguum: sed quid faciam? vt Vlysses  
 ille apud Alcinoũ nihil habet quod repen-  
 dat pro ingentibus meritis, præter vota &  
 grates: ita ego, quem cetera destituunt præter  
 munera hæc mentis. Quæ tamen vobis ma-  
 gnis quoque sæpè magna. & meritò: quoniam  
 fama & æternitas ab istis: & vt ait Pindarus,

\* Sermo  
 factus diu-  
 tius viuit,  
 quem cum  
 Gratiis vo-  
 lentibus  
 lingua ex-  
 tulerit &  
 profundâ  
 mente.

\* ῥῆμα δ' ἐργμάτων χερσὶν ὀ-  
 τερον βιοτάει,  
 ὃ, ἢ κε σὺν χαρίτων τύχῃ  
 γλῶσσα φρενὸς ὀξέλοι βαθείας.

Vale III. Idus Apr. ∞. Io. xc.



## AD LECTOREM.



ABE etiam hanc CENTURIAM  
 Lector, sed puram, simplicem, &  
 sine mixtione. In priore illâ alienas  
 aliquot inseruimus: nunc displicet,  
 & detraxi. Non ergo digna illa edi?  
 digna, sed non à me: & mali ex-  
 empli, arbitrium hoc sibi sumere in scriptâ aliena.  
 Mihi fieri nolim: & tamen faciunt. atque ecce edunt  
 alibi hanc aut illam epistolam, me non ignaro solum  
 sed inuito. Quæ hæc temeritas, siue improbitas, est?  
 Clamo & testor apud homines qui sunt, qui erunt,  
 inimicus mihi quisquis hoc facit.

QVICVMQVE QVODCVMQVE  
 MEVM, PRÆTER ME, DIVVL-  
 GAT AVT DIVVLGABIT, PRÆ-  
 SES LITTERARVM ET FAMAE  
 DEVS VINDICATO.

Homo imperite & \* ὀρέσας ἠδ' ἐέ. Verba aliquot apud <sup>\* mensura</sup>  
 te familiaria, aut libera, aut blanda effudi: sed apud <sup>uaine.</sup>  
 te: & in lucem tu hæc calide effers? Quid hoc est  
 aliud (ut ar disertissimi viri verbis) quàm tolle-  
 re è vitâ vitæ societatem? tollere amicorum  
 colloquia absentium? Quàm multa ioca so-  
 lent esse in Epistolis, quæ prolata si sint,  
 inepta esse videantur! quàm multa seria, ne-

Q<sub>3</sub>

que

que tamen villo modo diuulganda! *Abi igitur inhumane, inepte: nec sic me produce, imò traduce. En, cùm cautè omnia & circumspèctè scripsimus (ut hoc auum est) non effugimus morsum: tu subitaria mea prodis, id est, latus pectusq; meum nudum obiicis ad omnem ictum? Abstine. & tu Lector, mea ama, sed mea.*



## INDEX

## EPISTOLARVM

## SELECTARVM

## CENTVRIÆ II.

## MISCELLANÆÆ.

<b>A</b> BRAHAMO Mylio epi- stola xxvij.		G.	
Abrahamo Ortelio	xxxvij, lix,	Gerardo Tuningo	lxxvij.
xcix, c.		Gulielmo Cripio Filio	lxxxij.
<b>Æ</b> milio Rosendalio		H.	
	xix.	Hadriano Sarauiæ	xx, lxx:
<b>C.</b>		Hadriano Turneho Hadriani Fi- lio	j.
Carolo Clusio	xxiiij.	Henrico Borbonio Principi Dum- barum	lvij.
Caspari Vosbergio	lxxxvij.	Henrico VViltzio	vij, liij.
Christoph. Plantino	xxvij,	Hieronymo Groslozio Lislæo	xj.
lxxij.		Hieronymo Mercuriali	xlviij.
<b>D.</b>		Hugoni Blotio	xciv.
Dionysio Gothofredo	xxxij.	<b>J.</b>	
Dominico Baudio	xxij, lxxx.	Iacobo Augusto Thvano Amerio	iiij, lxj.
Dominico Lampsonia	xv, l,	Iacobo Corbinello	v.
lxxxvij.		Iacobo Cuiacio	xvij.
<b>E.</b>		Jacobo Monauio	lxxvij, xcviij.
Elberto Leonino	xij.	Iano Doufa V. N.	lvij.
Euerardo Pollioni	xij, xxxix.	Jano Doufa Filio	xlviij.
Euerardo Reidano	xcv.	Iano Duystio	xxxij.
<b>F.</b>		Iano Grutero	xlj.
Federico Morello	lxix.	Jano Lernutio	ix, xviij, liij,
Francisco Bensio	lxxv.	Ioh. Arcerio	xxv, lxxxiiij.
Francisco Hildesbeimio	lxxij.	Joh. Guliel. Stuckio	xxvij.
Francisco Iunio	xiiij.	Iosepho Consalues	lxviij.
Francisco Nansio	xxxvij.	Josepho	
Francisco Raphelengio Filio	vij,		
xxxiiij, liij, lxxv, lxxj, lxxiiij,			
lxxxvij.			



Iosepho Scaligero	xxj.	Nicodemo Frischlino	xxxv.
* Ioseph Scaliger Iulii Caesaris F.		Nicolao Ondaerto	xcij.
Francisco Vertuniano	xlvi.	P.	
Iosie Mercero	xxxj.	Paullo Melisso	xxx.
Isaaco Casaubono	lxxxiv.	Petro Aloftano	xl.
* Iul. Scalig. Ferrerio	xlvi.	Petro Brachio	lxv.
L.		Petro Pauvvio	lx.
Leuino Caluardo	lxxix.	Petro Regemortero	xxij, xlix.
Lamberto Culerio	xlviij.	Petro Villerio	x.
Lamberto Vander-Burch	vj.	Petro Villerio Filio	iiij.
Lanceloto Brunio	xcvi.	Philippo Marnixio	lxxxv.
M.		R.	
Marie Gornacensi, virgini nobili		Regnero Grutero	xcj.
lvj.		T.	
Martino Lydio	xc.	Theodoro Bernardi	xlj.
Matthaeo Dressero	xxxviij.	Theodoro Cantero	lxij, lxxviij.
Michaëli Forgacz, libero Baroni		Theodoro Leevvius	xxvj, xliij.
de Gimes	lxxxj.	lxviij.	
Michaëli Huralto Hospitali	lxiv.	Theodoro Marcilio	xxix.
Michaëli Montano	xlj, lv, xcij.	* Typographus Lectori	xcviij.
N.		V.	
Nathani Chytraeo	lxxxix.	Victori Giselino	ij.

IVSTI LIPSI  
EPISTOLARVM  
SELECTARVM  
CENTVRIA SECVNDA

MISCELLANEA.

EPISTOLA I.

HADRIANO TVRNEBO HADRIANI F.



ERVM mel, non epistolam, à te, Clarissime Turnebe, accepi. Tu mihi gratias? ego tibi, qui tam gràtè & benignè interpretaris officium, quod sine scelere non omisissèm. Qui vir diuinus ille parens tuus fuerit, nôrunt & fatentur omnes, quos stupor non præpedit, aut liuor. Ego à puero, velut astro quopiam inclinante, iui in amorem illius & laudem: nec grandior mutauì affectum, sed auxi. Non nemo inuidet? esto: ille viuet in fumina æternaque gloriâ, quamdiu res Græcæ aut Romanæ. Nec plura hîc de illo: de te, germanissime Turnebe, sic habe. non ambire me amicitias, naturâ & iudicio propèsum ad tenebras & quietem: sed triumphare in tuâ, quem iure amo purum aurum ab illo auro. Plura libet, non licet. testis mihi iste Hier. Grossetius vestrâs, insignis iuuenis, qui iam nunc mihi adest, & abit. At nobis haut sæpè opportunitas mittendi, scribendi tamen semper voluntas. quod crebrò & magis seriò faciam, ita amor hic inter nos perennet, quem coimus auspice & teste immortalì tuo patre. Postid. Id. Mart.

EPISTOLA II.

VICTORI GISELINO.

INVITI à vobis abiimus, inuiti. Quid vis ampliùs? apud amicum hoc satis est: ceterùm, calceum hunc vide, nemo vestrùm

R

scit

scit ubi me premat. Apuleium tuum scriptum conferre cœpi: quædam in eo valdè bona. Venationes etiam nostras attigimus, sed frigidè imò contemptim. A peregrinatione enim hac supinus & aliarum cogitationū, vagè adhuc in studijs erro. nec facilè insistant lineæ, nisi recreatus aduentu vestro: qui, per omnes deos, ne me fallat. Hoc communiter rogamus, Doufa, Hautenus, ego. Varias Lectiones . . . . . legi, editas in Galliâ nuper. placet ingenium adolescentis, placet aliquot locis nostri imitatio, si non furtum. Idem in libello . . . . . Quid dicam? discipulos habeo, & breui faciam sectam. Sed ut ait Pindarus,

\*Optimum  
omne quod  
à naturâ  
est.

\* Τὸ δὲ φύα κατὰ τὴν ἀπὸ τῆς φύας.

Sanè siquid in oratione nostrâ aut stilo probandum: totum à naturâ est, vix à curâ. Rationem meam scribendi scire vis? fundo, non scribo. nec id nisi in calore & interno quodam impetu, haud aliter quàm poëtæ. Siquid operosius paramus; rem meditamur, disponimus. verba facilè succedunt, ac pænè præcedunt meam mentem. Istos rideo, qui etiam epistolas, si dis placet, lentè & velut ad numerum componunt. Verba examinant, circumspiciunt, traijciunt: & miselli cùm omnia fecerint, vinbras putes non homines loqui. Ita tenuis tota scriptio, sine sanguine, colore, carne. Sed diffundor. peccatum meum solenne, cùm ad te scribo. Nuncemendo, & fileo; & te valere iubeo, ac venire. Ni facis, Amor Gifelini res tuas tibi habeto. Lugd. Bat. xv. Kal. Iun. ∞. Id. LXXXI.

### EPISTOLA III.

Lutetiam.

IAC. AVGVSTO THVANO AMERIO.

**D**ISTVLI ad te scribere, V. C. dudum: præter morem meum, & præter votum. Amantes redamare non ego neglegens: & tu merueras, non amore solùm, quem benignè vltro attulisti, sed ingenio, sed doctrinâ, sed probitate: quæ tria in vno Carmine tuo clarè vidi. Sed amabo te, ita perpetuùm Fama te amet & Virtus, ignosce: & morbum hunc nosce, qui non finit me esse mei iuris aut moris. Verba non dedi, non misi: dedi animum, misi affectus mei sæpè auras, qui apud te & duos illos quos in extremo Carmine tuo mecum iungis. O cælestem pænè dixeram



dixeram Trigam! nisi de terrâ & lutô meo aliquid afferrem ego, funalis ille tertius equus. Nam iugales duo, reuerà supra homines: & tu item auriga, qui iunxisti. Nos Epistolas dedimus nuper: & valdè hauebam exemplar tibi illisque mittere, nisi qui has ferret, recuassset. Nosti per hoc bellum, nec tuta, nec trita nunc viarum. Valetudo mea meliuscula: sic tamen, vt extra morbum potius videar, quàm languorem. Damus nunc & edimus *De Pronuntiatione Latine linguae Dialogum*, tenue in re tenui opus, nec dignum meliori vestrà aure. Tu ex animo à me salue: qui aeternum tuus sum. ita sim saluus. Clarissimis Cuiacio & Scaligero salutem. Lugduni Bat. III. Id. Februar. ∞. IO. LXXXVI.

## EPISTOLA IV.

PETRO VILLERIO *Filio.*

**V**ERE scribis. semper tu mihi curâ, & nunces: ita ingenium tuum & mores, & pater etiam, merentur. Utinam aliquâ curâ meâ te curem, & à morbo isto releuem, qui pertinaciter vrget! Quid facias? feres. certus ad salutem tuam hæc dirigi, etsi non ad voluntatem. Si vulgi more loquerer; querelas miscerem, & dolorem meum ostenderem in casu, quo hæc ætas tua & tu indigni. Non faciam. fortiolem esse te & me volo: nec te cupere solatia ex alienâ sympathiâ, nec me promere dolorem, etsi doleam. Nam hoc non nego: si deo visum esset, aliud te malim. cum non visum; quod ipse vult, nolens, (vt sic dicam) volo. Hoc de te scribo. in me nōne idem? languor hic biennalis me tenet, & abijcit in validissimâ hac æui parte. Annum enim trigessimum-nōnum vix attingi. quid tamē angar, aut opponam? facit ille, qui me fecit. Nōne in figuli manu est, effingere leui rotâ vasculum, & idem frangere? Et hoc melius, quod figulus noster nos non frangit, sed refingit, & è miseris beatos, ex inferis superos reddit. Sed hæc talia aut tu tibi sepè, aut omnium optimè pater dicet. De iuris studio, quid nunc cogites? profectò solitudinem id non amat, cui forum semper propositum & turba. Ad Philosophiam magis te nunc ducam, quæ non delectet solùm in hoc tædio, sed firmet. Eloquentia & stilus rus tuum non spreuerint; in quibus si tempus hoc ponis (donec melior tibi valetudo) id non perdis. Scripsi-

mus De Pronunciatione, leui manu, vt in re leui. en habes, vide,  
& à me salue, qui ex animo tibi cupio. Lugduni Batauorum,  
Kalend. April. ∞ . I. LXXXVI.

EPISTOLA V. *Lutetiam.*

IACOBO CORBINELLO.

**L**ITTERAS ad me mittis, non adfectus solùm plenas, (leue id  
verbum sit) sed amoris. Benignè ad amicitiam prouocas,  
laudes adiungis: è quibus has vix agnosco, illam appeto pari te-  
cum voto. Gentem vestram amaui semper: & ex eâ illos maximè,  
qui vetere illâ Italiâ digni. Qualem te esse, mi Corbinelle, nō so-  
lùm ex igniculis litterarum tuarum, quos sparfos colligo, video:  
sed etiam ex testimonio viri magni P. Victorij, qui de indole tuâ  
ad virtutem magna prædicat, nec vana. Atque vtinam pessima  
hæc tempora concedant nobis liberum eundi redeundi iter! pro-  
fectò viderem vos, (lumina illa Galliæ etiam includo:) & nectâr  
illud sermonum vestrorum haurirem auidâ aure. Sed nos iacta-  
mur: nec Æolo etiam vos, vt video, litastis. Venti vbique & tem-  
pestates: quæ, mirum, nisi hoc anno euertant, certè conuertant,  
hanc Europam. Fratris tui *μεγαλοψύχου* historiam & tristem exitum  
legi. quid miremur? hodie illæ viæ, & nil nisi *σκολιδον* videmus à  
plerisque his dynastis. O Italia, Italia illa prisca, vbi es? At tu, vir  
nobilissime, solare te cùm alijs rationibus, quas litteræ & sapien-  
tia tibi suppeditant, tum maximè communi eo Fato, quod ini-  
quum hîc semper in bonos. Exempla tibi prompta scio. tu scito  
& hunc animum: quem iam nunc seriò deuoueo in tui amorem.  
Lugduni Batauor. ∞ . I. LXXXVI.

## EPISTOLA VI.

*Ultraiectum.*LAMBERTO VANDER-BVRCH, *Decano.*

**A**MO iure tuas litteras, amoris & prudentiæ simul plenas. A-  
morem enim interpretor, meas laudes: quas adfectus tibi  
magis certè, quàm iudicium dictat. Quid enim sumus? conari  
me magis scio quàm efficere, velle quàm posse in publicum pro-  
desse. Quidquid tamè id est (& esse aliquid vobis tam fidis ami-  
cis

cis credo)gratum mihi,quòd gratiæ saltem locum parit apud tales viros. At prudentia tua, in ijs mihi clara, quæ de publicâ istâ rescribis: quæ sanè confusa, turbida, & vrinam non vicina ad occasum. Quis bonus non queritur de eâ tecum? sed hoc vnum relictum est, quoniam mederi non in nostrâ manu. Imò fortasse nec humanâ. Deus ille est, qui publicas has clades immittit, qui alit, & fouet; & tum finiet, cum nos earum causas. Eæ autem peccata sunt. quæ adeò apud nos non desinunt aut minuunt, vt augeri mihi & accumulari videantur vnâ cum pœnis. Iritamus cotidie magnum illud numen, & quasi puniendi iustæ causæ non sint, damus nouas. Quando luxus, fastus, libido maior, impunitior? & religio passim nunc in ore, improbitas in corde. Verba pietatem sonant, facta ambitionem, auaritiam: nec in vno alteròve, sed apud plerumque ordinem, ætatem, sexum. Itaque de pace aut tranquillitate, nihil ego spero. — *bella horrida, bella exspecto: aut certè tyrannidem non optabiliore quouis bello.* Illi ad quos Victoria inclinare se videtur, irati veniunt: & si qui moderari volent, nescio an audientur. In omni bello cruda post victoriam principia: magis in ciuili, vbi odia & acerrimæ factiones. Sed Deus videbit: cui, quod ad me, curas has ex animo relinquo. Sicut & illam de valetudine meâ: quam non ego quidem, Vir amicissime, neglego, nec mortem vltro appeto: sed cum feci quæ humanitus possum, securus exspecto euentum. Hoc curo, vt vitam meam corrigam, vt deo meo placeam, vt sedē ab his nimis quietam in superâ illâ arce possideam: vnde adspiciam humana hæc omnia, & contemnam. Interea tamen nec studia prorsus omitto, nec ea omnia per quæ publicè aut priuatim humano generi videor posse prodesse. Ostendent id breui quædam etiam scripta nostra, quæ iterum paramus. De Floro tuo manuss. quem offers, valdè gratum. multa sanè reperio, non animaduersa Vineto aut Stadio ante me censoribus: & reperiam plura, scio, si auxilium mihi tui libri. Itaque si eum quamprimum ad me miseris, beneficio adficiēs me & posteros: nec id celabo. Vale, & fratrem tuum Graphiarium amanter à me saluta, cum gratiarum actione pro munusculo nuper ad me misso. Lugd. Batauorum.



## EPISTOLA VII.

*Antuerpiam.*FRANCISCO RAPHELENGIO *Filio.*

**T**VAS reuersus vidi libens: non etiam ea, quæ in ipsis. Langorem præferunt, & nauseam in rebus omnibus serijs & honestis. Vidi, mi Francisce, iam olim insitum tibi hoc vitium: quod ratione & curâ, quæso te, vince. Iaces, nisi facis. Quid hominis tam proprium, quàm erigi & spectare alta? Alta dico, id est, quæ ad ætheream illam partem pertinent, cælitus immissam nobis mentem. Hæc colenda. nec potest sine meditatione, sine actione: neque ista, sine labore. Hunc igitur vsurpa: quidquid reclamet fastidiens illud tædium, haud longè à veterino. Tu deo, tu auo, tu mihi, curæ & cordi es: nec te deferemus, si non te ipse. Doctoris illius noui diem quòd obieris, benè factum: quòd cum versu celebraueris, nec malè. Sapientiæ pars est leuiter desipere, & paullùm extra viam rectam ire, ad vitandum violentum aliquem occursum. Vidēsne vt nautæ vela sinuent & obloquent: & teneant nihilominus suum portum? imitare. Pietas tibi interna & vera sit proposita, Modestia & Virtus: in externis, personam interdum sume aut pone, pro re aut pro æuo. Studia tua calere velim (ætas ista hoc postulat) & videbimus quid in rem tuam maximè sit vnà cum auo. Surge tantùm, & cōfide. Ineptias . . . . . vidimus, & risimus. quis comprimet Criticorum hunc luxum? Satyra mea frenos non dedit; opus lege aliâ aut rege. Vale. Ex vrbe, in quâ tu olim, XVI. Kal. Decemb. ∞. IO. LXXXVI.

## EPISTOLA IIX.

*Biturigas.*HENRICO WILTIO *IC.*

**C**ANTERV S apud me erat, cùm tuas accepi. dicam gratas? gratissimas, ita me Deus amet, vel hoc nomine quod à sex mensibus primas & solas. Et tu de me quereris? bellè. at ego pluries scripsisse me scio (vide an deceat) quàm te respondisse. Excusabis non redditas. credo: feramus igitur inter nos & excusamus, non tam culpam communem, quàm temporum sortem. Valetudo tua & studia prospera, mihi gaudio. perseuera. Nonne  
apud

apud illum virum es, qui sæculi decus? vide ne frustra: frequenta, audi, disc. Pollio meus honore ab illo auctus: quod ab illo, iure ante honorem ipsum ceseat. Scripsi ad eum, & quam grata mihi Dedicatio illa, ostendi. Vos, quæso, inter vos cõcorditer & amicè viuite: quia Belgæ, quia ex meâ domo, quia sacrorum eorûdem & studiorum. Senectus mea, si ad eam pertingo, solatiû sibi spondet in vobis. Sed quando videbõ? quãdo reditis? mihi placet non porro vos currere, in Germaniam flectere, illinc lares. Iuno Iuga vos exspectat, & Quies. Et si patria hæc etiam nunc turbulenta. sed si non antè peregrinandi vobis finis, quàm hîc quies, quis finis? Tua ad Nonium grata, proba. Sed litteras vrge, & sapientiæ studium ne omitta: ad quam metam dirigi velim omnia tua. Infelix semper erro, si ab illâ aberras. Vt navis quæ inter fluctus sine clauo iactatur, sic mens quæ in hac vitâ sine sapientiæ gubernaculo. Mores illi plebeij, stolidi, vani, ne te inficiant caue. Alphæus mare Siculum subterlabi dicitur, sine mixtione vndarû, ad suam Arethusam: tu per leuitates, per vanitates, ad amatam illam Diuam. Vidisse ea vtile, non se inseruisse: transisse, non miscuisse. Edidimus nuper Centuriam Epistolarum. magni illius viri mihi illic mentio, & sæpius fuisset nisi impedisset ille vir quem hîc nosti. Scænæ seruiendum est, quamdiu ego in hoc Theatro. Sed verum meum sensum breui aperiã magis & diffundam. Nec vos quidem omisi, te & meum Pollionem, vt videbitis, aut potius iam vidistis. Nam libri, credo, allati. Etiam nunc edidi De pronuntiatione Latinæ Linguæ Dialogum, mihi probum. Tu salue, & redi si parenti tuo ita visum. De Italiâ, non tibi, non Pollioni nostro nunc ego auctor, pönite vana cogitationum. xvi. Kalend. Maijas. ∞. IO. LXXXVI.

## EPISTOLA IX.

IANO LERNVTIO S. *dico.*

**I**T A perpetuus inter nos amor sit, mi Lernuti, vt cum aculeo discessi à vobis. Cursim, inquires. Quid facerem? aliud animus, aliud res suadebat. Vitam meam nosti, & scænâ cui seruimus. Si vinqum aliquid verè scripsi, hoc est, quasi anima à corpore, auulsus sum à vobis. Fuge aliud suspicari in me: quem,  
culpa

culpa tua est, si nondum nosti. Nam apud amicos nihil me vno simplicius: apud alios, sanè sim quod Vlysses. Nónne & aulam, & Etruriam ego vidi? sed ijs non vtor apud simplices & candidas istas mentes. De colligendis & digerendis poëtarum nostrorum versibus, ego verò tibi iterum auctor. Famam tuam cum alienâ auctum ibis (quanti enim est, putas, illa recti iudicij gloria? apud me, super ingenij aut doctrinæ.) decus item Germaniæ & nostræ Galliæ. quarum interest, non omnia ingenia intra Alpes clausa videri. Non exemplum nuperum illius vidisti, qui Italos poëtas digessit? sed vellem eius, imò ipso causâ, magis cum dilectu. Inter nostros Lotichium amo: Ianum Pannonium æstimo: Scalligerum patrem admiror. qui si felix illud ingenium & inuentionum inuidendum acumen curâ temperasset & limâ, coronari contra omnes poëtas posset ab illo ipso æuo prisco. Hac, nisi fallor, deficitur: nec in edendis quidem eius adhibitum, quod debuit, discrimen. Eò suaferim, illius & aliorum optima quæque ab optimo iudice selegi: & tu is eris. Reliqua in sermonem reijcio, qui inter nos proximo mense. Ita enim scribo, ita impero. Venies inquam ad hunc Iunium: & iam nunc aures claudio ad omnem excusationem. Extra iocum, Lernuti, in hac breui fugaci que vitâ fruamur hunc fructum. Ferrum nostrum in igni est. Vale.

xv. Kal. Iun. ∞. IO. LXXXI.

## EPISTOLA X.

P. VILLERIO.

**S**OLATIO mihi antea amicorum litteræ, nunc remedio: nec vlla medicina magis leuat hunc languorem, quàm alloquia hæc à vobis. A te inter primos: qui me seriò amas, quem seriò ego amo. Vultum tuum videre nuper cum Hagæ esses, optabam. Fefellisti. contentus manu sum, quia scio quæ negotia te circumstant & implicant, atque abripiant sæpè inuitum. Ego hoc vno felix, quòd meus. Sed nimirum, ut qui semel nauim & mare ingressi, in arbitrio ventorum sunt, nec redeunt ad terram, cum volunt: sic vos, qui in remp. Tenet illa inuitos; & cum terram maximè spectatis, retrahit aliquis æstus. Atq; utinam tui similes teneat semper! Remiges & sentinatores plerique sunt, qui nunc ad clauum.



clauum. Hinc iactatio, & ad extremum, naufragia: nisi ab alto dirigat ille Deus. Inuitatio tua in Zelâdiam, grata: & puto, parebo. non illi alteri consilio, de Galliâ. Nec vera nego quæ de opportunitate, salubritate, & suauitate locorum hominum quæ narras: sed peregrinandi mihi nunc vna causâ, Valetudo. Eam meliorem posse fieri per acidas illas aquas medici suadent, & (vt in spem nostram proni sumus) persuadent. Tentasse quid nocuerit: eo certè animo, vt nihilo abiectior illânc redeam, quàm eam, etiam si omnia sint contrâ. Vitam hanc magnificere Christiani non puto, quem manet vita illa melior: sed nec abijcere, & remedia spernere, quæ data huic fini. Gallia vestra, si deo ita visum, sanû me videat; & exosculer magnas illas animas, quas ignotas amo: imò etiam, quæis ignotus amor. Nam si vsquâ in Europâ, amicos mihi in eâ gente esse, hoc scio. Busbequius meus iam diu inuitauit, differo. In grandi illâ Epistolâ tuâ, de stilo & imitatione quod monuisti, verum est. Quàm multi in iuuentute nos æmulatur! & rideo: quia aut à me procul illi, aut procul certè ego à recto. Nihil magis breuitate amo, sed si simplex: nihil magis breuitate odi, sed si adfectata. Quid etiam, si fucata? nam verba emendicât, & abtrusiores aliquot phrasès: ad quæ, non dicam risum nō teneo, vix iram. Comprimam publico aliquo scripto, & de Imitatione totâ. quid mihi videatur, monebo. Nam ego vt mutem, seruum est. arbuscula hæc, siue recta, siue aliter, creuit & induruit in hanc formam. Ciceronem amo. olim etiam imitatus sum: alius mihi sensus nunc viro. Asianæ dapes non ad meum gustum, Atticæ magis. De Lemouicensi: an frustra monueris, vide. Misi enim exemplar ad filium tuum, nō ad te: quia parum dignum te argumentum. Sed tamen cùm ad filium, nōne & ad te? qui imago vera tui, imò tuipse. Sanitas tantum ei adsit. quam Deus ille dabit, si salutare: & in eâdem te Vir amicissime seruabit. Lugd. Batauor. Kalend. April. ∞. IO. LXXXVI.

## EPISTOLA XI.

HIER. GROSLATIO LISLAEO.

**T**ANTVM non in procinctu iam eram iturus Vltraiectum, & inde in Germaniam; cùm me litteræ tuæ inuenerūt. Di-

S

cam

cam gratas eas? non gratior Gratiarum ipsa diua: per se, & non nihil à clausulâ illâ, quæ de Mercero. Illène illîc? hîc mallet: & iam nunc vos inuitem, nisi abeam. In reditu fiet, si viri estis; & tam vicini videbitis & libabitis saltem oram Batauiæ nostræ. Mihi valetudinis vnius causâ susceptum hoc iter. imus enim ad acidos, qui iuxta Confluentiam, fontes. Valebo per eos fortasse, aut valere iubebo hæc omnia humana. Ad alta illa ibo, nec ibi quoque me amor vestrum deferet, qui altè in pectore isto hæret.

\* - dij verò  
sint mihi  
testes.

\* — δεο δ' ὀνημαρτυροί ἔσονται.

Lugd. Batauorum. vi. Kal. Maias. ∞. Id. LXXXVI.

## EPISTOLA XII.

ELBERTO LEONINO *Geldriæ Cancellario.*

**P**EC CARE mihi viderer, si expertem te habeam consilij, quod firmandæ valetudini meæ cepi. Iter in Germaniam institui ad acidos fontes: in quo iam sum, sed sorte non nimis faustâ. Discrimen quidem adhuc nullum, sed in hoc opidulo, circumcludor à turmis equitum, quæ in Belgium parantur. Ita differtur mihi via, imò pænè aufertur: quia perit opportunissima pars anni, & hyemi sustinendæ haud planè firmum hoc corpus. Ambigo an pergam, an sub tectum me dem, & resistam in aliquâ maritimâ vrbe. ad vos quidem bonâ fide redibo, nisi impediât me, ut vos Iurisconsulti loquimini, vis maior. Ego vir amplissime, amorem & officium omne tibi offero, ab animo non ficto: & iure debeo, quia te comperi mei amantem. Vale. Oldenburgi, Non. Octob. ∞. Id. LXXXVI.

## EPISTOLA XIII.

*Frankfurtum.*

EVERARDO POLLIONI.

**Q**UID ais? siluisse me? erras. Nullas ego à te vidi, ad quas non sedulò responderim: & habui te, mi Euerarde, semper inter primas curas. In languore tuo doleo: & miror quid illud mali morbi, quod vires tam valde afflixit. Sed ætas tua est, quæ faciliè resurget: & si quid spirituum aut sanguinis perierit, reponet. Tu modò te cura, sed sine curâ: & quidquid Deus ille noster dabit,

dabit, excipe libenti, inò & hilarâ fronte. Vivere te vult? velis. Mori? non nolis. finis & initium nostri ab illo sunt: felices, si in illo. *Συδδεα* quædam fumus à magno illo figulo: quid querimus, si fingit nos & refingit? Hæc tibi, & per te mihi dico: qui & ipse valdè inter imbecilles. Febris quidem nupera vix vitam mihi reliquit: & eam ipsam, præter spem omnem medicorum. Basileam meam placuisse tibi, gaudeo: urbem eo nomine planè dignam. In Gallijs nondum *γαλῆης*: & sanè doleo Wiltzium nostrum inuolui, nonnullâ suâ culpâ. Ut quid enim desidet & cunctatur, præter nostram & parentis mentem? Nam de abscessu in Germaniam, suasi pridem. At quod ad te nunc, mi Euerarde: ego de reditu seriò tibi auctor: siue quia pater ita poscit (scis quid illi debeas) siue quia tua valetudo. Amicus hîc & familiaris aër, facilitè tibi dederit novas vires. Et quid ibi hæreas? inter bonos & doctos, scio: sed sine magno tuo vsu. Meta itineris quæ tibi fuit, eam iam attigisti: nec tu mihi Vlysses aliquis esto aut Philoctetes. Terrent te hæc ambigua? quî magis, quàm nos? Sanè infirmus hic patriæ status, fateor, & qui sine manu Dei palàm ruit: sed valdè erras, si his pereuntibus, speras illîc firmitatem. Europæ libertas corrui, si semel hoc vallum. Ego hoc non suadeo solum, sed hortor: & fac, ut in viciniore te aliquando conquiescamus. \* *Αρευνον* esse me scis: tu, \* *Σινε λιβερῶν* & qui alij probi è disciplinâ nostrâ, mihi \* *τέχνη*. De genere vitæ <sup>vis</sup> *Liberi*. quod capias; hoc vnum dico, ut nullum. Late nunc & quiesce, donec desæuiat civilis hæc tempestas. Plura coràm. nam me spe- ro in primis videbis. Prid. Kalend. Mart.

## EPISTOLA XIV.

FRANCISCO IUNIO S. D.

**N**ON amore me præuenisti, sed significatione saltem amoris. Quis paullò humanior, te non nouit? & qui nouit, quis non amet? At tu tamè affectum in me largiter sanè declarasti, cum epistolâ suauissimè scriptâ, tum munere adiuncto, quod meritò mihi carum. Monumentum enim ingenij tui est. parùm illud ad gustum vulgi, fateor: sed ambrosia & nectar nobis, quibus paullò acrior iudicij ille sensus. Sanè in implicatissimo scripto vilè subtilemque operam nauasti: & lumen prætulisti locis, in quæis æter-  
S 2          -          nũm



nūm fortasse caligasset. Multiplex notitia linguarum hoc tibi dedit, ut talia ista interpretari nostro quo possis vnicè, & dixeram pænè, vnus. Iam de affectu tuo in Georgium nostrum quān mihi suaue! Viuit enim in animo meo ille adolescens, magni ingenij, magni acuminis, & qui ad summa omnia venisset, nisi Deus ad verè summa illum euexisset. Felix, qui ereptus tot instantibus malis, & tot futuris. Nam fauillæ huius nostri incēdij spargi mihi videntur, & iam ad vos ire, comprehensuræ (utinam fallar!) Germaniam totam acri igne. Sed publica omitto. De ijs quæ Epistolis ad Atticum obseruitalle te scribis, & offers mittere: valdè velim. Nunc tamen in alijs curis sum, ut videbis. Nam, cū absoluerō, mittam. In tuis ad Curopalatem de Aspro Turcarum lēgi: addas opportunè notulā è priscis Glossis, *Δε ἔστιν ἄσπρον, Asprum.* & iterū: *Ἀσπρότης, candor.* Vberius aliās. nunc salue, vir magne: & tui amantem ama. Lugduni Batauorum.

## EPISTOLA XV.

Leodium.

DOMINICO LAMPSONIO.

**S**PERABAM & aspirabam ad vos, mi Lampsoni: sed, heu, sperabam. Consilia illa omnia euertit is, qui melius nobis, nobis it consultum. Redij, & acquiesco: nisi quòd lepidissima tua epistola saluam mihi sapius mouet, & \* *παραγίξω* iterū ad vos facit, Amoris & Venerum ita plenos. O sermones nectarei, quos promittis! ô fabulæ! ô epulæ! ô lunonem tuam mihi non timendam, quam placem nō verbulo vno, sed oculo! Nullo Ioue opus ad iram eius leniendam in hunc Æneam: qui paratus est satisfacere, & altera tanta scribere aut dicere in viros. Viles mihi, & domi nascuntur tales sermones. Dic illi, saluta, disluaui. Quid ais? fatin' familiariter? non excuso, talis apud te volo esse. Noster \* *ἀδελφός* estne Antuerpiæ? vbicumque, ille meus. Imaginem nostram mittam breui. quam sculpi iussimus à Goltzio, qui te amat & multum sapere in isto quoque genere ait nō falsò. Amici quidam in Germaniam, & vltra, me vocant: ego delibero, & caueo nequid temerè. \* *ὅστις δὲ μάστον ὄλεος ὁπίζομαι.* Quid ni circumspiciam? vbique sunt quæ arceant, quæ alliciant: nec ad gustum humana omnia, quamdiu erimus in humanis. Contentus ergo

\* *Alas quare.*

\* *Venerabilis, seu Reuerens.*

\* *Darus magis felicitas circumspiciendum.*

ego

ego meo Catone. Tamen Aufstelli nonnulli nos hîc turbant : sed adhuc occultè. si pergunt, & magis se aperiunt, mihi quoque ad alia consilia viam. Politica dogmata pango, selecta ex antiquis. Minus gloriæ ea scriptio habebit, scio: sed & minus inuidiæ, & fidei plusculum apud eos, quibus homines magni ( vt poëta ait) *Propter mille annos.* Valetudo vacillat. sustentamus eam quantum potest, remissionibus, peregrinatiunculis, & præsertim hortuli delicijs : in quo leges ecce meas vidè. nam inserui, vt rideas. Vale.

XIII. Kal. Iul. ∞ . IO. LXXXVII.

# L I P S I A N I H O R T I

## L E X

IN IPSO ADITV, SVB PERSONA

B I F R O N T I S I A N I.

\* B. F.

\* Bonum  
factum.

Quisquises, STA, LEGE, PARE.  
IANVS ad hoc limen sic EDICO:

K. I. **H**ORTO & HERO *fruendi tibi ius esto:*  
*Sed illo ad ASPECTVM, isto ad SERMONEM.*  
*Nisi OCVLIS, quidquid heic satum aut natum, ne LIBATO.*  
*TIRO esto, MANVM apud te habeto.*  
*Si effers ad TACTVM aut ad RAPTVM:*  
*Verbo dicam, te EFFERTO.*

K. II. *Sed nec HERO vsquequaque FRVITOR.*  
*Ante SEXTAM vespertinam ne ADITO:*  
*Post SEPTIMAM ne MANETO.*  
*Horæ aliæ, ad alias illi curas.*  
*Heic cogitat, heic pangit:*  
*STILVS heic est, Abi MVSCA.*  
*Quid si & CAENA? Abi MVSCA.*

S 3

K. III. SER-

K. III. SERMONES *etiam ne exleges.*

IOCARI *licet:*

NARRARE *licet:*

ROGARE *licet:*

*Sed nihil* SERIVM.

GRATIA RV M *hic locus est.*

K. IV. *Siquid* AMOENIVS *tamen in* STVDIIIS,

*Inter* AMBVLANDVM

*Differe, doce, disce.*

*Et* MYSARVM *hic locus est.*

K. V. *Tu qui* SERIOSVS,

*Tu qui* RIXOSVS,

EXESTE.

CLVSIVS *ego sum vobis.*

K. VI. CANIS, *prater vnâ,* EMANETO.

HECVBA, *prater vnâ,* EMANETO.

*Habes? hoc etiam.*

QVOQVÒ TE AGIS, TE VIDEO.

## EPISTOLA XVI.

*Hagam.*

THEODORO LEEVIO.

**E**RGO tamdiu te expectamus frustra? non hoc pollicitum, cum nuperrimè istic essemus. Præsta age fidem, inò & amore: & veni non quia promissisti solum, sed quia cupis. Certè debes. quid iucundius quàm cum amicis versari, diu non visis, aut vix visis? Nam aspicere & non alloqui, nec videre quidem est: si non fallit ille Sapiens, *Loquere vt te videam*. Verborum satis habes, si vir bonus es qui soles: sin degenerasti, nec preces quidem te adducent. Quibus abstineo, quia amicis summum precandi genus est, Velle. Ego te die Dominicâ expecto vespere in cænâ, cum Dousâ & Hauteno. Hæc, vt iuris prisca verbis utar, summa dies esto. Vale & ambula, aut vehere potius. postrid. Kal. nouas. ∞. I. C. LXXXVII.

EPI.



## EPISTOLA XVII.

Biturigas.

IACOBO CUIACIO IC.

**D**IV filii, sed inuitus. Bella hoc faciunt, quæ viam nobis omnem intercludunt, penè & vitâ. Ego Germaniam meditabar nuper, & tentavi, sed non volente Euentu. Nunc huic epistolæ spem fecit ad transitum Hier. Groslothus, egregius adolescens, & quod inter laudes eius pono, tui amans: ideo amatus est mihi. Utinam ipsi mihi os illud intueri coram aliquando fas: quod vnum miror hodie (Scaligerum tamen adiungo) in Europâ. Vidi nuper Iuonis in misellum Titium. Perijt infelicissimus hominum, hoc vno tamen felix, quod ab illâ manu: tuâne an Scaligeri, an vtriusque? Nam præter vos, fallor, aut nemo sic scribat. Excitastis sanè quosdam, imò nō excitastis: quia, certum habeo, immorientur ambizioso illi vererno. *Admonere possum*, aiebat ille olim ad Galbam, *corrigenere non possum*: hoc hîc valet. Elogium tuû quo me consecrasti, legi. & ab amore amplector, à iudicio & admiratione (nam & câ voce vteris) quâ ausim? Debeo tibi, Cuiaci, debeo: & falsa in me dictio, *Beneficia tam diu grata esse, donec videantur posse exsolui*. Ego non possum, & quia non possum, ut insani illi amantes, hoc magis volo. Thuanum amo. vbi is est: Scaligerum deperco. quid agit? quid non agit? vtrûvis enim potest & debet: illud ex voto nostro, hoc pro æuo. Politica nescio quæ ego molior, non à me, sed à priscis. illorum gnomas filo quodam verborum meorum necto, & irriso olim verbo, ferrumino. Vellem quædam de Iunonis filio, qui apud nos: sed differo, ne differar. Ventura enim hæc ad te quis spondet? Vale vir maxime. Lugduni Bataurorum postrid. id. Mart. ∞. IC. LXXXVII.

## EPISTOLA XIX.

IANO LERNVTIO.

**I**MBVISTI meliquore litterarum tuarum suauiter aridum & iamdiu earum sitientem. Reuixi. Te tuosque viuere & valere gaudeo: ego quoque vtrumque. etsi istud mediocriter. Animus me sustentat, & concepta opinio non fore perpes discidium  
hoc

hoc nostrum. Nónne ab Albione spem faciunt albæ deæ? hîc narrant. Politica etiam nunc me tenent, nescio an cœptum opus bonâ aui, certè lentâ. Pennas suas non habet. quin vellico & carpo eas vndique ex alieno scriptorum corpore: eoque res tardior. Quale futurum opus sit, nec ipse adhuc scio: & tamen auguror, melius quàm laudatius: id est, maioris rei, quàm famę. sed vos iudicabitis. In Senecam poëtam haud pauca notavi: quem legi his diebus, & nimis me cepit. vtique Medea & Thebais: quas supra omnes alias esse, nec eiusdem vatis, mihi certum. Tu quid censes? quid iuuas? nam aut ipsum dare molior, aut ad eum Notas. Idem de Liuiio. in quo nimia nobis bona. Senecam propriè meum, id est Philosophum, præripuit mihi is, cui ego olim Tacitum, vt aiebat. Quamquam non tam ille me absterret, quàm hic Luterianus Faber, qui politè post illû dedit, & ne quid spei relinquat, pollicetur etiam Prætermissa. De rebus Amici apud Amicum securus esto: excipio Fatum aut Vim. Victoriolo nostro iámne melius? spero. causâ duplici: quia & sedes ei pinguior, & in Autumno iam messis. Reuirefcite, me amate, planè planè tuum, & tuum. Propriid. Kal. Septemb. ∞. IO. LXXXVII.

## EPISTOLA XIX.

ÆMILIO ROSENDALIO.

**V**ix legi tuas, & respondi. Quid ais, aut quid censes? illu sisse me? Non is sum, nec qui amo verba, vt ille ait, blandicella. Strictim laudaui te, sed ex animi mei sensu: nec hîc vela te aut excusa. Dijs gratia, ego is sum & eò veni, vt saltim iudicare possim de meliore & elegantiore ingenij venâ. Nec tamè feci aut facio, vt te attollam: quin contrà, promouisse te cense, non peruenisse. Modestia est, mi Rosendali, & pudor iste ipse quem in te amo, quæ sistere te debent in candidâ illâ Virtutis & Sapientiæ calce. Si ista deserunt, non velis vllis peruenies aut ventis. Pestem hanc video in pleraque iuuentute nostrâ hodie, quæ simul sapere cœpit, iam sapit: & vix limen libauit arcanæ huius domus, putat penetrasse. Tu caue, quod facis: & sponso rem me cape felicissimæ tuæ viæ, quem an reâ in parte ductorem. Seriat quidem beniuolentiæ meæ hoc symbolum habe. quòd tardè ad plerasque litteras & vix respondco:

spondeo: libenter & auidè ad vestrùm talium, qui à nobis semel inducti in Viam hanc rectam, calcatis eam constanter pede recto. Pergite, crescite, viuite, in vestrum & patriæ bonum. Fratri vota eadem reddo, quæ mihi. Leida, in hortulo meo, quem cùm voles, vide; propriid. Kal. Iul. ∞. IO. LXXXVII.

## EPISTOLA XX.

HADRIANO SARAVIAE.

**C**ERTÈ mihi iucundum fuit litteras tuas, & in ijs te, regustare ex interuallo. Tamdiu cur siluisti? Scire debes me tuū & fuisse, & esse, ex quo semel te noui, peramantem. Collegæ fuimus, iuncti sermonibus sæpè & consilijs: & vt illa nunc non sint (Deo visum aliter) manebimus tamen iuncti animo, optimâ illâ parte nostri. Dissident quidam à te, qui mihi assident? nihil ad rem. Amare, & iudicare, ego possum: nec probo sanè omnia, quæ fero. Naturâ mitis & lenis sum, vt nosti: nec facilè me oppono, præsertim sine spe vllâ profectus. Me & mea, quantum possum, compono & curo: publica fateor me numquam tangere, nisi inuitum. Perpetuum hoc mihi iudicium est, nec facilè vlla Suada aut Sophia eripiant mihi hunc errorē. Stoicos illos, quos sæpè miror, scio hac in parte esse alios: qui in rem eunt, & vt poëta ait, ciuilibus vndis se mersant, sed mihi ingenium meum dicat aliud, & inprimis valetudo: quorum neutrum suadet mihi trahere hoc iugum. Itaque priuatim amicus esse didici, & fidus amicus: iuuare patriam aut rempublicam, animo & voto possum, vix consilio aut facto. Quòd me in ea loca inuitas: vellem, sed valetudo nunc quidem arceret. Videbo quid hæc æstas feret: animus quidem iamdiu auet videre pulcherrimam & maximam insularum. Vale. x. Kal. April. ∞. IO. LXXXVIII.

## EPISTOLA XXI.

IOSEPHO SCALIGERO.

**A**DOLESCENS hic cùm ad te iret, mi Scaliger, nefas putauit vt sine meis litteris. Vtinam ego cum illo! sed \* ἀνεμολίον \* irritum. hoc votum: ita Gallia vestra, & nostra item, turbat. Quis prudens

T

dens



dens pedem nunc domo? & tamen ardet mihi animus amplecti te ante fatalem illum diem. Si vlla quietis aura adspirat; certus esto, nos ad te rectà. Iamdiu ne publicè quidem nos alloqueris: quid tibi factum? Per deum nosce te, & sperne hoc æuum maior hoc æuo. Pungunt aut allatrant? qui? nempe ij qui palum non digni figere præ te in parietem. At nos amamus, miramur, & quicumque sumus \* τὸ ἀμείνωνος πηλὸν. facturi hoc æternum, ita amet me ille Æternus. Ad Senecam Tragicum aliquid meditatus sum. habes. nisi ferre grauiabitur hic ipse, qui olim ait fuisse tuus: & vt nunc per me sit, rogo. Vale. Lugduni Batauorum, XI. Kalend. Maij. ∞. ID. LXXXIIX.

\* è meliore  
luso.

## EPISTOLA XXII.

P. REGEMORTERO S. D.

\* prius-po-  
stiorius.

\* cursim.

\* sui inter-  
fectio.  
\* inde sciri-  
re.

EPISTOLAE ego tuæ \* πρῶτον ἐγὼ respondebo, & quæstion-  
culam libabo quam proponis, sed breuiter & cum Home-  
ro \* ὁμοχρόδω. Quid enim hîc vela pandam? hoc ipsum timidè,  
quòd pedem omnino pono in hâc cymbam. Quæris, an sapienti  
fas aut ius consciscere sibi mortem? Olim id disputatum: nunc  
decisum. & scis quid hac in re statuunt religionis nostræ leges,  
quas improbè sollicitemus. Tamē vis aliquid pro veterum men-  
te? distinctè & breuiter. Stoicis adhæream; quibus \* αὐτοχρεια pla-  
cuit, sed nō \* ἀόριστος aut semper. Cùm necessitas suprema ingruit,  
puta à tyranno aut aliâ vi violentâ, nec mōri tibi fas decorè aut  
honestè: putant arbitrij nostri esse vitam nostram. Pauculos dies  
aut horas quidni præueniam, non metu aut ignauia, sed honesto  
illo fine: non, inquam, vt euadam, sed vt aliâ viâ vadam. Quid si  
morbus etiâ vrgeat difficilis, pertinax, & sine spe medicorum? vi-  
deatur haud improbū, non diu iactari in hoc mari, & trāsire com-  
pendio ad portum. Idem in acerbitate temporum, & cū omnia  
miseriarum plena, sine spe alleuationis. Atqui durare melius est,  
inquiunt alij: & hoc viri fortis. Non negamus, vbicumque breue  
aliquod malū est, & quod habere possit medicinam: vbi aliter, ô  
ignauiam mori toties, & nō mori! *Rebus secundis seruare* nos poë-  
ta iubet: sed non per aduersa aduersis. Vt in domo conducticiâ  
si habitern, nihil peccem si paullū exeam ante diem pensio-  
nis:

nis : ita hîc videtur . sed videtur : & nihil definitio ( absit , absit ) præter definita pijs sapientibusque viris . In Thraseâ nostro locum hunc magnificè tractauimus , & vt viro illo dignum . quem tamen premimus , quia nimis nos premant iudicia aut voces calumniosi æui . An iam nunc non pecco , quòd hæc *\*αἰσχρολογία βαλζω?* *\*vana pre-fero.* sed apud te vnum , & ex lege dictâ . Scribis ampliùs de Galliæ rebus : quæ hercules incertæ , & nescio an id quoque regnum venerit ad fatalem metam . Nos quieti per illas turbas : nec præter votum etiam mors illius Albionij , quem putant parùm in nos fuisse æquum . Adolescens , quem mihi commendas , ira erit : & ex vultu ac moribus iudico mereri . Vale . Lugduni Batauorum ,  
IX. Kalend. Febr.

## EPISTOLA XXIII.

DOMINICO BAYDIO.

**D**OLOREM tuum quòd apud me effundis , gratum : certè apud amicum , & de amico . Collegæ illi meo nō ego volo , & semper volui ? ex animo . nec moror quid maligni suspicentur aut effutiant pro suo more . Deus , ego , res mihi testes : & tempus quædam aperiet , quæ nunc latent . Eò dico , quia hæc res ita gesta est , vt me celata omnia sint , & nunc adeò celentur ab ijs , qui nihil aliarum rerum me celarunt . Non credunt ? esto . hilum non ego deterior , sed nec tristior : qui sto apud iudicem , cui nemo mentitur . Curuæ illæ mentes sunt , quæ de me tam curua . At tu Baudi esto quod semper : id est , bonus & volēs , & æquus in eum , qui talis in bonos . Sed de fermunculis parùm est , quos nemo par mihi vitauit , nemo maior : res magis ipsa me angit , cui vtinam à me medicina . Nec de causâ inquiri , quam tu rangis : vulnus ipsum quî coïbit tam grande , tam patens ? Auctoritas alterius partis agitur , alterius honor : & scis alioqui quàm lenti cedere isti nostri . Heu multa in hoc æuo quâ publicè , quâ priuatim molesta ! illud in primis , quòd rebus miscentur , suspitione aut voluntate vulgi , illi ipsi qui extra res omnes se proijciunt animi quodam decreto . Talis ego , nec mentior . sed rarum tamen aliquid in hac vrbe , non solùm Scholâ , cui Lipsij nomen non insertum , verò siue falsò . Doufam nostrum ama , excusa , &

inter plures scito esse vnum: aut certè ne damna (quod in hac mis-  
sione maximè damnatur) inauditâ causâ. Ego eum à diebus ali-  
quot non vidi: & me subtraho, & manum cum Milone haud  
temerè infero inter hiantes has rimas, quæ (Deus ita faciat) coi-  
bunt. nisi, quòd ea quæ munus Recturæ & officium amici mihi  
imponunt, non defero, non deferam, nec cum offensâ. Salue mi  
Baudi. III. Non. Maij. ∞. IO. LXXXVII.

## EPISTOLA XXIV.

Viennam.

CAROLO CLVSIO.

— \* Fato  
seruatus  
ab ipso.

**S**CRIBERE me ad te, mi Clusi, mirum est: & non ego, non  
Salius quispiam id censuisset, ante mensem. Ipso enim natali  
meo XIV. Kal. Nouemb. acris & feruida febris me inuasit; quæ  
corpus per se haud validum ita duos menses penè afflixit, vt om-  
nium iudicio iam in ipso Fati limine starè. Viuo tamen, clemen-  
tis dei beneficio palàm — \* *Θανάτων ἡ κίεας ἀνέλας*. Meas acce-  
pissete gaudeo, & quæ in Senecam adiunxi. Ea nata mihi subito,  
nec otium habuisse aut animum plura exēplaria conferendi, tute  
facilè vides. Gratum mihi quòd Excerpta tui codicis miseris, quæ  
inspiciam opportunè. Lapidem Ancyranum accepi. & iam antè  
habebam descriptum à Busbequio: sed tamen gaudeo firmari  
eius fidem & industriam alterius etiam descriptione. Nam tua  
hæc, parùm aut nihil mutat ab illius. Vt ei ea nobis in volumine  
Antiquitatum Smetij (vbi crebra tui quoque mentio) quod hîc  
edimus elegantibus typis, nec sine publico, vt speramus, bono.  
Vnde vos illud nacti? inquires. Dicam quod rideas, Prædones à  
prædonibus. Milites, inquam, nostri in tumultu hoc Belgico res  
Marci Laurini diripuerunt, inter eas, hunc Thesaurum. Centurio  
qui habuit, in Angliam venalem detulit: emerunt illîc Acade-  
miæ nostræ (cùm casu pro legatis adessent) Curatores. Ego au-  
ctor diuulgâdi, & adiutor. Auc̃tuarium enim addidi Inscriptio-  
num aliquot, quas Smetius aut non vidit, aut omisit. Vtinam tu  
propior nobis fuisses! nec enim dubito, quin iuare largiter po-  
tuisses, & bonam symbolam conferre ex ære, quod peregrè colle-  
gisti. At nunc ferû: nam liber lucem iam spectat. Quòd desides,  
me cruciat: & vtinam agere ac peragere tibi fas vtilissimè cœpta!

Dacia



Dacia non miror si te trahit, me quoque, si deus meus pateretur, in primis delectaret ea loca lustrare, quæ trita scio vestigijs Romanis. Quot illîc lapides & monumenta prisca! Lazius me docuit, qui multa adfert, nec adfert: ita exscripsit parùm fidè aut curiosè. Nos etiam nunc in spe de Irene. Illa quæ Albioni præsidet, legatos missura, imò iam misisse dicitur ad Principem scuti equestris. Tu quid ais? diffidis. Ego illud cogito, *Optare liceat, si potiri non licet*. Illi viro Vincentio Pinello cum scribes, quæso te, salutem ei à me dicito, ignoto de facie, non de famâ. Amo virum, magnum meritò apud omnes magnos. Idem te rogo de Hier. Mercuriali, quem Felicitas mihi dedit vt coràm etiàm Romæ nossent. Vale. Postrid. Id. Ianuar. ∞. IO. LXXXVII.

## EPISTOLA XXV.

IOANNI ARGERIO.

LITTERAE tuæ honestissimi amoris indices, mi Arceri, an gratæ mihi fuerint ne quære. Gratissimæ. & in ijs ἀφελότης illa tua & candor, quem haud minùs quàm doctrinam amo. Pauci hodie tales: & pleræque, quod doleo, \* σκολια aut curuæ mentes. De morbo meo, & eius gravitate, nihil vanum audisti. Pernissimè factum (cum Plauto meo loquor) vt irem ad beatos. Sed tamen viuo, imò & dei benignitate meliusculè etiam habeo, quàm ante morbum. Quòd autem rogas vt te quoque in cohortem meam adscribam amicorum, frustrà rogas: quia reuerà iam adscripsi. Notitia mihi aliqua tecum dudum fuit, & nuper instituta etiam amicitia, id què in sacrâ mensâ: nec violabo, quamdiu me violenta illa dea non violabit. Spondeo. & arram velut pacti huius mitto syntagma nostrum ad Senecam, haud magnæ rei aut molis, in quo tamen (nisi meâ me fallunt) non vulgaris aliquot Notæ. Vale mi Arceri, & vxorem tuam à me meaque saluta. Leidæ. Kalend. ipsis Ianuarij: quas salutare tibi precor & faustas. ∞. IO. LXXXVIII.

## EPISTOLA XXVI

IOH. GVLIEL. STVCKIO.

**Q**UOD gaudes & gratias mihi agis, Vir Clarissime, pro testimonio quod in Epistolis meis tibi reddidi: ego quoque gaudeo, & si pateris, gratias etiam tibi ago. Quidni pro tantâ & tam rarâ gratitudine? præsertim quam elicit beneficium à me nullum. Quid enim mi Stucki in te contuli? paucorum verborum testimonium, doctrinæ & industriæ tuæ ita debitum, ut non qui dixerit benignus existimeretur, sed qui tacuerit, malignus. Abest autem à me hoc vitium, & absit in omne ævum. Candidum mihi valdè ingenium fateor, & quod alienas virtutes siue doctores videt facilè, & visas amplectitur atque amat. Hæc mihi causa eius elogij, à naturâ meâ profecta: nec magis de te demerendo cogitavi, quàm sol ille cum nobis lucet. Tamen hoc quoque laudibus tuis nunc accedito, quòd non solùm doctus, probus (hoc sciimus,) sed etiam mirificè gratus esses: quod nunc disco, & eò magis exemplum exosculor, quòd rarius in hoc ævo. Passim ambitio, infidia, detractio; & commune parvis magnisq; ingenijs vitium, ingratitude. A veteribus haurimus cottidie, quæ scribimus: quoruscunque fatetur aut meminit? A novis multa subducimus: & dissimulamus callidi, quasi hoc vno magni, si nemo præter nos magnus. Sed quod mimis, hoc istis sæpè evenit: & vestis ijs detrahitur in publico hoc theatro. Sed quorsum ista? ut producam, & paullisper tecum fabuler: quem æstimatum mihi antea, certum est iam dehinc amare. Tu me quoque Vir clarissime, & salve, XI. Kal. Sept. ∞. IO. XC.

## EPISTOLA XXVII

ABRAHAMO MYLIO.

**L**ITTERAE tuæ quomodo mihi non gratæ? Adfectus in ijs undique elucet: sed vereor, ut adfectus. pro scriptis meis & pro famâ pugnas: sed rem audi, amanter magis quàm prudenter. Quid enim acri hoc amore tibi vis? probare me aut mea ijs, qui non probant? frustra. & hoc est quasi cibum aliquem conciliare illis,

illis, qui abhorrent. Ut palati inclinationes quædam sunt, quas haud mutes: sic iudicij. nec in probando minùs differimus, quàm in agendo. Ut hæream in hac stili lineâ: age, quis inter veteres, & inter nouos, eâdem ratione scripsit, aut scribit? Similes fortassè aliquos reperies, & id egrè: nullos pares. Natura in corporibus raro hoc commenta est, ut vel ab eâdem parente fætus assimilent: vis tu à diuersissimis ingenijs stilum? Quod si ille variat: necessum est & iudicia. quia quisque optima assequi, aut certè sequi se, censet. A fonte ingenij interno, Myli, ista sunt: & diffusa oratio, stricta; lata, seuera; quemq. delectat aut indelectat, ut quisque est talis. Hinc nationes olim totæ disfederunt de optimo genere dicendi: & nostri oratores Atticos, Asiaticos, Rhodios: quid miraris homines singulos: quid hoc æuo? cum imperitissimus quisq; audacissimus, & iudicij hunc calculû sibi sumit quilibet è litterariâ plebe. De eloquentiâ iudicant, qui nō dicam cuius coloris illa sit nesciunt, sed vix Latina lingua. Itaque Myli non tu, non ego, his sermonibus moueamur: & de Apellæis istis lineis Protogenes aliquis iudicet, non qui auersus ab hac arte aut Musâ. At Critica nostra non effugiunt etiam \* κρίσις. Gaudeo, & ideò scripsi. Præter \* censurem naturam cuiquam hoc videatur, at non meam: qui tam libenter iudicor, quàm iudico ipse. Cur in tam libero scribendi genere non liber cuique sensus, dissensus, imò & lingua sit? Liuior modò absit & malignitas, quam odisse me, cum Homero, fateor

\* ——— ὁμῶς αἰδᾶο πύλησι.

Sed in eo suaues, quòd Orationes me negant scribere. Vellem dixissent, edere: agnoscerem, & causam darem cur laudem nō queram in hac arenâ. De descriptione quis abnuet, qui vel puerum me nouit? Iactantiam omittamus, sed audi simpliciter. hæc palæstra mea vetus est, hoc studiû quo vsus me duxit & natura. Vix duodecennis orationes scripsi, habui: pueriles scilicet: sed quas grauior etiam ætas laudaret in illâ ætate. Nec destiti postea: & credo me specimen etiam dedisse in Batauo hoc solo. Improbulum aliquid addam. si stadium istud eloquentiæ aperuisset mihi mos mei æui, decurrere id ausus essem cum nonnemine prisca æui. Nec verbum vltra addo. erubui. Tu vale. Lugd. nostræ, Kal. Iunijs.

\* ἀγὼν ἀπορίας  
ἀγὼν ἀπορίας  
ἀγὼν ἀπορίας



EPISTOLA XXVIII. *Coloniæ Vbiorum.*

CHRISTOPHORO PLANTINO S. P.

**I**N curâ de te fuimus, mi Plantine, ob tempestatem, quæ, præter anni tempus, sub discessum tuum exorta. Venti quidē prosperi, sed violenti, grandes: deus faxit, vt breui audiamus fuisse, si ne tuâ noxâ. Imbecillitas etiam corpusculi tui nos torquebat, timentes vt parùm esses ferendę agitationi inter vndas. Solatur me vnice tuus animus, magnus ille semper, & se maior, vbi discrimen. Apud te, vt volumus: apud me, vt possumus. Nam morbus meus non deferit etiam hanc materiam, & ignis ille interior in eâ lentè ardet. Sustentamus tamen, & corpore atque animo repugnamus. Typographia bono loco. operę modestæ. nos Tranquillum daturi videmur cis paucos dies. Nam de Thraseâ (etsi bona pars iam parata) tardamus, offensuscularum quarundam metu: etsi non negamus multa ijs inesse, quæ non ad famam meam magis, quàm ad publicum bonum. Videbimus porrò, & statuemus. Franciscus tuo-meus redijt ante biduū, mihi quidem valdè gratus. Litteræ quas ad me teque adfert, testimonium de ingenio & moribus habent valdè honestum. Qui hæc dedit, seruet quæso augeatque. Sed eo quid fieri vis? hîc habes, an euocas ad te? Si hîc: dabimus operam ne orio aburatur, & vt id locet in studijs benè cœptis. Si illuc traducis: (nec id fortasse, vt tēpora sunt, abs re) tua hæc cura, vt collocetur apud eos, qui iuuentutem benè & peritè formant. Scis quid in sermone suaferim. Plura hîc non innouata à tuo discessu, qui nunc me sanè mordet. Ludouico Pereffio amico nostro, & M. Varroni, item Ximenio, Metello Sequano à me officiosam salutem nunciato. De rebus tuis & cōsilijs expecto auidè. Vale ego alter. Lugduni Bat. iv. Kal. Septemb.

## EPISTOLA XXIX.

*Lutetiam.*

THEODORO MARCILIO.

**C**LARVM insigne beniuolentiæ in me edis, Marcili, litteris vltro & tam amanter ad me scriptis. Quæ ita gratæ mihi sunt, vt velim omnia quæ publicè scribo. Nā quòd tu me ames, æstimes,

æstimes, qui non amem? Ingenij tui fætus vidi, noui eos qui te norunt: in illis omnia erudita, bona legi, & ab istis audiui. Hæc de te *\*παῦρα μὲν, ἀλλὰ μάλα πρῶτα.* — Nam in me, vereor vt tu & *\* pauca quidem, sed fida.* tua Gallia parùm veri. Ab amore vel ab humanitate effusæ illæ laudes sunt: quorum ille in te nuper natus, hæc à veteri æuo infita præter omnes gentes huic genti. Error iste est, error: sed amicus, & nescio quo modo sapientissimo cuique etiam gratus. De tuâ meaque patriâ quæ auguraris, vtinam ne tam certa! Iactamur, imò mergimur, nisi quid adiuuat supera illa manus. Arcturus tuus turbat, & rex quispiam etiam ab Arcto: qui clauso freto, minatus nobis nuper miserrimam omnium mortem, Famem. Quid censeas? nisi in totâ Europâ, sed non sine sonitu, inuerti orbem hunc rerum. Id ego video & fero: non solum præceptis ab arcanioribus libris firmatus, sed malorum vsu ipso, qui in animo isto genuit callû. Valetudo nostra anceps, propior tamen bonæ. qualé tibi lôgum, longum, mi amicissime Marcili, (is mihi deinceps eris) opto. Lug. Bat. IV. Kal. Iun. ∞. IC. LXXXVII.

## EPISTOLA XXX.

PAVLO MELISSO S. D.

CERTE postremæ tuæ mihi traditæ, vnâ cum Exsequialibus. quæ fecistis piè & legitimè Principi Anhaltino. Tot aliis tuis quid factum? illud, quod non insolens hoc æuo, abiecitæ credo, aut interceptæ. At carmina illa vestra me recrearunt, tua inprimis, sanè docta: sed & F. Iunij, quem ego nesciebam harum etiam esse Musarum. Ille autem est in primo choro. Stenius etiam vester adprobatus. Quid dicam? Aonij illîc montes, & nisi Doufa vnus vetet, nobis luridæ, imò Stygiæ paludes. Quidni sic appellem, per funesta hæc bella? Nos tamen obduramus, colimus, & vi quadam retinemus abiturientes illas Diuas. Iustitia minatur: cuius (hoc quidem loco) præses, abit & deferit Donellus. non sponte: missus enim est à Scholarchis, caussis quas non dicam. Sed de Pronunciatione etiâ mne vidisti? gaudeo, magis, si apertè mentem explicares, & aut consensum in eâ re mecum, aut dissensum. Nam nunc quæ loqueris, meræ mihi ambages. Hortensius non sum, nec Sphingem accepi, quæ adiutet.

De poëmatis Bargæi, monui Plantinianos. aiunt se misisse, & in vasis inclusa, quæ sunt nunc (esse certè debent) Francofurti. Baronem Serotinum vidi, stellam, verbo dicam, Germaniæ vestræ. Iani Gulielmij poëmata, premis, an edis? Neutrum suadeo, quia incertum mihi an pro ceterâ eius famâ. tu dispice, & tui amantes nos ama. Lugd. Batavor. Kalend. Iunijs, ∞. IO. LXXXVII. V. Nob. Othonem Grynadium salutes à me velim.

## EPISTOLA XXXI.

IOSIAE MERCERO.

**L**ISLAEVS apud nos fuit: cur non vnâ tu? Bella occasio erat: quam vereor vt nunc amissam, frustra postea requiras. Atqui, cum illic sis, Batauiam te nostram, & in eâ Lipsium non videre, dedecus sit nostrum mi Mercere. me coniungo. Non enim tanti ego tibi? Nec crede hanc esse ——— \* *δοιχλὴ ὁδὸν ἀργαλέην τε*: dici vnus res est, cum leuiter fauet ventus. Sed, spero, emendabis. Nostra ad Senecam Tragicum iam mitto. quid censes? & an non mecū facis in iudicio illo, quod de scriptoribus feci? Nam

\* *longam  
viam diffi-  
cilem q̃.*

\* *cacum cor  
habet ple-  
raque ho-  
minum  
turba.*

\* *eximie  
veneratio  
me habet.  
\* stupor.*

\* *τυφλὸν ἔχει ἥτορ ὅμιλ' ὁ ἀνδρῶν ὁ πλεῖς* Ⓞ, ait Pindarus: non etiam tu. Profectò si consideras, Thebais illa, Thebais, \* *ἐξαιρέτως* pulchra est: & quoties lego, \* *σέλας μέλει*, vel potius \* *ἀλη*. Nemo varū visus mihi tam altè, & tam feliciter, volasse. *Iuonis Villiomari* in Titium ante paucos dies vidimus. Nescio an recens lectio me ita ceperit, sed non videor scriptum bellius legisse à multis annis. Non decima illa Musa, Plautus, possit aliquid magis Musæum. Sed dic fodes, quis scriptor? non enim ille falsus Iuo.

\* *Mentiar,  
an verum  
dicam? in-  
bet me ani-  
mus.*

\* *Ψόσμου, ἢ ἔτυμον ἔρεω. κέλε' δέ με θυμός:*

Scaliger noster est, lumen illud & columen litterarum. Non diuinaui? Quæ tamen ibi correctio inter basilicas videtur,

*Discit ab hirsuto iaculum torquere Capellâ,*

nondū mihi proba. Nos aliò longè ducimus Iuuenalis eos versus. Sed hæc talia (deus faciat) aliquando coràm. De patriâ, valdè \* *πρώσιμος*, mi Mercere, noster hîc status. Mihi parū certum est hîc manere; imò certum non manere, si hæc manent. Turbones nimis multi: vtinam vnus aliquis, qui sub Hadriano! Sed tu vale, & nos ama. Lugduni, x. Kal. Octobr. ∞. IO. LXXXVII.

\* *cautus.*

EPI-



## EPISTOLA XXXII.

*Basileam.*

IANO DVYSTIO.

**S**I vlla res me delectat, mi Duysti; ea est cùm vos tales video, qui me audistis. Amantes mei, æstimantes: suprà quàm meritum fortasse est: at non suprà, quàm vos decet. Tu inter eos insigniter gratus: cuius beniuolentiæ in me, iudicij apud omnes de me, clara in litteris tuis video signa. Perge verò, amare inquam non tam me, quàm ea quæ censet in me, Virtutem & Doctrinam: quæ te clarum aliquando efficient, & mihi certè effecerunt iamdiu carum. Studium tuum cognoscendi & compellendi illustres viros, laudo: & pudorem in omni re ama, non in istâ. Hic fructus inter alios peregrinationis tuæ sit, vidisse illa lumina, quæ cogitatione ipsâ te illustrent, excitent ad sui imitationem. Ruinæ & monumenta veterum heroum nos commouent aspectu: quidni istæ viuæ imagines virtutum? Itaque quòd Italianam etiam ex Germania cogitas, approbo: cum cautione tamen illâ quam olim Lanoyo meo (nam Epistolas meas video te vidisse) prouidè præiui. Non repeto. Hoc tantùm Varronis inclamo, CAVE CAVE CANEM. Multi in animo, nonnulli in corpore ad morsum, æternum dolorem retulerunt è pulcherrimâ illâ terrarum. Tu me capis: audi tantùm, imò ausculta. Patauij si Hier. Mercurialem Clarissimum Medicum, imò æui nostri primarium, si inquam vides: à me saluta, & dic ad suauissimam eius epistolam respondisse. O vtinam anni & vires mihi quæ olim! profectò lustrarem amata mihi loca, & amplecterer viros, quorum nomen me recreat & diffundit. Sed coërceo exsiliensem animum: te rogo, vti in me sis quem ostendis, certus à Lipsio idem tibi fore. Lugd. Batauorum, Kalendis Iuniis. ∞. IO. LXXXVII.

## EPISTOLA XXXIII.

DIONYSIO GOTHOFREDO.

**B**REDERODIVS noster, dum ad vos iter affectat, desiderij & memoriam mihi excitauit tui. Meritò te amo, qui iam

\* hominum  
propter  
pestis.

\* pestis.

dudum me : & id ostendisti non vno signo. Scripta tua , quæ in publicum elaborasti , nobis grata , tibi honesta : & in similibus edendis vt perseueres , te hortor. Vides languescere Galliã tuam , & ponere paullatim ardorem illum discendi , docendi , scribendi . Vos pauci è subsidio adeste. Malum illum deum & *εροτο-* *λοιγόν* abisse à vobis , gaudeo : vtinam & *λῆμός* ! quod , vt hæc tempestas anni est , spero. Nos pessum imus : aut valdè fallor : nec sustentat scirpea illa , quam induximus , ratis. Fraudes , inscitia , calor , quid non corrumpunt ? Fuit apud nos nuper Paulus Stephanus Hen. F. mitis animi adolescens : quod velim patri nuncies , & à me salutes. inprimis autem Casaubonum , eiusdem , vt audio , generum , cuius ingenio & crescenti famæ valdè faueo. placent nimis scripta eius , quæ vidi. Cetera à Brederodio nostro audies : quem vt commendem tibi , à se commendatum , non laboro. Tamen vno verbo id facio , sed ferio prorsus. Vale V. C. & me ama. Lugduni Batauor. Idib. Sextil. ∞ . IO. LXXXVII.

## EPISTOLA XXXIV. *Antuerpiam.*

FRANCISCO RAPHELENGIO *Filiò.*

**S**i paullò tardiùs , mi Raphelengi , ad litteras tuas respondeo , non miraberis , si me & te videbis. Me , qui ita cottidie interpellor & occupor , vt omne tempus sermonibus aut colloquiis pænè dandum sit , exiguum aliquod meditationi aut stilo supersit : te , qui ipse in hoc largo otio , in flore ingenij , aut spissò ad nos scribis , aut files. Et tamen scito affici nos tuis litteris , & hærrere in istis medullis semel conceptum tui amorem. Postremæ tuæ me recrearunt. in quibus omnia beniuola in nos ( de quo numquã dubitauì : nec aliter tibi facere fas est ) & de te ipso plena bonæ spei. Vitia vides mollioris illius præsertim & residis animi : quem vtinã , vtinam , semel excites & erigas , mi adolescens , non tam citò relapsurum. Contemni à te humana , gaudeo . quæ me quidem auctore pedibus etiam trahe : sed ita vt contemptus iste ab alto quodam animo sit , non qui ipse se contemnat. Pars illa ætherea in te viuat & vigeat : cetera illi seruiant , sed non vt cum illis ipsa. Hoc modestiam aut sapientiam censēs , iacêre ? ni-

hil

hil agere? ad nullum vitæ genus collineare? Ignauia est, magnorum etiam sæpè ingeniorum pestis. *Subit enim, vt ille inquit, inertiæ ipsius quædam dulcedo, & inuisa primò desidia postremò amatur.* Vt lignum occulta teredo consumit: sic animum delimat paulatim & exedit ignauus hic affectus. Homo es, è duplici materie, cælesti & terrenâ: ad duo etiam natus, cælum & terrâ. Illud imprimis, sed nec hæc neglegenda est, quamdiu es in istâ. Id est, famam, opes, amicos, doctrinam, hæc omniâ modicè parare debes, quæ magna esse vides apud homines etiam magnos. Ad vanâ & validam ambitionem non te voco: ad media tantum illa: quæ vsum sui varium præbere nata sunt, bonum bonis, malum malis. Per hunc omniū rerum immodicum contemptū, vide ne in contemptum veniat vita ipsa. Tempora me dant in languorem, inquires. quid tempora? tu semel statue quis esse debeas, illuc cogitationes actionesq; dirige: cetera eo loco habe, quo tempestates aut ventos. Munies te contra illa, vt poteris: neminem cōtumaciâ aut loquentiâ irritabis: cetera permittes illi, qui tempora & temporum dominos regit. Rarò allisa nauis est, quæ modico vëlo legit litus. Eminentia feriunt procellæ. Hæc cogita: & illud imprimis, vt attemperes te ad consilia aui tui, siue iussa. Quis illo tui amantior? quis vsu rerum peritior? nec puta prudentiam omnem à litterulis manare, aut nescio quâ hac doctrinâ. Telum ea & adiumentum acre, fateor: sed non sola.

Tua in Senecam mihi proba sunt. quid si aliud tale in alium oratorem, siue poëtam? elige. Quæ conferre cœpisti cum Ortelij nostri libro in altero Senecâ, video non mala esse: cupio vt perseueres, & vt quemque librum absolueris, ad me mittas. Ego his diebus Controuersias contuli, & repperi haud pauca Censoribus non visa nec Romanis nec Gallicanis. Res nostræ fluctuant, & turbat vicinum mare: nos illi (Deo hoc debemus) qui solemus, inconcussi. Vale mi Raphelengi, & si me amas, te ama. Lugduni Batauor. propriid. Kalend. Septemb. ∞. IO. LXXXIIX.



EPISTOLA XXXV. *Marpurgum.*

NICODEMO FRISCHLINO.

SEROTINAE tuæ ad me litteræ, tamen grata: vel quia tam  
 Samanter ad amandum prouocas, vel quia communicas iis  
 rebus; quæ in Germaniâ geruntur. Quam terram velut alteram  
 parentem (origine enim nos Belgæ inde) iure diligo, atque eo  
 magis, quod benigna ea nutrix mihi fuit per aliquot annos. Sta-  
 tueram regustare liquores eius, & in itinere medio fui: reppulit  
 me aduersantis Fortunæ velut ventus. Ergo nunc iterum in aquo-  
 sâ Batauiâ meâ, mihi tamen carâ, quia carus ego illi. Cum Cru-  
 sio tua liticula nonnihil me cruciat. nollem in hac paucitate eru-  
 ditorum eos inter se--- \* ἀντιθέσει μάχισασθ' ἐπέεσι. Sed tamen, libe-  
 \* aduersis sermonibus depugnare.  
 rè dicâ, etsi ætate ille grandior; tu mihi in hoc certamine Achil-  
 les, ille Troilus videtur. Plus virium in tuâ hastâ, imò & causâ:  
 si tamen eam per calorem & immodestiam (quod spero lon-  
 gè à te esse) non corrumpis. Ego miror homines esse, qui plus  
 Grammaticorum præceptis tribuant, quàm illis per quos Gram-  
 matici viuunt. Mihi probum & rectum est, quicquid pro-  
 ba & prisca illa ætas scripsit, etsi Grammaticorum omni co-  
 horti aut non lectum aut neglectum. Tamen Crusiana illa  
 \* ne causam.  
 nondum vidi, & ideo iure amplio, ne audiam illud, \* μηδὲ  
 δίκην. Te amo, & saluere iubeo, & crebrò terere hoc littera-  
 rum iter. Agere te Marpurgi gaudeo, apud Principem, qui  
 sapientiâ Germaniæ Princeps. Vale. Lugduni Batauor. VII.  
 Non. Ianuar. ∞. IO. LXXXVII. stilo nostrate.

## EPISTOLA XXXVI.

FRANC. NANSIO V. Cl.

SALVE mi Nansi. en habes Nonnum tuum, quem remitto  
 lectum à me cum voluptate. Ipse Poëta mirificus (vt res qui-  
 dem illa & versio patitur) & tu Censor, in eo emendando. At  
 defectus quos in eo supples, iam non defectus: cum tam felici

&amp;

& pari venâ carmina addideris tua, nec tua. Nonnum enim totum spirant, quem concoxisti. Perge, & ede. ego suadeo: quem scire debes tui amantem esse. Prid. Kal. Iunij. ∞. IO. LXXXVI.

## EPISTOLA XXXVII.

ABRAHAMO ORTELIO.

**T**HESAURVM abs te, mi Orteli, vidi & in parte legi: verè thesaurum. Condita in eo habes, quicquid Græcia aut Latium habuit, in eâ quidem argumenti parte. Placet materies, ordo, industria: illa vtilissima, iste facillimus, hæc summa. Iam præloquia illa & velut lumen operis, quid? bona. Bo-  
chij vestri & Vackeri versus laudabiles: quos ex vngue illo viros puto, & gratulor vestræ vrbi. Quæ iamne respirat? Diu fauces vobis premit atra & famelica illa diua: quam pellet, nisi fallor, nata mox copia pleno cornu. Deus faxit! ciues enim certè amamus, & quicquid Belgarum est, longè ab odio quod factio gignit. Byzantina Imperatrix (Irenen dico) quando ad nos? heu, tardè. nec viam video: nisi quia Deo, cùm volet, \* *πάντα πρὸς ὅτι*, \* *omne in-*  
*πράττει*. Cratonem medicum abiisse audio, & doleo. amauit *uium, per-*  
*uium.* me vir, ego illum. At nos manemus, in extremâ velut vitæ lineâ stantes, & animo dumtaxat, non corpore, fortes. Politica nostra pergunt, sed, vt familiaris poëta meus loquitur, testudineum gradum. Ita sæpè interpellamur, ab amicis; à munere quod sustineo, à morbis. Fero omnia, & te in pectore æternum. Vale.  
Prid. Non. Iulias. ∞. IO. LXXXVII.

## EPISTOLA XXXVIII.

*Erfordiam.*

MATTHAEO DRESSERO.

**E**TIAMNE ex dissitis illis locis aura ad me beniuolentiæ?  
etiam. & spirat ea suauiter in tuis litteris, quas ante paucos dies accepi amoris & honesti iudicij plenas. Vtroque gaudeo, et si illo magis quàm isto: quia tius hic ab eo fonte, & multum me æstimas, quia multum amas. Et verò iam pridem inter nos  
cogno-

\* in perpe-  
tuum.

\* à profun-  
dâ mente.

cognouimus; cùm in Germaniâ vestrâ aliquamdiu Ienæ age-  
rem, & ad meliores artes præire iuuentuti. Tunc (memoriâ  
teneo) coïtum inter nos fœdus amicitiae, non nisi nobiscum mo-  
rituræ. Perseuera: ego de me hunc affectum tibi spondeo <sup>\* εἰς αἰῶ-</sup>  
<sup>nas.</sup> Quem utinam tempora & res nostræ ferrent, ut aut præsen-  
tes, aut certè vicini magis ostenderemus! fruerer te non solum  
cogitatione, sed etiam possessione, & manum inijcerem in cer-  
uices tam amicas. Fata negant. nec aliud relinquitur, quàm ar-  
cta & arcana illa animorum coniunctio: quam magis magisque  
ligemus per epistolarum hæc vincla. Verba ista sunt, fateor: sed  
<sup>\* ἀπο βαςίλειος ψυχῆς,</sup> & re comprobanda, cùm res se dabit. Salue Vir  
eruditissime. Lugduni Batauorum.

## EPISTOLA XXXIX.

Patauium.

EVER. POLLIONI.

\* De car-  
nibus.

**I**TALIANE te tenet? præter opinionem meam, fateor: & ta-  
mengaudeo. Quis non amem illum locum, in quo iucundis-  
simè viximus ipsi olim? qui ante nos, sedes tot illustrium ani-  
marum? Sanè amo, & si adire aut peregrinari in eo dissua-  
deam, repugnem interiori meæ menti. Tamen tardè nec li-  
benter concessi hoc tibi. quid mirare, si timidus amor est? si iu-  
sta etiam mihi causa timoris? eò magis quia gentem & loca  
illa penitiùs paullò introspexi. Ad Lanoyum quæ scripserim,  
legisti: crede non scripta ea animi causâ. Mare, mare, nauig-  
as, & id scopulosum: caue ne obhæreat alibi ista ratis. Cau-  
tè inter captatores homines ambula, te cela, linguam preme,  
omnia proba etsi non probas. Certamen aut dissensus omnino  
tibi cauenda, & ut feliciter hospitem agas, age seruum. Iactan-  
tia aut libertas nobis feruentur: nobis etiam omnis tuus amor  
castus, purus, & nequid delibent ex eo obscenæ illæ aues. Quâ-  
tumuis formâ aut plumis blandiantur, ah fuge; aut potius pu-  
gna, quod dicitur, <sup>\* τῶν κρεῶν.</sup> Reuera de illis agitur. Præsi-  
dium tu in motu ponis, & quod nusquam, ut ais, figes pe-  
dem. malo ut nusquam oculum, inprimis ne animum: & ut  
ille semper munitus sit in eiusmodi occursum aut aspectum. Hoc  
tamen suadeo, ut vidisse Italiam satis habeas, hoc quidem tem-  
pore: nō placeat tibi pernouiſſe eam aut insedisse. Viros magnos  
regio



regio fert, scio: sed sepositos aut subductos: & vt prompti sint, vix per illa discrimina adeundos. Minus mihi sape, & diutius viue. Quibus nunc velim te innotescere, paucos noui. Anni octodecim sunt, cum Italiam ego reliqui: & qui tunc vigeabant, plerosque ex iis reliquit vita. Ad Hier. Mercurialem litteras tamen dedi: virum probum, candidum, illustri doctrinâ & famâ. Bononiæ, opinor, nunc reperies. Romæ est Fuluius Vrsinus, cui salus à me fortasse tibi dederit admissionem. Est ibidem Latinus Latinus, si tamen viuit, probissimus senum quos ego noui, & omni litteraturâ instructus. Eum quoque à me saluta. Reliqui è grandibus sunt, ad quos te non mitto: quirem, vt opinor, quæris, non splendorem. Quod superest, Deum, vt Comici verbo utar, animitus rogo, cautam circumspectamque mentem tibi det, & auidam ad tuos redeundi. Wiltzium meum, si illic est, à me saluta: à quo iam pridem nihil audire me. sed cohibeo. Tu vale. Postrid. Kalend. Septemb. ∞. ID. LXXXIIX.

## EPISTOLA XL.

PETRO ALOSTANO.

**D**OVSA meus ad vos venit, & est in quo operâ tuâ ei opus: quam vt benignè, & vt ingenium tuum est, comiter illi exhibeas, te rogo. Resp. nostra quo loco sit, vides: & quò perduxerint nos acerba quorundam consilia, nec percocta satis ad Prudentiæ solem. Hinc immites isti fructus, quos ciues illi vestri numquam gustarunt, te regente. Vtinam & nunc (tibi hoc, nec tuâ causâ dicam) eiusmodi aliquot ingenia nobis ad clauum! facile sedarent hi fluctus. Nisi fit, mergimur, mi Alostrane, mergimur. Deus iuuat, & te Vir Clariss. seruet. Postrid. Kalend. April. ∞. ID. LXXXVII.

## EPISTOLA XLI.

*Burdigalam.*

MICHAELI MONTANO.

**S**CRIPSI ad te ante menses &, vt tempora hæc sunt, suspicor non vanè, parùm rectè eas litteras, certè parùm feliciter, datas. Nam nec ab eo cui Luteriam curandas miseram, responsi

X

quid-

quidquam accepi. Itaque iterò scriptionem. non quia tuâ magni inter sit, sed quia meâ, scire te & accepisse me humanissimas tuas litteras, & eo quidem animo quo à tali viro merebantur. Non blandiamur inter nos. ego te talem censeo, qualem publicè descripsi vno verbo. Inter septem illos te referam, aut si quid sapientius illis septem. Nam externa & polita ista doctrinarum, sermonis & linguarum ad fastum & fastidium vsque scientiam (audi intimum meum sensum) sperno ego valdè, nisi cum prudentiâ quadam & recti iudicii normâ coniuncta dirigantur ad vsum vitæ. Ea duo postrema in te esse vidi, & illa non deesse. Nos in Politicis aliquid meditabamur, desumptum ex veterum agro: & iam pars non scripta solùm, sed tradita typis. tamen differo, & sustineo me temporum horum adspectu. Ego enim, vt pericula quæ obueniunt, non timeo aut vito; ita non temerè ea prouoco aut arcesso. Scio autem quàm facilè vel in optimis consiliis peccetur, & quod imperu, non consilio fertur. Interea in Senecam Tragicum aliquid Criticum dedi: quem scriptorem, vel ob nomen, scio & te amare. Nunc edo *Curas meas secundas* (ita appello) in Tacitum. Quid faciam? aliquâ fallendum hoc otium est, si non salubri, certè non inutiles occupatione. Tu vir magne. ecquid agas, & inprimis ecquid valeas in Regni vestri morbo, fac me tui amantem scitiorem. Lugduni Batavorum, XVII. Kalend. Maias. ∞. IO. LXXXIIX.

## EPISTOLA XLII.

THEODORO BERNARDI S. D.

**B**ENE habet, mi Theodore. de Amico illo nostro extra meum sumus, imò extra suspicionem. Ille viuit (ex litteris eius mihi constat) & viuet, vt spero, in multos annos. Heu dolorem meum, si aliter! Variis virtutibus amorem nostrum meretur, & certè amore. Quod quaris à me de Apellæis illis lineis, verasne eas censeam, & quales? ad prius respondeo, veras: nec fas ambigere, nisi si fidem spernimus historiæ omnis prisæ. Ad alterum nunc fileo: & censeo vt priùs ab Amico illo nostro quæras, cuius ingenium grande & capax, diffusum per has quoque artes. Mirificus ille vir est, & quem Homeri verbis iure appel-  
les

les\* — *δαίφρονα, ποιητομήτωρ*. Ego coram aliquid tecum. quem de-  
cretum mihi visere ineunte hoc Vere, atque vnà cum Henrico  
Spiegelio meo amplecti. Amo vtrumque : vterque me amate.  
Lugduni Bat. Prid. Kalend. Marr.

\*pruden-  
tem, variâ  
mente pra-  
ditum.

## EPISTOLA XLIII.

THEODORO LEEWIO.

**G**AVDEO & gratulor (hinc enim primùm ordiar) quòd ite-  
rùm te dedisti in itucunda hæc nuptiarum vincla. Deum  
quæso, vti felix tibi ea res & salutaris sit : id est, matrimonium  
concors. Nam in eo voto, includi censeam reliqua vota. De quo  
mihi magna spes est, quòd eam non ex dote legisti, sed ex natu-  
rà, & ex ipsâ. Sic decuit (quidquid vulgus hîc dicit) & equum  
emere, non sellam aut strata. De rep. nostrâ nec ex tuis litteris  
mihi magna spes est, nec ex rumoribus vulgi. Si vtrumque per-  
tendunt, quis exitus? Cedere altera pars debeat, aut potius vtra-  
que, & sic coire in arctum & amicum fœdus. Amentia ! hostis  
in latere, & tantum non ad portas Annibal : & nos litigamus ?  
Atque hæc per eos eueniunt, qui sententiæ suæ tenaces, iudicia  
omnia & consilia spernunt aliorum. qui quam viam semel in-  
gressi sunt, nec omittunt, etiam in errore manifesto. Pestis iam  
olim huius & plurium rerum publicarum : nec facilè excutien-  
da, si aut ipsa potens, aut obsedit potentes. Felices illi Princi-  
pes, quibus electio & iudicium est hominum, quibus fidant  
& credant. Interea quocumque loco nostræ res : nos, mi Lee-  
wi, nostro maneamus, id est, inconcussò illo & firmo. A deo  
& à fato eius pendeamus, certi subire sortem omnem quam ille  
dabit patienti ceruice. Calcitriones isti & refractarij equi, hoc  
consequuntur, vt verbera etiam aliquot excipiant, nec excu-  
tiant tamen iugum. Omnino lenius omne malum fit, leniter  
ferendo. Qui interpretando auget, qui velut scalpit suum vl-  
cus : facit, quod qui onus ad onus sibi addunt. Ego tecum sen-  
tio. standum in hac acie, & sine fugæ vllâ cogitatione, vincen-  
dum aut cadendum : sic tamen, quamdiu palàm aliter non  
suadebit ille Imperator. Lugduni Batavorum XI. Kalend. Octo-  
bris ∞. IO. LXXXVII.



## EPISTOLA XLIV.

IANO DOVSAE *Filio.*

**S**CALIGERVM patrem, quem sæpè tibi laudo, mi Doufa, ipsum hîc vide. Quis depinxit? quo nemo melius aut verius potuit, se ipse. Quando? cum fallere ei minimè libitum, paucis diebus ante summum diem. Heu, quis ille vir! pænè ausim dicere,

\* *sapientia  
similis diis  
immortalibus.*

— \* σοφία μὲν ἀνθρώποις ἀθανάτοις.

Tres sunt quos admirari vnicè soleo, & qui in hominibus excessisse mihi humanum fastigium videntur, Homerus, Hippocrates, Aristoteles: sed addo hunc quartum, qui natus in miraculum & gloriam nostri ævi. Scripta docent (etsi bona, inò optima, eorum pars periit: ) tum hæc Epistola. quam tu mi Doufa, quantum potest, lege, describe, remitte. Nam Pici non ita aurum suum custodiunt, vt ego hunc thesaurum.

## EPISTOLA XLV.

IOS. SCALIGER IVLI CAESARIS F.

*Francisco Vertuniano S.*

**I**NCIDI in Epistolam Patris mei, quam vltimam prudentissimus Senex dictavit. Agnosces, puto, manum meam. eam ille dictavit inuitissimus. hoc est, rogatu Paschalij illius qui se historici Regij non tam munere quàm nomine venditabat. Quod nisi te ex Epistolâ ipsâ cognoscere malle, pluribus tibi explicassem. Hoc vetabat ingenuus pudor, sed officium scribendi expressit importuna hominis loquacitas. Quare, quum te videam studiosum Scaligeri nominis, non dubitavi te hanc Epistolam non solum in deliciis, sed etiam in miraculi parte habiturum. Adde quod eam in parte officij te habere volo, quod ad me pertinere putem te nihil ignorare eorum, quæ ad amicitiam nostram aut augendam aut conservandam spectare videbuntur. Quum Epistolam eam descripseris, remittito. Nam non tantum meâ, sed etiam omnium bonorum interest, eam non perire. Vale, ac me ama. Vlmium nostrum saluta. Abenni. pro prid. Kal. Iun.

## EPISTOLA XLVI.

IVL. SCALIGER FERRERIO S.

**Q**UOD tuis elegantissimis litteris non responderim, multas afferre causas possum, sed omnes quidem præter meas occupationes. Nā quemad-

quemadmodum iucundissima mihi fuit salutatio tua, ita nihil mihi prius esse oportet, quàm ut omnibus omissis ostendam diligenter & mihi fuisset honori, & dandum esse operam ut mutuis officiis eliciam frequentior. Ceterum ad hanc usque diem nemo se obtulit nobis, qui isthuc iter faceret, nisi Quæstorum magistri, quorum tanta est superbia, ut præ se contemptis ceteris omnibus penè regnent. Podius verò noster panè prius abiit quàm accepsit. Atque nunc etiam ita scribo, non qui habeam quidem, sed ut ne mihi desim, si fortè quopiam meliore fato nactus fuero nuntium aliquem opportunum. Scriptionis verò meæ summa in eo potissimum versatur, ut quammaximas possim gratias agam viro de nostro sæculo benè merito Paschali, qui ita censuerit, me augere posse numerum virorum illustrium, præsertim in Regiâ historiâ. Ac quamquam diuturnâ ambitione meus animus æger sibi studuerit aliquid comparare, quo se humo, ut ait ille, tolleretur, sæpè tamen sese respiciens ac sui compos factus, faciendum putavit, ut iam partem gloriæ acquiesceret: non quod vel recusarem, vel parui faciam me uti beneficio tanti viri, sed satis habiturum me debere arbitror, si quantus illi modò notus sim, tantum me ostendat posteritati. Nam quod tam gratiosè atque humanè petit, de me ut historiam conscribam, quin ad id adducar faciendum, tres omnino causæ prohibuere. Ac primum quidem pudor ingenuus, & dignus vel familiâ nostrâ vel meâ institutione. deinde quod quammaximis atque illustrissimis de rebus meis ubi narraueram, tum maximè dixerint me mentiri, quicumque tantum litterarum cum tantâ belli gloriâ in seipsis coniunctum non esse indignantur. Tertium verò illud est, quum elogio simplicissimo transigendum illi video, quæ ne maiori quidem libro comprehendi possent. Pugnavi pedes, eques; adolescens, iuuenis; miles, præfectus; certamine singulari, in obsidionibus, in campo civili, ad ludos equitum ordinarios, in excursionibus, in exercitiis: sæpius vici, aliquando victus sum, corpore, non animo; non virtute, sed fato: sed ita ut etiam aduersi casus ipsi maiori mihi fuerint honori propter egregia facinora, quàm ipsis hostibus victoria. loca infinita non designabo. Familia nostra merita à Taxili usque temporibus erga regnum Gallicum ad meam usque operam notissima sunt. Quod si exempla non sunt odiosa, poterit illius erga me amor eius animum eò impellere, ut simul & Masinissam & Xenophontem componat, quorum utriusque idea vix me vnum exprimat. Vides quàm ridiculus mihi ipsi factus sim, quum vix centesimam quamque partem delibarem. De his omnibus ita ut volet. Nam fami-

liam meam quotusquisque doctiorum neget, si nobilitas in vetustate sita est, esse omnium nobilissimam? cuius lux in Alani splendore ac virtute aduersus Attilam primum refulsit. Si ad capita Principum spectes, liberalium, magnanimorum, fortissimorum; per pauca gentes cum ea sint comparanda. Si quis malit intueri cognationes, deductos nos sciat multis ex Imperatoribus. Quintus enim ego sum ab Imperatoris Ludovici Bauari filia. Si quid verò conferunt etiam ad finitates, quis ignorat Mastini Scaligeri filiam Beatricem, Barnabæ Ducis Mediolani uxorem, decem filias peperisse, quæ omnes maximis Europæ Principibus nuptæ fuerint; vna etiam Eduardo Regis Angliæ filio, quo defuncto duxerit eam uxorem Dux Andegauensium, altera verò Siciliæ Regina fuerit? Sed ut parcam historia; hic est ille Barnabas, cuius fratri nupsit Valentina, & quam honoris causâ nomino, & quâ nominatâ finem statuo gloriæ nostræ. Nihil enim mihi honorificentius contingere potuit, quàm ut essem sub luce Regum Francorum, non solum tamquam ciuis adscitus ab Opt. Max. Francisco Rege diuino, verum etiam particeps benignitatis atque pietatis Regis incomparabilis Henrici secundi. De meis verò vel studiis vel scripturis nihil ad Paschaliū mittam. De iis moribus, qui ad vegetum robur animi pertinent, etiam in hac extremâ senectute, qui panem octogenarius sum, per pauca poterit, nisi graue est. Omitto frigoris, æstus, mediæ patientissimum, dies integros laboribus fregisse, noctes etiam continuasse. Hoc multis fortasse commune: illud non fortasse multis; vespere post expedita diurna negotia ad\* sexaginta versus commentum esse; deinde canasse; post canam dictasse quæ ad agroto- rum postriduanas præscriptiones pertinerent; postea somnum cepisse; summo mane experrectum fremitu nuntiorum qui opem meam petunt cottidianam, interrogasse, respondisse, dictasse sub prandium vsque; meridie pransum illos ipsos versus quos vespere concepissem, ad verbum sine vllâ hæsitatione scribi iussisse. Qui hoc non mirabitur, fortasse ne illud quidem, decem & septem Æschyli versus semel modo lectos summâ fide memoriter illic reddidisse. Habes quæ à Paschalio humanissimè rogatus, à me ipso coactus effudi, non quòd digna putarem tanti viri lucubrationibus atque admiratione posteritatis; sed ne viderer barbaro fastidio tam luculentum officium contempsisse. Vale. Agenno. Prid. Non. Iulij.

\* Sed cxx. fuisse, cōf- que Ioni- cos maio- res, Ios. filius dixit; nam & ipse describe- bat dictan- te Patre.

Tuus Scaliger alienâ manu. meâ enim ægerriam hoc tantum subscripsi.



## EPISTOLA XLVII.

Patauium.

HIERONYMO MERCVRIALI.

**A**D litteras quas à te vnas accepi, iamdiu Vir Cl<sup>me</sup> respondi. Vtinam sæpiùs scriptionis hoc mutuæ iter teramus! quid mihi iucundius? Sed, vt ille ait, multæ inter nos terræ sunt, & multi montes: qui tamen separant me à te, nec separant, ad quem sæpè transuolo cogitationum & desiderij leui alâ. O Italia, quam vidi olim, non pernoui! quando te regustabo? Ita me deus amet, vt hoc aueo. vereor vt frustrâ, cùm tempora video, & valetudinem quoque istam, quæ ambigua & infirma. Sed vt hoc non sit, fas mihi tamen vos interdum litterarum hac viâ adire & alloqui. quod facio nunc ex occasiunculâ, quam mihi præbuit egregius & ingenuæ doctrinæ iuuenis Euerardus Pollio; cui apud te commendando hoc satis erit, quòd vsus olim sit domo meâ & mensâ. Si te videt, ama iuuenem, & benigniore vultu excipe. nec enim aliud pretium quærit, aut certè non maius, peregrinationis suæ, quàm eiusmodi viros & hæc lumina vidisse, iisque innotuisse. Adolescens est \* *ὁ ἄνθρωπος πολλόν*. Idem à te <sup>\* non è  
vniq̃.</sup> peto pro Henrico Wiltzio, si is quoque templum tuum adibit, excipias propitius & volens. Hypochondriorum meus morbus remisit, sic tamen vt intemperies & imbecillitas in hepate remaneat: cui vt possumus, non tam \* *φαρμακεία* quàm diætâ <sup>\* medica-  
mentaria.</sup> medemur. Abiisse te honestissimâ vocatione Bononiam audimus. ni id esset, valdè rogarem in Viri magni Vinc. Pinelli amicitiam me insinuare: quem ego iure æstimo inter Italarum primos. Vale, & seriò amantem tui ama. postrid. Kalend. Septemb.  
∞. IO. LXXXIIX.

## EPISTOLA XLVIII.

Zvvollam.

LAMBERTO CVLENIO IC<sup>to</sup>.

**S**I vniquam, lubens litteras tuas & te in iis regustavi ex intervallo. Molestus mihi esse vereris? numquam potes caput tam amicum. atq; hoc debeo Bronchorstio; qui vt beneficium à me impetraret, prior mihi obtulit litteras tuas: cui adfuturû me  
in om-

in omni re noli ambigere. Ipse id videbit, & scio scribet. Vtinam potius tibi in re simili gratificandi occasio esset! sed patria te & publicum munus tenent, & (vt verum fatear) ita hoc rerum statu omnia hîc & alibi ambigua, vt nesciam an amici sit alium temerè commouere. Dissidij semina palàm video: Deus ille faciat, vt opprimantur in herbâ. Animos magnos illa gens auxiliaris gerit, & nostris certum non cedere de priscâ libertate. Vtrique tamen vt spero aliquid remittent, nec funem hunc contentionis trahent, quod non potest sine casu & pernicië alternâ. Nobis enim, quod Deus auertat, oppressis, quæ illis perennandi spes? Huic rei symbola aliquot conscripsi, quæ hîc vides, in vsum & gratiam præfecti vestri monetæ. Arcanum omnem sensum non explicui: nec opus, perit enim horum talium Venus, nisi aliquid sit, quod lector & inspector quærat, & inuenito eo gaudeat. Comitem Dordraci fuisse, sed statim in Zelandiam rediisse, credo te scire. De summâ rerum, non aliud habeo quod nunciem. suspecta enim adhuc omnia, & mutuâ quadam diffidentiâ suspensa. O Belgica, hûcne redacta es, vt timere eos ipsos debeas, quos euocasti ne timeres! Impedior, ignosce. nam animus mihi certè diutiùs tecum fabulandi, quod aut coràm aliquando fiet, aut per litteras ocio meliore. Vale Vir Clarissimè, & prorsus mihi care. XI. Kalend. Sextil.

## EPISTOLA XLIX.

*Brielam.*

PETRO REGEMORTERO.

**E**RGÓNE meas nondum accepisti? at dedi illi ipsi qui tuas adtulit, atque adeò etiam ad Baudium. Socordia hæc hominum, an perfidia? Tamen amorem & curam tuam amo, qui me alteris etiam compellas, & significas quæ gratum mihi intellegere & scire. Nam etsi, mi Regemortere, reip. nō misceor (scis hac in parte decretum meum, quod nulla res mutabit) tamen non ita <sup>\* aliud</sup> <sup>agens.</sup> <sup>per te</sup> <sup>opus</sup> sum, aut ab communi hac virâ abeo, vt exuam solitudinem omnem de patriâ & affectû. Ego illi benè cupio, & ex animo iis omnibus qui l anc procurant. Vtinâ concordia illa inter nos, quæ esse debeat: & quæ nisi breui coit, perimus. Ego tecum quoque sentio, legum ita habendam rationem nobis, v

præua

præualeat suprema illa lex. Patriæ salus. cum hæc periclitatur ob  
 priua aliqua scita siue leges, scio non solum flectendas istas sed  
 frangendas : & improbus, quisquis aliter sentit. Sed tamen vi-  
 dendum, nequid nimis tendatur : & ne acri contentione rumpatur,  
 quod dicitur, hic funis. Vtrique cadimus, si id fiat. Principi-  
 bus honorem & dignitatem seruari, æquum & verum est : sed,  
 per deum immortalem, ne ita illa omnia ad exactam & sum-  
 mam rationem reuocemus, ut neglegamus salutem. Tempestas  
 & venti in hoc mari sunt. quis ille nauta, qui vno cursu & cer-  
 tâ, ut sic dicam, lineâ peruehi conetur in portum ? Flectendum  
 est, vela commutanda, obuertenda : & curandum, ut turò po-  
 tius perueniamus quò institimus, quàm ut citò. Dies multa da-  
 bit quæ nunc ardua videntur, & ille \* *ὁ πάντων πατήρ χρόνος*. Calo-  
 re quisquis vititur apud frigidas has gentes, fallatur & labetur.  
 Duci volunt, non trahi. Ille noster \* *μεγαλάντρος*, utinam largiatur  
 aliquid istis cum vsurâ recipiendum, & submittat se nonnihil ut  
 crescat ! Liberè hæc ad te scribo (sed solum) nec cælo sententiam  
 meam in hoc dissidio non dissidio, quæ est, Indulgere. Si per-  
 tendimus : è leuiculis rebus veniemus ad image maiores rixas.  
 Cum Ordinibus ut conueniatur, id est opidis, caput rei est : de  
 hominibus singulis, quales & quanti illi sint, quis labore ? Se-  
 quentur, aut ruent. De collegæ mei negotio, rogari nolo. Non  
 dicam fenestrâ, sed rimâ mihi apertâ, omnia conabor ad per-  
 fringendam hanc arcem : quamquam ille, quod scis, nescio quâ  
 causâ alienior à me in totâ hac causâ. Sed nihilominus \* *μελίσσει*.  
 Tu vale. XII. Kal. Octob. 1611

\* *omnium  
pater Tem-  
pus.*

\* *magnani-  
mus.*

\* *cura erit.*

## EPISTOLARUM.

Leodium.

DOMINICO LAMPSONIO.

**H**EVs tu, quid nuntij habes non intempestiui solum, sed  
 infidi ? Ille me in horto subitò opprimit, litteras tuas por-  
 rigit (illas quidem optatissimas) poscit illicò responsum. Intra  
 horulam, inquam. negat. Intra semihorulam. negat. Quid ergo  
 faciam ? inquo. Mitte sodes, inquit, Hagam : totum diem ego  
 trās illū, & in tali domo. Ego, mi Lampsoni, testor Genium ami-  
 citiæ, misi : sed litteræ ad me remissæ, cum ille nusquam compa-  
 ruisset. Hoc præfari volui, & silentium excusare. nunc ad tuas.

Y

Vrges



Vrges valdè vt concinnem De institutione Iuuentutis. fiet : sed non antè potest , quàm hoc pertexuero in Politicis , quod sum exorsus . Valdè id opus me tenet : magis quàm vllum meum , etsi nec meum . Colligo enim & confarcino ex scriptis alienis . Quid faciam ? vereor vt error iudicij mei fuerit in ordiendo : nunc constantiæ laus est in absoluendo . Quædam etiam interueniunt , de temperie in Religionis rebus , & talia , quæ hoc æuo cum omnium gratiâ aut veniâ non dicas . Tamen faciam , & breui vt spero habebis . Nunc istud breue adtextum siue *ῥησιμα* habe ad Cornelium : non gustandum , nisi illo lecto . Opus eo edito fuit , quia iterum Commentarij nostri eduntur cum hoc augmento : quos qui non habebunt , contenti sint illo . Status publicus apud nos valdè \* *κυριαίς* . de Pace multus sermo & multa spes fuit : nunc iterum languescit . Petrum Oranum quod amicum mihi conciliaſti ( tuum hoc esse scio ) gaudeo . Virum magnum , & quod caput est , bonum esse , quidni credam , qui tibi sic placeat ? Itaque responde illi audacter de mutuo meo animo : quem factis verbisque ostendam , vbi res cumque feret . Sed nonne ego Oranum noui aliquem Coloniae olim ? opinor , & qui erat ex Leodiensium gente apud Patres illos meos , quos nosti . Nectamen opinor hunc esse . Tu quæ promittis , aut vt verius dicam , offers , de Institutione à Ximenio scriptâ , si me amas , fac videam . Valdè me iis aut adiutum iri scio , aut firmitum . Lugd. Bataur. xv. Kalend. Iul. ∞ . IO. LXXXIIX.

\* *ῥησιμα*.

## EPISTOLA LI. *Dantiscum.*

IANO GRUTERO.

**B**REVES & tristes tuas nuper accepi , de parentis optimi fato : & nunc vberiores paullo , non lætiores . Nimis , mi Grutere , iaces . Quid te moneam ? scio te hanc in rem omnia quæ me scire : hoc deest , quod non vsurpas . Remedia habes , sed recondita velut in thecâ tuæ mentis . non expromis . At nunc est vsus eorum , aut numquam erit . Vides publicè , vides priuatim omnia aduersa , tristitia : nec spem cuiquam nisi in se , id est , robore & contemptu quodam omnium rerum . Quid alios , quid me censes agere scilicet dies festos ? in morbo iam biennium non cubo , sed,

sed, quod deterius ego censeo, ambulo. Æger enim omnia munia fungi cogor sanorum. Alius me scribere, legere vult, alius conuiuari, hilarescere, & omnia agere vt solebam. Et tamen, mi Grutere, apto me huic scenæ, & hilari vultu personam sustineo, quam imposuit magnus ille Ædilis. tu idem fac. Non es qui ille, & ille? at multi etiam infra te sunt, & qui in cælo sibi videantur, si tuo loco. Alia solatia omitto: hoc quòd sapere & scire supra vulgum aliquid tibi datum est, quanti æstimas? Si vero pretio, supra omnes debes humanas opes. Descende in te, subtrahe ab circumfusus & externis, & oblectare cum interno illo deo qui in te viuit. Ille, ille melior ignis, nisi opprimis, extinguere vnâ flammulâ potest humida hæc omnia & lenta curarum. Huic rei en nouum subsidium, libros. Misimus enim quos petisti. At tu *Pericula* tua cur nobis inuides? irascor. Ego me velut Familiarem aliquem Larem vel primum placandum censebam hisce libamentis. Culpam vides, tu emenda. In Plautum iam nuper accepi, & sanè placuerunt. Non scripsi: quia tunc nullus videbam, & hæserunt ex Notæ apud Æmilium nostrum Rosendalium, me non inuito. Amo enim & illum adolescentem, ingenij planè boni & recti, id est tui. De Constantiâ nostrâ quod etiam nunc quidam carpunt: securus esto, mi Grutere. Morbus hic quidam animi est, & nocere magis volunt, quàm nocebunt.

*Illam aget pennâ metueret solui*

*Fama superstes.*

\* Αφθιτος inquam, etsi non \* ἀφθονον hoc scriptum. Semel hoc dicendum fuit, ob Lentulos istos, quorum abundans ea ora. At tu vale. Lugd. Bat. Prid. Kalend. Septemb.

\* *Expere  
mortis.  
\* Expere  
inuidia*

## EPISTOLA LII.

FRANCISCO RAPHELENGIO *Filio.*

**P**RAEFATIONEM tuam duplicem vidi, mi Raphelengi, titulo ipso alteram mihi gratam. Ad me enim est, in quo non tam memoria mei delectat, quàm gratitudo, quâ meritò declaras in eum, qui voluit tibi semper, vult, & volet. Vtraq; proba satis: vellem paullò longior. Nam etsi breuitas mihi amica, in quo haud infeliciter me sequeris: tamen in adolescentiæ isto

\*Dij bona  
laboribus  
vendunt.

quo maior quædam vbertas mihi haud displiceat. quæ ipsa etiam esse potest, sine fraude vllâ breuitatis. Plura cur non scribis, etiam si non pluribus? id est, cur non extendis siue Epistolas siue Præfationes tuas, & materiæ plusculum addis? Nam verba non desidero: & in eo mihi places. Vide ne rem tibi dicam: nec tu iudicio istud facias, sed fugâ quadam laboris aut intentionis. Ingenium tuum, mi adulescens, in omnia validum. vtinam tu exerceas, & solum illud fertile magis assiduo, vt sic dicam, vomere inuertas! Diligentiam à te volo, diligentiam: nec eam cum impetu, sed stabili quodam animi tenore. Quid? influere eruditionem aut virtutem ipsam censens, famam aut opes affluere, sine contentione & labore? erras. \* *Ἐοί τ' ἀγαθὰ πόνοις πωλῶν*), vetus & vera gnome est: quam, si quid me aut te amas, ama. Manutium & Stephanum quoties tibi ingessi? tu supra eos esse potes (verè tibi vaticinor) magnâ conciliatrice Aui tui famâ: quam illi non habuerunt. At tu hæc contemnis. vtinam omnia externa! sed contemnas tamen cum modo, qui nisi adest, insipiens omnis Sapientia euadit. Homini ego nihil humanarum rerum magnum esse fateor, si animum & cælestem illam particulam spectes: si corpus, & si vitam cur prorsum negligas ea, quæ ad opes faciant aut honores? Abiectè sapit, quisquis ea sic abiicit. Erige igitur te, & aptum præbe iis ad quæ Auus, Pater, Ego, te destinamus: adiuturi omnes in hoc honesto cursu, non clamore solùm & fauore, sed & rebus. Ego quidem non opem solùm meam, sed & opes ad hanc rem polliceor: vt te præbeas dignum iis qui genuerunt, iis qui docuerunt. Omnino autem (hæc summa admonitionis meæ est) magis assiduum & crebrû te velim in scribendo, in legendo: magis etiam tui amantem, & æstimantem. non quò ad superbiam te vocem (absit, absit illa pestis) sed vt ad tui pretium: id est, ne dona quæ magnus ille Deus in te contulit, vt aquam immotam, sordescere patiaris & obsolere. Senecam tuum expecto cû iis ipsis Præfationibus, in quibus nihil muto. nec in meis quidem laudibus: quas decorè tu mihi das, etsi numquam recepturo. Ad te redeunt. Mitte quamprimùm exemplar. In Thebaide versum repperi (nescio an ita in aliis libris) *Μεὸς ὅ; manes manibus infestis petit* *Ἐδάτῃ; vultus*. ineptè. cùm legendû sit, *Μεὸς ὅ; que manes*. De Senecâ Ortelij nostri gratiam illi habeo, & tibi ta-

men



men facio gratiam conferendi. Nimis nouitium exemplar est, ut video ex iis quæ adnotasti de æuo. Nos in Tacitum damus CVRAS SECVNDAS: in Politicis paullum resistentes, in temporum hoc flexu. Vale. Lugd. Bat. VI. Kal. Maias. ∞. IO. LXXXIIX.

## EPISTOLA LIII.

IANO LERNVTIO.

**A**VDES, non dicam scribere, sed cogitare, quæ scribis? Ego tui obliuiscar? ego te deferam in hoc casu? Ah, mihi Lernuti, pectus mihi scindunt hæc tua verba. Sol citius suum cursum, quàm ego relinquam tam diu sanctè habitum amorem. Negas scripsisse me. quæ potes? Ternas dedisse me scio, vnas famulo tuo ipsi in manus: binas misisse ad vxorem. Quid possum, si ex perierunt? Iam in re tuâ, & ad leuandum miserum hunc casum, quid omisi? Scripsi ad. . . . ., scribi iussi ad. . . . . : nec ut pro amico, sed ut pro me ipso. Nihil factum, inquires. Doleo. nec nimis miror, qui scio (ut nunc se verterunt vices) gratiam meam leuem esse apud hos è stirpe Bruti. Vtinam qui hîc potiuntur rerum, ius habeant in eo loco! Lipsius non essem, aut tu non illîc. Tamen scripsi in Britanniam ipsam: & inprimis ad Thomam Henneagium, virum illustrem & mihi amicum. Daniel etiam Rogerius redux è legatione Danicâ hîc fuit. feriò cum eo egi, nec solum ut ipse adniteretur; sed ut apud quos ipse aliquid posset. quid tamen dicam? quod res est: rem volunt isti. Castorum fabulam legisti? cum omnia fecerimus, vsurpanda erit, & non eripies te nisi abiectâ tui parte. Mihi si valetudo paullum modò firmior (caput hoc iuro) iâ in Britannis essem, aut in tuis vinclis. Sed quàm vacillem, & quàm ægrè <sup>\* σωματίον</sup> hoc sustineam, credo te audisse. Ceterum spero aliquid à promissis Rogerij, quem ipsum audio futurum inter Legatos. Tu interea, mi amice, esto quem esse te expedit; id est, vir, & fortis. En palæstra & arena, in quâ Deus spectandum te præbuit: exere insitum tibi robur. Clama in Fortunam, Nihil agis: non si libertatem mihi eripias, sed si ipsam vitam. Ignaui animi ad primum ictum concidunt: tu ostende aliquid in te esse altioris auræ. Ego, imò nos omnes quotquot hîc, planè tui sumus. si

\* *Serenus esto, ut postumate te quoque sacula laudent.*

quid possumus, viam præsigna : inibimus, pænè dixerim, vel illam quæ fert ad Orcum. Tu interea vale, & \* *Ἀλκιμὸς ἔσ', ἵνα τίς σε καὶ ὀψιγόναν εὖ εἴπῃ.* VI. Idus Martij, ∞ . IO. LXXXIX.

## EPISTOLA LIV.

Romam.

HENRICO WILTZIO S. D.

**G**RANDIVSCVLVM interuallum fuit à te litterarum, mi Wiltzi. Accepi nuncdemum, quæ te Neapoli fuisse nunciarent. Gaudeo, & gratulor vniuersam hanc peregrinationem adhuc cessisse ex voto. Deus reliqua sic secundet. quamquã quid reliqua? Deuste ad nos reducat, quod & suadeo & opto. Satis vsui datum, satis etiam voluptati: longior emansio discrimen fortasse habeat, non fructum. Si patriâ decretum carere vobis, donec omnia hîc tranquilla: quando fiet? In omni Europâ turbas subseri vides turbis. Tu nobis te redde, & componere ad hoc æuum: in quo ipso minùs recto, viuere semper tibi sit rectè. Externa ista vis si nos cogat, malè agatur cum diuinissimâ illâ parte. At hæc talia coràm. Nam ego non consilio, non auxilio vmquam deero: & amo vos qui apud me olim, vt si ex me essetis. Meus Pollio, vbi est? audio cogitare Viennam & illum tractum. Nolim. & si propior sim, (quoniam verba nostra negligit) manum iniiciam huic errori. Redite. in patriâ, apud parentes viuite, atque ita mihi valete. Ad Franc. Bencium scripsi ante menses pauculos. O virum, quem ego olim & nunc amo! Frater mihi fuit, nec solui vmquam possit artus ille amor. Iam dotes in eo sunt, dignissimæ vel admiratione vel amore: quas tu coràm vides & gustas. Da te viro. paucos meliores aut maiores dabit tibi ille tractus. Vale. Lugd. nostræ, III. Kalend. Maias. ∞ . IO. LXXXIX.

## EPISTOLA LV.

Burdigalam.

MICH. MONTANO.

**I**AM semel ad te scripsi, Vir Nobilissime: nec satis certum habeo, an litteræ ad te perlatae. Interuallum locorum grande est:

est : & addo, quòd nihil hodie tam receptum , quàm fallere fidem. Iteraui igitur. & scire te hoc volui, cum gaudio me litteras tuas accepisse, & legisse cum voluptate. Diu est cùm te noui, nec noui : à mente & scriptis, non à corpore. & admiratus sum (nihil hîc vanum) rectitudinem iudicij tui, eò magis fortasse quòd in plerisque simillimum id meo. Nam fateor : in Europâ non inuêni, qui in his talibus sensu mecum magis consentiret. Vtinam plura tibi scribere mens, aut otium ! quamquam istud fortasse, non illa : quia auersum te ab omni gloriâ video, etiam verâ. Non debebas. & habere in oculis si nō æternitatem temporum, at miseriam hominum : qui talibus monitorum auxiliis omnino ducendi, fulciendi. Me valetudo prohibet ab iis, quæ vellem. tamen, vt languidi, conor & serpo : & nescio quid in Politicis breui dabo, meo textu, non tamen filo. Videbis inter primos : vtinam & probes ! De Galliâ tuâ & te vident, quòd inuitas & offers : gratum est. sed quâ possum ? valetudo me ligat : & si non illa, etiam turbæ. quas non effugiam, vt video, nisi in plenâ illâ libertate. Salue, vir nobilissime, ab eo, cui tu semper carus & magnus. Lugduni Batauorum, III. Kalend. Septemb.

## EPISTOLA LVI.

MARIAE GORNACENSI, *Virgini nobili.*

**Q**VAE tu es, quæ sic ad me scribis ? Virgo ? vix facis fidem. Hæcne, non dicam lectio & ingenium, sed prudentia & iudicium cadant in illum sexum, in istud æuum ? Commouisti me virgo : & nescio an gauisus sim sæculi, an doluerim sexus nostri causâ. Accedere tu ad nos vis ? imò supra nos ascendere. atq ; ita facito, deo hominibusque fauentibus : certè me. qui te ignotam amo ; & quem affectu paucis præbeo, miror. Quia mihi lucem, quâ te propius nôrim ? non enim dicâ probius. adeò satis te nosse videor è pauculis scriptis, atque adeò vel sine scriptis. Ex vno iudicio tuo, quod de viro illo magno fecisti, non ego de te iudicem ? Non cadit hoc nisi in illû, illâmvē (tu ad cautionē hanc nos ducis) qui ipse valdè magnus. Vt animam nisi anima nō capit :  
sic



sic sapientem nisi sapiens. Maesta tu, & persta in hoc ad Virtutem & Sapientiam gradu; tum etiam in illo iudicio, quod frustra vereris vt mutem. Darem, nisi dedissem. & vellem vberius: imò non vellem, adeò tu benignè id explicas & peritè. Intellegi sàpè mihi detur à tali mente, loqui per talem linguam. Itaque ne me roga quid hîc castigem: hoc vnũ, quod rogas. siue etiam hoc alterum, quòd à me illustrari censes Græcas litteras Latinasque. Cetera in parte amplector: hoc de Græcis, omitte. Candidè ego apud te candidam. videmus aliquid in Græcis, sed haud multum supra vulgum: & satis mihi, si haurio ex eâ linguâ quæ ad animi aut scriptionis meæ vsus. At tu iam corrigenda seriò, audi. Peccasti. quid ita non plura ad me libri tui misisti? Si piguit, cur non argumentum & materiem saltem perscripsisti? Curiosus enim sum, vt sciam (nouum monstrum) quid paritura sit virgo. Ad nostrum illum amicum & tuum, vt appellas, patrem Mich. Montanum, scripsi ante mensem, misi Antuerpiensi viâ: spero accepisse. Tu vtinam istas, & in iis spirantem nostrum affectum! Vale, vale, xui nostri (viue tantum) vera Theano. Lugd. Batavorum.

## EPISTOLA LVII.

IANO DOVSAE.

**Q**UID in Bembi historiâ reprehendam, singillatim & distinctè vis tibi scribam. Estne, mi Doufa, tanti? aut an ego naturâ *\* φιλοφρόνησις* ? neutrum: sed tamen quia valdè vis, age,

*\*carpendi  
cupidus.*

*\*Hac tibi  
ego, tibi ego  
hac valdè  
veraciter  
edam.*

*\*Τὸ μὲν ἐγὼ εἰ ταῦτα μάλ' ἀπρεκείως ἀγορεύσω.*

Stilus est quem reprehendo, supinus, languidus, & affectatâ imitatuunculâ fractus. Vt pueri pedes per delicias malè ponunt, & imitari varias discunt: sic iste, cum rectè scribere posset, maluit prauo elegantiae studio flectere orationem & enervare. Magnos viros ea ætas sub magnanimo Leone tulit: sed quosdam qui in puerili illâ hæresi, vt religio iis esset scribere aut dicere aliud, quàm à Cicerone scriptum aut dictum. Inter eos Bembus. Itaque vniuersa scriptio, composita & formata ad æuum priscum: & omnia sic de re Venetâ, quasi de potenti illâ re Romanâ. Hoc fero. etiâ mne verba omnia ex illorum moribus tracta ad hos nostros? & vbi ea non sunt, nescio quid pluriû ambitu dictum, quod

quod assequi debeamus diuinando? Hoc, vt mea quidem mens est, damno: & fallor, aut tu & viri omnes mecum. Ecce. *Patres conscripti* semper, Venetorum Senatus: ipsæ Venetiæ *ἡ πόλις*, *Vrbs*, anni numerati: non à Christo nato, sed *ab urbe condita*. qui militiæ eorum Præfectus, \* *σεμνὸς* vbiq̃ue *Imperator*: etiam tunc cū alienis auspicijs ductuq̃ue militat, vt in bello Neapolitano Contarenus. Atque hæc inter minores noxias. Illa iam \* *γελασὰ καὶ ἐκ ἐπιμετῶ*: *Rex Urbini, Rex Mantuæ, Rex Populoniæ, Rex Camertium*.

\* magnificē.

\* ridicula &amp; non toleranda.

Quid censes eum dicere? Duces. Atque item Ducatus ipsos, *Regnā*. Quin diserte etiam scribit, Gallorum regem ab Imp. Maximiliano impetrasse, *vti se Regem Mediolani diceret*. Heu vanitas! quāne Cicero nouitium hunc titulum non nouit, confundendi minuti isti dynastæ fuerunt cum vero aliquo magnoq̃ue rege? Saltem *Regulos* dixisset, & ferrem. Ab eādē mēte & causā sunt hæc: *Sophi Rex Armenia*, qui nobis Persarum: *Rex Thracum*, qui nobis Turcarum. Tuam fidem, siue frontem potiùs, Bembe, ille tibi Thracum modò rex, cui bina Imperia subiacent, & triginta ampliùs regna? Nec in titulis solū isti lusus, sed in nominibus ipsis. Quale illud de Ludouico Gallorum rege, quem *Aloisium* (magis *ῥωμαῖος*) scilicet vbiq̃ue appellat: & alibi cum facerēt additiunculā, *quem isti* (qui isti? barbari nos & inepti) *Ludonicum appellant*. Quid, quòd etiam in diuinis rebus hæc sibi permittit? & Fides nostra non nisi *Persuasio* illi est; Excōmunicatio, *Aquā & igni interdictio*: Peccata morituro remittere, *Deos superos manesq̃ue illi placare*. Ipse Deus rarò in stilo aut animo: sed prisco risu, *Dij immortales*; idq̃ue in serijs maximè sententijs aut rebus. Atque adeò, quod omnem stultitiam superet, prudens ille Senatus Venetus ad Iulium Pontificem publicè scribit, *vti fidat dijs immortalibus, quorum vicem gerit in terris*. Felicē te gentis & patriæ, Bembe! quia si nostrū aliquis trans Alpes sic scripsisset, profectò nō tulisset impunè. Iam quæ periphraSES in eo & circuitus verborum? Senatus Venetus dono misit Aloysio regi Gallorum *Aquilas sexaginta, ex earum genere quibus in aucupio vti reges consueuerūt*.

Quid Aquilas? Ita Falcones tibi dicere religio est? quā tamen voce \* *Iulius Firmicus* vsus. Accipitres igitur dixisses, vero magis et si minùs augusto verbo. Sed addis etiam *Reges* vti consueisse. *Reges tantum?* ideo, & pergo. Scribis ibidem, *donatas regi pelles pretiosiores,*

\* Imò &amp; inter cog. nomina prisca Romanor. Falcones.

*tiosiores, canis ab summo inter nigrum colorē conspersas, ducentas. Quæ istæ sunt? Genettas dicis, an potius Zebellinas? Quin, malum, exprimis: & res nouas nouo aliquo nomine dicis? Si puritati sermonis tui metuis, adde, vt vulgò dicimus: nihil infuscas. At illud ambiguum etiam nunc me habet, quòd Iulius Pontifex Contareno, cum classem Hostiam adduxisset, vini Corsi carros sexdecim, boues sexdecim, hircos genitalibus defectis bis totidem dono misit. Qui enim isti Hirci? maritine caprarum per delicias in Italiâ exsecantur? an vis dicere Verueces? Quòd si ad Verba & Phrasas etiam venio: benigna hercules materia cauillorum. Ecce scribit, *Velle se hominem suum Byzantium mittere*. Iterùm: *Reip. hominem ad se missum*. quod nos diceremus, Actorem aut Legatum.*

*Turrim terream* appellat, Propugnaculum siue aggerem è terrâ. quo exemplo? *Sumpti, Tumulti, Senati*, inflectit ad Plautinũ eum, cum reliqua omnia minimè antiquarij sermonis. *Neminem vnam partem muniunt*. pro, Nullam: quia Ciceroni alibi Nemo de femina dictum. *Proopidum* sæpè, quod nos Suburbium: *Prodominus*, qui Vicedominus Venetis: itemque, *Proimperator*, & *Proordinates*: putidè, vt sentio, aut nouè. *Rebus suis veritus*, crebrò & ad nausèa, pro Timens aut Diffidens: quia idem ille Cicero semel fortasse, Vereor mihi. *Senatus decreuit*, vt eorum qui fortiter atq; amanter ad flumen Tarum contra Gallos temp. gesserant, ratio haberetur. Iterùm: *Præfectos, qui se omnes nec strenuè nec amanter eo bello gesserant*, missos fecit. Sæpiusque. & illud *Amanter* inuitâ sanè Venere amat. *Lauredanus naues onerarias quattuor secum afferens*. Hem! pro monstro est. Attulit? imò adduxit. Tamen. iterat alibi: *Legatus Baiazetis equum Patribus attulit*. χαλσίως & ineptè, siue mari is venerit, siue terrâ. *Pensionem annuam, quam posteri eius sequerentur, Senatus instituit*. Imò, quæ posteros eius sequeretur. *Petunt, vt quò celerius fieri potest, viæ se dent*. Solæcum est, nec à Latio, sed ab Idiotismo Italorum. Plura sunt. cur ea colligam? Ipse vide. & fateberis pleraque talia affectatè atque improbè scribi, certè indecorè. In pueris ista vix ferimus: te virum, & in tam serio scripto, Bembe, deceât?

\* Neg. te oportet  
Puerilia  
sestari. non enim ultra talis es.

— \* εἰ δ' ἐπεὶ σὺ γὰρ

Νηπιῶδες ὀχέω· ἐπεὶ γὰρ ἐπὶ πλῆνι ἐστὶ.

At tu Doufa vale, & si quid temerè culpauit, mone. In Musæo meo. H. III.



## EPISTOLA LVIII.

HENRICO BORBONIO, PRINCIPI DOMBARVM.

**I**LLVSTRISIME Princeps, noua & prædicanda hæc humanitas, quâ vltro ad me scribis. Quis ego sum? vnus aliquis è vulgo litteratorum. Tu quis es? inter Galliæ primos, regiâ stirpe, &, quod magis est, indole ac virtute. Atqui etiam amas me, & amicitiam meam (ita scribis) poscis. Illust<sup>mc</sup> iuuenis, cõmutas nomina rerum. officium & cultum nos tibi debemus: amicitia est inter pares. Tamen & hanc, aut certè amorem, tibi spõdeo: qui ita me cepisti, vt nihil magis in votis sit, quàm palàm ostendere hunc in te affectum. Natales tui ad magna te vocant, ingenium ad summa: ecce me non solùm approbatorem fautoremque tuæ laudis, sed voce & stilo præconem. Deum ego quæso, vt mentem hanc tibi, quâ ad optima optimosq. accensus raperis, seruet; & te afflicto regno, quod nisi per eiusmodi columnas stat, ruit. Illustrissime Princeps vale. Kal. Augustis.

## EPISTOLA LIX.

ABRAH. ORTELIO.

**C**OGNATVM tuum, mi Orteli, modestissimæ frontis & animi iuuenem eò libentiùs vidi, quia litteras à te attulit: nec eas tantùm, sed & munus. Adiunxisti enim Tabulam Hispaniæ veteris, iucundam mihi & valdè opportunam hoc tempore, quo Liuium & bella Punica auditoribus meis publicè explano. Scis tu, quàm multa illic mentio passim & bellorum in Hispaniâ & locorum. Itaque & gratias tibi habeo, & te planè hortor vt eandem operam in Galliâ etiam nobis præstes. nam de Germaniâ, iam effecisti. Tum si Illyricum voles, aut Græciam, aut Africam, iudicij tui esto. Cessaturum enim te non esse, omnino mihi persuasi, præsertim cùm & grati labores tui sint, & otio (rebus illic tam quietis) iam abundes. Monavi amorem in me pridem noui, & nunc ex litteris eius recognoui. Oro, saluta amâter à me virum probum, doctum, & gratum mihi inter paucos. De Thracæâ meo, tu & ipse virgetis. quid pollicear? aliud mihi nunc sub

manu: & eo absoluto, videbo quò me impetus, aut potius iudiciorum hæc aura feret. Nam, quidquid ego constans, tamen mi Orteli ægrè obduramus cōtra minutos istos & cottidianos morfus: præsertim vbi aliquid, quod tangere fines Pietatis videatur. Doctus scio, quid sit irritare hos Cantharos: qui omnia peruolant, & olim etiam ad cælum. Nosti apologum. Nos hîc in otio, an in longum? nam minas iterùm audimus & apparatus. Deo rem committo, qui publica ista ex sui numinis & nominis gloriâ dirigat, & te mi Orteli seruet. Lugduni Batauorum, iv. Id. Decembr. ∞. Id. LXXXIIX.

## EPISTOLA LX.

*Amstelrodamm.*

PETRO PAWIO.

**Q**UID QUID damnaturi me Stoici nostri sint, miseratus sum & dolui duplicem tuum casum. Illum de amisso parente: hunc nouum, de libris & scriptis. Ego scio quātum vtrumque vulnus sit, vtrumque expertus: & hoc postremum in nostro animo valet, quod in multorum omnes Fortunæ. Nōne hæc diuitiæ nostræ sunt? suauia mellificia, è tot scriptorum flosculis confecta. Et multa, vt breuitas huius æui est, haud faciliè refinguntur. Addo, quòd nescio quomodo delectant nos iuueniles illi & primi nostri labores, quos velut primitias libauimus & intulimus in arā hanc Musarum. Me vndecimum iam annum carentem patriâ vides, itemq; agris & opibus, quas mihi Deus modiceas, sed ad meum vsum vbere dederat: tamen mihi crede, nulla iactura propiùs mihi cor tetigit illâ librorū, quam feci in Louaniēsi vrbe. Subitò enim abeundum fuit, & nisi sic abissem, numquam abissem. Tuas miseras narras, inquis: sic me solaris? Ego verò, mi Pawi, vel sic. Parentem alterum amisisti: ego vtrumque. Libros naufragio: ego, quod magis mordeat, furto. Quid tibi igitur eximium euenit, quod eximiè doleas? Fero meum casum, quem non muto: tu quoque fac, hoc exemplo. Vis communia illa me dicere? Hominem te esse: Euenire hæc in vitâ: Deum voluisse: Dolendo nihil te profecturum? Hæc omnia verissimè possem: sed subijci ea tibi à te scio, aut certè ab ijs qui apud te. Ego simpliciter & pro amico ago, & hortor te ad incommoda pari  
mecum

mecum mente ferenda . De munere tuo apud nos moneri nolo. semel dicam, quidquid mearum virium erit, faciam: etsi nihil, in re quæ alieni arbitrij est, polliceri possum de effectu . Iudicium meum & commédationem largiter habebis. Vtrumque auunculum tuum amicè à me saluta : & Henrico hoc amplius nuncia, benè redditos mihi nummos, quos Hamburgo acceperat : etsi puto eum id scire. Vale. Postrid. Idus Nouemb.

## EPISTOLA LXI.

*Lutetiam.*

IACOBO AVGUSTO THVANO.

**D**IV, mi Thuane, siluisti, nec eò minùs tamen, vt spero, amasti. Spero? imò video, cùm ex epistolâ tuâ amicissimè scriptâ, tum ex munere quod beniuolè adiungis. Amo illam, & hoc laudo: argumento eximium, tractatu arduum, & in quo verè alti atque acris ingenij tui signum . Perplexâ illa & breuia, tam aliena non solum à sermonibus nostris, sed à moribus, vertere magna laus sit: quid carmine & versu illigare? & id dilucidè atq; eleganter? Non blandiar, sed, mihi crede, rem magnam confecisti, inuidendam celerius quàm imitandam. Nobis humilior per hos dies labor, in additiunculis ad Commentarium Cornelianum. *Curas Secundas* appellavi, ab ipsâ re. Velim non videas solum, sed censeas: quoniam illud cuiusvis est, hoc verè amici. Cuiacius ille magnus éstne apud vos? ego ita accepi. Si est, eius causâ nihil doleo: sed perijt illa, cui ipse anima, Schola Bituricensis. Ovium, quem miror, quem amo, quem vtinam complecti mihi fas ante excessum! Scaliger quid? valere intelligo, sed cessare. Non sic oportuit ingenium natum ad tam magna. Si piget huius sæculi ( nec immeritò ) at cogitet natorum natos. Res apud vos, vt audio, mirificè calent. Si vera adferuntur, nihil inuidebimus vestræ quieti. Nos Velleium, Florum, Liuium ordine cogitamus: deus mihi vires, & ô vtinam copiam iudiciorum vestrorum! Nam hîc ego in solitudine: vna vrbs vestra abundat supra reliquam Europam . Librum tuum, quod volueras, misi ad I. Drusium. responsum ecce habes. Ecquid tu, ecquid alij vestri parent, velim scire: si quid tamen per has turbas. Vale. Lugd. Bat. III. Non. Iun.



## EPISTOLA LXII.

THEODORO CANTERO.

**Q**UOD silentium excuses apud me, mi Cantere, nihil est. Si-  
 luerunt tuæ litteræ? at non amor: quem viuere in te scio &  
 spirare. Quòd tamen occupationibus meis id adscribis: nolo.  
 Cantero meo non ego semper vaco? verè dicam. tua probitas &  
 modestia, in litteris studium, in litteratos amor, admissionem ti-  
 bi tuo iure apud me dederunt inter primos amicos. eaque vtere:  
 numquam non Lipsius tibi patet, leuato, vt sic dicam, velo. Iuue-  
 nalem quòd doceri totum à me velles, & probas quæ in eo lêgi,  
 gaudeo: sed vereor vt id ex omnium gustu sit, qui volunt Histo-  
 rias & alia (vt censent) magis ardua, à me legi. Ego tamen scripto-  
 rem eum inter apprimè vtilis numero, & dignum serio interpre-  
 te & accurato. Itaque occasione captâ Satyram vnâ publicè præ-  
 lêgi, sed extra ordinem \* *καὶ ὡς ἐξ ἑνὸς βιβλίου*. Siquid vltra tētabo, vtar  
 libro quem mihi offers: etsi ipse bina exemplaria habeam satis  
 proba. Sed tu quid agis? nouū aliquid cogitas? an Arnobium re-  
 fingis? Colligo enim ex epistolâ tuâ nec hanc quidem curam te  
 posuisse. Cupis vt ad Cuiacium scribam pro Excerptis exemplar-  
 is Regij: quod facturū me polliceor primâ occasione. Ceterū  
 in republicâ an apud vos quies? ita videtur. Vtinam & concordia  
 cum finitimis prouincijs, sine quibus firmū nihil esse vobis po-  
 test contra hostem. Benè, quòd ille alibi distringitur, eoq; simul-  
 tates exercere vacuum nobis fuit. Classis illa magna ab Occiden-  
 te, nunc apud Orcadas stare dicitur, expectare ventū quò redeat  
 ad incepta. Videbimus quò recidēt magni isti & planè regij co-  
 natus. Latrocinia adhuc fuerunt, nunc bella. Heus tu, audistin?  
 captiuum Hagæ Hispanum Doctorem Medicum esse, virum lit-  
 teratum (mirare in Hispano) Latinè disertum, carminis etiā pan-  
 gendi nō ignarum? Is ad nos scripsit, & subleuari miseriam suam  
 cupijt, vt consecraretur eorumdem studiorum. Fecimus in parte.  
 Vale mi Cantere. Lugduni Batauorum. Postrid. Kal. Septemb.  
 ∞. IO. LXXXIIX,

\* velut ad-  
 ditamentū,  
 & super-  
 mensum.

## EPISTOLA LXIII.

IOSEPHO CONSALVES Doct. Medico.

**A**LTERA scriptione me occupas, priusquam priori responderim. Et cur silui? non tui contemptu, aut negligentia: absit. sed quia ipse venire Hagam parabam, & in sermone vberius liberiusque tecum agere, quam litteris possem. Id consilium meum euectio vestra subita impediit: & prius audiui Medemblicę vos esse, quam ituros cognouissem. Excusa ergo silentium à causâ iustâ. At nunc scribo, & te, mi Iosephe, per deum & per salutem tuam rogo, ut animum attollas contra Fortunę vehementem hunc ictum. In carcere es, à tuis & à patriâ remotus: quę graua esse fateor his, qui parum exploratos habent casus & res humanas. Te quid hęc fugiat? si usu non didicisti, quàm fluxa & caduca hęc omnia nostra, imò & nos simus: hausisti certè è litteris, & illę tibi millena exempla suppeditarunt casuum similium aut grauiorum. Tricę & spinę, hęc omnis vita: & fal-  
leris, si quæris in eâ gaudiorum flores. Nos ipsi, quid?

*Ut herba solstitialis, paulisper sumus.*

Abeunt hęc vana, & nos abimus: nec quidquam firmi, nisi in firmo illo loco. A Platone tuò didicisti, \* *παραμενῆσαι τὴν εὐχὴν* & *εὖ*. \* peregrinationem quandam esse hanc vitam. Hęc cogita. & propriè ad tuum casum, assiduum & pænè sollemnem hunc esse fortunę ludum. Quid crebrius in omni memoriâ quàm carcer? quę conditio aut ordo ab eo liber? Nobiles, ignobiles; seruos & reges accepit, & capiet. Perseus ille Macedonię rex, sceptrò simul & libertate spoliatus, spiritum non traxit solum in carcere, sed effudit. Idem Gentio, Iugurthę, Ptolomęis aliquot euēnit. & ne ad vetera te mittam, tua gens, illi ipsi Hispani, regem Gallię Franciscum in custodiâ habuistis, & reges Mexicanum & Peruanum etiam in vinclis. Heu sortem humanam! nasci, dolere, mori. Et tamen felices inter omnes miseras, hoc vno Christiani: quòd via nobis per hęc ad aliam vitā, in qua gaudiorum nec modum ullum esse scimus, nec finem. Huc adspiremus, hęc spernamus: & vocem illam ex pectore efferamus, *Dis-solui velle, & esse cum Christo*. Mitto ad te libellos nostros de Constantiâ, quos petiisti: magis tamen ad Sacros libros te horter, è quibus.

quibus vera solatia petas omnium malorum . Mittam ad te Biblia minuscule, uti cupis, quumprimùm nancisci poterò . Nam Antuerpiâ peteda sunt: quoniam hîc inopia eiusmodi exemplarium. Vale Clarissime Doctor, & confide. Viuit Deus. Lugduni Batauorum IV. Eid. Nouemb. ∞ . IO. LXXXIIX.

## EPISTOLA LXIV.

Hagam.

MICH. HVRALTO HOSPITALI.

**T**VNE ad me vltro non scribis tantum, sed & venis? tu ille maximi viri magnus nepos? O mihi iucundum lectu Hospitalis nomen, quod nisi iure quodam sanguinis ferres, posses similitudinis & exempli. Scripta illius per te edita, dudum vidi; & habeo (certum me scito dicere) ut Homeri libros rex ille Magnus. Litteratius aliquid edi fortasse potuit, & poterit; nego quidquam litteratius & prudentius simul. Pulchra hæc coniunctio, & quæ nisi sit, abire qui in studijs quæritis solidam & veram laudem: me iudice non feretis. Quod amanter Hagam vocas, imò lectoribus missis pænè ducis: ignosce si non pareo. parebo. Nam dies Mercurij, qui feriatu nobis est, nisi quid interuenit, tibi me sistet. Ita dico, non ut occupationes excipiam aut talia impedimenta: sed ut vnicum morbum. qui etiam à vadimonio, ut scis, excusat. Ego autem iam annos aliquot nescio quomodo non tenui solum, sed incertâ valetudine: nec quicquam promittere de me non dicam in diem possum, sed in horam. Tamen fauebit & faciet Genius meus, spero: eò magis, quod non ad seria vocor (cū Teridate quid mihi?) sed ad risus & Plauti mei sales. O te virum argutum! qui vidisti, quo vno possim capi. Veniam, veniam, & hic mecum. Vale. III. Non. Septemb.

## EPISTOLA LXV.

FR. RAPHELENGIO *Filio S. D.*

**C**ARMINA tua de me legi: proba & arguta. & in quibus hoc vnū moneo, ut videas sic me deinceps laudes, nequid offendas eos apud quos viuis. Tēporum non ignari sumus: cum quibus pugnare te nolo, etsi haud seruiliter seruire. Apud te &  
interio-



interiorem tuum animum liber esto, recti iudicij & sensus: in sermone interdum tempera, nec offende qui possunt offendere. Sapientia vera firma est, non tamen elata: non timet pericula, sed nec prouocat aut lacescit. Ascanij illius apud poëtam iuuenilis nimis ardor est, qui

*Optat aprum, aut fuluum descendere monte leonem.*

Non ita nos. qui abundè fortes sumus si excipimus, non etiam incurrimus in discrimen. Plura vellem, non vult hoc æuum. Senecæ Excerpta tua accepi: & erunt vsui, si deus volet. Nam ego amo & adiutum seriò volo scriptorem illum, præceptis optimum si non vitâ. Quamquam in ipsâ vitâ, si consideras, præponderant vilibus aut feruilibus, recta eius facta. Certè extremus ille Actus si in fabulis poscit palmam: laudabilis valdè in isto. Iure doles & culpas, quæ ad Polybium scripsit, vt opinor, exsul. Quid facias? verè tunc iacuit: nec credam animo eius plenè adhuc impressum à Sapientiâ robur. Ego non tam miror scripsisse ea hominè, quàm indignor edidisse. Quidam temporibus sæpè damus, sed furtim & apud vnum alterumve: quod nō nisi propudium aliquod hominis diuulget. Sed de isto aliàs, & fortasse ad ipsum. Esse qui opinionem tuam fefellerint in amore & honore litterarum: non miror. Per bella ciuilia non spirant Musarum venti. Tamen, mihi crede, illæ viuent, & in portum venient inter medias turbas & naufragia multorum. Tu eis adhære, & Pietati ac Virtuti imprimis: sine quibus nec verè honestus vmquam eris, nec Meus. In nummo Orteliano (frater tuus me consuluit) nihil video, nisi ipsum sciam & quæ adiuncta: id est, quo tēpore, quid symboli. &c. Lugd. nostræ, IIII. Kal. Nouembr. ∞. MD. LXXXVIII.

## EPISTOLA LXVI.

*Burdigalam.*

PETRO BRACHIO.

**L**ITTERAS à te accepi, mi Brachi, benè amicas. Etiamne amor ad me penetrat è locis tam longinquis? nec tamen de te miror, qui totus es ipse Amor, sed fidus ille honestusque. Ita me Fama & tui similes ametis, vt cor mihi tetigit tam pius ille tuus in tuam affectus. O exemplum in omni æuo rarum! & magis in isto, quo non solùm desijimus laudanda facere, sed etiam

a                      laudare.

laudare. Liur & obrectatio passim, bonorum operum impedimenta aut venena. Quid tamen te morentur? qui vitæ delinimenta proijcere & conculcare potuisti, nonne facilè ista? Mihi constantia tua admirabilis est, amicitia grata, scripta nuper visa & probata. Nam tulit ea ad me noster Doufa, quem nihil eiusmodi florum, quos Musarum vspiam hortus alit, potest fallere. Tu verò salve poëta, non poëta: ingenio talis, moribus iuxta Socrates omnes aut Catones. Ab eius filio habes carmen quale petijsti. Cur non à me? iuro salutem meam, ab aliquot annis nihil tale iam scripsisse, & vix posse. Morbi quid habeam, tenes: & quàm non per eum alacris animus & poëtafter. Ignosce. volui, sed hoc tantùm. Tamen aliàs videbo, & si quis etiam halitus me adspirabit ex illo vestro & veteri meo fonte; seruiet cælesti tuæ  
 A M A T A E. Nunc festinabat Faius Hospitalij magni nepos, cui litteras has dabam. Vale, & qui constantis amoris exemplum es, constanter etiam me ama.

## EPISTOLA LXVII.

IANO LERNVTIO.

**L**ITTERAS tuas ad Coluium vidi, non ad me: nec indignor. Illud indignor, quod tamdiu in tristissimo illo squalore sedes, & nonnullâ tuâ culpâ. Quid expectas? liberari \* *ἀμύδι?* numquam fiet. Scribamus omnes, & ad omnes: numquam nisi minis extis placabimus tuum illum Direm. Fuge, fuge, ab Acheronte: præsertim cùm de Irenes accessu nulla vltà spes. Decedet aliquid rebus tuis. Vbi sapientia? hoc scilicet mauis, vt tibi? Perceant illa omnia, dum saluus nobis noster Lernutius. Quamquam nonnemini, quem non nomino, exigua sit è magno metallo illa rasura. Sed qualisqualis, ferenda, subeunda. Aliâ viâ qui effugium tibi esse suadent, non suadent vt amici. Torqueor cùm hæc scribo. Tūne illis aliquid credis, quibus nequid ego crederem, tu mihi primus auctor? Sperne, & sape. Litterulas cogitas, & nostras  
 \* *ἀγροφῶνες* deas. valdè scilicet gratiosas apud illos \* *ἀγροφῶνες* & militares. In pretio pretium est, mi Lernuti: & cetera in fronte grata sunt & verbis. Verba ego tibi non dabo. siquid possum, non pete, sed iube: siquid non possum, abstine tormentum mihi dare, cui hoc  
 fatis

fatis tormenti, quòd tu tamdiu in tormento. In Rogerfio specula aliqua erat: ille nunc in Daniâ. Ad Tho. Hencagium bis scripsi, sine responso. Præfectus Briellanus, & per eum rogatus Vliffinganus scripserunt; sed non alio effectu, quàm vt meliusculè habereris. Ipse mihi Briellanus coràm dixit ( probè autem nouit hominem ) precibus aut intercessione solâ numquam te liberandum. Habes meam sententiam. vtinam ad eam tua inclinet, & omittas aliquid siue de constantiâ illâ tuâ, siue de rigore! Quod mihi, hoc amicis & notis omnibus tuis videbatur. Cistas & quæ in ijs, confecto rerum Indice, traditas scito Sayonio cognato tuo. ille portò misit, quòd debuit: & credo, iam appulisse. Nos cum certum aliquid in rebus nostris statuerimus, te non celabimus. Vale. & illinc euade, si nos valere vis. IV. Idus Septemb. ∞. 10.

LXXXIX.

## EPISTOLA LXVIII.

THEODORO LEEVIO.

**D**E silentio ne excusa, aut me accusas. Nónne & ego silui? Sed profectò, quod aliàs scripsi, serius & fortis ille amor delectatur quidem fomentis litterarum, sed & sine ijs viuit. Noster, vt spero, æternùm. Cogitatio cum pascit, cum non sermo. De pede tuo molestum mihi audire: idque ex meo sensu. Nam ego eam partem tam caram, quàm ipsum caput habeo: cui vita sedentaria, non sit vita. Scis quàm ambulatione delecter & motu. Cura eam igitur, sed lentè & molliter; quia nerui reduci ad officium volunt, non cogi. Filium tibi agnatum ex animo gratulor. deum precor vt is tibi heres sit non opum magis, quàm animi & virtutum. Crescat, crescat. Ego illum & te videbo, cum primum se aperuerit & diffuderit stricta hæc aura. Nónne in mediâ hie me etiam nunc videmur? Quòd catellum illû nuper mihi visum & simul amatum offers: agnosco amorem. Accipio: & habeo pro manere magis mihi caro, quàm si gemmas à te vel aurum. Non rideo. amaui à puero totum hoc genus, & video idem fecisse præstantes aliquot animas ab æuo prisco. Telemachus ille Homeri in concionem etiam vênit, canibus duobus affeclis; & Patroclo fuisse nouè \* νέας τεσσάρων, idem vates tradit. Non enim ad ve-

\* canes  
mensurati



nationem solum aut Dianæ studium : sed ad voluptatem & tutelam habebant.

*Hæc leuisonna canum, fido cum pectore, corda.*

Ad summam, mitte, sed per fidum aliquē : ego eum paullo amplius amabo, etiam tuā mittentis causā. Sed bonā fide, vxorcula non ringitur ? carere eo potest, aut vult ? absit ut iratam habeam tuam lunonem : quamquam ea tam mitis, ut nesciam an habeat bilem. Sed eā lege tamen mittito, si volet illa. De rep. nostrā non vanè asseris pendere eam ab alienā. Ita est. in Galliā certamē nostrum cernitur : & qui ibi exitus, expectandus & nobis. Ut cymba magnæ alicui naui annexa, ita nos Galliæ sumus, imò pleraque adeò Europa. Expectemus euentum fortes, erecti, & si volumus numquam serui. Poëta Ennius olim egregie :

*Ea libertas est, qui pectus purum & firmum gestitat.*

*Alia res obnoxia nocte in obscurâ latent.*

Tale pectus induamus, non concutient nos omnia humana. Vale, & vxori tuæ salutem dicito, pusionem etiam tuum à me suauiare. Lugd. Bataur. VII. Kalend. April.

## EPISTOLA LXIX. *Lutetiam.*

FEDERICO MORELLÒ V. C.

**T**VNE ille es, mi Morelle, qui amicitiae meae fores suauiter pulsas ? ades, ades. nemo hoc anno gratior mihi hospes. Praesertim qui Florente illo comitatus ad me venis : quem quis excludat, nisi quem Gratiae & omnes Musae ? Nam profectò illud Siculi vatis in eum conuenit

\* *stirps sacra Graeciarum.*

— \* *χαιρὲν ἱερὸν φίλῳ.*

Deus bone, quàm me delectârunt illa Tragica eius siue Comica ! Altera res tentata magno nostro Scaligero, altera nec illi. Gratulare viro. cuius ego labori fauco, & maximè argumento. O quando nos & vos inuiset candida illa Diua ? Si quando ; certe ego recto pede ad vos, mihi populariter tam amicos. Libellos epistolæ tuæ diu etos percurri : sed hoc tantum. nam herè demum accepi, cum in viâ diutulè hæsisset. Amaui & exosculatus sum tuum iudicium in Thebaïde, quam voluisti etiam producere in illud Europæ theatrum. Age, age, sic oportet : inferere inquam

iuuen-

iuventuti non ea quæ probantur maximè, sed quæ probanda. Certè illa fabula sublimis & ætherei spiritus est, & soni in versibus supra omnes tubas. Tu, qui legisti, agnoscis. Notas ad eam Florentis vidi, & amaui. Cui à me dicito, scriptum illum vnà tecum non in externo & ambizioso isto amicorum albo, sed cum paucis \* *ἔν τῶν φρενῶν δ' ἄλγος*. Qui quòd elogia aliquot tam amica <sup>\* in animi tabulis.</sup> mihi tribuit: quædam non agnosco, in quibusdam nec ignosco. Irascor in illo ad Thebaidem, quòd me Prætoris magni loco habet, se nec lixæ. Apage immodestam hanc modestiam: & ita me nôrit atque æstimet, vt etiam se. Eiusmodi viri (non sinuoso pectore hoc dico) magnus honos mihi, si non asseclæ mei, sed collegæ censeantur. Illa iudicia eius de Scaligero patre castigatiora, & planè ex meo sensu. Laudabilior ipse apud me, ob eas laudes. Nam quod de Tullio dixit vetus magister, *Profecisse multum cui is placeret*: ego veriùs, Magnum esse, cui Iulius iste magnus. Cuius ego vitam iamdiu haueo mittere in scripta, si aliquod mihi auxilium ab ijs qui interiora & minuta illa vitæ nôrunt. Nam maxima nobis patent, mirâ & ingeniosâ de se alibi atque alibi scriptione. Tu mi Morelle, vt claudâ & coërceam animum nimis se diffundentem, me amare perges, vel constantiæ tuæ causâ: ego quidem te ferio, per vestigia Turnebi nostri & munera euntem ad illud ipsum veræ gloriæ culmen. Lugd. Bat. vi. Id. Decemb. ∞. IO. LXXXVIII.

## EPISTOLA LXX.

HADRIANO SARAVIAE.

**Q**UO D filuisse me scribis, miror & doleo: cùm plenè & ferriò responderim ad priores omnes litteras tuas. Quas ab aliquo iam interuallo nullas vidi, præter has querulas & breues: sed ideò mihi gratas, quia tales. Nisi & me & mea amares, non quererêris de officij huius intermissione. Illud grauius, quòd de morte filij tui (heu vnici) scribis: in quo, numquam ex animo gaudeam, nisi ex animo sum tristatus. Amabam modestissimum ingenium, nec vltrâ laudandum, ne desiderium & caussas dolendi tibi augeamus. Scis communem legem, Dei ab æterno decretum, & alia quæ alij hauriunt à tuo fonte.

Hæc ipse tibi nunc instilla. Imus hûc omnes, mi Sarauia : nec coniungimur, sed leuiter alter alterum anteimus. O beati, qui in beatâ illâ metâ ! nam hîc etiam in optimo statu, quid nisi miseræ ? quanto magis in his publicis Europæ ruinis ? Nam mutari eam totam & inuerti, nemo prudens non videt. Censebam Politica nostra posse me mittere sub hoc tempus, trina aut quaterna folia etiam nunc restant. Firmioris attentique iudicij Lectoribus probaturum me id Opus spero, numquâ ijs qui peruolant, & instar apum scripta saltem delibant. Thomam Heneagium à me salutes velim, virum Musis & mihi valdè carum. III. Kal. Sext.

## EPISTOLA LXXI.

*Antuerpiam.*FR. RAPHELENGIO *Filio.*

**S**ENECAM tuum sub vesperam accepi, & eum ipsum ad læscernam libaui. Placet seriò: perge, perge. Malè cœpisti, si hîc definis. Saliuam tantum, quod dicitur, nobis mouisti, exple desiderium vberiore aliquâ mēsâ. Quid tam proprium huic studio, quod auum tuum immortalem reddidit, quàm Criticæ? quam si adiungis iudicio, vt cœpisti, & opportunè: non rem solum magnam feceris, sed famam. Neutram harum contemne, etsi aliquid ante eas pone. In poëtis alijs velim te simile aliquid aggredi. an in Iuuenale? iuuabo: aut in quocumque alio, quem leges. Nam hoc Poëtices studium, & in eâ emaculandâ labor, non dedecet hanc ætatem. postea ad grauiora te ducam. Hortamina quæ nuper ad te scripta misi, credo legisti & imbibisti. O vtinam! vtinam erigas, inquam, te, & vno certoque tenore eas, alacer semper & vegetus, quid non effecture? Velim ad me seriò & liberè scribas, siquid est quod te mordeat aut absterreat. depones in fidum & amicum planè sinum: nec id tantum, sed etiam auxiliatorum. Nam ego te, mi Raphelengi, quamdiu ero, non deferam: & iuuabo consilijs, & quâ aliâ re potero. Confide. cum leni non medico solum, sed amico tibi res erit: indica siquid est morbi. Spero sanè nihil esse, & scio caussam tibi non præberi ab Auo, qui te amat vt ex se natum, non vt nepotem; tamen cum interdum iacere te ex litteris tuis intellego, suspicor nescio quid non esse ad tuum sensum. Æuum & mores illos noui. torquent? indica. si



ca. si concoquere non potes, subueniet \* *ἐπιθυμία*. Ego scio non \* *peregrina-*  
 omni ingenio cōuenire, quod Homerus Marti suo ascribit, \* *ἀλ-* *natio.*  
*λοπεσουλλος*. Reperiemus quod ex usu tuo fiat, & cum gratiâ tuo- *huc illuc*  
 rum. Deum rogo ut te firmet, iuueniles leuesque animi motus *se flexens.*  
 tollat: quibus subijci te non ignoras, & vincere eosdem debere  
 ac paullatim atterere, hoc quoque non ignoras. Vale. Ex vrbe no-  
 strâ veteri. vi. Id. Nouemb. Optimo Ortelio salutem.  
 Nos è Nundinis nec litteras, nec Catalogum. satin' ferio vestri  
 nos curant aut cogitant?

EPISTOLA LXXII. *Francfurtum ad Oderam.*

FRANCISCO HILDESHEIMIO.

**T**AM benigna tua salutatio meritò litteras meas elicit, et si  
 breues. Multa mihi tribuis, Vir Clarissime, sed vereor ut  
 amore inductus, qui in hanc laudis partem nō bonus iudex. Ego  
 te amo ob amorem, & seriò deinceps censeo inter meos. Quòd si  
 in Germaniam aut loca propinquiora vinquam venero (ita au-  
 tem statui): crebrioribus istis litterarum alloquijs fouebitur ami-  
 citiæ hæc herba. Sin hîc mansero; profectò id arduum in tanto  
 interuallo. Rari à nobis homines illuc, nisi ad mercatus Franco-  
 furtenses: nec ij semper certi. De Plinij loco eruditè disseris, nec  
 quidquam addidero aut mutauero in tuis dictis. Maeste! virum  
 te esse video, quales in illo orbe pauci. Sed, nisi fallor, breui  
 eas quoque oras illustrabit melior hic Phœbus. Vale. Lugduni  
 Batauor. Postrid. Kalend. Sextil.

EPISTOLA LXXIII. *Antuerpiam.*

CHRIST. PLANTINO.

**M**I amice, nulla vinquam epistola tua aut gratior mihi aut  
 grauior fuit hac postremâ. Languidâ manu scriptionem  
 tuam nimis exosculatus sum, & seruabo pignus fidissimi inter  
 nos amoris. at dolui in tuâ afflictissimâ \* *Quæ illi*  
 men mens mihi dictat & præfagit iam esse meliorem. O Deus, *postrema.*  
 & tu, facite me cōpotem huius voti! Aliud nihil scribo, nisi hoc.  
 quicquid à me factum voles, etiam cū me præcedes & in vili  
 hac

hac terrâ non eris, impera: non viuum magis amaui, quàm post-  
câ verè viuum amabo. Salue, Salue, Salue.

## EPISTOLA LXXIV.

FRANCISCO RAPHELENGIO *Filio.*

**C**ERTE, mi Raphelengi, tristi nuncio percussi sumus, tristi:  
nec cuiquâ vestrûm qui sanguine iuncti estis, aut in aman-  
do cessi, aut nunc in dolendo. Amisisti tu auum optimum, ali-  
patrem, ego amicum, sanctum nomen & rarum hodie in terris.  
Heu mi Plantine, quis mihi post te alter? nemo: nō magis quàm  
ante te talis quisquam fuit. Beatum quidem te, qui extra præsens  
& imminens omne discrimen, extra molestias, quæ senile etiam  
caput tuum circumstabant: at nos volumur & reuoluimur in  
medio æstu. Tu mi fili multum amisisti, in omni fortunâ tuâ  
consilium, solatium, opes. Amabat te, hoc scio. Sed feramus, &  
illius maximè exemplo (in quo enim hæc virtus clarior?) prompti  
volentesque sequamur magnum illum Deum. Scripsissem ad  
Moretum & heredes, sed ita me salus amet, vt ego minimè aptus  
sum ad solandum. Non quia iaceam (hoc dedecus Constantiæ  
nostræ non imprimam) sed quia haud ita firmiter stem, vt erige-  
re alios possim. Vacillo ipse, & rationum itemtidem fulcro me  
sustento. Ad te nuper breuiter scripsi de Italiâ. nunc hoc addo,  
omnino ad nos venias, priusquam in alterutram partem aliquid  
decidas. E re tuâ erit: nec quicquam suadebimus, non dicam  
præter vtilitatem, sed fortasse nec tuam voluntatem. Ades. Po-  
stid. Idus Iul. ∞. IO. LXXXIX.

## EPISTOLA LXXV.

*Romam.*

FRANCISCO BENCIO.

**T**ANDEM, tandem, vnas à te litteras. Nam & ego ordiar à  
querelâ. Tu ne misisse quidem fateris: ego scripsisse seriò  
me testor, sed tamen frustrâ. Quæ autem mea culpa est, si homi-  
nes parùm fidi hodie aut diligentes? Ego te, mi frater, diligo: &  
numquam suauissimam illam consuetudinem nostram rumi-  
nor, sine interioris animi motu. Tuæ litteræ me excitant, & velut  
adspirant

adspirant in hoc languore nostro vitalem aliquam auram. O terra, ô viri ! vtinam per vires aut tempora vos regulstem ! Sed ego, mi Benci, inclino, non tam æuo fractus ( eâ parte adhuc viro ) quàm lento & nescio quo intestino morbo. qui tamen vitæ officia atque ipsa studia leuiter interpellat. Vos iacturam ante biennium in Mureto fecistis : cuius Senecam , extremum opus , etsi non confectum , probamus . Orationem tuam in eius funere , & quidquid tuum , vidisse velim . Rarò ad nos veniunt melioris cæli illæ deliciæ : & possunt tamen per Plantinum . Ad eum virum mitte , quidquid ad me voles : & inprimis ( per sacrum illum Amorem te rogo ) si quid editum à te , aut edendum . Censuram vis ? libera erit . Laudes ? effusæ . nec alius hodie id fecerit magis ex affectu . Amo , amo , primos illos meos ignes , & in iis puriter liquefco . Illustrissimum Sirletum superesse apud vos gaudeo , columen perfectissimum virtutis & doctrinæ . Fulvio Vrsino quid sit , quid Latino Latinio optimo seni , gratum si per te sciero : & si à me eos salutabis . Edidi quædam nuper , sed leuia , nec nunc mittenda . Vale , & me ama tui & probitatis amantem . In Bat. prid. Kalend. Septemb. ∞ . ID. LXXXIIX.

## EPISTOLA LXXVI.

GERARDO TVNINGO.

**A**D litteras tuas , mi Tuninge , breuiter respondeo : & hoc ipsum amoris est , quòd respondeo . Nam etsi vis illa morbi me reliquit , tamen languor & debilitas manet : nec mens aut manus satis apta ad suum munus . At ego te ex animo amo , & crescenti virtuti tuæ faueo : eoque expressa mihi hæc scriptio , eius iudicij mei index . In foro versari te iam credo : & quamquam res nondum calent ( tempus ista adfert ) tamen carceres tibi aperti ad cursum . Stadium hoc sub initia molestum & arduum fortasse videbitur : dies molliet , & scopus qui tibi in oculis esse debet , cum Lucro Honor . Dignitas enim & splendor plerumq ; ab isto campo . Ego ad amicos meos cùm scribã , non deero te commendare de eâ notâ quâ te noui . Tu confide . sponsor ego tibi , si perges hac Virtutis & Modestix viâ , quâ cœpisti , de optimo successu . Vale , & duo illa , ac me vnâ , ama . Lugd. nostræ Batauor. v. Kalend. Decemb.



EPISTOLA LXXVII. *Vltraiectum.*

THEODORO CANTERO.

**C**VM mutationem rerum audiui, quæ apud vos facta, lætatus sanè sum, quia omnia in melius versa & modestius: nec tamen valdè miratus, quoniam veterem illum statum violentum & turbidum, sciebam non posse esse diuturnum. Illud nescio an lætari debeam, te potissimum electum qui clauum teneas in hac tempestate. honori tuo quidem gratulor, idque amicissimo animo: sed molestias video, atque adeò discrimen etiam quod adiunctum, nisi clementer te dirigat & feruet ille, qui te huc destinauit. Id quod spero, & cum ex affectu rogo. Illud ego valdè velim & suadeam, ita clementer & leniter omnia nunc administrari, vt vix appareat conuersum esse orbem rerum: appareat, inquam, dolore cuiusquam aut pœnâ. Vltio & affectus feponantur; & satis sit (meo quidem iudicio) inutiles homines remoueri ab reip. administratione. nisi si quis est vnus aut alter, qui palàm in eâ se gesserit malâ fraude. Sed nec omnia subito mutanda, etiam quæ mutari melior ratio suadet: lentè, lentè, & minimo sono. Pro nostro Arcerio sollicitor. manebit illi sua conditio? velim, quod in te sit, iuues. Non enim puto virum è calldis illis esse, qui omnia & omnes turbant. Thinnius noster an redierit, nondum audiui. omnino ego opinor: & admo- uendum iterùm rebus virum peritissimum rerum. Quod cum sciero, ad eum scribam. De Prætoris reditu, audiui: & velim meo nomine illi gratuleris. Nisi aura hæc turbida impediret, ego sanè ad vos euolare, & facerem linguâ quod nunc stilo. De filiis tuis, ij mihi curæ erunt. Sæpè me adeant, semper mihi grati. Vale. 1v. Idus Octobr.

EPISTOLA LXXVIII. *Uratislaniam.*

IACOBO MONAVIO.

**L**ITTERAE tuæ à se gratae, mi Monavi, hoc asperum habuerunt & triste, quod nunciârunt de morte Andreae Dudithij, magni & sapientis viri. Qui, etsi præter ætatem nihil passus

passus videri potest, aut præter communem illam legem: tamen profectò dolori est, & amicum nos amisisse, & Germaniam in hoc statu rerum spoliata[m] notæ modestiæ & prudentiæ viro. Nam in aulis Principum, quàm multi passim, vt sic dicam, incendiarij turbarum, & qui \* *πῦρ ἐπὶ πῦρ* addunt? à quorum ingenio alienissimus hic noster, natus sedare ciuiles istas tempestates, non excitare. Sed deo pacis visum, vocare ad se istum Pacatorem: ideoque feramus, in Constantiæ nostræ monicis fixi. De amore tuo in me, gratiam non habeo solum, sed refero. quomodo? amando. atque ego te vnum hoc pretium exspectare scio tui affectus. Mihi quidem iucundum & quasi pabulum quoddam studiorum est, amari non tam à magnis, quàm ab eruditis & virâ quoque probis viris: quâ in classe te scio esse, optime Monauri. Nos valdè nunc distringebamur editione Politicorum. quod opus Regibus Principibusque scriptum, vtinam vsui quoque ijs sit: quod non despero, si capere tamen poterunt eius generis scripta. Sed deus videbit. ego arduo labore defunctum me scio, & soluto pede ad mitiora & planiora iturum. Thraseas noster omninò differendus est, & te aliosque rogo, ne quis me roget. Vale Clarissime Monauri, reliquum in ijs locis affectus mei fulcrum. Nonis Iunijs.

\* ignem ad ignem.

## EPISTOLA LXXIX.

LAEVINO CALVARDO.

**S**CRIPPIO tua mihi grata, & scribendi causa. Amor in me, & humanitas in adflictos te impulit: quorum vtrumque amo, & hanc etiam laudo. At illud mihi iuxta actibi nouum, fuisse in eo grege Hispano hominem Latinas quoque litteras doctum, & doctorum amantem: cui auxilium, aut certè solatium, meritò debemus. Id, quod in me est, non faciam solum sedulo, tam amicâ præsertim tuâ rogatione inuitatus, sed iam feci. Conueni quosdam qui cum Pretore huius vrbis agant, qui nauim eam cepit, & in cuius hic est manu. Videbo an in vrbe[m] nostram adduci possit, eamque habere pro custodiâ. Sanè Musarum illum alumnus æquo iure censerem cum Barbaris, ignominia nostra sit mi Caluarde. quem ex animo

saluere iubeo, & me amantem tui quoque amare. xvii. Kalend. Septemb.

## EPISTOLA LXXX.

DOMINICO BAUDIO.

**P**LVSCVLAS à te litteras accepi, fateor : ad quas filui, non voluntate aut subitâ ignauitâ, sed quia deinceps sic cogit ualētudo. Tibi narro Baudi. frangor paullatim, frangor : & per assiduum hunc languorem deserit ponitq; calor & vigor ille in nobis, velut ventus. Velo ferri solebamus, nunc vix remis. Politica etiam mea, serium opus, valdè me tenuerunt. Nunc ipsa absolui, nondum quæ ad ipsa : id est Notas. Inuidia fatebitur arduum & operosum opus esse, nescio an probum. Tu certò & semel sic existima, te à me æstimari, amari : & semper id fore, siue scribo, siue sileo. donec perpetuùm tamen silebo. De munere siue titulo, quonon sine fructu gaudes, tibi gratulor, & voueo atque auguror maiora. Amante ama. Idib. Iul. ∞. IO. LXXXIX.

EPISTOLA LXXXI. *In Hungariam.*MICHAELI FORGACZ, *libero Baroni de Gimes.*

**A**MANTER valdè me prouocas ad scribendum pariter & amandum. quis tu es? ignotus mihi, imò notus, vel ex vnâ epistolâ istâ, in quâ faciem video pulcherrimæ mentis. Etiamne ille vester remotus, & verè Martialis tractus, educat ac profert Palladias istas proles? gratulor tibi hanc indolem, te patriæ : quæ profectò præsidium grande & lumen expectat ab eiusmodi alumno. Quòd si hanc directam ad laudem & Virtutem viam, plerique è tuâ classe ingredi vellent: quid Europâ beatius? quæ nunc iacet misera, vndique telis confixa ciuiliū barbarum. Sed resurget profectò aliquando ( & ea certa spes me tenet) eiusmodi adminiculis & fulcris. Tu perge, & te litterarum ac Sapientiæ studiis primùm, mox patriæ trade: palàm factururus, quantum intersit inter doctos cultosque Nobiles, & istos, qui nihil lucis habent nisi à luce maiorum. Meam quidem amicitiam quòd appetis; ita cupidè offero, vt ipse propior appetenti sim: & in tempore ostendam. Lucubrationibus nostris quòd dele-

ctari



∞. 10. LXXXIX.

Coloziam.

GVLIELMO CRIPIO *Filio.*

\*omni vir-  
tute deco-  
ratum.

\*Sanguinis  
es boni care  
puer.

\* *malum*  
vana dice-  
re.

EPISTOLA LXXXIII.

IOH. ARCERIO.

\* & ab in-  
timâ men-  
te gaudeo.

deserit suos, sed abducit à loco vt ad meliorem reducat, & obijcit sæpè non sperata. Nos in tenui & veteri nostrâ valetudine, tamen Politica absoluiamus : quæ vtinam ne mecum langueant, & sint, quod dicitur, \* *ἵππε γῆρας*. Mihi tamen firmum compactumque opus videbatur, & ferendo æuo: sed mihi. Vestra aliorum iudicia exspecto, nec antè me do ad absolucendum. Nam quod ad notas attinet, \* *μέγα ἔργον ἄρεται*, vt ille inquit: & id quod fecit morbus. Exemplaria quattuor ad te mitto, distribuenda pro inscriptione singulorum. De Galliâ, credo vos audisse magnum illud facinus, & inopinatam Regis cædem. Ego video Deum res magnas, res nouas moliri, & conuersionem status in vniuersâ Europâ.

\* equi senium.

\* magnum opus imperfectum.

\* multi-  
rum ut-  
bium sol-  
uit culmi-  
na:

Atque etiâ  
soluunt.

———— \* *πολλῶν πόλεων κατέλυσε κάρνηα,*

*Ἡ δ' ἐτι καὶ λύσει.*

Vtinam saluis nobis! Vale vir ornatissime, & cum vxore tuâ à me meaqué salue. Lugd. Batavorum, xlii. Kalend. Septemb.  
∞. IO. LXXXIX,

## EPISTOLA LXXXIV.

ISAACO CASAUBONO.

**N**ON redditas tibi litteras meas, mi Casaubone, non miror solum, sed indignor. Spernam egote? ne differam quidem: & respondi illico vt accepi tuas. Gratæ mihi & à tali ingenio, quod iamdiu æstimo: & à tali affectu, quem calidum profecto in me promissis. Amo, amo vicissim; nec tam frigidum aut rigidum mihi pectus, vt non incalescat & moueatur ab hoc igne. Strabonem tuum vidimus, & multa in eo proba. perge per Deum, & quoniam Scaliger noster in hoc genere toto filet, tu prodi & age hanc personam. Decenter, mihi crede, potes. Sed, heu, Gallia vestra quàm æstuat! vetus, florēs, & illud regnorum, vt sic dicam, regnum, quàm periclitatur non cōuerti sed eueri! Illacrumo. nam fateri debemus illustrium ingeniorum iam ab aliquot annis hanc matrem fuisse, aut sedem. Nos quoque in veteri nostro bello: sed minùs feruido, & consumimur lento quodam igne. Feramus; & nos, mi Casaubone, istis litterarum Sapientiaqué studijs inuoluamus: in quibus abductio, aut certè aliqua

aliqua seductio est à turbis. Vale. Lugduni Batavor. Postrid.  
Non. Sext.

## EPISTOLA LXXXV.

PHIL. MARNIXIO.

**A**CCEPISSE te librum nostrum, legisse, probasse, serió ego gaudeo. In tuo iudicio quidni acquiescam? qui secasti hos fluctus, & benè penitus te immerxisti in rerum ciuiliū istud mare. Nosti ergo, & peritiam tibi ingenuit ipse vsus. Qui nobis quidem modicus adest, & liberè cum Homérico adolecente fateor,

\* Οὐδέ τι πω μύθοισι πεπείρημαι πικνωσίην.

Quò magis vestrum est, monere & dirigere siquid peccamus. Quod malles in Ευσέλαις illà re verbis quoque me εὐσεβῶν, spre-  
tis illis profanis: fecissem profectò, si distinctiùs & accuratiùs  
dicendum de ijs mihi putassem. Hoc omisi, aut distuli: & caus-  
fam nònne vides? Cùm tā pauca & timidè dixerim, nunc quo-  
que vndique incurrunt, pænè dixerim,

\* Neque  
ego adhuc  
sermonum  
prudentiū  
vsus ha-  
beo.

——— \* ἀγρότεροις σύεσιν ἐοικότες.

quid futurum erat si magis me diffudissem? Libaui igitur: &  
ideò in stilo quoque nihil mutauī, & exiguam illam laciniam  
pertexui filo quo reliquam vestem. Quod si tamen tibi hīc aut  
alibi aliud videtur, mone, & me deuincies. Aliorum voces siue  
calumniæ, asperæ: \* ἀγαθὴ δὲ ὁδὸς αἰφύσας ἐστὶν ἐταίρη. Tuus Gedeo  
Borzelarius mirum est quàm se nobis probet, modestiā, dili-  
gentiā, profectu. Stirpe suā dignus euadet. Vale. Lugduni Bat.  
Prid. Kal. Octobr.

\* ἀγροῦ-  
bus suis  
similes.

\* bona ad-  
monitio  
amici.

## EPISTOLA LXXXVI.

Leodium.

DOMINICO LAMPSONIO.

**I**A M nunc mihi adest, qui ad vos abit. Ipse tibi dicer, tem-  
pus mihi non fuisse ad longam scriptionem: atque adeò, vt  
familiariter tecum loquar, è lectulo me excitauit. Sed vigilo, vi-  
gilo cùm Lampsonij nomen auribus & menti meæ insonuit.  
Iamdudum etiam ego à te nihil. quid tum? tam scio amare te, quàm  
me spirare.

\* Οὐδέεις



\* Non est  
amator,  
perpetim  
quoniam  
amat.

\* Οὐδεις ἐραστὴς ὄστις ἐν αὐτῷ φιλεῖ.

\* multa  
menti ma-  
gis, quàm  
multis  
verbis stu-  
diuisse.

Politica nostra absoluiamus: cape, lege, arbitrare. Nam iudicem aliquem te tuique similem, valde mi Lampsoni volo: versatum in rebus scilicet, nec à lectione solum sed ab usu doctum. Vide sicubi erramus. Breuia ista sunt, & adstricta, fateor: sed apud te quid excusem? scio in eiusmodi rebus rem te velle, non supina aliquot & natantia verba. quò nimis ferè inclinant, qui res Ciui- les hodie scribunt. Nimis, inquam, se per disputatiunculas dif- fundunt. At mihi Cretenses illi probi: quos Plato ait \* πολυλογιαν μαλλον, ἢ πολυλογίαν ἀσκήσας. Nos iam in manu habemus Dialo- gum *De magnitudine Romaná:* & perficiemus, si Deo visum. Epistolarum etiam Centuriam alteram extrudimus, & priorem reformamus. Apud me ista: tu quid? scribe, scribe, nec (quod callidæ amantes solent) desiderio nos torque. Lugduni Barauo- rum, Postrid. Idus Sext. ∞ .IO. LXXXIX.

## EPISTOLA LXXXVII.

FR. RAPHELENGIO *Filio.*

**M**I Raphelengi etiam nunc fluctuas? quousque? Semel statue rationi & nobis pareas, an tibi. Illa suadet differ- ri iter in proximam ætatem, ob causas multas. E famâ tuâ erit, è re tuâ, ex usu familiæ Plantinianæ. Tam citò solui & abrum- pi illum cæterum sublato capite, sit indignum. Causas quas ha- bes, ego quoque intellego, atque adeò approbo: sed calidè nihil fieri volo aut importunè. Ne nimis cupidè cupe quod cu- pis. Mali ominis sit nimia hæc festinatio. Audi me ex animo loquentem. Ire te in Italiam ad multa utile est: vt absis ab his turbis, vt videas & discas, vt locum & occasionem quæras e- mergendi. Hæc omnia vera sunt, & suadeo: sed hoc quoque ve- rum, magis decòre te iturum post aliquot menses, magis tutò sub ætatem, & magis prouidè omnia ac dispositè acturum. Vti- nam antè te vidissem! id quoque è re tuâ fortasse esset, & certè ex meo voto. Sed nos ea audimus, vt verear ne breui interclusè om- nes viæ. nisi si ipse sub Ver proximū in Germaniâ me sisto, quod haud despero. O iuuenis in quod æuū incidisti! sed tene viam re- ctam, haud pœnitebit. Ne pugna cum temporibus, & serua te  
ad m.

ad meliora fata, sed sub tegmine & umbrâ semper modestæ Virtutis. Ego desino: haud multa libet. xiii. Kalend. Sextil. ∞. IO. LXXXIX.

## EPISTOLA LXXXVIII.

CASPARI VOSBERGIO.

**D**ISTVLI respondere litteris tuis, sed sine tuâ vllâ noxâ. Nunc id facio per Legatû Regis, cuius negotia tibi commendo, & peto, quod in te est, ea matures. Nostri quàm lenti sint, præsertim vbi pecuniaria res est, non te fugit. Politica grata tibi fuisse gaudeo: quæ tu quod thesaurû appellas, magis ex amore facis, quàm quia merentur. Hoc tamen liberè dixi & repeto, ruminanti ea plusculum aliquid semper suboriturum, quàm primâ specie visum. Hortaris me ad reliqua, & præsertim ad Aristocratiam. quam ego quoque probo mi Vosbergi, sed benè compositam, & qualis illa Spartanorum fuit, aut hodie Venetorum. O quis deus eam dabit! Tamen illam quoque conceptam in mente habeo, & vnius omnino libri res erit. Sed priusquam aggrediar, certum mihi audire & libare iudicia de toto hoc genere scribendi. & si vniuersum displicebit, filere; (cur enim vella faciam aduersis ventis?) si in parte; cognoscere, & refingere siquid minùs rectè aut consideratè à nobis scriptum. Nam id numquam pigebit. Apelles in magnis suis laudatisque operibus hoc seruabat, vt ea publicè proponeret omnium oculis ac linguis, atque ipse velo aliquo tectus iudicia venaretur etiam minimorum: cur nobis hoc non fas in opere, quod tangit omnes? Sed nec Notas, vt vides, plenè absolui. quod caloribus istis immodicis tribues, qui valde me dederunt in languorem. Te valere opto, & nos amare. Lugd. Batauor. xiii. Kalend. Septemb. ∞. IO. LXXXIX.

## EPISTOLA LXXXIX.

NATHANI CHYTRAE O S. D.

**A**CRES quasdam faces epistola tua mihi subdidit, quam ipse amor tibi scripsit. Non me fallunt supina quædam aut natantia verba, & illa quæ ab imo pectore profecta. Talia tua  
c sunt.

sunt. & iam mihi carior noster ille Lydius, per quem tu quoque inter meos caros. Quid verbis me diffundam? redamo sic amantem: virtutis doctrinæque tuæ merito primum, sed etiam fratris adspectu, qui mihi inter Germaniæ primos. Scripta tua & illius iam olim vidimus, & tenuistis nos sepè illâ \* γλυκεία Σειρήνι τῶν λόγων. Non plura apud te. pergamus in hoc cursu, & quod reliquum est vitæ viuamus — \* φίλα εἰδότες ἀλλήλοις ἡ. Accipe daque fidem. & salue. Lugd. Bat. Idib. Mart. ∞. Id. XC.

\* dulci Si-  
rene sermo-  
num.

\* mutuum  
amantes.

## EPISTOLA XC.

MARTINO LYDIO.

**A**MICA tua epistola, vt semper, atque etiam anxia pro nostrâ famâ. Agnosco amorem: sed de purgatione, quod scribis, quæso omitte. Quid me eluas apud eos, mi Lydi, quibus decretum quacumque de causâ \* μῶμεν ἀνάσαι? Ieiuna imò turpia sunt quæ adferuntur (ago liberè:) & te aut me non noui, si hæc \* ἀπεδαιτέον excuso. Impiè hoc scripsi, inquiunt, quòd Religionem omnem tolero in repub. modò vetus. Etiámne gentiliū? etiámne Turcarum? etiam. Vbi hoc scripsi? Verba adfers: sed ô boni, ergo notulam illam graue iis legere, quæ ad oram? Coërcui enim ecce, & restrinxi: MOS PROBVS *et* *vetus seruandus*. Satin' clara hæc verba? ita vetus tenendus, si probus. Iam illud alterum, in quo sæuitiæ me arguunt, bellum. Quis verba ea bonus integerque vir legit, qui non capiat ex meo bonoque sensu? At possunt aliorsum flecti. Multa talia in omnibus scriptis: sed eos nempe carpinus, qui sic flectunt. Melissæ aliquæ flores nostros infideant, non istæ Arachnæ. Quid verba facio? his talibus suadeor, non vt aliter scribam, sed vt ne scribam: & silentio tuti simus, quoniam ratione vix licet.

\* Multi  
malesoli  
in nos ma-  
chinantur.

\* Δυσμενέες γὰρ πολλοί εἰσι τοῖς ἡμῶν μηχανόων.

Ego tibi verum verbum dicam. Quosdam ex istis torquent non quæ scripsi, sed quæ non scripsi. Intellege, & me iam olim tuum ama. Lugduni Batavi. xvii. Kal. Apr.

Qui has tradet, Nansius Filius erit, vt opinor. Faucas ei quæso meâ causâ, & aut cœptam speim promoue: aut si ea mortua, in nouâ hac iuua. Ab ipso audies. Saluta amicos Arcerium, Drusium,



Druſium, Eilardum. Ecce reſponſum etiam ad Nath. Chytræi epiſtolam: rogo te cures.

## EPISTOLA XCI.

REGNERO GRVTERO.

**G**RATÆ mihi tuæ litteræ, mi Grutere, nec eſt quod excuſes. Peccares, niſi ſic peccares. Ego, etſi non ſemper reſpondere aut ſcribere vacuus, tamen legere: & nimis quàm libens ſermones veſtros libo, qui aliquando in noſtrâ diſciplinâ. Statum & formam Academiae veſtrę per te cognoui. probus eſt: ſed inprimis ille vir magnus, quem iure laudas. Iunium intellego: cui tu, mi Grutere, adhære, & recondita multa hauri ex arcano illo vberique penu. Chryſmannus aliquidne De temporibus poſt Scaligerum? durus ille concurſus eſt: & tamen ſcio eſſe, quæ poſt eum addi illuſtrarique poſſint. Nos poſt Politica edita redimus in veterem campum; & vel mores Romanos illuſtrabimus, vel ſpinas aliquot in eo runcabimus, Criticâ iſtâ falce. Deus valetudinem modò & otium mihi det: de quorū altero vix ſpero. cū turbas video quæ in Galliâ natæ. Vale mi Grutere, & identidem me appella. Lugd. Bat. III. Id. Sext. ∞. IO. LXXXIX.

## EPISTOLA XCII.

MICHAELI MONTANO.

**V**IR Nobiliſſime, per epiſtolam rarò te alloquor, ſępiſſimè animo & affectu. Utinam res veſtræ aut noſtræ quietiores! nunquam ego deum videam, niſi te viderem. Nam litterarium hoc colloquium, nugæ: meri amores & mera ſuauiſſas, os aliquod amicum intueri & amplecti. Sed, vt ille ait,

*Νυνὼ δ' ἐτέρως ἐβλήοντο θεοί.* ———

Politica noſtra tandem edidi, diu preſſa, & neſcio an vel nunc emiſſa aue ſatis faultâ. Æuum ego & hæc præiudicia an ignoro? ſed tamen temperaſſe me videbis, & nihil niſi communibus præceptis ſcripſiſſe: excipio paucula de Religione. In quâ conſilium noſtrum nec improbum, nec imprudens fortasè apud probos. O tui ſimilis mihi lector ſit! & tu iudicium tuum liberè, & vt vir es, ſcribe. Turbæ apud vos magne: ſi ingenium tuum

noui ( vt certè è scriptis noui : in quibus non fallax tui imago. )  
quiescis. Quod vt tutò & diu possis, æternum Deum rogo.. xv.  
Kal. Octobr.

## EPISTOLA XCIII.

*Mechliniam.*

NICOLAO OVDARTO.

**A**CCEPISSE te libros Politicorum mihi gratum; & magis, te probasse. Ex animo tibi dico. probari tui similibus lucribratiunculas nostras gaudeo, etsi pleraque scribimus non huic æuo. In illo ipso opere Politicorum, quàm multa parùm ad palatum huius illiusve partis! nec aliter fuit, aut erit, vbi sunt partes. Veritatem puram candidamque ego scio, & immunem ab omni affectu. Vt oculi, vbi glaucoma obsidet, puriter non vident: non item mens, vbi adfectus. Præiudicium iudicium omne tollit. At in iis quæ de Fato scripsi, gaudeo quòd liberè mones. etsi ego me insistere tritam & priscam viam sentio, nec in aliâ mente esse Thomam & argutos illos in Ecclesia Doctores. Tamen si quid aliud, videbo: & tuo monitu libens nō explicabo solùm; sed, si opus, retractabo. An me pudeat? numquam. & veram rectamque viam tardè videre & inire possumus, numquam ferò. Magnum illum virum nobis obiisse, dolco: & heu patria, quàm talibus nunc eges! Impetus & calor est, qui nos perdiderunt & perdent. Sed ego longiùs progredior. cui hoc tātum propositum scribere: me te amare, & gaudere in amore tuo mei: quem vt propages deinceps ac serues, consuetudinis causâ, rogo. nam necesse non esse, facilè ex eo mihi liquet, quòd sine vlllo nomenclatore, tot annos firmiter eum in arcanâ istâ mente coluisti. Vale Vir amicissime. v. Idus Nouemb. ∞. IO. LXXXIX. Berchemij nostri mentio in epistolâ me excitauit. quid illo fit? vbi est? amo, amo virum.

## EPISTOLA XCIV.

*Viennam.*

HVG. BLOTIO.

\*consu-  
natalibus.

**V**ERE diuinasti. perierunt litteræ tuæ quas Thysio dedisti: neque ego vllas, præter has à \* συμβουλευτικῶν meis, vidi. An ego tam diu aliàs filuissim?

\* Ζεύς

\* Ζεὺς τὸ γ' ἀλέχησεν ἃ θανάτῳ θεοὶ ἄλλοι.

Meritò amâtes ego mei redamo, & te mi Bloti inter primos, veterum & veterem Musarum mystam. Ergo scito amicitiam tuam mihi caram, gratum etiam de scriptis iudicium : quod etsi nimis sumit ab affectu, tamen, liberè fateor, his talibus

\* Iupiter  
hoc auertat, & immorales  
dij alij.

— \* ἀέξεῖ ἐνδοθι θυμός.

Tu si me litteris tuis sæpius appellaueris, & in iis rerum etiam aliquid asperferis quæ istic geruntur (præsertim siquid ad nos & hæc studia : ) beabis, & reipsâ videbis prouocatum à te, quod dicitur, \* ἵππον εἰς πείλον. Vale. Lugd. Batau. Idib. Martiis.

\* augetur  
intus animus.

Illustri Baroni Hieronymo Beck à Leopoldstorf gratiam de-beo pro affectu in me, quem ex animo iubeo saluere. item nostrum Leunclauium.

\* equum in  
planiciem.

## EPISTOLA XCV.

EVERHARDO REIDANO.

SCRIPTIO tua me affecit, & iudicium de Politicis ; quæ votum mihi præcipuum est vt approbem vobis. Aliorum sermunculos quid curem? placere iis & satisfacere in alio quouis argumento magis possum, quàm in isto. Ego liberè quod mihi visum est dixi, & sæpè magis ex vsu publico, quàm ex gustu. At sunt etiam quidam qui Batauiæ finibus me includunt, & omnia scribi volunt pro hoc statu. Inepti! quod non Plato, non Aristoteles, non quisquam veterum fecit, qui scripsêre aliquid in spem diuturnioris æui. Hic illa forma reip., alibi alia : atque vtinam nobis Princeps sit, sed ille adstrictus & legitimus, & qualem formo. Iam etiam quidam diffundi me voluerunt, & iuisse potius per liberam semitam & vestigia nostra. Haud difficile mihi, fateor: sed aliò me duxerunt rationes quas dixi, & quas non dixi. Faciam tamen aliquando, si viuo, & Notis meis siue Commentariolis abundè explebo hanc sitim. Mihi iam nunc materies ea parata, sed premimus, & calamus paullisper retineamus scripturientem. Ego, vno verbo, te amo, & id mihi fieri à te percipio. Vale. Lugd. Batau. xii. Kal. Mart. ∞. Id. x c.



EPISTOLA XCVI. *Londinium.*

LANCELOTO BRVNIO.

**P**ADDEIVM tuum insignem virum libens vidi, & officia præstiti quæ potui prolixè. Malo ab ipso hoc te audire. Sum naturâ in omnes benignus, tum maximè in nostri gregis homines, & qui commendant se colore isto litterarum. Colore inquam, non fuco. quia reuerâ Paddeius tuus, imò iam noster, ferio se melioribus istis scientiis tinxit. Nos titulum ei dedimus, sed rem attulit ipse ad nos abudè. De valetudine meâ quid scribam? potes ex ipso audire, qui *\* αὐτότης*. Tamen vos medici probè scitis, quidquid dissimuletis, leniri non tolli hos morbos. Vbi semel radices egerunt, hærent. Itaque languéo, & præsertim per hos Caniculæ insanientis æstus, qui corpus hoc per se siccum & aridum, pænè reddiderunt cornu. Animo tamen egregiè adhuc sustento: & deus mihi seruet hanc mentem, numquam eâ parte succumbam. Britanniam vestram & vos amicos videre iam diu gestio: sed nescio quod impedimentum mihi nascitur aliud ex alio: & ægrè muto locum, quem numquam tamen sine fructu & bono valetudinis muto. Sed videbo, & fortassis aduolabo

*\* inspector.* *\* πρὸς τὴν δόξαν.* Franc. Vlmi *De Liene* iam diu lêgi, missum ad me è Galliâ. nam ego vestra medica, præsertim si quid elegantius, valdè appeto, & diuerto suauiter in illos naturæ hortos. Tûne in eodem argumento? diuulga, & doce nobilem aliquem vsum in nobili illâ parte.

*\* præter opinionem.*

Sed heus tu, quid Typographis vestris visum Politica mea recudere? non debebant. *\* Ἀτελές* adhuc opus est: & præterea, prima illa exemplaria ad vos missa, haud satis emaculata. Alia aut emendatiora sunt, aut præferunt certè suas mendas. Itaque factum hoc non amo: sed te fideliter mi Bruni. Vale.

*\* Imperfectum.*

LECTO-

## LECTORI.

**E**RANT in editionibus aliis Epistola quaterna, quæ ioci aut salis aliquid haberent, non in gentem, sed in hospitium gentis, & præsertim rusticana. Aliqui morsum aut lesionem interpretati sunt: & quia non est, nec fuit is animus, nunc omisimus induximûsque. Earum loco ista Centuriam expleant: quæ defensionem habebant, & sine cuiusquam malâ gratiâ, opinor, legantur. Vale.

## EPISTOLA XCVII.

TYPOGRAPHVS LECTORI S. D.

**E**DIMVS hanc Epistolam, Lector, etsi auctore non tam volente, quàm nolente. Nec enim eò scripserat vt ederetur, non certè sic sola: sed quia iam factum in Germania ipso ignarissimo atque inuito, frustrà teneri videt quod effugit. Euenit etiam, quod solet, vt fugitiua parùm compta esset atque ornata, imò parùm recta. quæ caussa illi maxime, vt edi pateretur iterùm, minus mali scilicet si minus malam. Itaque propriam ei vestem reddidit, & qualis in arculâ remansit. Hoc tantùm serio testatur: ne nunc quidem ista quasi publicè responsa velle. quid opus in rebus leuibus? & abest alioqui animus eius ab omni non solum concertatione, sed defensione: & putat sapientius spernere hæc talia, quàm refutare. Præsidium famæ, non in verbis, sed in vitâ suâ ponit: atque illam integram sperat apud eos, qui hanc norunt. Quod ad scripta etiam atinet, acrem sed æquum iudicem non recusat: in quibus siquid erroris alibi aut caloris, prouocat ad humanam conditionem, cuius hoc proprium, sicut nusquam labi diuinæ. Id tantùm rogat, Lector, ne leues aut liuidi homunciones te moueant, neu calumniis istis temerè acciptor sis: quia illud verissimè dictum, Διαβολὴ ἔστι δεινότερα τῶν ἐν τῇ δ'ύο μέρ' εἰσι τοῖς ἀδικούντες, εἰς δὲ ὁ ἀδικούμενος. Calumnia res iniquissima: in quâ duo quidem sunt qui inferant iniuriam, vnus qui ferat. Tu ne alter ex iis esto, & hoc Menandri cogita.

Herodot.  
VII.

Ὅστις δὲ διαβολῇσι πέδιτ' ἔχῃ,

Ἡ τὶ πονηρὸς αὐτὸς ἔστι τῶν ἑόρων,

Ἡ πάντα πᾶσι πηδαρίω γράμμιον ἔχει,

Calumniis quisquis fidem præbet citò,

Aut ipse mente moribusque est improbus,

Aut mente eadem cassus, & prorsus puer.

Vale. Antuerpiæ. Kal. Sept. ∞. IO. XCH.

## EPISTOLA XCVIII.

I. LIPSIVS IACOBO MONAVIO S. D.

**I**NCOLV MEM te rediisse ex Pannonicâ peregrinatione (Ortelius indicium fecit) ex animo, mi Monau, gratulamur, &  
Deum



Deum rogamus, vt in patriâ quoque talem te seruet. Nos adhuc in peregrino solo apud Eburones : vrbe, in quâ olim & nunc, in nos proni & benigni. Tamen deliberamus sub æstatem de fede aliâ, & magis certâ: si quid tamen certi in hoc motu rerum. Nam quocumque me verti, in hoc ambitu aut palàm bella, aut eorum metus. At nos quietem, vt scis, quærebat: vbi inueniendam nisi in superis illis locis, & æternùm quietis? Tamen de pace nunc aliqua mentio. sed mentio magis, quàm adfirmatio : & qui statum rerum peruidet, parùm etiam sperant. Sed cum Poëtâ,

\* *Ἀλλὰ τὰ γὰρ ἑὸς οἷδ' ἐν ὀλύμπῳ αἰετὲρ ναίων.*

\* *Verùm  
Iupiter hæc  
scit Olympi  
pius æthra  
habitor.  
Homer.*

Ei nos hæc, & nosmetipsos permittimus : certi, quòd non magnam illam solùm orbis nauem, sed hanc quoque cymbulam diriget Prouidentia suæ clauo. Sed quod ad Quietem, fascinare eam nuper Saturnius quidam oculus voluit, calumniis in me iactis, quas vidisti. Voluit, non fecit. nam nos hæc talia adeò ad animũ non admittimus, vt vix ad oculos : & sciunt amici, quàm multis denique mensibus post inspectus mihi hic libellus. Curiosi & auidi quid simus talium? quæ certum nobis est contemnere magis, quàm vindicare. Atque adeò, bonâ fide, nec nunc vidissem : nisi iidem monuissent, inesse quædam, quæ non ad famam doctrinæ nostræ solùm pertinerent, sed & probitatis. Inspexi igitur, & quid dicam? Scriptum vniuersum est compositum ad inuidiam pariter & infamiam, quam mouet mihi apud homines singulos, & apud gentes totas. Deus immortalis, hanc acerbiter cadere in Christiana pectora? idque ob leues aliquos, scænatiles, & vt grauissimè dicas, improuidos iocos? Nam in Westphalos ecce aliquid dixi. Hoc caput, hæc arx accusatio- nis est. Testor fidem, Monauì, animo & mente nihil nec luisse quidem in ipsos, sed in ea, quæ ad ipsos. Vbi virtuti eorum aut robori aliquid à me detractum? De cultu dixi, & genere vitæ externo : quod valdè elegans apud ipsos esse, nec ipsi quidem dicant. Atqui nefas illa tangere. Quid Erasmo igitur fiet, qui tam vbertim & liberè illufit in hospitia omnia Germaniæ? Quid Cle- nardo, qui in Hispaniâ? Nec tamen vsque adhuc vidimus, qui dicam iis scripsit. Ferri solent & possunt hæc talia, amœnitates, aut si vis, lasciuiæ ingeniorum : nec oderunt hos sales, qui salem ipsi habent. Ij sciunt, dicta à maledictis, & hæc à maleficiis dif-

ferre. At iste capitis etiam me anquirir, & (verba eius sunt) *crucem mereri hæc, crucem*. Credo sanè, sed eam, in quâ Cupido apud Poëtam adfixus, ioculare. Sed extra iocum, si quid in Epistolis illis nimium aut asperum est, quæso, è nostrâ mente molliatur: quam palam testor nunquam fuisse ad lædendum. Verba quædam si ire videntur longius, reuocanda sunt, nec id me facere pudebit publicè, & ut sic dicam, in ipsis Rostribus. Vtinam pectus hoc videant! niueum est, & fuit. Humida sunt illa & lapsantia quædam verba, & nata non nisi in summo ore. Quid, quod in morbo nata? ille excuset. Querulum hoc genus, & præ-

\* ab eâ facile vel lymphum accidere possit.

Theocrit.

fertim nos, quos atra hæc bilis vexat: quæ cum exarsit, \* *Εὐμαρίως*, *ὡς ἀπ' αὐτῆς καὶ λύχρον ἀΐται*, ut ait Poëta. Atqui Germanos etiam vniuersos læsimus, quibus *passim* (ita inquit) *tam stultè, quàm ferociter insulto*. Quæ frons tam infrunita hoc dicit? Ego Germanos? parentes illos maioresque nostros? Nam ita scio & sentio, nos Belgas plerosque origine illinc esse: & quamquam positu locisque Galli simus, tamen stirpe & sanguine Saxones, & læti libentesque audimus INFERIORES GERMANI. Vbi igitur, aut cur læsi? Dicta & scripta mea excutiantur, latebranusquam in quâ hæc calumnia delitescat. Quin contrâ, diserta & exserta verba & laudem & elogia gentis, alijs inuidenda. Scripsi & edidi in commentario ad Germaniam Taciti: CANDIDAM GENTEM: &, CASTVM ORBEM: &, MAGNAM MEAM PATRIAM: &, fastigium, si examinas, omnis laudis, PACE ET BELLO OPTIMAM GENTEM. Quæ vis magis honora, magis viuâ & spirantia verba? Tamen cumulaui, & ecce iterum ad Annalem Taciti decimumtercium, PVGNACISSIMA ET FIDELISSIMA GENS. Et in Epistolis: HOMINES ETIAM ILLA TELLVS (Germania) ALIT, INGENIO DOCTRINAQUE PARES NOBIS, FIDE ET VIRTUTE MELIORES. Ades liuor, quis germanissimus Germanus potuit de matre suâ benignius? Nec vsquam læsa à me hæc pietas (ita loquor, & sentio:) nisi si quid ioculo in bibones quosdam, & ut hoc quoque ioco, \* *καλῶς*, *ὡς ἐπέτρε*. Sed ille non contentus hoc mare in me commouisse, Imperatorem ipsum concitat, & postulat me Maiestatis. Ius, inquit, eius minuisti, in laureâ Poëtarum. O homo, nec per som-

\* Calicem remiges sine trahomes.

Apud Athen.

somnium in illo somnio feci. Sed tu colligis, vt video, omnium sermonum aurulas, & ijs vela tua ad calumniandum imples. Fuit res in inuidiâ aliquâ, fateor, recenti illo scripto: tracti in causam per eos qui iure læsi, etiam qui non læsi. Sed seorsim postquàm Epistolâ excusauî & aperui ( exstat in Saturnalium nostrorum fronte: ) omnis ista bilis soluta est in risum. Quid enim aliud schemate illo ( non sanè scommate ) volui, quàm quod verbum vetus: *Multos Thyrsiferos esse, paucos Bacchos?* Et hoc sciunt, & dolent illi ipsi, quos merito suo cinxit Phœbæa illa laurus. Ad Imperatorem quidem quid istud pertinet, si sint qui imponant & obrepant? Ego tantum absum, vt lædere aut illudere voluerim Principum illum principem, sacrum caput Christiani orbis: vt contrâ ab adolescentiâ cultum omnem venerationemque detulerim ipsi, & eius genti. TACITVS meus cum præfatione ad MAXIMILIANVM iuit, Imperatoris huius Patrem: ELECTA ad Archiducem MATTHIAM, eius fratrem: POLITICA nostra, ad HVNC IPSVM & Christianos reges. Cur non facerem? deberi mihi hæc & alia meliorum ingeniorum libamenta visa, *domui ad summum fastigium genitæ*, arci & propugnaculo vnico in æternum illum hostem. Hæc sunt in vniuerso illo scripto, quæ digna reiectione aliquâ censui. nam reliqua sunt conuicia aut scommata insulsa, illepidâ, nata inter haras. Peponem habet loco cordis, quem ea delectent. Atque ego, quid me opponam? Spreta illa exolescent: & vt in omni alio certamine, qui vincit, coronatur; ita contrâ hîc est, & accipit herbam, qui eam dedit. Nos scimus arbores quæ iuxta vias sunt, saxi & fustibus peti sæpiùs: & homines linguarum his telis, qui in limite melioris famæ. Non tamen ea nocent: imò iuuant. & vt frumentum triturâ folliculos exuit ac deponit: sic nos concussiunculis illis paleas, si fortè, vanitatum. quas nimis sæpè animis adhærescere è tractatione istâ litterarum non est negandum. Oraculum est, *Nimiâ gloriâ luxuria-* Liu. lxx.  
*re, & euanesce vinida sæpè ingenia*. Interueniant igitur vtiliter hæc conuicia: & quod amicorum lenis spongia non eluit, deterrat & defricet scaber his lapis castigationum. Hæc nostra mens est, nec nunc solum, *cùm folia in me cadunt*, sed etiam *cùm arbores* (fiet, vt hoc æuum est:) nec aliud, quàm Palladium illud



scutum pectori apprefferim, NON MOVERI. Miseri quid ad hoc scamma producimur? quid luctatiunculis istis nobis volumus? Ecce mors supra caput, & superum istud tribunal; vbi non scripta nostra examinanda sunt, sed facta. Sapiamus. Mihi quidem deinceps certum, Deum per maiorum vestigia constanter colere, studia & ex iis famam non negligere, quatenus tamen ea vsui Reip. esse possint, aut iuuentuti. Quod si interea homines me contemnant, aut incurrant, contemno: & cum Achille clamo,

\*Spero me  
honoratum  
fate Iouis  
esse.  
Homer.

\* Φρονέω δὲ τετιμῶσθαι Διὸς Διόν.

Ecce habes, mi Monauī, longam, & pænē præter leges epistolæ, epistolam: sed prouexit me res ipsa, & filum istud responsum: tum etiam hæc causā, quod tibi homini Germano, & inter eos claro, probare nostrā causā voluerim: maximè duplicem, quæ ad gentem, & quæ ad Cæsarem: amandam à me semper illam, & hunc colendum. Vtrumque facturus sum Monauī & tibi. Vale. Leodici, Nonis Ianuariis, ∞. ID. xcii.

## EPISTOLA XCIX.

ABRAHAMO ORTELIO S. D.

**E**N mi Orteli illam ad Monauium, quā legere te adeò non veto, imò volo. Scripta per hanc occasionem est, & quia quærebat ecquid in illum vellem? Scripta inquam, de ipsā re, & breuiter, sed fortiter satis ad me purgandum. Reliqua nolui tangere, quæ in me ferè dirigit, & nihil ad ARA S FOCOS QVE PATRIOS: & ea ipsa cum glacie fragiliora sint, quid insistam? Cave autem tu aut alius aliò me traxeris: longius non ibo. *Si stimos pugnīs cædis, manibus plus dolet*, ait noster: non alius hīc fructus. In Busbequij morte, & tali morte, in animo meo dolui. Seruatū hunc virum per tot discrimina, apud exteros, apud barbaros, vt in limine ferè patriæ latronum manibus (ita audimus) periret? Sed cū recogito, quacūque viā illa venerit, mors est: & paucis viris magnis contigit illa, quam Augustus optabat & habuit, \*δύραστοία. Sed loco eius \*δυστυχία contigit, & suauem famam reliquit doctrinæ suæ, prudentiæ, probitatis. Nos quando ad hunc portum? Magis appetimus, cū publica & priuata

\*leuitas  
moris.  
\*fama be-  
nigna.

hæc

hæc naufragia videmus amicorum. Sed fiat quod Deo, & cum Deo, visum : cui parère, & velle quod ipse vult, summa non sapientia solùm est, sed tranquillitas & quies. Vale mi Orтели. III. Idus Ianuar. ∞. IO. XCII.

## EPISTOLA C.

ABRAHAMO ORTELIO S. D.

**V**IDI epistolam meam diuulgatam, & dolui, quocumque casu aut culpâ id factum. Seriò loquor. Hócne oportuit me inconsulto? & an sic oportuit solam? imò & corruptam? Nam immutata in eâ quædam aut omiſſa, quæ vel optimè à nobis dicta. Ego Monauio non quidem irascor (quî possim tam amico?) sed tamen subirascor, quòd passus sit excrìbi ab hominibus, vt res docet, parùm fidis. Atqui beniuoli illi mihi. Credo, sed an quisquam supra me? Vulnus ego meum optimè intelligo & sentio, atque vnà medendi tempus. Sed enim edi merebatur. Quis præsūmit sibi hoc iudiciū? mihi debebatur: nec feram in parente, si viuat, vt hac in re non dicam plus me, sed aliquid sine me possit. Tamen factum est: quid ergo faciam? nisi illud

\* Τάσσομαι, ἐν στήθεσιν ἔχων ταλαπενθία θυμῶν.

Vndique mihi materies ad Patientiam, & latus campus in quo exerceam hanc virtutem. Sed iterum dico, Monauio non irascor: quem PEC CASSE pronunciare non possum, sed PARVM CAVISSE. Ego in posterum: etsi quî possum, nisi vt planè stilum coërceam & hanc manum? Vnum est quod me lenit aliquid & mitigat, quòd epistolæ eius me non pudet, & recitetur vel in theatro Europæ. Tamen exempli improbi res est, nec probus aliquis neget. Vale mi Orтели. Leodici, VI. Kalend. Iul. ∞. IO. XCII.

\* Perpetiar, tolerantem animū isto in pectore gestans. Homer.

F I N I S.

## L. APPULEIUS

### 1. *Floridorum.*

Hoc quoque genus inuenitur, qui meliores obtreċtare malint quàm imitari, & quorum fimilitudinem desperent, eorumdem adfectent fimilitatem: Scilicet vt qui suo nomine obſcuri ſunt, aliorum innotescant.

## APPROBATIO.

*Nihil continent hæ epistola fidei Catholica aduerſum, aut quod quemquam meritò offēdat. Actum Bruxella, 4. Auguſti. 1592.*

Cornelius Worzel. S. Th. Licentiatus,  
D. Gud. Plebanus.







IUSTI LIPSI  
EPISTOLARVM  
SELECTARVM  
CENTVRIA TERTIA  
MISCELLANEA.



ANTVERPIÆ,  
EX OFFICINA PLANTINIANA,  
Apud Ioannem Moretum.  
cId. Idc. v.

*Cum Privilegiis Casareo & duorum Regum.*





AMPL<sup>MO</sup> ET NOBIL<sup>MO</sup> DOMINO,

D. I O A N N I

DRENCKW AIRTO

EQVITI, TOPARCHÆ DORMALIÆ,

supremo Belgicæ Thesaurario.



ENTVRIAM hanc MISCEL-  
LANEAM ad te mitto, non  
munus, sed particulam luen-  
di æris, quod varium & mul-  
tiplex fatemur debere. De-  
cem anni sunt, cùm me beneficiis alijs su-  
peralia cumulas: vt non dicam relationem,  
sed actionem gratiarum studio videaris præ-  
uenire. Quid autem vel nunc refero?  
EPISTOLAS, plerasque ipsas ad te missas:  
& velle nomine tibi inscribendas. Sed EPI-  
STOLAS cùm dico, quid nisi rem leuem &  
subitanæam, & intra verba consistentem di-

co ? Sanè argumenti aut grauioris materiæ hîc parum est : etsi alibi aliquid intercurrit : sed quaecumque , nec felicibus bonisq̃ue temporibus, cùm flos & acumen ingeniorum fuit, repudiatum ab editione & à famâ hoc genus. Epistolas quidem scribere , commune &, vt sic dicam, passiuum est : benè scribere, infrequens, etiam in communi & frequenti aliquâ linguâ. Eò magis iure laudem poscit, si quis in Romanâ præstat, iam olim desitâ : & quæ tamen diuinâ prouidentia vinculum gentium in Europâ hæsit, & thesaurus ac conditorium scientiarum. Quid ? inquires. tanti ergo Latinè scribere ? non : sed sic subito & in festinationis illo calore, & sine industriæ colore scribere , id fortassè pretium habet, apud peritos quidem arbitros rerum & ingeniorum. Nam si studium hîc & affectatio apparet, nihil est : simplex hoc genus est, sine fūco aut paraturâ, &

*Qualis Apellais est color in tabulis.*

Atque ego de elegantia nescio, sed de facilitate aut ( vt liberè dicam ) negligentia scio : &  
quàm

quàm nobis hæc sub manu feri nascique soleant, celerius fortasse quàm scribam. Itaque velut præcoces quidam fructus sunt, iidemque fugaces: qui tamen & vestris magnatum mensis inferri solent, & gratiam festinationis mereri. Quæso apud te, Amplissime Domine, ita sit: placeant quia inaffectedata sunt, quia candida & aperta sunt, simillima ingenio & moribus tuis. Scio equidem graues seriasque tuas curas, in officio laborioso & addam inuidioso: & in quo non dicam gratiam mereri, sed odium vitare difficile est. Quod tu tamen multos annos est, cum ita sustines, ut industriam fidemque tuam Regi antea, nunc Principibus probaueris; & communiter omnibus integritatem, & animum ab omni labe aut corruptelâ immunem. Nam tu rationes istas Belgicæ, publicâ famæ voce administras, tam abstinenter quàm alienas, tam diligenter quàm tuas, tam religiosè quàm publicas, & quæ sacrum illud nomen Patriæ tangunt. Hæc tua laus est, & in sedato animo vigor maximarum rerum capax: quem, ut cœpi, iterum

\* 3

rogo,



rogo, ad hæc etiam minuta, sed fortasse oblectantia, demitti. Legistine Achillem inter media arma citharam & fides interposuisse, & animum ægrum curâ aut offensâ recreasse? Idem facito, hæc vt ludicra sumito : sed ab animo tamen serio & graui profecta, & in cultum tui deuoto. Louanij, v. Kalendas Martias. ∞ . IOCII.



INDEX

# INDEX

## EPISTOLARVM CENTVRIÆ III.

### MISCELLANÆ.

**A** BRAHAMO Ortelio xj.  
Ægidio Schondoncho, Soc.  
Iesu lxxxj.

Antonio Richardoto suo xcij.

B.

Balduino Iunio suo xlix, lii.

Balthasari Moreto suo lxxxix.

Balthasari Robiano, Senatori  
lxxxviij.

C.

Carolo Clusio xvj.

Carolo Vtenhouio xxviij.

Claudio Frossardo à Broiffia viij.

ad Contubernales suos li.

Cornelio Anchemanto suo lxxiij.

Cornelio Prunio V. C. xiiij.

D.

Danieli Susio U. N. vj.

Dionysio Villerio U. R. & Cl.

lxxx.

E.

Erycio Puteano suo lxiiij, c.

Euerardo Pollioni I<sup>do</sup> xxxiiij.

F.

Francisco Billiodo lvij.

Francisco Modio xviij.

Francisco Montmorencio Berseij

Taparchæ lxxxviij.

Francisco Orano suo lxxxvj.

Francisco Schotto, Senatori xxxj.  
G.

Gedeoni Tserbendrixio U. R.  
& N. lv.

Gerardo Buytenuechio lxxxij.

Guilielmo Barclayo xxxiiij.

Guilielmo Beeckmanno J<sup>do</sup> xvij.

Guilielmo Michielsio J<sup>do</sup> xxvj.

Guilielmo Scarbegero suo l.

H.

Hadriano Vander-burchio, patri

xl, lx.

Hadriano Vander-burchio, filio,

Senatori lvij, lxv.

Henrico Schulteto xciiij.

Henrico Vveno J<sup>do</sup> xlvi.

Hermanno Malleano xxv.

Huberto Audeiantio xxxix.

Huberto Giffanio I<sup>do</sup> xv.

Hugoni Grotio xcix.

J.

Jacobo Angiano, Equiti, Toparchæ

Kestergatij xc.

Iacobo Campio, Archidiacono &

Canonico iij.

Jacobo Carondeleto, Cancellario

& Canonico ij.

Iacobo Marchantio xxiiij.

Jacobo Pontano, Soc. Iesu xxxvj.

Iano

Iano Grutero	xcviij.	Leonardo Lessio , Theol. Soc. Iesu	
Jano Lernutio	lxxviij.		xix.
Joanni Baptista Perezio Baronio		Luce VVyngardo U. N.	lxxix.
lxx, xciiij.		M.	
Joanni Bernartio I <sup>to</sup>	xxviij, liiij,	Matthæo Radero, Soc. Iesu	xxx.
xcj.		Matthæo VVachero, Cancellario	
Joanni Bezancenotto	lxxj.	Silesia	ix.
Joanni Brantio, Graphiario	xx,	N.	
xxxviij.		Nicolao de VVeerdts, J <sup>to</sup> & Cog-	
Joanni Carolo Aenobardo U. N.		nato	lxxij, lxxxiiij.
xlj.		Nicolao Hacquenillio	lxj.
Ioanni Drenckpvairsto, Thesau-		Nicolao Ondarto U. R.	lvj.
rario Supremo Regio, x, xiiij,		Nicolao Serario, Soc. Iesu	v.
xxij, xxiiij, xxxviij, xliij, xlvij,		O.	
liij, lxij, lxviij, lxxviij, xcvi.		Othoni Hartio J <sup>to</sup>	xij, xxix.
Joanni Hemelario	lxxxiv.	P.	
Ioanni Hollandio	xciiij.	Petro Lasaillio, Caroli F.	xliij.
Ioanni Moreto, Typographo	j,	Petro Orano I <sup>to</sup>	iv, xxj, lxxxv.
xxxviij.		Petro Pantino Decano	lxiv, lxviij.
Ioanni Orano, Presb. Soc. Iesu	xlvi.	R.	
Joanni Seurio, Legato Hispaniensis		Remaclo Roberti	lxviij.
à Secretis.	lxxiv.	S.	
Ioanni VVouerius suo	xliij, xlvij,	Stephano Turnebo, Senatori	
lxxxviij.		xxxv.	
Isaaco Casaubono	lxix.	T.	
Julio Salinerio	xcviij.	Theodoro Cantero	lxxxv.
L.		U.	
Læuino Torrentio, Episcopo	vij.	Vibrando Anskema	lix.

I  
IUSTI LIPSI  
EPISTOLARVM  
SELECTARVM  
CENTVRIA TERTIA  
MISCELLANEA.

EPISTOLA I.

I. LIPSIVS IOANNI MORETO, *Typographo S. D.*



ERIO & vno verbo, mi Morete, semel hoc crede. quidquid à vobis ad me venit, gratum est, iucundum est: & meritò istæ tuæ litteræ, sincerissimi affectus in me plenæ. Nolo eū testêris: scio. nec pariter vllus vquam Plantinianus ramus erit, quem ego non amem, & cui non benefactum velim ex imo isto fonte. Ostendam hoc semper, quamdiu melior ille spiritus diriget hoc corpus. Sed hæc non necessaria. precibus tuis respondebo, quas velut publico nomine ad me defers. Thraseam tuam, inquis, flagitant omnes. De multis, mi Morete, credo: multos etiam aliter esse cenfeo, & quibus hæc nostra nec grata valdè nec magna. Quæ iudicia vt nec magni ipse facio, nec planè tamen sperno: ita hoc facilè apud me impetrant, vt differam opus, si non vt omittam. Philosophia ista non pro omnium gustu: & calumniam vitare fortasse melius, quàm deprecari. Munus aumarij, in quo chartæ & epistolæ nostræ recondantur, an non gratum sit te mittente? gratissimum: sed & re atque vsu opportunum, & hæcenus desiderabam. In oculis aut manibus cottidie erit: & quod sequitur, eius auctor. Ergo gratia tibi esto & dicta, & reposita: tu aut tui apud me inuenite, & amandi semper amate. Lugd. Bat. v. Id. Decemb. ∞. Io. LXXXIIX.



## EPISTOLA II.

IACOBO CARONDELETO, *Cancellario & Canonico*, S. D.

**H**AVD iniuriâ mihi gratularis, de felici aduentu ad Spadanâs Aquas. Certè per multa discrimina, & molestias, huc venimus: è quibus illa Deus depulit, & has mitigavit. Sine illius præsentî numine & auxilio, per tot ambages viarum, in hac afflictâ valetudine, numquam venissemus ad propositam metam. Sed illi gratia esto, iam hîc sumus: atque eo animo sumus, vt non vltrâ reuifamus ambiguos, & bonis parùm gratos, locos. Quæ ipsa caussa deferendi. Statuimus in vicino tractu menses aliquot (fortassè & vltrâ) agere, & in quiete ac solitudine abdere nos in vetera illa Musarum castra. Rogo eundem illum Deum, vt cum publico bono. Quod autem amorem tuum præfers, & testaris: ille verò mihi notus: occasio mihi sit, pariter testificandi & declarandi mei. Dionysium Villerium iampridem ego noui, & amo hominem verè elegantis ingenij, niuci pectoris, & prorsus de meliore luto. Inò hoc te magis amo, quòd tu illum. Mihi valdè in votis, eiusmodi viros amplecti, & alloqui; magis, quàm omnes Principes & Dynastas. De nummis priscis, coràm videbimus: capior, atque etiam aliquid capio. De fluctibus qui imminere nobis, ex præfagio illius Calchantis, videntur, nò abnuo:

\* nam nobis magna calamitas voluitur.  
Pind.

— ἡμῶν δὲ μέγα πῆμα κελύδεται:

sed tamen de exitu haud valdè angor. Quem Deus diligit, per æqua per iniqua, per fluxus & refluxus perueniet ad suum portum. Vtinam ego ad illum salutis! salutis inquam duplicis: nam & hæc corporis, videtur per fontes vestros etiam affulgere. Sed adhuc incertò: momentum tamen & \* ῥοπή ad meliora. Vale R. & Nobilissime Vir, & nos sub metam septimanæ proximæ expecta. Nam rumor hîc de Aulâ, ad quod nomen fugio. vii. Kal. Iulij, ∞. IO. xci.

\* inclinatio.

## EPISTOLA III.

Moguntiacum.

IACOBO CAMPIO, *Archidiacono & Canonico* S. D.

**P**RAESENTIS tui vultus, & in vultu ipso conspicua probitas, me delectarunt: nunc litteræ, hanc ipsam præferentes, & in me

in me amorem. Gaudeo, & redamo, atque vt litteraria hæc colloquia frequentemus, te rogo. Nummos accepi, atque aliquot Inscriptiones, suo nomine gratas, tum & illius, à quo profecta. Quis studium hoc elegantiae in viro nobili, & Germano non amet? quægens, nescio quomodo, parùm adhuc eò inclinauit: sed cùm eiusmodi procures viam facient & præbunt, facile istas Lunas sequentur minora illa astra. Deus faxit, & vt huc potius se dent, quàm ad inutiles & noxias illas super Religione disputationes. Vno verbo. ego Cancellarium vestrum amo, & beniuolentiam pariter eius in me pro beneficio amplector. Cur non vidi eum, cùm essem in vestrà vrbe? Nam ad hoc quidem temporis largiter fuit: sed credo abfuisse; aut de tali viro, & virtute neminem indicium mihi fecisse. si adfuit, & siluisti, tu mi Campi peccasti. Ego salutem, & obsequiosum animum illi defero; & tibi mi Campi significo, me in Eburonibus & nunc esse, & videri futurum hanc hiemem. Amici sunt, qui detinent, tum & locus & vrbs amœna, & caput, quòd res in patriâ nostrâ eo loco, vt nemo ad eam adspirare possit, cui grata & amica quies. Sed nec securitas in plerisque oppidis, Batauo inualescente, & nostris per secordiam, aut pessimam disciplinam infirmis. Me otium capit, non illud solum, & languidum, sed quod libri, & lucubrationes alant, ac vegetent, & quod aliquid egisse nos, etiam cùm nihil egimus, apud posteros testetur. Paro igitur plura: promptius, si diploma nobis, & interdictum à Casare esset, ne quis nostra statim (vulgò iam fit) recuderet, & imitaretur. Fit cum Typographi damno, fit cum meâ fraude, cui via adimitur addendi, immutandi, castigandi. Spero me in ipsâ Imperatoris aulâ amicos reperturum, sed per quos id confici, aut impetrari maximè debeat, ignoro. Tu si scis, me quoque scitiorum facito, & magis magisque tibi deuinctum deuinci. In Eburonum dominâ vrbe.

XI. Kal. Sextilis. ∞. IO. XCI.

EPISTOLA IIIL. *Leodicum.*PETRO ORANO *J<sup>to</sup>.*

**H**EVs tu, suauius herè vnà fuimus: & quid dicam nisi me à consortio vestro mores ducere, & paullatim hilarescere?

Deus faxit, remittat ille ater humor, quid nisi pater curarum & atræ mortis? De floribus meis dicebam, & inuitabam, & nescio quid promittebam. O benignitatem in inopiâ! Leidæ aliqua nobis copia,

*Huc una è multis capsula me sequitur.*

Tamen veni, vide, cape. Incito te? Carmine etiam facio: sed quod à prorsâ istâ vix abit, & quale sub manu solet nasci.

**P**ETRE, iuris & elegantioris  
*Musæ candide cultor, & sacerdos;  
 Quem ni sic amo, ut hos meos ocellos,  
 Atque ut tu geminos tuos puellos,  
 Jupiter mihi perdat hos ocellos:  
 Quando ad me venies, meosque flores?  
 Namque & gestio ego ipse te videre,  
 Atque illi mage gestiunt videri.  
 En Sol purior hic, & aura Veris,  
 Pinxit, ut Babylonicum tapete,  
 Nostras areolas. veni, videbis,  
 Gaudebis quoque. namque pars eorum,  
 Herculi ut decimæ, tibi sacrata est.  
 Ecquid te traho? sed veni, peribunt  
 Illi, ni properas, tuumque donum.*

## EPISTOLA V.

*Herbipolim.*

NIC. SERARIO, Soc. Jesu S. D.

**C**VM vsurâ salutem tribui, quæ epistolam bonam & vberem ad me traxit. Ita liberalis es? tamen, non mentiar, illo pænè fine misi. Quid dissimulem? amare te cœpi, cum ob tua bona quæ ille ab alto tribuit, tum quia audiebam quod me amares. Non debuit diutiùs quasi sub cineribus delitescere hic ignis: quin, quia honestus est, exferat se, & chartarum isto adminiculo det flammam. Ergo apertè iam mi Serari, amo te, & cupio à te amari. Spem facis, aut potius fidem, ita esse: atque ego non desistam, & donec oculi isti claudentur, non claudet hic affectus. Mittamus blanda. Lecmpurium meum (ita appello. amo

amo virum, & longi molestiq; itineris mei comitem fidum) honore apud vos & titulo publicè auctum, gaudeo: & scio meruisse. In patriam iuit, vtinam labascenti illi fulcrum! quod vix spero, ita omnia non ad inclinationem spectare videntur, sed ad ruinam. Pax quàm proteruiter reiecta nuper, & illa Pindari <sup>\*νῆος</sup> *\*tranquil-*  
*χῆν φιλόφρων, δ' ἰκνῆς θυγάτηρ?* O misera, exfulat ab Europâ: quia nec *litas ben-*  
 diu sedem habitura videtur in Germaniâ vestrâ. Illi Martiales *igna, iustiti-*  
*ia filia.*  
 iterum ad suum Martem: vellem ob aliam causam, quàm istam. Sed hæc infelicitas nostri æui est, innouare, turbare, pugnare: & id specie Pietatis. In caipsâ, hortaris vt in meis refingam vbi opus, aut certè illustrem. Iamdiu statui; impediunt aut tardant partim typographi, partim quòd circumagimur, nec fiximus adhuc stabilem sedem. Scis quietæ mentis, imò & temporis, esse tale aliquod opus. Atqui conabor. & si mors præuenit, testor me alienum ab omni nouitiâ opinione aut errore, firmum in veterum scitis. Vale. Leodici, XVI. Kal. Maijas. ∞. IO. XCII.

EPISTOLA VI. *Leodicum.*

DANIELI SVSIO IACOBI F. V. N. S. D.

**V**T audiui de morte optimi patris tui, etsi ipse doleam, tamen exegi me ad te solandum. Scio quàm affligeris; & inter alias virtutes, noui tuam pietatem. Sed mi Susi, debuisse illum mori non ignoras: & si tempora, & ea quæ circumstant, aspicias; fateberis, non potuisse opportuniùs mori. Æuum pessimum, & vix in spe correctionis: vt felices meritò censeamus, & verè *μακαριστάς*, qui educti. Ipse in ætate quoque iam pessimâ, & non senex sed senior, cùm illud Lucretij locum habere incipit:

*Claudicat ingenium, delirat linguaque, mensque.*

Itaque si vmquam etymon illud Græcorum habere fidem debet, in his talibus potest: *\*τὸ γῆρας, ἀπὸ τοῦ γῆς ἐφ' ὅν*, dictum esse. Ipsi, inquam, qui in eâ ætate, abire desiderant, extra miseras suas, & ludibria aliena. Iam quicquid optandum homini, & quæ vitæ longioris causa esse & votum solet, ipse adeptus. optimam famam, liberos propaginem stirpis, atque eos in fortunatis coniugiis, iterum ad propagandum. Alia quæ in te vidit, apud te non dicam. Optare debuit mori, in hoc sereno Fortunæ, & priusquam

*\* Senium  
ab eo, quòd  
terrâ spe-*  
*ctet.*



nubes aliqua offuscaret. Addo, quod caput est, mortuum piè, & in sano de religione & Deo sensu. Itaque ne mortuus quidem, sed terra hîc relicta & terræ reddita; ipse immortalis in cælum migravit, ad immortalem illum patrem. Hæc te solentur. nec absentiam eius cogita, quin vnà vbi sit cogites: & si pius es, in æterno eius gaudio gaude. Facturum te confido, & habes qui quod ego breuiter & aridè, copiosè & vbertim tibi instillent: inter eos, Delirium nostrum. Animum tamen meum vides, quem scito in amore tui esse & fore firmum. Louanij, vi. Idus Decemb.  
∞. IO. XCII.

## EPISTOLA VII. *Antuerpiam.*

LAEVINO TORRENTIO *Episcopo.*

**A**DOLESCENTES eos vidi, quos per epistolam mihi commendas: nec frustrà. Quid enim tu à me frustrà? quin ita promptè volo, & debeo, quidquid voles, vt admoneri modò debeam, non rogari. Et sanè in istâ re litterariâ, libens etiam officium confero; quia censeo in publicum me impendere, quicquid ad culturam facit nostratium ingeniorum. Paucos per hæc bella, omnino paucos, ad artes nostras adspirare non ignoras: & cò magis prouehendi sunt, si qui adspirant. Quæ enim resp. tandem futura, si veteres, vt sic dicam, arbores excidantur aut concidant, nouellæ stirpes non depangantur in earum locum? Vastitas profectò, & tenebræ, & boni honestiq; inscitia, &, quod sequitur, contemptus. O vir magne, si plerique, qui ad remp. sedent, hæc tecum iuxtà intelligant! maior certè honos aut cura esset eorum, qui has artes profitentur aut ornant; nec sic iaceret hæc ipsa (Louanium dico) earum sedes. In quâ, præter veterem nominis dignitatem, quid pænè reliquum? nec publicis opibus, sed famâ suâ dixeris eam stare. Et tamen stabit, nisi vniuersa ruina patriam hanc inuoluit: à quâ nonnullus mihi interdum metus est, euentus istos improsperos, & magis caussas eorum intuenti. Sed benignus ille Deus, semper nostri tutor, auxiliabitur: qui te quoque Reu<sup>me</sup> in C. P. seruabit Ecclesiæ suæ & Reipub. fulcrum. Louanij, iiii. Idus Sept. ∞. IO. XCIII.

EPISTOLA VIII. *Dolam.*

CLAUDIO FROSSARDO A BROISSIA S. D.

**A** MOREM ego, non audaciam interpretor, mi Claudī, quòd ad me scribis. Et si enim varij interpellant, & verè dicam, melior diei pars scriptiunculis perit: tamen numquam mihi graue, capere aut reddere litteras ijs, qui tui similes, in virtutis & doctrinæ viâ recto cursu pergunt. Est etiam naturâ insitum, ut a meminis faueamusque ijs, quos putamus operâ nostrâ meliores, aut instructiores. quo in numero censere te non desinam, qui aliquamdiu cum affectu & industriâ nos audisti. Et nunc patria tua te habet, magis loco alio quàm animo, uti confido; & pergis haud dubiè in ijs, quæ benè cœpisti, & extrues ædificium, cuius iacta iamdiu fundamenta. Deus faciat. & (ne aliò te mittam) pater tuus, vir magnus, tibi sit in oculis, quem ad culmen hoc honorum eaisp̃a studia artesque duxerunt, ad quas te vocamus. Vixi ipse olim in eâ vrbe vestrâ, sed non longum: & specimen etiam tunc aliquod publicè dedimus ingenij, aut facundiæ, siquid in nobis erat. velim scire, ecquid schola nunc floreat? vereor ut minimè, cum motus, si non vestros, vicinos tamen video, & Martem ac Bellonam vbique in pretio magis, quàm Phæbum aut Musas. Istę vices rerum sunt, & magnus ille gubernator, modò temporum lenem aliquam mitemque æstatem inducit; modò asperam turbantemque hiemem. Ferenda omnia, & expectanda ac votis expetenda meliora. sed vita in primis: quæ si emendata, profectò hæc quoque breui emendentur. Vale mi Claudī, & Amplissimo parenti tuo officium & salutem meam defer. Louanij, VII. Kal. Febr. ∞. IO. XCIII.

EPISTOLA IX. *Vratislaviam.*MATHAEO WACHERO *Cancellario Silesiæ* S. D.

**S**i à frequentia scribendi animum meum æstinas & amorem; malè audiam necesse est, & deseruisse videbor militiæ huius signa. Quod non ita est, spondeo: sed laxat me, & velut comineatum aliquem liberiores dat, valetudo. Pares non sumus, quod apud te profiteor, reponere tot epistolis, quas vndique &

que & assidue missas lectitamus. Tamen vos mihi pauci illuc eximij; & ipsa cessatio etiam habuit causam, vt in occasione te affarer. Ecce data est, scribo, & vnà libellos de C R V C E mitto. Titulus magnum aliquid spondet: tractatui autem stilus noster fortassè non respondet. sed vos legite, & quod amicorum est, iudicate, atque etiam indicate. Amo admoneri. De filio, quod postremis litteris consilium meum quæsieras, nunc dabo: etsi ex ipso silentio videre potuisti, quid sentiam. Nam si mittendum huc iudicasssem, certè respondisssem & id scripisssem: non placuit, ne nunc quidem. quid ita? non quin iucundum esset, tuum aliquem, imò te ipsum quodammodo, hîc habere; sed quia omnia bello etiam iacent, nec est vetus illa schola quæ fuit. Exteri non conueniunt, ob viarum discrimina, & quia in vicino hostis. Qui Louanij iam agimus, nihil mentiemur, si in liberâ quâdam custodiâ nos agere dicemus. Vestigium extra urbem tutò non ponimus, & illa prata, campi, siluulæ, calcantur aut adeuntur raro pede. Cur igitur nos ipsi hîc agimus? quia alia nostra ratio à iuuentute. Quiescere nobis propositum; illis discere, tutò agere & iucundè. denique hæc patria mea est, & incommoda etiam eius meritò fero. Vt parentis aspera aliqua verba, filius patienter audiat, extraneus aspernetur: simile hîc esse dicam. Mollit etiam, quòd Rex & Ordines honestè me & benignè habent. Sic agimus mi Wachere: vt apud te omnia benè & votiue, idque in longum, Deum equidem rogo. Louanij, Nonis Feb. ∞. 10. XCIII.

## EPISTOLA X.

Bruxellam.

IOANNI DRENCKWAIRTO, *Thesaurario supremo Regio.*

**H**ARTIVM dimittere sine litteris nolui, illū Hartium in amore vtriusque nostrū. Et quod me in tuo esse voluisti, gratias habeo, & in animo agnosco. Non fallunt me aut verba tam benigna, aut ipse vultus, affectus tui index. Habeo, inquam, gratiam, & debeo: atque vtinam in me sit, quo foueam honestum istum ignem! Quod quidem petebas à me nuper, de adulescente aliquo, quem ad manum & honestiora munera haberes, qui esset ex meâ institutione: hoc ipso quid de me sentias video, & statim dedi operam, vt effectum darem. Scripsi ad quemdam,

dam, qui nunc Mechliniæ; sed frustra, quia fides eius alteri iam obligata. Putabam tamen illum aptum futurum, ingenio, doctrinâ, moribus. Sed de alio cogitabo & dispiciam, si erue ali-  
cundè possim. Nam bonâ fide, eiusmodi adolescentum copia rara est, qui cum litteris Modestiam sociant & Virtutem. Sunt qui in illis aliquid possunt; sed ferè iidem vani, elati, & mores de-  
mutant. Scio te vtrumque velle, & à literaturâ modicè instru-  
ctum, & à moribus vel maximè ornatum. Sicut arborum illæ optimæ, quæ non florem solùm, sed fructum ferunt: sic homi-  
num, quibus præter ornamenta doctrinæ, vita etiam est ad fru-  
gem. Sed cùm de fructibus, tibi quoque agendæ gratiæ, qui alti-  
les opimos carduos ex horto tuo submisisti. Quid remitto? ani-  
mum ferio semper tuum. Louanij, XVII. Kal. Sextil. ∞. 10.  
XCIII.

## EPISTOLA XI.

*Antuerpiam.*

ABRAHAMO ORTELIO S. D.

**D**ISSEREBAMVS nuper, vt scis, in mensâ apud Antistitem nostrum de Gestatione: & erat qui fortiter negaret in es-  
sèdo eam fuisse. Contrâ tendebam, & sciebam: sed non per-  
tendebam, vt meus mos est, & vincar in talibus citiùs quàm pu-  
gnem. Itaque altercationem desij; abeunti tibi & requirenti  
obtuli, scripto me consignaturum, quod eius rei esset. Feci lar-  
giter, & totum hunc ritum explicatum, & in oculis ecce habes.  
Videbis, iudicabis, me amabis. GESTATIO veteribus Roma-  
nis crebro, vel assiduo potiùs in vsu, exercitij & valetudinis gra-  
tiâ: idque ferè sub balnei aut cænæ tempus. Quia, inquam, ex-  
ercitij: ideo Glossæ veteres explicant *Gestationem*, γυμνασία: itém-  
que, *Gestatorem*, γυμναστήν. Sed laxum est, & finem rei, non rem  
dicunt. Pressiùs meliusque eadem alibi: Αἰώπα, *Gestatio*. &, Αἰωπί-  
ζετα, *Gestatur*. Id verum est. & latio omnis aut vectatio in naui,  
lecticâ, curru, venit in hoc nomen. Celsus per partes explicat li-  
bro II. in Capite proprio, *De Gestatione*. Genera, inquit, *gestatio-*  
*num plura. sed tamen leuissima est naui, vel in portu vel in flumine: ve-*  
*hementior in alto mari, vel lecticâ aut scamno: acrior vehiculo.* Omit-  
to illas in aquis, in terrâ igitur triplex est: Lecticâ, Scamno, Vehi-  
culo.



\*In r. Ele.  
tor.

culo. De Lecticâ, notum est, & \* alibi explicauit: Scamnum quid est? dico idem esse, quod Sellam. Nam in Lecticâ iacentes ferè vhebantur; in Sellâ sedentes, ideoque & Scamnum dixere. Haud sæpè legas, sed in Iuuenalis Scholiastæ veteri, huic sententiæ firmamentum repperi. qui vbi Iuuenalis dixerat,

—— *stratâ positus, longâque cathedrâ;*

interpretatus est, *Cervicalibus stratis, Scamnum dicit.* Ergo eo auctore, idem Scamnum quod Cathedra siue Sella. Hæc est quæ *Sella gestatoria* Suetonio dicitur Neronis cap. x. Vitellij xvi. De duplici isto genere, iunctim ita Seneca De breuitate vitæ: *Ne illos quidem inter otiosos numeraueris, qui Sellâ se & Lecticâ huc illuc ferunt, & ad Gestationum suarum, quasi deferere eas non liceat, horas occurrunt.* De scamno idem, epistolâ lv. *A Gestatione cum maximè venio, non minùs fatigatus, quàm si tantum ambulassèm, quantum sedi. labor est enim diu ferri.* Posset quidem hoc & ad Vehiculum aptari; sed de Scamno verius, quia dixit, *Ferri.* At tertia est in Vehiculo siue Effedo. & communiter valdè sic utebantur, & hanc maximè intellegebant. Suetonius Vespasiano: *Post decisa, quæcumque obueniebant, negotia Gestationi, & inde Quietì vacabat.* Eadem enim illa quasi interpretans Aurelius Victor: *Pòst autem negotiis, quæcumque obuenissent, auditis, exerceri Væstatione, deinde requiescere.* Idem Suetonius Galbâ: *Ne ad gestandum quidem vñquam aliter egressus* (ita hæc legerim) *quàm vt proximo vehiculo secum decies Hs. in auro efferret.* Significat, sic timidum an cautum fuisse Galbam, vt numquam vel leuiter domo egrederetur, etiam ad Gestandum; quin secum altero & sequente vehiculo, decies illud Hs. quasi subsidium fugæ (si interuenisset) efferret. Nec sanè quidquam in eâ lectiōne mutandum est. Seneca de peruerso illo Spanio, epist. cxxiii. *Quæro circa horam noctis octauam, quis sit ille rotarum sonus? dicitur velle Gestari.* Manifestè dat rotas: ergo effedum fuit. Sic Martialis:

*Illic Flaminie Salariæque  
Gestator patet effedo tacente,  
Ne blando rota sit molesta somno.*

Suetonius de Claudio: *Solitus etiam in Gestatione ludere, ita effedo alueoque adaptatis, ne confunderetur ludus.* In effedo igitur, subiungit equis, aut mulis: & quis vltra neget? Sanè mulos. Iuuenalis adfi-

adsignat, versibus mox dandis; equos Martialis, in istis:

*Gestatus biungis Regulus esset equis.*

Quia autem crebra, imò alsidua hæc Gestatio; curæ fuit, ut locus esset in vrbe aut villis duplex, Apertus & Tectus. Ille in æstate vsui; hic hieme. Et apertæ quidem Gestationes non nisi \*arboribus clauderantur ad latera, plerumque infructuosis, & quæ speciem modò haberent. Vlpianus de Vsfufru: *Et si fortè voluptate fuit prædium, viridaria vel Gestationes, vel deambulationes, arboribus infructuosis opacas atque amœnas, non debet deijcere.* Plinius lib. 11. Epistolar. *Gestatio buxo aut rore marino ambitur.* At tectæ, porticibus clauderantur, opere & manu factis. Vtrumque genus Iuuenalis tetigit, Sat. 1111.

*Quid refert igitur, quantis iumenta fatiget*

*Porticibus? quantâ nemorum vœtetur in vmbra?*

Nam priora palàm ad porticum Gestatoriam, in quâ essedo cursus. Et posteriora explicat Scholiastes, *Viridaria, vbi solent Gestari.* Iterùm de Tectis, idem Sat. VII.

*Balnea sexcentis, & pluris Porticus, in quâ*

*Gestetur dominus, quoties pluit. ænne serenum*

*Exspectet, spargatque luto iumenta recenti?*

Atque eæ Porticus, fortassè & Viridaria, plerumque rotundæ, & in orbem ibant. Quare? quia in exiguo spatio scilicet, amplior ita vœtatio, continens & recurrens. Plinius indicauit, cùm dixit: *Rore marino ambitur.* Ergo Ambitus fuit: & clariùs inscriptio hæc marmoris, vbi & magnitudo Porticus expressa:

GESTATIO

CIRCINI. EXTERIOR

A DIAETA. APOLLINIS

AD. DIAETA. EANDEM

IN. CIRCIVITV. P. ∞. CC.

LXXVII.

Has tales, ditiores etiam in ipsâ vrbe habebant, suisq; domibus. nec Martialem aliter exaudio, lib. XII. ad Sparsum quemdam:

*Et rus in vrbe est, vinitorq; Romanus,*

*Intraque limen clausus essedo cursus.*

Non aliud quàm Gestatio clausa tectaque est: eoq; non placeat rescribi, *latus essedo cursus.* Noto denique, solum ipsum in his arte

factum & duratum fuisse leuiter: vt & concussio leuior esset, nec rotæ inæqualiter imprimerentur. Plinius in laudibus suburbani Comensis, lib. i. Epist. *Quid Euripus viridis & gemmeus? quid illa mollis, & tamen solida Gestatio?* Nam pro ipso loco accipit, vt superiora aliquot exempla item euincunt. Hæc veteres, & pro bono valetudinis, quod res ipsa dicit. Plinius item, lib. xxviii. *Inprimis verò prodest (valetudini) Ambulatio, Gestatio, & ea pluribus modis.* Seneca commendat, epist. xv. *Gestatio & corpus concutit, & studio non officit. possis legere, possis dictare, possis loqui, possis audire.* Et de concussione illâ distinctiùs, epist. lvi. *Mibi tamen opus erat concutere corpus, vt siue bilis insederat faucibus, discuteretur; siue ipse ex aliquâ causâ spiritus densior erat, extenuaret illum iactatio.* Sanè litteratorum, & qui menti operantur, exercitium illud sit: doleo periisse, aut certè per mores siue opes à nobis non vsurpari. Tu vale mi Orteli. In Musæo nostro, prid. Kal. Iul. ∞. Id. xciv.

## EPISTOLA XII.

Bruxellam.

OTHONI HARTIO. 1<sup>to</sup> S. D.

**E**N, mi Otho, ad nostrum Thesaurarium, (quidni nostrum? ego hercules corde veneror & amo) en inquam, de re quam commisit. Iuuenis de quo dixeram, & qui initio excusauerat, nunc paratus videtur, & rumpet vinculum quod ligabat. Scripsi igitur, & exspecto quid videatur. Si arcessi eum placeat, & coram conspici atque audiri; hoc approbem, ne vnus mei suffragio admittatur. Confido equidem fore, qualem volumus, & esse in eo quæ volumus; sed vos quoque diiudicare, quid nocet? imò id opus est, & decet. Rescribe verbo, non longos logos, auocor, & fabri mei strepunt. Adfirmo tibi, per læuam hanc occupatiunculam iacere studia, & interiores litterulas nostras. Sed non diu me tenebit, abi ædificatio, meam imminuis, res tuas tibi habe. Vale. Louanij, vii. Kalend. Sept. ∞. Id. xciii.

EPI-

EPISTOLA XIII. *Bruxellam.*IOHANNI DRENCKWAIRTO, *supremo Regio Thesaurario.*

**Q**UOD agere cœperam cum adolescente illo Batau, ut operam daret tibi in scriptione, & alio ministerio honesto, et si initio remora aut impedimentum fuit, tamen videor peregrisse. Peregrisse inquam, quod ad ipsum attinet: qui iam inclinat, & expecto voluntatis tuæ nutum. Si ita sedet, mittam ipsum ad te ut videas, explores; & transigas etiam, si approbabis. Equidem falli possum, sed moribus, industriâ, & mediocri doctrinâ, spero sustinere meam & tuam expectationem posse. Honestus inter suos est, & natus è Persinis: sed pietas & religionis studium (ama causam) amouit eum è patriâ, ubi parentes quoque sunt inter planè probos. Cetera, Vir Ampl<sup>me</sup> tuo iudicio relinquo, quod certum mihi est acere esse & rectum. Verbo si rescribis, mittam eum ad te, & Mechliniâ euocabo, ubi nunc agit. Ampliss<sup>me</sup> & Nobil<sup>me</sup> Domine, diu reip. regi, & nobis, salue. Louanij, VII. Kal. Sextil. ∞. ID. XCIII.

EPISTOLA XIII. *Antuerpiam.*

CORNELIO PRVNIO V. C. S. D.

**E**VGE, euge benignitatem tuam! qui munera ad me mittis, non plenâ manu aut sinu, quod dicitur, sed toto curtu. Faberbor tibi, velut ictu laticia percussus sum, cum vidi: & hortor perpetuum emblema & ornamentum in se iisti, quo maximè egebat. Nam florum aliquid, fruticum istorum nihil habebam: ut munus tuum non magnitudine solùm (verè tale est) sed opportunitate mihi sit gratum. Fecisti quod scripseras, & Ditem patrem ab inferis excitasti, qui non florilegam Proserpinam, sed Floram ipsam raperet & Pomonam. Amo amo te, etiam cognatum tuum *Dilfium*, qui tam promptè, tam benignè, hoc curauit. Quid autem ultra dicam? etiam illud, pœnitentiam iam agere impudentiæ meæ incipiebam, qui sic confidenter postulassem, quod ipse non haberes. Sed næ ego pœnitentiæ illius magnam nunc pœnitentiam ago, cum successum video, & ius mihi hoc fuisse in candidissimo tuo amore. Enimvero, mi Pruni,



ferrea hæc sunt tempora, liceat etiam uti interdum ferreâ fronte. Etsi mollis ea mihi per naturam est, sed sic desiderium & cupiditas indurat: qui auidè ista hortensia appero, auocamenta non à studijs solùm, sed à curis. quas tempora hæc assiduè & vbertim gignunt. Quibus etsi non tollitur lumen illud, ut sic dicam, mentis: tamen interdum offuscatur, & velut nubeculâ serenitatem eius subducunt. Tu verò accumulas etiam beneficium, & de fenestris in nouâ domo iterum offers. Accepi & accipio, fenestras inquam: & duas nomini tuo inscribam. Te autem ipsum V. C. in hoc pectore, è quo nulla dies euellat. Louanij, III. Kal. Oct. ∞. IO. XCIII.

## EPISTOLA XV.

*Ingolstadium.*HYBERTO GIFFANIO *Jcho* S. D.

**C**VM Francofurti te vidi, & magis cùm audiui, decretum mihi certò amicitiam tecum colere, quam etiam colo. Nihil in animo remisi, etsi in scriptione fortasse aliquid fuit, variâ vel culpâ vel causâ. Culpa quidem in ijs, si qui meas (bis enim scripsi) aut non reddiderunt per negligentiam, aut per malitiam suppresserunt: causâ etiam in me, quem occupatiunculæ, & valetudinis infirmitas recidere cogunt & imminuere totum hoc genus scriptionis. Sumus Louanij, docemus, ædificamus etiam: an non bono magnoque animo, inter medias res aduersas? Litteris quidem quid hîc fiat, per te intellegis, nec pueros Musarum nunc in pretio, sed Martis. Apud vos aliter, & video Germaniam totam excoli, & fugitiuas è Gallia artes sedem figere illîc. Longum ita sit, nec magnus ille hostis quietem istam turbet, qui in limite, ut audimus, assultat. Ego ab Italis variè vocor, Pisas, Patavium, Mediolanum: tenet patria, à quâ tamen vel inuitus auellar, si possidet & mancipio habet eam Mauors. De Ic<sup>tis</sup> quod requiris, nihil mihi nunc in promptu: sed nec otium nostra dispiciendi. Militia me exercet, sed vetus illa Romana: & cœpta iam est cudi. Tu quid agas, quâ agas, & fatin' ex voto tuo illîc & merito, velim scire: & te ætatem valere. Vale V. Cl. Louanij, Idibus Nouemb. ∞. IO. XCIII.

## EPISTOLA XVI.

CAROLO CLVSIO S. D.

**A**RGVMENTVM te scribendi non habere, & tamen scribere, certè amoris est argumentum mi Clusi. De quo inter nos ambigere quî possumus? inueterauit iamdiu, & vt annosa arbor,

—*quantum vertice ad auras*

*Æthereas, tantum radice ad tartara tendit.*

Sed mitto blandiri. Germanum nobilem, te mysttagogo, in amicitia nostræ ædem recepi: & vt tua elogia sunt, non eam maculabit. Valetudinem tibi in hac ætate satis validam esse, gaudeo, & diu talem precor: de meâ quod quæris, ambigua est, & vt cum nostro Comico, magis varia quàm panthera. Torâ quidem hac ætate aduersa fuit: sperassem meliorem, si Aquis Spadanis vti mihi per terrores vestros licuisset. Videbo quid in proximâ erit, si tamen Deus & hanc dabit. Tu mi Clusi salue, & hunc ineuntem annum atque alios felix vide. Louanij, III. Kal. Ianuar. ∞. IO. xcv.

## EPISTOLA XVII.

*Leodicum.*GVILIELMO BEECKMANNO I<sup>re</sup> S. D.

**N**VPER admodum litteras tuas accepi, & hauebam iam nunc respondere, sed muliercula elapsa mihi celerius opinione fuit. In morâ nihil intertrimenti: animus in te est quisuit, imò addo qui crit: id est, iudicio & affectu tui amans. Iudicium meum meruerunt cùm alia in te, tum modestia: quæ numquam me fefellit radix esse & altrix virtutis & veræ famæ. Oculi & animus mihi sæpè dolent. cùm aliam iuuentutem istam video, proteruam, lubricam, vanam; & id in laudabilium omnium rerum inopiâ, aut raritate. At firma & bona mens, vt ager post quietem, fructus promittit vberes, & non fallaces. In eâ re vtinam contulerit, aut conferat aliquid, consuetudo vel auditio mea! Scio optare, & non minùs tibi fauentem, quàm tuos esse. Tu autem non speras tantùm, sed iactas, & inuidiosum exemplum adfers Alexandri & Aristotelis: quod non agnosco, & scio esse super fortem

sortem nostram. Affectum tamen tuum agnosco & amplector, nec nolo sic errare leuiter, qui doctorem me habuerunt, aut habent: hoc fine, vt ardentius amplectantur aut perseuerent, quæ præscripsi. Duxisse enim & præiuisse ad bona me spero, & porrò volo mi Beeckmanne, vbi occasio aut facultas erit. De Oratio iam olim meo, spondere ausim, quòd te amabit, iuuabit, pro copiâ suâ & Genio temporum: nec vltra te scio velle. Ego hoc vnum à te, vti me ames, & fratri tuo Canonico affectum hunc à me nuncies cū salute. Louanij, post. Non. anni noui ∞. 10. xcv.

## EPISTOLA XVIII.

*Ariam.*

FRANCISCO MODIO S. D.

**G**RATVLOR rediisse mi Modi, gratulor, & animi mei voto tibi adsum. Quando ad nos? inuise veteres tuas sedes, veteres etiam amicos: reperies & affectus veteres, nec temporum aut locorum interuallo mutasse. Ille quem amare me inuito solebas (liberè dicam) abiit

*Illuc, vnde negant redire quemquam.*

Sed abiit & noster ille Victor, ingenio dissimilis, & totus puritas, candor, fides. Rogas de meis studijs. quid si iacere ea dicam, per tempora parùm ijs amica? nec mirum, nec iniquum dicam: tamen, vt possum, erigo, & pars altera Militiæ me habebat. Machinas & instrumenta eius tractabam. O me vel in turbis beatum, quòd animum abduco, & his oblectatiunculis pascō!

—— *nihil amplius oro*

*Maia nate, nisi vt propria hæc mihi munera faxis.*

Eodem te, mi Modi, voco. nec ad elegantia illa solùm, sed sapientia studia: quæ & æuo huic, & ætati tuæ maturiori, sint apta. *Satis multum temporis sparsimus*, ait ille, *incipiamus in senectute vasa colligere*. In freto viximus, moriamur in portu. Fac, fac ô ad alta natum ingenium! & semper sic sensi de te, & magnum spondi. Quod autem in extremo me rogas, siquid in Cæsareos scriptores habeam, communicem: parare te eorum editionem: ecce subiunxi. & amplius dico, siquid in aliâ re iuuare te, etiam re meâ possim, pete, & puta factum. Louanij, viii. Kal. Febr. ∞. 10. xcv.

In Vul-

In Vulcatij Cassio scribitur:

*Enumeravit deinde omnes Principes, qui essent occisi. dicens meruisse Neronem, debuisse Caligulam, Othonem & Vitellium nec imperare voluisse. Nam de Pertinace & Galbâ paria sentiebat, cum diceret, In imperatore auaritiâ esse acerbissimum malum.*

Mirum de Pertinace hîc dici, & illum Galbæ etiam (quanto post Galbani?) præponi. Sed magis mirum, hæc ab Antonino Imp. dici, qui Pertinacem antecessit. An ille de morte eius si forte diuinavit? Putarem, de *pertinaciâ* Galbæ. & propriè significat vel tenacem nimis fuisse; vel & peruiacem in proposito non largiendi. Spartianus videatur eâ voce sic vsus in Seuero: *Cognomen Pertinacis, non tam ex suâ voluntate, quàm ex morum parcimoniâ videtur habuisse.* Nam Pertinacem & Parcum æquiparat. Sed videndum ne ibi verius (ex sententiâ) *morum acrimoniâ*. Sic Capitolinus, in Albino: *Cum suis numquam cenauit, vel propter vinolentiam, vel propter morum acrimoniam.* Lampridius in Alexandro:

*Aulicum ministerium contraxit. ita ut annonas non dignitatem acciperent, fullones, vestitores, pictores, & pincernæ, omnes castrenses ministri.*

Itane Castrenses ministri cum Aulicis hîc miscentur? atque adeo pincernis & id genus iunguntur. Vide num, *gastrenses*: τραπεζῶν γαστέρα. qui, inquam, ventris ministri sunt. Ita Ammianus libro XXV. *Hyperochum antehac rectè gastrensis ministerium, id est ventris & gutturis.* An placet *secta gastrensis*? sed vox compâret. In Festo est: *Mugger dicitur à castrensum hominibus, quasi mucosus, qui talis malè ludit.* Suspiciabar & hîc, *gastrensum*. quid enim talis, cum castris? qui illinc, vulgò certè, exfulabant. Atqui vulgi hoc verbum. Si tamen retines; tum placeat *telis* legi: & sic dictum ioco militari, qui in cottidianis proludijs siue exercitijs tela ignauè & languidè mitteret. In Lampridij Heligabalo:

*Vt ex totâ penitus vrbe atque ex nauticis monobelos quærerent. sic eos appellabant, qui viriliores videbantur.*

Causam eius nominis haud assequor satis, nec nimis scrutor: sed mihi clarius esset, *onobelos*: quasi a sinino telo insignes. Ita Commodus hominem habuit magnâ prominentiâ, quem *Onon* appellabat. In Capitolini M. Antonino:

*Cum egrotare cœpisset, filium aduocauit, atque ab eo primum petiit,*



*ut belli reliquias non contemneret, ne videretur Remp. prodere. & cum filius ei respondisset, cupere se primum sanitatem, ut vellet, permisit; petens tamen ut exspectaret paucos dies, aut simul proficeretur.*

A sententiâ corrigere admoncor, *cupere se primum civitatem.* Pater quidem filium Commodum hortabatur belli reliqua conficere; sed ille ad urbem adspirabat, quasi illuc imperium firmandum, & sedes eius occupanda. Sed reuera deliciæ & luxus eum trahebant: quod ex Herodiano discas, quem hîc vide. In sequentibus etiam lego: *ut unâ proficerentur.* Cùm vidit pater decretum ei ire; permisit, inquit, rogans tamen moram aliquam post suam mortem, ut nempe funere factò, urnam paternam & reliquias secum ferret: atque ita *unâ proficerentur.* In Vulcatij Cassio:

*Scis enim ipse, quod Maiestatis hac natura est, ut videantur vim pati, etiam quibus probatur.*

Sunt verba ex ipsâ epistolâ Marci ad Verum, sed emendanda, etiam quibus parabatur: vel, & à quibus. Dissuadet Marcus puniri Cassium, etsi affectati regni & (ut loquebantur) Maiestatis suspectum. Caussam dat, quia egrè persuaderetur alijs, quemquam hoc tentasse: & vim, inquit, atque iniuriam passi videntur, qui ipsam parabant. Hoc est, quod subiicit: *Non credi Principibus de affectatâ tyrannide, nisi interfectis.* In Capitolini Maximo & Balbino:

*Maximum igitur atque Balbinum, quorum vnus in re militari tantus est, uti nobilitatem generis splendore virtutis allegerit; alter ita clarus nobilitate est, ut & morum lenitate reip. sit necessarius.*

Constat maximum istum è nobilitate non fuisse: atque ipse Capitolinus mox addidit: *Maximo pater fuit è plebe.* Itaque legendum: *ut ignobilitatem generis splendore virtutis texerit:* aut si quis mauult, *alluxerit.* In Spartiani Hadriano:

*Omnibus Hispanis Tarraconem vocatis, dilectumque ioculariter (ut verba ipsa ponit Marius Maximus) detrectantibus.*

Imò tota hæc res iocularis non fuit: seriò actum, & puniti mox detractantes. Scribam ego: *populariter detractantibus.* In Lampridij Alexandro:

*Historicos eius temporis legant, & maximè Acholium, qui & itinera*

*itineræ huius Principis scripsit.*

Conuenire magis censebam, qui & intima. Iterum in Lampridij Alexandro:

*Antonini nomen suscipi mereatur, Senatus Antonini mereatur.*

Verius: *suscipe. Mereatur Senatus, Antonini mereantur.* Ohe, satis hæc funto. μη κόρη ἐλθὼν κνίσσῃ, ait Pindarus. Vale.

## EPISTOLA XIX. *Leodicum.*

P. LEONARDO LESSIO, *Theol. Soc. Iesu S. D.*

**F**ONTES & ego te expectamus. Quid venisti ut sic abires, confors discriminis tantum, & vix fructus? Redi cum bono Deo, ille aderit & securitatem dabit, fortasse & sanitatem. Turba quidem hinc nunc exigua, sed crescet: & illi ipsi qui Limburgi sunt, & vibices vinculorum adhuc gestant, illi, inquam, redeunt, & sperant meliora. Post latrocinium recens, viæ turtiores sunt, post tempestatem ferè serenitas: nobis, post periculum & fugam, quies & securitas adsint. Principi Electori qui à consilijs sunt, polliciti mihi tutelam, & nostri curam: nihil tamen adhuc factum cuius fructus appareat, & in oculos incurrat. Salue mi Pater, & tecum Smithus. Quandocunque venietis, cænulam vobis paratam apud me scitote, ex legibus Spadanis, tenuem, frugalem, cum fame dimissuram. Spadæ, IV. Idus Iulij ∞. IO. XCV.

## EPISTOLA XX. *Antuerpiam.*

IOH. BRANTIO, *Graphiario S. D.*

**I**N ipsâ tristitiâ tuâ & luctu super paternâ morte, gaudium aliquod mihi fuisse, non possum mi Branti negare. Non quin dolori mihi dolor tuus fuerit, & serio fuerit: sed quod memoria mei in illi ipso adhuc actu apud te fuerit, & binis tuis litteris me compellaris. Benè factum, in tali sorte exprimit se animus & clarè ostendit quos habeat inclusos. Itaque hoc ipso video valde me à te amari, quod cogitationem & scripta etiam ad me mittas, & tacitè solatium aliquod petas. Utinam dare possim, ut volo, mi Branti! si non pulsus dolor tuus, certè fractus esset, & talis à quo periculum non esset viro forti. Et si cur ego

dem? te ita cū video, nihil opus: qui & legisti hæc omnia, quæ dici possunt & solent, & excerpta eorum quædam in epistolâ tuâ vtiliter sparsa cerno. Duo quidem sunt, quæ solari te maximè debent. & communis illa lex, quam fatuus est qui non cogitat, **DEBVISSE MORI**: & quòd indulgentiâ quâdam & benignitate diuinâ diutissimè eo fruitus es, & præter communem morem. Ad extremam ætatem parens ille tuus venerat, vidit in plerisque liberorum, quæ voluit: te coniugio, prole, officio florentem: quid vltra ei gaudij accedere potuit, imò quid non doloris? **Ætas** illa pessima subiecta tot incommodis, ætas hæc publica tot vitijs aut cladibus: vt nihil nisi misérias propagari illi voluerit, qui vitam. **Votis, votis** prosequendus est cū abiit mi Branti, vt felix iter & ad supera illa ierit; non querelæ interponendæ, nec reuocandus ad humum & misérias humanas. Quas qui recto oculo intuetur & diiudicat, proh Deus quid in vitâ eum teneat aut iuuet? Sed fatui ita plerique & terreni sensus sumus, vt viuere tantum vt viuamus iuuet, & quia innatus aliquis metus est à solutione & morte. Tolle hunc, vitæ suauitatem sustuleris; & vereor vt plerique faciant, quod ille qui Platonis Phædone lecto prope-  
rauit ad spontaneam mortem. Hęc & talia meditanda mi Branti: non dilato, quia & scire te scio, & spero usurpare. Nos Louanij iterum sumus Spadâ reduces, & penè in Bataviâ reduces, vt vis fuit & insidię hostiles. At Deus tutatus est, & velut nube me velatum ab ijs texit. Vbi dixi, v. Idus Sextil. ∞, 10. xcv.

## EPISTOLA XXI

*Leodicum.*PETRO ORANO *Ido.*

**B**EKEMANNVS ad vos venit, quem litteræ meæ non tam conciliant, quàm ostendunt. Vidisse eum & nouisse, amare est: ita sunt mores & ingenium adolescentis, addo & doctrinam super hanc ætatem. Doctrina autem ipsa melior politiorque est: in Iure vestro sine sordibus aut scabritie, denique & à Græcis fontibus hausta. Siue erit apud te in contubernio, siue crebrò veniet, benignus ei meâ causâ esto; & tua audacter aperi, non priuati consilij solum, sed & publici. De fide, & arcani patientiâ, spon-  
forem me cape. Filium tuum hîc erudiuit in Iuris rudimentis  
diligenter

diligenter & libenter : qui filius adhuc benè valet, & se gerit, spero & semper. Vale mi Orane. Louanij, prid. Kal. xbres, ∞. IO. xcv.

## EPISTOLA XXII.

IOANNI DRENCKWAIRTO, *Theſaurario ſupremo Regio.*

**C**VM ipſa liberalitas Fontani Comitſ mihi grata eſt, tum gratior te nunciante. Quid poteſt benignius, à tali viro? & affectu proſectò in me oſtendis, quem animo æſtimare magis & pendere poſſum, quàm ſermone promere aut linguâ. Quid autè gratias tibi agam? nec veteres quidem exſolui, & iam nūc tacitus mihi morſus eſt, quòd pro nupero beneficio pecuniæ annumeratæ, nihil feci aut dixi, quo internam hanc gratitudinem teſtarer. Certè enim ea in animo eſt, crede Vir Ampliſſime; & inter omnes Belgarum proceres, tibi fatemur nos obſtriectos. Age, quæ benignitas tua eſt, amare imò & curare (ita enim facis) me perge: non quò magis tuus ſiam, quod vix poteſt, ſed quia generoſis animis ita inſitum eſt, beneficia ſua amare. Amp. & N. D. Regi & Reip. vale. Louanij, prid. Kal. Decemb. ∞. IO. xcv.

## EPISTOLA XXIII.

IOANNI DRENCKWAIRTO, *Theſaurario ſupremo Regio.*

**Q**UOD iamdiu inſueui, id facio; & cùm auxiliij aut opis ſegeo, ad te recurro. Fiducia benignitatis tuæ, in me toties declaratæ, impellit; tum etiam, quia iſta res eſt, quæ propriè te & tribunal tuum ſpectat. Nam cum Ærario regio mihi res eſt: quæ? vt id exhauriam (iocanti dabis veniam) & ego quoque inter publicas neceſſitates, vnà cum multis, veniam petitor. Cum multis, ſed in cauſſâ remotâ & propriâ, & vt ſtipendij ſemeſtris ſolutionem impetrem, quod Rex titulo Hiſtoriographi ſui voluit me ferre acceptum. Libellum communiter ad Senatum veſtrum (ita moris eſſe audio) concepi: ſed tuâ auctoritate & gratiâ inprimis niti me fateor: ac rogo, vt pro affectu tuo veteri, Amp. & N. D. mihi conſulas, & rem hanc ex tardâ aut turbidâ expeditam reddas & tranquillam. Louanij, XII. Kalend. Sepr. ∞. IO. xcvi.



## EPISTOLA XXIII.

IACOBO MARCHANTHO S. D.

**L**IBRVM tuum & litteras vnà accepi, etsi eundem librum aliquot iam septimanis antè à Moreto, sed ita vt ipse poposcerim: nam tenebat me (vt verum dicam) auiditas videndi. Vidi, legi, & vel publicè tibi velim dare testimonium, industriæ, prudentiæ, sed & eloquentiæ, pro historico quidem modo. Illud vellem (vt omnia dicam) diffusiozem te alibi fuisse; non mihi, cui abundè hæc satis sunt, & neruosa placere solent, sed alijs, qui aut non capiunt hæc breuiâ, aut ad ea non excitantur. Cetera, in  
*\* Censores.* re accurata & inquisita sunt; nec moueat te, siquid *\* Egeras* mutarunt, aut detraxerunt. Solet olim & nunc fieri, & sapientis est publicis his iudicijs suum dare. Illud doleo, nihil benignè adhuc in te factum ab ijs, qui possunt & deberent, si mens & indoles illa vetus esset. Heu sæculum, non pro nostris artibus! & ego, quem tu in copiâ amicorum, circumfluere aliâ copiâ censēs, in me sentio: qui nihil magnoperè è studijs meis rettuli, præter nomen & famam, & ea quoque à multis calcata. Quid faciamus? quod fecimus. si rectum honestumque est ista colere, perseueremus: & præmium in illisipsis, ac fructu nostro interno, ponamus. Mihi crede, auifer ille Tagus non nobis fluit: quidquid conetur, & spem faciat amicaibi tua proles. Quam animo complector & saluto, fac tu & meis verbis, cùm scribes. Vale Vir Cl<sup>me</sup>. Louanij, post. Idus Ian. ∞. IO. XCVII.

## EPISTOLA XXV.

Leodicum.

HERMANNO MALLEANO S. D.

**B**INAS à te accepi, fateor, sed vnis tantum postremisque respondere mihi fas sit: tum quia occupatiunculæ ita suadent, tum quia in prioribus tuis nihil præter affectum in me erat, quem notum habeo, & item carum. Reponi cum pro meâ parte, semel scito. Rogas & angite significas de valetudine meâ, præfertim in hac aëris intemperie, quæ multos in valetudinarium, multos in Charonium, apud nos quoque misit. Audi quod gaudeas,

gaudeas, fatis valeo, meliusculè etiam quàm soleo: adeò in hac quoque re morbus meus singularis est, & extra leges communes abit. At horti quoque nostri rident & florent, sed subdolum, vt vereor: & proxima æstas funera nobis aut dabit, aut ostendet. Nam iam nunc esse arbitror, sed terra tegit & occultat. De otio tuo sic honesto & industrioso, gaudeo & gratulor. Perge in istis, nec Electa illa (sic appellare soleo) omitte, segetem veram doctrinæ. Qui è variâ illâ lectione nihil colligit, seponit, disponit: nugas agit, & in acceptum pauca refert. Ordo cuique suus solet esse, nec in eâ re temerè præscribam: tuum illum serua, & minora quæ occurrent, in Alphabeti seriem distingue. Sed heus, te dubitare etiam de fato Bogardi, olim hospitis tui! ille verò vixit, & dum Bruxellæ essem, ante quatuor circiter septimanas, subito morbo extinctus est. Quid nouum? homo erat, & omnia in vna voce dicta. Te valere & viuere opto, mi Malleanc. Louanij, XIII. Kal. Febr. ∞. IO. XCVII.

## EPISTOLA XXVI.

*Brugæ.*GVILIELMO MICHIELSIO *Jrto* S. D.

**S**CRIPITIO tua, quâ beniuolentiam in me abundè testaris, spergrata sanè fuit: neque tarda, vt dicis. Nam scio multa interuenire in peregrinatione & itinere, ac priusquam stabilis aliqua sedes sit, quæ mentem à tali cogitatione auocent: tam mihi excusanda, quàm illud dolendum, morbum etiam inter causas fuisse. Sed benè, quòd fuisse: & meliorem firmioremque te nunc esse, eadem litteræ nunciabant. Vtinam de matre tuâ eadem spes sit! quam ego vereor, vti hoc genus morbi est, ad lentam & certam mortem ire. Sed præcipe tale iam nunc animo, & illum firma atque erige in omnem euentum. Vitæ hoc salum, vt sic dicam, iam ingredi seriò incipis: pueritia & adolescentia tua lusit adhuc circa litus. Propone tibi & scito, multa falsa & amara euentura; sed quæ tamen voluptate aut amœnitate aliquâ summus ille Deus solet temperare. Vtraque modicè habenda sunt sapienti: hæc cum metu aliquo, illa cum spe, quia vtraque incerta, & vicibus suis mutantur. Idem in Republicâ tibi eueniet, cuius partem (& gratulor) nunc attigisti. Habeas, quæso, illam vt publicam,

publicam, & valdè nunc afflictam pro viribus erige aut solare. In eâ quoque vices videbis, & Deum nunc vindicem, nunc fauto-rem: vt vel merita nostra sunt, aut consilia eius occulta. Itaque nec in propinquo quidem naufragio eius despera. ita homini videbitur, sed ille vno nutu attollet, qui omnia nutu suo regit. De Lernutio meo, grata quæ nuncias. amo veteri & fido affectu illum virum: & tempora si alia sint (spero, breui) ita viuam, vt ipse me, aut ego illum videbo. Vale mi Michielsi. Louanij, postre. Kal. Febr. ∞. IO. XCVII.

## EPISTOLA XXVII.

Coloniam.

CAROLO VTENHOVIO.

**E**PISTOLAS crebras ad me mittis, & nouo planè genere scriptas. Nam solutis verbis cum legere me censeo, & scriptura præferat, mox versum & vincula agnosco: nec tamen vel primâ scripture me fefellisti. Ita me Musæ, Musicum & lepidum hoc genus est, & quod pauci imitentur, nec nisi quibus pectus imbutum poëticâ eâ copiâ, & stilus factus ad promendum. Mitte, mitte sæpius, & nos oblecta. Scribis de Pannonico bello, quod feruet, & quid mihi videatur. Mihi? quod Principes faciunt, benè factum, nec in consilia illa inquiri. Videtur & necessitas fuisse bellandi, cum gens illa effera sic instaret, & identidem inducias ac pacta violaret. Sempërne contemni & calcari? Et tamen bellum magnum, anceps præuideo, & cum poëtâ,

*Eheu quantus equis, quantus adest viris  
Sudor?*

imò & sanguis: nec vno alteroque prælio res ibi decernenda. De exitu tamen benè sperem, quia causa bona est: & confidam etiam, si Germani, qui fuerunt, fient. Cum bonâ veniâ gentis dixerim, ab annis centum quæ mutatio, id est inclinatio facta: in robore, in opibus, in animis: nec dixeris esse vltra Martis illos pullos, & Homeri verbo, \* θυμολέοντες. Profectò fuerunt. nec olim & Romano solum æuo, sed Caroli magni, atque infra, perseuerarunt. Ecce, in Fridericorum, Orthonum, Henricorum rebus, quàm multa egregiæ fortitudinis opera? Vnum in Friderici primi occurrit mirabile. Obsidebatur Tusculi Antistes Coloniensis

\* animo  
leonino.



nienſis à triginta millibus Romanorum, qui tunc Imperatori hoſtes. Ad opem ferendam, ceteris cunctantibus, Moguntinus progreditur, & quingentos ſuos milites, cum Caſariæ obſingentis educit. Inſtruuntur acies, ſine aſtu aut fraude palàm certatur: fuſi fugatiq̃ Itali, & ad quindecim millia ex iis caſa. Res fide pænè maior: ſed eius æui ſcriptoribus adfirmata. Neque alibi ſimilia, ſi non paria, exempla deſunt. vt iure iactare & dicere Rudolſus Auſtriacus primus potuerit: \* *Se in qualibet mundi parte, cum electis quattuor galeatorum, & quadraginta peditum armatorum de Alemannia millibus, ſtare inuictum: æſtimans hos omnem multitudinem aggreſſuros.* En robora illius gentis: quid potentia & opes? paucis indiſcijs colligendæ. Rudolſus Auſtriacus electus Imperator, cum Aquasgrani venit, coronæ cauſſâ: occurrerunt ei Dux Bauariæ, Saxoniæ, & alij cum viginti millibus equitum. Multitudinem aliam hominum ſtrata publica, vſque ad tria milliaria, vix commodè recipiebat. Poſteà deinde, in Adolphi electione: equos phaleratos habuerunt Moguntinus mille quingentos, Treuirenſis mille trecentos, Albertus dux mille quingentos: & vbi reliqua omnis Nobilitas vtriuſque claſſis? Vnus Fuldenſis Abbas ſexaginta millia bellatorum Imperatori præbebat in hoſtem. Nec in hominibus tantum, ſed in auro & argento exuberabant. Cives Friburgenſes comiti (Rudolſo) domino ſuo, pro modicâ \* emendâ, viginti millia marcarum tradiderunt. Item: Cives Columbarienſes regi Rudolſo, vno anno, librarum triginta millia tranſmiſerunt. Paullò poſt: Thuricenſes mille quingentas, Conſtantiænſes mille ducentas, Columbarienſes quingentas marcas regi Rudolſo dederunt. Columbarienſes, præter hæc, mille obſingentas libras expenderant pro cibarijs & ſeruitijs dominorum. Sed & quidam Imperatorum in pompâ & inſtrumento inſignes. De Carolo Boëmo Imperatore, Annales: Erant omnia paramenta menſæ ad comedendum & bibendum, & \* nauicula continens eleemoſynam illius menſæ, omnia de auro puro, nec quidquam inibi apparebat argenti: omnia autem inferiorum menſarum paramenta, etiam pro garcionibus, & curruſ ducens nauem continentem eleemoſynam, de argento fuerunt. Ecce, in illius æui ſimplicitate, etiam ſplendorem, imò luxum. Omnia tamen ſuperabant Eccleſiarum opes, quæ pænè immodicæ tunc fuerunt. Vno exemplo oſtendam. Exſtat pars Chronici veteris rerum Maguntiacarum, per Conradum Epiſcopum: in quo recenſentur

\* Verba ipſa in M. Alberto, eius æui.

\* Amendâ, ſive mulctâ.

\* Arcamagna & receptaculû vaſorum.



templi eius vasa, vestes, ornamenta, Deus bone, cui sine stupore legenda? *Purpura, tapetia, dorsalia, palla, casula, tunica, infula, tiara, anuli, thuribula, grues, pelues, Urcei, calices, gemmae*: tantâ copîâ, pondere, pretio, varietate, vt recensere deterrear: duo tantum ex omni cumulo excerpam. *Erant calices tres aurei* (auratos omitto: ) *qui omnes habebant suas ampullas: & pyxidem ad hostias ex auro purissimo, & margaritis. Vno calice aureo solus Pontifex, vel praelatus Ecclesie in summis festiuitatibus utebatur. Alij duo, tanta erant quantitatis, quod cum ipsis diuina mysteria nequaquam poterant celebrari. Erat enim vnus maior altero. minor habebat cum patenâ marcas auri electissimi octodecim: in cuius pede per circuitum erant pretiosi lapides valdè, & in patenâ circuitu limbus, qui & ipse gemmis non carebat. Calix maior quot marcas auri habuerit, nescio: certum autem est, quod spissitudo eius erat digiti, & per totum, tam in pede quàm suprâ, gemmis erat pretiosissimis adornatus. Habebat etiam idem calix duas ansas, quæ manus poterant implere leuantis. Huius patena talis erat latitudinis & spissitudinis, quod ipsi congruebat, & ipsa gemmis per circuitum decorata. Hic calix habebat altitudinem vnius vlnæ, & capere poterat dimidium sextarium vini: nec ab omni homine poterat leuari à terrâ. Alterum, quod eligo. inter varias Cruces, vna fuit lignea, auro optimo vestita. in quâ imago erat aurea Domini crucifixi, quæ imago cuiuslibet hominis communis magnitudinem excedebat: concava, sed multum spissa: cuius venter plenus erat reliquiis, & gemmis pretiosissimis. Dicebatur autem nec Romanum Imperium meliores habere. In huius imaginis capite, loco oculorum, erant duæ gemmae quas carbunculos vocant, tantæ magnitudinis, vt duo vitelli ouorum, qui in tenebris coruscabant. Huic cruci inscriptus erat versus iste:*

*Auri sexcentas habet hæc crux aurea libras.*

*Et nota, quod vna libra habet duas marcas. Sic ergo erant mille & ducente marca auri probatissimi. Pro speciali huius auri examinatisimo valore, crux ipsa proprio nomine censebatur, vocabatur autem BENNA. Ex his mi Vtenhoui, robur, potentiam, opes, velut pertransennam vides: & quàm ab ijs ætas hæc defecerit, quæ non nisi in vitia & luxum surgit. Quæ causâ mutationis? plures, nec lubet dicere. vnam præcipuam à factionibus scio, quæ diuellunt iunctas olim vires: & Imperatori quid nisi precariû pænè ius & imperium manet? Sed produco scriptionem, voto non querelâ clauden-*

claudendam.

— *ſtet Capitolium**Fulgens, triumphaliſque poſſit**Roma ferox dare iura Medis.*

Vale. Louanij, Kal. Iunijs. ∞. ID. XCVII.

## EPISTOLA XXVIII.

*Mechliniam.*IANO BERNARTIO *I<sup>ſ</sup>* S. D.

**M**ELIVSCVLE mihi eſſe, aut potiùs minùs malè quàm fuit, hoc tibi nuncio: etſi vires aut alacritatem, quæ in ipſo iſto perpeti languore aliqua fuit, nondum recepi. Cùm Deo videbitur, fiet; aut eò me recipiã, quò noſter Berchemius. quem virum vnicè probum & litteratum nos amiſſiſſe, fideli teſtimonio meo ſcito. Heu, quid iſtud eſt, virtutem & prudentiam omnem à nobis ſic abire: vitia, arma, barbariam manere, vel augeri? Iampridem vidimus, quid quid illud eſt, mutationem in Europâ & nobis Deum parare, & velut refingere velle hunc orbem. Sed hæc exſpectanda nobis ſcilicet, & ferenda mente, quæ fortes & peritos cæleſtium decet. Queri, mollitia eſt; reluctari, infania. Sed ad te, laudo quòd pedem figas in genere vitæ, quod Deum & fata quoque ſcire debes tibi impoſuiſſe. Aliud aliquod animo magis allubeſcit fortasſè: ſed quod tibi, hoc illis quoque euenire ſcito, qui compotes ſunt eius, quod tu petis. Ij ſibi diſplicent, tædia & moleſtias ſuas habent, & fortasſè ad tuum illud acriter anhelant. Miſeria aut inſipientia noſtra! numquam deſiderijs aut iudicijs quieſcere, abſentia petere, præſentia contemnere; & vitam ſemper inter vota ſuſpenſam habere. Interea illa venit, quæ ad Berchemium vênit, & bonâ fide quietos ſemel ſilentefque reddit. At tu, mi Bernarti, viue & vale tuis. nam & augendum te breui aliâ prole ex famâ, an ex tuis litteris accepi? Louanij, IIII. Idus Iun. ∞. ID. XCVII.

## EPISTOLA XXIX.

*Bruxellam.*OTHONI HARTIO *J<sup>ſ</sup>*.

**I**NTELLEXI iam nunc ex litteris Marchantij de obitu Caroli filioli tui, neque neſcio, ex comuni parentum ſenſu, & tacitâ

DD d 2      quâdam

quâdam naturæ lege, te & matrem dolere. eoque manum stilo admouei, vt breuiter, sed fortiter te solarer. Quem? virum vsu & doctrinâ, rerum humanarum peritum & gnarum. Quid igitur tam obuium, tam assiduum in ijs, quàm iste casus? Perambula cogitatione vrbs tuæ domos: rara est excepta, quæ familiam quidem & proles habet. Comparatione illâ inuenies, benignè etiam tecum agi, qui non plures amiseris: & plures sanè habes, atque vt diu in solatium & fulcrum instantis senij habeas, Deum rogo. Sed enim iste eminere genio & ingenio videbatur. Credo equidem, & hoc ipsum est cur hîc non perennârît: quia Deus ille optimus, optima ferè ad se trahit. Ad se, inquam mi Harti: & hoc caput alloquij, in superis beatisque locis filius tuus agit. Dubitare non potes: dolere igitur non debes, gaudere potius, si ipsum & bona eius amas. Atqui citò perijt. Quid hoc est? aut quantulum istud ipsum, quod longum nobis videtur? Triginta, sexaginta, centum anni, si cum volumine illo æui & cæli comparerentur, quid sunt? punctistitium, & vix mereantur hoc nomen. Nihil hîc diuturnum: & verâ imagine tibi exprimam nostram vitam? Vidisti fabulas haud dubiè actitari sæpè, atque etiam à iuuentute in scholis. Prodeunt reges, satrapæ, alia officia, & quidam satellites, ac personæ in speciem, & mutæ. Ecce alij diutiùs ex ijs hærent in scænâ, & loquuntur; alij ostendunt se tantùm, & nec vocem edunt: simile nobis est, vario munere aut dignitate in theatrum hoc Vniuersi mittimur; alij silentio transimus, aut ostendimur tantùm. Nihilo tamen deterior ille, qui in vili veste, qui non diu hæsit, quàm ille qui regem aut longum carmen egit. Apud Deum vita longa non optima, sed innocentissima: & eam filius tuus in purâ illâ ætate habuit, & nunc gaudium & triumphum. Adspicit te, & tuos, proque ijs orat & vota concipit: tu pone luctum, & patrem exue, indue Christianum, & virum. Cui rei quoniam & consuetudo & alloquia amicorum aliquid faciunt, ego & vxor vocamus amanter te & tuam ad nostros istos festiuos dies, & rogamus vt non negetis. Domus vobis mea patet, & totus hic animus: venite, possidete, valete. Louanij, IIII. Nonas Sept. ∞. IO. XCVII.



## EPISTOLA XXX.

*Augustam.*MATTHAEO RADERO, *Soc. Iesu*, S. D.

**E**T amicitiam libens tecum iungo mi Radere, & illi firmandæ, quod petis de Martiale, in parte effeci. Amicum me toti Societati vestræ esse, quidni profiterar? quæ prima litteris his alijque me imbuir, quæ salutaria in omnem vitam præcepta dedit & præiuit. Amo hoc corpus, amo & membra: te inter isthæc, qui vel affectu tuo, vel iudicio de me, hunc affectum merebare. Etsi de iudicio, noli attollere nimis mi Radere. ego me non vetari inter summos scio, sed inter medios incedere, paullò altiorrem fortasse ijs qui serpunt. Sed de Martiale quod tetigi, rem ecce habes. quid rem? pauca verba & notulas, atque eas alibi fortasse notandas. Tu facito, & Censor esto: tum etiam siquid ultra scire me putas, pete, non grauabor respondere, & certè te amare. Vnà etiam Pontanum, eruditum & disertum virum, collegam tuum, quem saluto. Louanij, III. Kal. xbres. ∞. IO. xcvii.

## EPISTOLA XXXI.

*Antuerpiam.*FRANCISCO SCHOTTO, *Senatori S. D.*

**B**ONAE fidei creditum est negotium, ut video, quod tam sedulò & maturè redditum est effectum. Tibi, & fratri tuo, hoc nomine debeo: & magis etiam pro affectu, quem in me ostendistis. Antuerpiam non temerè semper amaui, in quâ tam multi qui me amant. Coràm hoc nuper didici, atque abundè & largiter me vobis dedi. At tu & alij, inquis, queruntur de celeri discessu? Itane? amicè magis, quàm iustè profectò: & quæ vrbs me tamdiu tenuisset? non ipsa Bruxella, quæ patria mea esse vult, nec est tamen nisi incolatu. Alibi natus, ibi educatus sum. Sed confidite. si proxima æstas viuum & valentem me habet, mensum totum etiam vobis dabo, & conuiuiam: sed cæ lege, ut semel in die epulemur, reliquum fabulis & sermunculis, aut etiam occupatiunculis, detur. Vtinam frater tuus intereà ex Hispanis adfit! quem virum iam olim noui, & quia noui, amo. est inter eos, qui rem non speciem in doctrinâ habent. Vale. Louanij, Non. Nouemb. ∞. IO. xcvii.



## EPISTOLA XXXII.

EVERARDO POLLIONI, 1<sup>80</sup>.

**L**AETVM me epistola tua reddiderat mi Pollio: ecce alteram ab amico aperio & lego, atque ibi triste illud de obitu parentis tui fulmen. Scio, & in animo isto sentio, ac quasi video dolorem tuum & complorationem: cò scilicet maiorem, quo melior ille tibi parens, & tu filius ei fuisti. Non sensibus solum & animis, sed domo & contubernio hærebatis: vt si amorem natura & sanguis non inderet, posset dedisse consuetudo. O triste discidium! sed soletur te mi Pollio, breue discidium: & quamdiu scilicet hæc terra & alienum domicilium nos habebit? Viue diu, & ita voueo: sed vt viuas diutissimè, quid nisi septuaginta, aut vt improbè, centum annos? Leue & breue est, si Æuum respicis, quod fluxit ab æterno & fluet. O miseras, ô vanas cogitationes nostras & curas! congerimus, ædificamus, libros scribimus, & eternitatem nobis quacumque viâ spondemus aut optamus. Quid tamen aut quantula ista sunt? quamdiu etiam sunt? non loquar de opibus aut ædificijs, quæ statim æuo aut casu pereunt: ipsa illa Fama, bonorum ingeniorum morbus, quousque se producit? Aliquid de Cicerone hodie aut Senecâ: id ipsum variè, inter culpas & laudes: sed quot anni sunt? vix mille quingenti, aut paullò vltrà. Caput ipsum ingeniorum Homerus, nomen vindicat & possidet à bis mille quingentis & paullò amplius annis. Enimuero quid hoc est? trigessimâ aut quadragesimâ stirpe potui eum attingere, & vide quid longum aut diuturnum vocemus. Cogitatio ista sæpè me & solata est, & erexit ad contemptum aut calcationem potiùs rerum fugacium, id est humanarum. Consolatio altera, à communi omnibus lege. Rideamus, si quis cùm tributa populariter danda sunt, lamentetur, & sortem suam accuset. quid ita? quia omnes cùm dant, non superbè solum sed stultè facit, qui se vult eximium aut exsortem. In hoc humani generis tributo cur non sic affecti sumus? cur fatuâ mollitiæ querelam & planctum miscemus? Hoc ipso quòd homo natus es, mori natus es: & siquid vltra punctum, horam, diem, annum viuis, donum est non debitum, & in gratiâ ac lucro ponas.

ponas. At nos obliuiscimur, aut non attendimus, & in tot mor-  
tibus quæ cotidie occurrunt aut ingeruntur, vna aut altera nos  
mouet & deijcit, quæ nos tangit. Alij si pereant, nihil noui aut  
mali est: si nostri, ô nos miseros, ô infelices! Verba aut inuen-  
tiunculæ non desunt, cur iniuria sit facta, cur Parca maligna  
fuerit: & vides sæpè ac rides, credo, in hac re scænam vulgi. Stul-  
ti, bis stulti, quod sumus cogitemus, & non magis miremur ho-  
minem subito, quàm florem mori. At tertio, diuina cogitemus.  
Ad meliora eundum est, ad puriora, lætiora, prauis, turbidis, tri-  
stibus his relictis. Si ad ea te aptasti, & viaticum (vt sic dicam)  
corrogasti virtutum & pietatis, quid malè te habet abire, aut al-  
lium abisse? Gratare, si sapis ô homo, plausu & cantu prosequere,  
qui non diu in salo iactatus peruenit ad beatum portum. Plu-  
ra sunt, quæ tu tibi mi Pollio dices. Ego ex animo in dolore tuo  
dolco, quem aliquem esse & cupio, & par est (neque enim homi-  
nem exuimus) sed temperatum nec longum esse, hoc suadeo &  
opto. Tu inquam tibi dices. quidni hoc sperem, qui mihi sic  
lubenti prædicas studium tuum sapientiæ & quietis? Exoscula-  
tus sum eam vocem. tu re effice, & nostri miserere qui volentes  
& adspirantes ægrè huc venimus. Scripta nostra vides multum  
(ingenuè fateor) à vano trahentia: ô si meo iudicio & voto illa  
sint, quàm alia & diuersa sint? Verbum aut calami ductum non  
perdam in illis, quæ ad solam fortassè scientiam faciunt: occuper  
in istis, quæ ducunt ad duo dicta. Sapientia, inquam, me sibi  
mancipet, Quies interna & externa (si possit) habeat: sibi alij  
famam, honores, opes, cetera humana. Vt claudam, amo te mi  
Pollio in intimo isto pectore, & opus te meum esse (ita profiteris)  
non admitto solum, sed gaudens subfigno. Perge, perge in viâ  
quam pauci calcant, sed Deo & pietate ducibus, & per inteme-  
rata vestigia maiorum. Louanij, Nonis xbris. ∞. IO. XCVII.  
Nam tuas litteras satis serò accepi, & heri demum.

## EPISTOLA XXXIII.

*Lutetiam.*

GVILIELMO BARCLAYO S. D.

**A**T tu files. vbi promissa de Iliade aut Chiliade ad vnam  
lineam nostram? Expostulo. eò magis, quia materies illic  
scribendi,

scribendi & seges, quam defectam referas in horrea nostra. Ab alijs de te cur audio, quæ non à te audio? Morfus & versiculos in doctores aduenas vidi, nec sine stricturâ nominis mei. Parùm est. tu modò rectus perge, nec deiicere, sed nec deflece aut siste ad repugnandum. Monui antea, & iterò: modestia est, quæ te gratiosum exteris, quæ magnum etiam faciat & seruet. Ad contentiones si venit, clades erunt, & Thebana aliqua pugna, in quâ victi victoresque plorent. Miseri homines, cur eò inclinamus? malitia est: vince, & quam dixi modestiam & frigus, ac me, ama. Louanij, ∞. IO. XCVIII.

## EPISTOLA XXXIII.

*Augustam.*

IACOBO PONTANO, Soc. Iesu.

**I**N summo hoc frigore, cuius ego quidem impatientissimus sum, calfecit me tamen amica tua scriptio mi Pontane: & excitauit non ad scribendum solùm, sed ad redamandum. An non talem virum? inclino iamdiu, & ipse quod tu voluisti volui, ex quo scripta tua prima vidi: quod fuit Augustæ Treuirorum, ex dono & beneficio Principum Bauariæ, quos transiens ante septennium illic salutauì. Ab eo tempore, credes mihi hoc Pontane, & memoria tui inhæsit & probatio: atque ideo facile accendere hanc materiam, igni sic paratam. Quæ tu porrò in me nimis benigno corde & ore laudas, scito pauciora omnia esse: dare tamen operam vt sint, inprimis Modestia & Probitas, quas ego æstimo & tollo super nomen omne litterarum. O institutionem vestram olim mihi vtilem! inhæret ea & inhæsit, atque illa Pallas fuit, quæ inter tempestates, imò naufragia, seruauit hunc Vlysssem. Eadem iudicium & sensum istum ad virtutes formauit, quas vtinam sic indipisci, vt sequi, derur! sed conandum est, & Deus manum dabit. Is te mi Pontane seruet, & inter nos mutuum hunc amorem. Louanij, x. Kal. Febr. ∞. IO. XCVIII.

EPI-

## EPISTOLA XXXV.

*Lutetiam.*STEPHANO TURNEBO *Senatori S. D.*

**T**RISTE mihi auditu fuit, de Hadriani fratris tui morte, triste: & pænè sic, quasi alterum illum, tuum & Musarum parentem, iterum amisisssemus. Nam & amicitia iam inter nos vetus fatis, & certè fida, coäluerat: & raritas ibi nunc talium, à clade istâ funesti belli. Solatur tamen, quòd & malis temporibus optimus ille subductus sit, & ne in virtutum & artium bonarum isto naufragio diutiùs iactaretur: solatur, quòd & tu in locum & vicem eius sic vltro venis, germanus Turnebi sanguis. Veni, parent animi huius fores, & affectui tuo velut brachia pando & occurro. Sicut agricola in locum amissæ arboris aliam subserit: sic nos in amicis oportet. Equidem & corporis huius oculis vsurpare te, atque alios insignes ibi viros, aueam: & spēsne est, vt vel obiter fiat? Aliqua, cum pacem hanc video: maior, si valetudinem non videam, inclinantem & de ruinâ (cur dissimulem?) minantem. Sed siue viuo aut morior, vestri amans viuam moriarque: vt tu mei, per parentis, & nunc fratris, magnos manes precor. Louanij, postrid. Kal. Sextil. ∞. IO. XCVIII.

EPISTOLA XXXVI. *Antuerpiam.*IOANNI MORETO, *Typographo celeberrimo.*

**B**RUXELLAE fuimus, ADMIRANDA obtulimus, grati fuimus: quid vltra? inquires. Hoc fatis: & cultum hunc atque alium Principibus debemus; & iamdiu imbibi bonum, quia bonum, amare. Externa ab his internis expetere aut expectare, inscitia sit: & cum alio æuo hæc fuerunt. Qui nunc, inquam, hæc querit; audacter ei edico abiicere

*Hæc studia, atque omnes delicias animi.*

Recudere te autem ADMIRANDA nostra, mihi gratum sit, priusquam alibi alij. Factum in quibusdam meis in Italiâ aut Galliâ: & indignor, aut si nō licet, doleo. quia & perperam multa; & mihi ipsi præripiunt castigare quædam, aut recedere. Quid? polita omnia, & sub ascia, vt sic dicam, à nobis dedicata? Non

E E e

hercules.



hercules. neque ita me *ludit amabilis insania*: neq; sum ille vbique

*Candidus, & talos à vertice pulcher ad imos.*

Næui alibi, nodi, laxa quædam aut manca: & præoptem eluere, dissoluere, adstringere, adimplere. Nescio enim quomodo facilius hæc diiudico & arbitror, nitidè excusa à vobis, quàm confusè à me scripta. non enim exscripta: & primam ferè manum nostram semper habes. At isti properi impediunt: calumniæ aut petitioni me exponunt. Nosti hodiernum \* τὸ φιλεπιδίμων. & quàm multi, qui legunt hoc tantum, vt carpant? scire abnuunt, & sumunt iudicare.

\* cupidum  
reprehendere.

— *hic nigra succus loliginis, hæc est*

*Ærugo mera.*

Iam nunc expertus in quodam altioris ordinis, qui luminibus meis ædificio suo sublimi obstruxit scilicet, & titulum mihi ereptum inscripsit. Faciat ipse, aut alij: quid lædunt? non me quidem. sed vt Sarpedon ille apud Homerum, hastâ petens Patroclum, equum eius iugalem interfecit: sic isti non me tangunt, fortasse impetum & velut ardorem illum animi prosternunt, quo ad honesta vehebamur. Etsi nec istum, & melior mentis ignis suscitatur, siquid soporis infuderunt. Sed abeant hæc, & valeat: ego vt istud, ad vos adspiro. Quando? quàm maturrinè poterò. nam etsi domi etiam nunc vincula, nec aperti carceres;

— *tamen istuc mens animusque*

*Fert, & amat spatii obstantia rumpere claustra.*

Semper ego non apud vos solum hilarior, sed à vobis melior redeo: gratia amicis & tibi, qui sic comiter habetis. Tibi, cuius domo, cuius mensâ vtor, pascor: an non hereditarium tibi onus? Nam cum Plantino, heu illo nostro, tesseræ hæc mihi sancti hospitij: cum vxore post illum: & te liberem, vtriusque heredem? Amice, ego tamquam polypus hæreo: per anticum emitte, per posticum insinuabo. Rides. & veni securus ab hoc metu, inquires. Scio, veniam: & fors sit scriptorum aliquid mecum. Vale, cum tuâ carâ & caris, quos saluto. Louanij, VIII. Kal. Octob. ∞, IO. XCVIII.

EPISTOLA XXXVII. *Antuerpiam.*IOANNI BRANTIO, *Graphiario S. D.*

**S**OCERVM tuum libens vidi, mi Branti, virum prudentem, probum, patriæ amantem. Cuiusmodi paucos hodie habemus: & multi res suas agunt & augent, communium prætextu. Enimuero, spes sub nouo hoc Principe & statu noua ac melior nos respicit: si tamen & pax ab Angliâ affulget. Si non illa, & Bataui idem pertendunt: quam Salutis arcem vides? At sunt qui etiam de Regis nostri fato, sanè importuno (si ita est) narrant. Id verò fuerit omnibus consilijs nostris, si non turbandis, certè tardandis. Deus adiua, & miseros Belgas tandem solatij aliquâ aurâ adspira. De Orteliano Epiraphio, tecum volo: sed languor meus mentem aut stilum vix erigit: & occupor, si vñquam. omninò tempore mihi opus, vt semel & opportunè fiat. Vale mi Branti. Louanij, vii. Idus Septembr. ∞. IO. XCVIII.

## EPISTOLA XXXVIII.

IOANNI DRENCKWAIRTO, *Theſaurario.*

**V**ENIT ad me Balduinus tuus, planè meus futurus, quia tuus. Nec aliâ commendatione est opus. In studijs eius dirigendis prima nunc cura erit: & placuit valdè iudiciu tuum de Græcis. Profectò, vt hodie iudicia sunt & exacta eruditio, nemo in aliquâ classe, qui linguâ eâ non sit saltem tinctus. Et vñum etiam suum, immò dixerim necessitatem, in omni ferè scientiarum genere habet. Itaque discet: sed non apud alium, quàm me præceptorem. nam domi exercitia, & quasi gymnasium eius linguæ habemus. De Philosophicis, mihi satis videbatur eum ad disputationes sæpè ire, quæ publicè in Collegijs habentur: atque ea optima ratio est & repetendi, & examinandi. Superest Iuris studium, quò credo eum destinari. & putem satis esse primo hoc anno, si Institutiones audiat, nec longius in illud pelagus se mittat. Nam stilus, & eloquentia etiam aliqua assumenda sunt, atque vtilissimæ huic in omnem vitam parti dandæ suæ partes. Hæc ita faciemus, nisi ipse aliquid mutas: & paullatim ac per gradus optimam indolem (ita mihi videtur) ducemus ad op-

tima, & scientiarum laudatum illud culmen. Deum precor, vt adspiret: eundem vt te, Ampliss<sup>me</sup> & Nob<sup>me</sup> Domine, Principibus, & rebus nostris diutissimè incolumem seruet. Louanij, VIII. Kal. Feb. ∞. IO. XCIX.

## EPISTOLA XXXIX.

HVBERTO AVDEIANTIO.

**I**N doinum incam cum venturus sis (ita vterque volumus:) quid præcipui muneris tui futurum, non ignoras. Prædixi. à manu, lectione, & studijs mihi eris: alijs functionis, quæ ab ingenio aut instituto tuo discordet, immunis. In excipiendo autem aut describendo, dixi Orthographiam aliquam nostram sequi & scire te debere: sed & vsum distinctionum, qui nobis frequentatur. De istis hauebas discere: & quamquam ad quædam in publico Dictata te remitterem, tamen ecce ipse operam hanc tibi iterum subij, & scripto complexus sum quidquid huius rei, pro meo sensu, esset. Lege, sequere & usurpa. *Distinctio duplex, Sermonis & Scripti. Illa, quam in pronunciando adhibemus, & per intervalia suslinemus, suspendimus, aut deponimus sermonem.* Comma sus-tinet, Colon suspendit, Periodus deponit. *Hæc virtus Distinguendi* (ait Fabius) *fortasse sit parua, sine quâ tamen esse alia nulla in- agendo potest.* En momentum, quod in Sermone habet: quid si maius etiam in Scripto dicam? Nam hercules confusa tota lectio & intellectio, nisi notæ suæ diuidant & quasi manuducant. Quid igitur ea est? *Notandi certa ratio, quâ secamus & partimur scriptionem.* Ea quæ veteribus fuerit, quærunt: ego ampliùs, an fuerit, quæro. Nam prisca omnia monumenta, lapides, tabulæ, æra legum aut orationum: in quibus omnimoda adhiberi ea poruit: nullam præferunt aut habent. Nisi hanc tamen, quâ singula verba punctis suis disparant & fecernunt: sed punctis vniufmodi semper & pari formâ. Quæ res, vt verum fatear, turbet magis & siltat lectorem, quàm transferat & adiutet. Quod de lapidibus dico, ad libros etiam priscos traho: nec, in ijs Distinctionum illæ variantes notæ. Vt alios omittam, exstant nobiles illæ Pandectæ Etruscæ, à Iustiniani æuo: quære, non dabunt. Quid ergo? ante Iustiniani æuum non fuerunt? mox videbo: sed



sed tamen antiquitus omnino, haud puto. Atqui Cicero & alij videntur agnouisse. vt Crassus apud eum loquens inducitur: *Non librariorum notis, sed verborum & sententiarum modo, interpunctas clausulas in orationibus veteres esse voluerunt.* III. De Orat. En notas à librarjjs, & quidem in clausulis, & gratiâ interpungendi. Idem pro Muranâ, in Iurisconsultos illudens: *eos in singulis litteris, & interpunctionibus verborum occupari.* Significat sensum mutari, & cautionem vel cauillum esse, ex interpunctis. Quid Seneca, nonne clarè? *Nos, inquit, etiam cùm scribimus, interpungere solemus.* Ecce *interpuncta*, & quidem *sollennia in scribendo.* Hæc sistant, aut viâ illâ sententiæ eijciant: sed nescio an prouidum & sagacem. Nam prior Tullij locus possit planissimè altrouorsum duci, quasi dicat Veteres ideò non vsurpassè in clausulis interpuncta, ne ea potiùs, quàm modum & modulum, in verbis, considerarent. Locus alter, dicat Iuris interpretes in minutis occupari, scrutari in contractibus apices litterarum, & puncta verborum: quia nempe ambigua sæpè hæc ista, & ad anteriora aut sequentia ducenda. Id enim eueniebat in illis solitarijs punctis, quæ verba, vt dixi, singula, non membra aut sensus secernebant. In Senecâ hæreo. & an dicit, spiritum stilumque hominis naturaliter etiam pausare in scribendo, & interquiescere cum sententiâ: non rapidè semper, & torrentis vicem, ferri? Profectò dicit: vide. Nam tota eius dissertatio est, contra præcipites illos & effusos in loquendo, & cursu verba conuoluentes. Quando igitur origo? nam res tam utilis, &, quod caput, tam obuia, ad quam Natura ipsa ducit, non debuit, non potuit diu quæri. Dicat aliquis sub Hadriano cœpisse. quia in Suidâ lego de Nicanore quodam Grammatico In Nic. aduop. eius æui, scripsisse *περί σημείων τῶν καὶ ὁρίων βιβλίας ἑξ:* De interpunctione in genere libros sex: itemque partitè, *περί σημείων τῶν παρ' ὁμήρου, καὶ ὁμήρου καὶ καλλιμάχου:* De interpunctione apud Homerum, & apud Callimachum: neque aliud egit aut scripsit, ita vt per iocum *σηματίας*, Interpunctus aut compunctus (seruile conuiciù est) vocaretur. Potuit igitur tunc agitari de inducendâ, etsi nondû vulgò inductâ. Certissima quam reperio, mentio est in Diomedè Grammatico: qui *appositionem puncti* (ita loquitur) in triplici differentia agnoscit. Differentia est, quæ clariùs apud Cassiodorum sic expressa: *Sed vt his omnibus addere videaris ornatū, Posituras quas Græci θέσεις νο-*

Lib. II.  
cap. De  
Pronun-  
ciat.

Lib. I. In-  
stit. Digi-  
nar. Lxx.



rant, id est puncta breuissima pariter & rotunda, & planissima, singulis quibusque pone Capitibus, præter translationem sancti Hieronymi, quæ colis & commatibus ornata consistit. quoniam illustrem faciunt orationem, quando suis locis aptata resplendent. Nam si corpus nostrum indiget per membra cognosci, cur lectio, cum suis partibus videatur esse distincta, confusa relinquitur? Iste quidem Positura seu Puncta, quasi quedam viæ sunt sensuum, & lumina dictionum, quæ sic lectores doctiles faciunt, tamquam si clarissimis expositoribus imbuantur. Prima est, Media; secunda, Subdistinctio; tertia, Plena. Quas à maioribus nostris idèò constat inuentas, ut spiritus longâ dictione fatigatus, vires suas, per spatia decreta (siue discreta) resumeret. Quas si manus cupidus lector agnoscere, Donatum lege, qui te possit de hac re, breui compendio instruere. Pleraque omnia hîc habes: Nomen, Vsum, Discrimen.

Lib. I.  
cap. XIX.

Nam veteres Posituras vocarunt: atque ita Isidorus. Positura, inquit, est figura ad distinguendos sensus per Cola, & Commata, & Periodos. dicta, vel quia punctis posit is annotantur; vel quia ibi vox, pro intervallo distinctionis, deponitur. Ex nomine nouitio (hoc quidem sensu) vides rem non esse perantiquam. Addit Vsum, qui liquet. Discrimen deinde, triplicem eam esse, Mediam, Subdistinctionem, Plenam. Isidorus autem ita: Sunt tres Positurae. Prima Subdistinctio dicitur: eadem & Comma. Media distinctio sequens est: ipsa & Colon. Ultima distinctio, quæ totam sententiam claudit: ipsa est Periodus. Talia Diomedes: & consentiunt etiam in Notis, quæ, Isidori verbis, sunt istæ. Vbi in initio pronunciationis necdum plena pars sensus est, fit Comma: Punctusque ad imam litteram ponitur. & vocatur Subdistinctio, ab eo quòd Punctum subtus, id est ad imam litteram accipit. Vbi autem in sequentibus iam sententia sensum præstat, sed adhuc aliquid superest, fit Colon, mediamque litteram puncto notamus: & Mediam distinctionem vocamus, quia Punctum ad mediam litteram ponimus. Vbi verò iam per gradus plenam sententia clausulam facimus, fit Periodus: Punctumque ad caput litteræ ponimus, & vocatur distinctio. Vbi vides aliam à nostrâ distinctionem fuisse, quod ad notandi posituram aut signum. Nam idem Punctum manebat, sed locis variabat. In fine Cassiodorus remittit ad Donatū: & sunt eadem ista etiam hodie in illo mutilo & fracto. quid opus verba reddere? Nos variasse isto euo, nō ignoras. & viros doctos plenius paullo distinxisse, in Comma, Semicolon, Colon, Periodum. Comma, vbi minima

minima respiratio est, & semicirculo notamus, . Semicolon, ubi paullo maior, nec ad Colon tamen accedit, notamusque, . quod locum sæpè habet in *Contrarijs*, aut *Disiunctis*, aut variâ *Partitione*. Colon autem, sententiâ in parte perfectâ, sed etiam crescente, & signamus duo puncta: At *Periodi* nota est punctum, longæ siue brevis. Nam & breues Periodi sunt (in epistolis creberrimè) quasi membra: & hæc ipsa punctus signet: sed cum discrimine, ut grandiore capitali litterâ non excipiantur. Ista de Distinctione veteri, & nostrâ, sed in vnâ Periodo aut sensu. Est alia, quæ veterum fuit, nunc desijt, meo voto reuocanda. Per versus libros diuidebant, & curiosè librarij subnotabant: quod vetus esse, & ab Asconij, id est Claudijæuo, apparet. Nam is in *Commentarijs*, verba Ciceronis cum citat & aduocat: *Versu*, inquit, à primo DCCCL. Item: *Versu circiter* ∞ . XI. iterumque: *Circa* *versum* à primo LXXX. Versus appellat. ut & Græci σίχους. Nam ita Dio- genes de Aristotele: *Libros eius omnes continere μυριάδας σίχων τετρας ἢ τετραράκοντα, πρὸς τοῖς πενταχίλοις ἢ δεσχοσίσις ἐβδόμηκοντα*: quadringenta quadraginta quinque millia versuum, itemque ducentos septuaginta. Item de Chrysippo, qui πολυγραφώτατος fuit, in diem scripsisse versus quingentos. Plinius de Zoroastre: *vicies centum ab eo millia versuum condita*. Galenus, Lyci cuiusdam commentarium se legisse, adeò prolixum, ut quinque millia versuum contineret. In Diuo Hieronymo, epistolâ ad Magnum, oratorem Rom. *Scripterunt contra nos Celsus atque Porphyrius: priori Origines, alteri Methodius responderunt. Quorum Origines octo scripsit libros, Methodius vsque ad decem millia procedit versuum*. Iterum ad Damasum, Episcopum Rom. *Quos mihi iam pridem dederas Lactantij libros, idè non libenter lego, quia & plurimæ epistolæ in eis vsque ad mille spatia versuum tenduntur*. Denique Iustinianus in *Pandectis* suis quindecim myriades versuum esse. Ex quibus omnibus liqueat, certam & perpetuam distinctionem in Versus fuisse, in omni volumine & descriptione reperiendam. Sed fueruntne igitur veri Versus, siue lineæ? Hæremus. si fuissent, quomodo in membranâ aliâ atque aliâ sic caderent? quomodo in litterâ maiore aut minore, ut solet? Nisi quis putat aut variasse per libros: aut certos modulos cuique volumini tributos, quos velut lege seruarent. Tale aliquid Isidorus: *Quædam nomina librorum apud antiquos certis modulis conscribuntur*.

Præfat. in  
Isai.

Prolog. in  
Paralip.

Lib. 1. In-  
ftit. diu.  
Lect.

In Esai.

In Orat.  
ad Brutū.

bantur. breviori formâ Carmina atque Epistolæ, at verò Historiæ maiore modulo scribebantur. An satis huc faciat aut firmet, nescio: possit tamen aliquis & Versus explicare membra minuta, & sectiones sic institutas. Hieronymum auctorem habeat, qui alibi *Prophetas versibus descriptos* à se fatetur: & communiter de libris Sacris, *Silvam nominum, sensuumque barbariem per cola versuum digessisse*. Neque aliud sanè vult, quàm quod Cassiodorus: *Primum D. Hieronymum, propter simplicitatem fratrum, colis & commatibus ordinasse translationem suam*. Et idem alibi: *Translatio sancti Hieronymi colis & commatibus ornata consistit*. Ergo idem isti Versus (Hieronymo quidem) quod *Cola & Commata*: & quid autem ista? nil nisi *Membra, & Sectiones*. Nam sic hodieque Biblia illa *Sacra* vtiliter legimus distincta, & ipsi Versus appellamus. Notat autem idem sanctus scriptor, exemplo prisco se hoc fecisse: *quia idem, inquit, in Demosthene & Tullio fieri solet, ut per cola scribantur & commata*. Caue acceperis de Interpunctis, eo nomine: fallèris. quod dixi intellegunt: & ita Demetrius definit, *Colon, aut simplicem periodum, aut composita periodi partem*. Ita Cicero *Commata* sententias accisas & breviores, sed plenas: ita & Hermogenes genus tale sermonis, *κομματικὸν καὶ ὀξελευτικὸν* appellat. Hæc igitur fuisse videntur. si non; vt nunc sint, & exemplum illud Hieronymianum vsurpetur, consilium meum sit & votum. Valdè ex vsu lectorum, & eorum qui excerptum aut subnotatum aliquid volunt, hoc esset. cùm ecce Liuium, Ciceronem, tales, non nisi per libros aut orationes diuisos habemus: & longum nec promptum in totis ijs aliquid quærere; facile & obuium, si Versus designarent. Industrius aliquis vir facere debeat, & Typographi imitari. Vale, & ad nos quàm maturrimè veni.

## EPISTOLA XL.

*Vltraiectum.*

HADRIANO VANDER-BVRCHIO S. D.

**O** SCVLA tua & OCVLVS accepi, & FVNERA mox & TRISTIA, quæ decorè subiunxisti. Æterna ita lex est, vt hæc in vitâ & vsu tēperentur: benè ergo & in Carmine, quòd imaginem illius habet. Grata fuerunt, vnâ re minùs, quòd nissionem eam excusandam putasti. Apud inène? qui semper talibus lector,



lector, vel pascor veriùs : & certè non sæpè nunc, vt æuum est, ingeruntur hæc mella. Ferox ille Mars, qui regnum possidet, animis ferociam & duritiã inserit, & abducit ab omni cùm humanitate, tum humaniorum artium cultu. Patiamur, quæ non mutamus. At de EPISTOLIS meis, etiã ne illíc vobis visæ? & tibi placuisse significas : non aliis fortasse, siqui alieni sunt à nobis. Vtinam religionis illa causa, id est res capitalis, vos nō diuidat! cetera dissimulari possint, etsi non probari. Quando autē emendari? leuis & frigida spes, si homines video; si Deum, magna. Vtinam nos modò emendemur, &

*Per nostrum liceat scelus*

*Iracunda Iouem ponere fulmina!*

Sed de EPISTOLIS, alias paramus : neque temerè tamen vos amicos immiscemus, ne beniuolentiæ specie noccamus. Vale V. Cl. & fratrem tuum V. R. Decanum saluta. Louanij, viii. Kal. Maijas, statim vt tuas accepi.

## EPISTOLA XLI.

*Bruxellam.*

IO. CAROLO ÆNOBARBO, V. N. S. D.

SERIVS omninò epistolam tuam accepi, non amoris solùm, sed curæ de me plenam. Cùm enim Antuerpiæ fuisset, itemque dies aliquot Bruxellæ vestræ; ecce reuerso demùm epistola ea mihi reddita, cui alioquin animus & ratio erat vel statim respondere. Hoc igitur excuso, & ad rem nunc ipsam pergo. Ais te audisse de itinere meo in Italiam, & parùm probare significas, imò libero & aperto ore (hoc quoque amici) dissuades. Vt tibi totum sensum meum aperiã, diffundam me paullùm, & in hoc chartaceo æquore exspatiabor, te, vt spero, fauente aut certè non sistente. Igitur de migratione aut mutatione aliquã consilij aut status, hoc in primis cogitare te deprecor : neque est tale aut fuit, & in istâ præsentī meâ conditione & patriâ aquiesco. Quid enim alibi quæram aut spectem? opes? modicæ obuenerunt, sed quas animus iste (audacter dicam) magnas facit, in minoribus etiam magnus. Fines mihi habendi iamdiu posui, & quod naturæ satis est, etiam cupiditati. Sed mihi vltrà obuēnit, & ad morem etiam viuere possum, non solùm ad naturam. Ergo ab eâ parte

FFf

nulla



nulla caussa migrandi aut innouandi. An ambitio fortasse impellit? & famam nouam apud nouas gentes quærimus? Liberè dixerim, adesse eam super vota, non solum super merita: & vnum illud mihi curæ esse, non vt augeam, sed vt coërceam, ne in vana aut ventosa effundar. Itaque ab vtrovis isto telo an stimulo non impellor: quæ autem vera caussa consilij mei, candidè & simpliciter audi. Annus Sæcularis ille sacer instat, qui ex omni terrarum orbe Christo sacratos homines ad se euocat: ecce inter illos ego sum: cur non fas obire & frui hunc Pietatis fructum? Ego verò fecero, eò iustius promptiusque, quòd onera domi non sint, quæ remorentur aut sistant. Nulla iuuenula vxor, quæ humentibus oculis abeuntem detineat; nulli parui liberi, qui collo se innectant & ingement parentem. Pietatis hoc studium liberum est: & propior aut iustior nulla ratio, quæ sistat. At caussa etiam altera, Valetudo. Tredecim amplius annos in tristitiam sum & aduersâ; vitam nec vitalem, vt sic dicam, viuo; & traho magis spiritum, quàm ducō. Quis ille baro mihi inuideat aut obiiciat, si refouere eam vel instaurare peregrinatiunculâ tentem? At enim tenue aut infirmum mihi corpus, nec par me læstis. Agnosco, sed hoc quoque vsu didici, illud ipsum assurgere & excitari per viâ & motum. Melius notabiliter habere soleo, cùm ambulo: & ideo iure hanc veniam peto, vt ij qui viuere me volunt, patiâtur transferri & moueri. Denique caussa tertia, viri Principes qui inuitant. Humanitatis est iis se dare, & animum flectere ad desideria aut imperia illorum. At, inquires, illi ipsi te illigabunt & sistent, & hoc amicos tuos angit. Audio, fateor, ab aliis metus similes: & timere me aliquid inducat communis hic timor. Cùm tamen oculos ad me & hoc animi decretum reflexi, ridere magis subit, quàm vereri. Egone vt in hac ætate, & quod caput est in hoc languore, ad sedes me dem & spes nouas? Iamdiu in ipsâ patriâ meâ rudem cogito, & mereri me autumo: transibo, & includi me patiar, in nouum ludum? Non faciam mi Ænobarbe: apud me, apud meos maneo: & nisi Fatum aut Vis interceptiunt, intra paucos menses Belgis me reponam. Deum rogo, vt ita sit: te autem, vt hanc esse mentem meam credas, quam ipsam tibi aperui, remoto omni simulationum velo. Vale Vir Nobilis & Cl<sup>me</sup>. Louanij, viii. Kal. Iul. ∞. Io. xcix.

## EPISTOLA XLII.

IOANNI DRENCKVVAIRTO, *Theſaurario.*

**S**ICVT inter primos conſilij mei de peregrinatione Italicâ certio-  
 tiorem te feci: ita nunc debeo de impeditâ câ, aut ſuſpenſâ.  
 Litteras ex Italiâ nudiuſtertiſ accipi, quibus ſignificant & pe-  
 ſtem in aditu atque ore Italiæ ſauire incipere, & metum eſſe ne  
 in reliquum corpus peruadat. Imò iam in Ferrarienſi tractu ini-  
 tia etiam eſſe. Itaque addunt deliberari Romæ, an ſacer annus in  
 alterum ſequentemque non ſit prorogandus. Hæc cauſſa iuſtiſ-  
 ſimè facit, vt tardem in hoc itinere, & in Veris ſaltem tempus  
 protollam, aut & totum omittam. Nam cur apud te diſſimu-  
 lem? Animus auct & impellit peregrinari, ſed corpusculi huius  
 imbecillitas & pertinax inualetudo, cùm ad iudicium redij, diſ-  
 ſuadent. Ergo de cognato tuo nihil vltra, nunc quidem, cogitan-  
 dum. maneat, ſtudeat, ad metam ſuam eat. Quod cum bono  
 Deo facturum eum ſpero: vtinam nos publicè ad optatam illam  
 metam Pacis! nec deſpero in Principum aduentu. Ampl. &  
 Nob<sup>me</sup> Domine, Deus te Reip. & Principibus, ſed & nobis, æ-  
 tatem ſeruet. Louanij, VIII. Kal. Sextil. ∞. IO. XCIX.

## EPISTOLA XLIII.

*Antuerpiam.*

PETRO LAFAILLIO, CAROLI F.

**E**PISTOLAM perbenignam à te accepi, inopinatam, & ideo  
 magis gratam, quia iuuat tales habere qui ament, cupiant,  
 iuuent. Nam nec hoc poſtremum abnuerim, vbi opus ſit aut op-  
 portunitas: ac fuiſſet ſanè in Italico noſtro itinere, ſi id perten-  
 diſſemus. Sed quæ interuenerint, audiſti. Omitto meam inua-  
 letudinem ſic affectam, vt medici pro ſano me non facturum  
 putent, ſi ſuſcepſiſſem: omitto inquam, & animus potuiſſet cor-  
 pori imperare & vincere: ſed publicæ illic cauſſæ ſunt, quæ me  
 quidem iuſtè videntur vel tardare vel arcere. Quidni, cùm illi-  
 ipſi deliberent & cunctentur, qui me vocant? In hâc ætate ali-  
 quid calidè aut temerè à me fieri indecorum ſit, nec veniam ha-  
 beat quam in iuuentute. Itaque differo aut ſuperſedeo; haud li-  
 bens,

bens, sed fatis, id est, Deo didici parère. Tibi autem gratias debeo, & semper in animo habebō, pro hac beniuolâ oblatione hospitij in domo tuâ Veronæ: quam urbem certum mihi erat videre, & suâ elegantia celebrem, & memoriâ antiquâ. Quod reponam, nunc non habeo, præter animum: quem scito & tibi ad dictum pròptumq. esse, atq. etiam tuis. Inter eos Petro Scholerio, cognato tuo: cui factum volo, & faciam ubi occasio erit. Re hoc malo ostensum, quàm verbis dictum. Vale Vir ornatissime, & cum tuâ tuisque salue. Louanij, ix. Kal. Sextil. ∞. IO. XCIX.

EPISTOLA XLIII. *Antuerpiam.*

IO. VVOVERIO suo S. D.

**H**ABES hesternas meas, quid istis opus erat? in unâ modò re, quam memoria tunc mihi subduxit. Buytevechianæ epistolæ exemplar Micaultianæ iniiciendum erat: quia scis quàm res eum tangat. Itaque neglectum à me, fieri per te rogo. Amplius, ferre te hanc mutationem consilij, & in eâ philosophari circa spes aut cupidines coërcendas. Numquam indulgendum nimis esse. sed ut ij qui in proclui sunt, sese & equos sistunt: sic in optabilibus & lætis faciendum, ad quæ animus sponte fertur. Vis cogitare Deum aliquem moderatorem vitæ & actionum esse? illum amantem & curantem nostri? Impediuit, disturbauit: ergo noluit: ergo neque ex usu fuit, etsi animus aliter vellet. Illum igitur ad diuinum apto, & non reuerti passu fati cursum sequor. Fac mi VVouerij, & simul quid parèti & tibi visum (in tuis rebus dico) fac sciam. Vale. Louanij, vii. Kal. Sext. ∞. IO. XCIX.

EPISTOLA XLV. *Leodicum.*

P. IOANNI ORANO, *Sacerd. Soc. Iesu.*

**I**AM denique sedet tuum & amicorum consilium (nam omnes amici in eâ parte:) manemus, nec Italiam hoc tempore adimus. Præter valetudinem meam nimis tenuem & infirmam, mouet & publica in Italiâ lues, quæ ipsa limina iam infedit. Ab Vrbe litteras habeo, & moneor ab iis qui calidissimè inuitarunt, ut deliberem & cuncter, quò lues se ista dabit. Imò seriò agitari de An-



de Anno sacro prorogando, si paullum se diffundit. Scis autem quas molestias Italia peregrinantibus dare soleat, vbi vel suspicio eius morbi est, nedum vbi ipse. Itaque iam scripsi dilaturum me iter in Ver proximum, & tunc fortassè omnia serena magis, & certa quidem fore. Quid ipsos aut me iuuet, periculis & molestiis frustrà exponi? Ea dilatio consilium etiam magis dabit, etsi propèdeo in patriâ & meâ istâ Spartâ manere. Apud te hoc prom. & quid me inuitet? pietatem tamen sepono: an pecunia? nec exspecto, nec peto: an ambitio? fortassè minuiam aliquid de famâ aspectus, nihil ad eam addam. Quicquid sit, ætas mea & iudicium iam maturiora, à vanitate abhorrent: & fortassè in pompam ac speciem multa illâ dicenda, aut gerenda. Præcogitasses hoc, inquires, nec addixisses. Melius erat. sed tamen vel sic præstat ante viam sistere, & temerè aut calidè aliquid dixisse, quàm fecisse. Calorem tamen meum religio & pietas excusabit, quam Deo teste affirmo in oculis præcipuè mihi fuisse. Vale Reu<sup>de</sup> Domine, & hæc cum fratre tuo V.C. Petro Orano, id est, cum me altero participato. Lampsonium communem viam inisse audimus: Deus manibus eius propitius esto. Louanij, v i. Kal. Sextil. ∞. IO. XCIX.

## EPISTOLA XLVI.

*Antuerpiam.*HENRICO VVVENO I<sup>to</sup>.

**B**ENE est mi VVvene, benè est (nam familiariter & abruptè apud te ordiar) quòd in eandem sententiæ partem inecum venis. Improbare tibi significas iter Italicum, id què magis quàm magis cogitas: tibi autem? imò addo verè & seriò, amicis plerisque meis omnibus, cum quibus scripto vel sermone de eo egi. Quid autem alios nominem? ego ille paullò antè calidus valdè & destinatus, cum iustâ iudicij lance rem pondero, remitto affectum, & in rationis partem incipio propendere. Duo me maxime mouent. prius, quod & tu tangis, metum subesse ne veniam facilius, quàm me recipiam: & ne remora mihi illâ, aut & manus iniectio, per beniuolentiam fiat. Quod si esset; iuro tibi sanctè, vitalis non sim, & nullo modo mores, ingenium, vitam ad illud cælum & homines nunc aptem. En senesco, & cani spargunt

FFF 3

meas



meas genas : mutabo familiarem aërem , locum , victum , amicos ? omnia noua sensibus oculisque istis obiiciam , & in metâ pænè vitæ , noua vitæ spatia ingrediar & decurram ? Mihi crede , hæream aut deficiam iuxta ipsos carceres : neque nunc ad senile & compositum ingenium faciant , quæ voluptati erant olim. Pompam dico , & splendorem , & speciosa omnia : præ quibus maturus & iam frigans hic animus otium , secessum , tranquillitatem amat. Duæ pestes humani generis Ambitio & Auaritia , altera nec olim me cepit , altera iam à plusculis annis dimisit , & nec laciniâ me tenet. Quid cogitem , aut cupiam ? nisi paucos hos & extremos annos , id est , pauxillum vini mei reliquum , Deo libare & melioribus vtilioribusq. Musis , quatenus eidem Deo visum ? Huic fini quies mihi conuenit , nec concutere corpusculum hoc caducum , fragile , & velut putre ædificium , ruinæ iam propinquum. Enimuerò cogitavi & antea , fateor ; sed Spes illa blanda & insidiosa mortalibus diua , suggerebat ipso motu & mutatione valetudinem posse corrigi , fortassè & erigi in rectum & veterem suum statum. Suggerebat : sed cùm rei vicinus & viæ , me examino (secundum hoc quod me mouet , esto :) Deû testor , tam imparem me longo huic itineri , quàm nauigationi ad extremos Indos esse. Suscipere possum , patrare non possum , & in viæ quadrante deficiam aut subsistam. Hæc ita sunt : sed quare addixisti ? inquires. Nolle factum , vt liberè dicam : sed me & illorum , qui vocabant , benignitas induxit ; & mea item cupiditas (cui pietas mixta) prouexit. Suaue erat in cogitatione & animo , reuifere vîsa olim loca , tot vrbes , tot homines nobiles , & multos ex iis nobis amicos. Sit venia honesto desiderio : sit venia etiam impotentix , quæ ex sorte me effectus facit. Quid autem quòd ab ipsis mihi suggesta excusatio ? imò diserte iam bis scriptum , nequid adproperem , & metum ibi luis esse , ac iam fines & limina Italiæ infedissee. Vt nihil aliud sit , honestiùs aut certè prouidentius maneo , & iter totum si non tollo , iustè protollo. Quod autem tu mantellum etiam & velum aliquod ab Aulâ quæris , nihil est , nec eò iuerim : & transluceat hæc purgatio , & callidi illi demant à verâ facie hâc personâ. Itaq. in re maneamus , securi iudiciorum , si qua præter rem dabuntur. Extremum quod vel inimici dixerint , sic leuitas & temeritas : esto : malim dixisse aliquid temerè

aut

aut scripſiſſe, quàm feciſſe. Ibi pudor dumtaxat, hîc pœnitentia fit adiuncta. Vale mi amice, & ſeriò te ſcio mihi, & me tibi eſſe. Louanij, Kalendis ipſis Sextilibus. ∞. IO. XCIX.

## EPISTOLA XLVII.

Eòdem.

IO. VVOVERIO ſuo S. D.

**E**GÓNE vt de Galliâ tibi diſſuadeam? tum planè à me abeam, imò mentis meæ exſors ſim, & cum Homero, \* τὰς φρένας ἐκπεπαισμένους. <sup>\* mente capitis.</sup> Galliam, Galliâ in pectore amo, in ore circumfero: & quidni? bonarum artium amantem, & ideò mei quoque (vtinam meruerim!) diligentem. Illa verò tellus ingenia ſemper habet, plurimùm format: & ſiquid nunc incultum aut ferox, à trifti & \* πλωρίω iſto Marte eſt, qui nimis diu eos preſſit. Ipſa gens <sup>\* immani.</sup> facta ad virtutem, alacritatem, humanitatem: quâ poſtremâ ceteras orbis terræ gentes vincunt, certè vicerunt. Sed fuerint hæc \* σπουδαία καὶ ὀλέθρεια: beata Pax tranquilla omnia referat, & veterem iis indolem ac mores reddat. Eſt, aut erit: tu intereâ me auctore viſe, oblectare, diſce. hoc poſtremum ſeriò, nec ludus aut aberratio tibi ſit, peregrinari. Plato iuuenes in ſuâ Rep. ab eo arcebat, quia vix apti eligere, & nouiſſe quæ proſint: at ſenes non ire ſolùm, ſed mitti volebat, relatuſque ſiquid boni moris aut exempli uſquam eſſet. Hunc finem, hunc animum, etſi non annos, habe: & velut ſpeculatorem miſſum te cenſe, cum Diogene aliquo, ad res humanas explorandas. Splendet aliquid aut placet? accede, tenta, an verâ luce: & ſi illâ, mirare, aut adſume. Sordet aut iacet? calca, non ſolùm tranſi, & animosâ fiduciâ ad meliora abi. Vt rem tibi dicam, vbique vtrumque reperies: alibi crebrius, rariùs, bona, mala, mixta. Iuuet te, quòd iudicium iam (aut fallor) in bonam partem formaueris, & firmus ſtare poſſis contra vanitatem, non ſolùm prauitatem. O fac, & contubernio meo honorem hunc concilia, prudentiæ aliquid ab eo, non ſolùm ſcientiæ hauſiſſe. Si hanc ſolam; abdico, vt olim ſeueri illi parentes. Ceterùm de Italiâ, nolim vltrâ te aut me titillet. mihi exſtinctus ille ardor (ita enim fuit) à ſedatæ rationis quodam imbre: velim & te reſidere, nec meditari fortasſe vana rerum. Res ipſas quæramus: vinbras, pompas, breues ſtricturas, recto oculo videamus,

\* Urbi im-  
misit mor-  
buna tri-  
sem.

deamus, noscamus, spernamus. Testimonium, quale volebas, hñc habebis : de litteris fac nunc gratiam ; occupor , quã in re? extrema (ne percellere) & testamentum cum vxore meã iunctim con- do. Hoc vera sapientia iam olim fieri suasisit ; nunc etiam plebeia, postquam superus ille Apollo \* Νέσσοι ἀνὰ πόλιν ὤρσσε κακῶν. Itaque funera in oculis habemus , etsi per hos dies rariora , & mitescere malum videatur. Deus donet, & te quò tendis sanum ire, redire, & manere meum semper. Louanij, IV. Idus Sextil. ∞ . IO. IC.

## TESTIMONIUM.

**E**GO, si quidquam bonã fide, iam nunc testificor, hunc IO. VVOVERIVM è contubernio & domo meã adolescentem , mihi carum, Modestus, & Musis fuisse : quas semper coluit , & vitam ad optima præcepta , ingenium ad artes conformauit. Commendo seriò, bis seriò, quicumque illa amant : addam & verecundè , si quis me amat , vt factum huic velit. Fuco verborum nemini imponam, nec ipse morum : candidus est, bonis benè natus est , & siquid ad rem , in re bonã. Fauete, qui hæc legitis, & breue sed fidum elogium censete : quod à vobis amplius auferet, si noscetis. Louanij, IV. Idus Sextil. ∞ . IO. XCIX.

IUSTVS LIPSIVS.

## EPISTOLA XLVIII.

Bruxellam.

IOANNI DRENCKVVAIRTO , *Theaurario Belgij.*

**V**ALETUDO mea adegit, vt domum properarem : idq; breuiore viã illã Mechliniensis. Ita vos non vidi, nisi affectu & animo : quem quomodò non sæpè istuc mittam, magis magisq; beneficiis vestris deuinctus? Ingratissimus hominum sum, & dignus cui vel frons, exemplo Macedonici illius militis, inuratur. Balduinus tuus ad nos sanus saluusque rediit : hoc momordit, quòd non te talem reliquisset. Si vota nostra locum habeant, non illud modò sis, sed pænè dicam immortalis. Balduinum tuum scandere ad tituli illius apicem curabimus : atque vtinam breui ad ipsum illud culmen , quòd adspirat ! Ipse adnititur , nos alleuabimus : sed nihil propere, ne non ascensum sed ruinam sibi fruatur. Sicut aues matres non patiuntur pullos suos longius auolare,



lare, sed comitantur & sistunt, & docent : nos item hæc talia in nostrâ iuuentute. At te, Ampl<sup>me</sup> & Nobil<sup>me</sup> Domine, sanum & firmum seriò vouemus, publicâ & nostrâ causâ. Louanij, III. Idus Sextil. ∞. IOC.

## EPISTOLA XLIX.

Bruxellam.

BALDVINO IVNIO suo S. D.

**N**IHIL timidè ad me aut cunctanter scriptione debes accedere. cur facias? amo affectum, qui impellit: sed & ipsum illud scribere amo, quod te exerceat, me delectet. In alto otio es, etsi in negotiosâ & turbidâ vrbe: sed in quâ vana & ambitiosa multa rerum videas, nec pro mente studiis melioribus operatâ. Sicut terrâ interiectâ, Luna lumen à sole amittit: sic animus obnubilatur, interuentu isto viliorum rerum. Itaque meritò eas fugis, & ad nos adspiras. etsi es tamen in contubernio Amplissimi viri, tui auunculi: à quo haurias præcepta, & exempla item videas, ad Virtutem. Sed vt nunc tua ætas, Louanium & hæc Mineruæ dicata loca, magis tibi faciunt: redibis igitur, cum illi visum, quia lues fit rarior & mitior, imò pennas quaterere videtur, & à nobis abire (fiat, fiat) mala illa Diua. Censeo tamen Principum aduentum expectes, qui appropinquare dicuntur, vt solennia illa videas, nec visa tibi nec fortean videnda. Hoc suadeo. etiam illud, vt mentem & oculos ad libellos flectas, manum subinde ad stilum, ne otiosum tuum illud otium sit: id est, vt noster Seneca appellat, *hominis viui sepultura*. Vale. Louanij, xvii. Kal. Sept. ∞. IO. xcix.

## EPISTOLA L.

Eodem.

GVIL. SCARBERGERO suo S. D.

**B**RUXELLA te etiam habet haud dubiè, & dies fortasse aliquot habebit, in hac publicâ lætitiâ & pompâ, quâ vestra ætas, quid vestra? ferior etiam aliqua meritò delectetur. Sed vt te deinde Louanium nostrum, & domus etiam mea, habeat, id cupio: & hæc causâ scribendi. Reuise nos, non quia diu abfueris, sed quia fortasse abfuturus: & in antecessum, vt aiunt, consuetudinis



fuetudinis hunc fructum capiamus. Coràm de itinere tuo & meo consilio. De Italico quidem ne vltra cogita, tam periitquàm extrema faba, vt Comicus ille iocatur. Causæ nimis iustæ sunt. & vel sola tenuitas mea, & hic homo, vt sic dicam, monogrammus, pro mille. Par non sum, quicquid coner, quicquid cupiam: & non Italia, sed via mihi sit sepulchrum. Vale, mi Scarbergere, & quod dixi, & (si voles etiam) iussi, veni. Louanij, III. Non. Sept. ∞. IO. XCIX.

## EPISTOLA LI.

AD CONTVBERNALES SVOS,

Franciscum Oranum.

Cornelium Anchemantium.

Io. Baptistâ Peregrinum Baronium.

Joannem Vouerium.

Guilielmum Richardotum.

Balduinum Iunium.

Antonium Richardotum.

Philippum Rubenium.

Guilielmum Scarbergerum.

Hubertum Audeiantium.

**I**TANE de Potoribus & Edonibus scire auctis? & decorè hoc poscitis? Ita. quia in Scholâ etiam differui in occasione, vt dicitis: & velletis rariora ista exempla in promptu habere, non ad imitandum, sed narrandum. Addam ego, & detestandum. nam sic oportet. monstra hominum fuère, qui huc se dedere, etsi in theatris & regijs etiam spectati, cum fauore suo & plausu. Sed videamus igitur primò Potores, & istos, cum poetâ prisco,

\* Conuiuij  
nautas, &  
calicum re-  
miges siue  
trahones.

\* Συμπόσια ναύτας, καὶ πωλίων ἐρέτας.

Proludo autem leuiter & vniuersè de toto genere: quos vbi & quando non est inuenire? In veteri & nostro æuo, in noto & nouo orbe videas: & Plinij dicto, nullâ in parte mundi cessare ebrietatem. Nec vina solum huic rei expeti, sed aquam adsumi: ô sagacitatem ingenij! quâ repertum, vt hæc quoque inebriaret. Frugibus corrumpi variè eam fcis, & herbis, & melle: quid quòd & fumis atque odoribus alibi (de Peruanâ Indiâ scribunt) inducitur alienatio hæc mentis? Quacumque viâ, madescere tamen volunt & desipere: ac pro plurium mente ille apud Comicum sentit:

—— τὸ δὲ ζῆν

Εἰπέ μοι τίδ' ἔστι; τὸ πίνειν γὰρ, φημι ἐγώ.

Antipha-  
nes apud  
Athen. li.  
bro I.

Ορᾶς παρὰ ρείθεσι χαιμάρροις, ὅσα  
 Δένδρων αἰὲ τινὺ νύκτα καὶ τὴν ἡμέραν  
 Βρέχεται, μέγας ὅ καὶ κάλλος οἶα γίνεϊ.  
 Τα δ' ἀνπτέοντ', οἶονεὶ δ' ἔσαν πναὶ  
 Ἡ ξηροσίαν ἔχοντ', αὐτοφρεμὺν δ' ἀπύλλυται:

—sed vivere

*Quid tibi videtur? mihine: bibere, ego inquit.*

*Videsne ut, ad fluentia consistæ arbores,*

*Et quæ diebus perpetim atque noctibus*

*Rigantur, alto stipite & lætâ comâ*

*Cælo minentur? contrâ, quæ velut sitim*

*Patiuntur, has perire cernas stirpitus.*

Plures, inquam, consentiunt: imò velut ad palmam currunt in Dionysiaco hoc agone. Qui olim eam populariter tulerunt, Platonis iudicio sunt *Scythæ, Thraces, Celtae, Iberi*: nec vel hodie id culpes, nisi fortè in Iberis, qui demutarunt. Sed bellum, quod de iis etiam addit: *Σκύθαι & Θράκες ἀκράτω παντάπασι χρώμιοι, γυναι- κες τε καὶ αὐτοί, & καὶ ἡῖς ἰματίων καταχόμιοι, καλὸν καὶ ἔνδοιμον ὀπιθήδαιμα ὀπιθήδαιμα νενομήκασι: Scythæ & Thraces meraco vino passim utentes, viri atque etiam faminae, & in vestes sibi defundentes, bellam & beatam vitam vivere se censent.* Quid ais? agnoscísne hæc & in nostris moribus? non etiam illud de effusione? quâ bibuli isti v- tuntur, siue cùm recusanti alteri poculum in sinum vestis proii- ciunt; siue cùm ipsi avidè bibentes, suum stillatim perfundunt. Sed Græcos tuos Plato quid ita omittis? scimus & eos in hac classe, & proverbio innotuisse. Etiam Diui Basilij reprehensio- neacri, quâ mores sui ævi ita corrigit, ut tamen reuelet. *Bibunt,* inquit, *avidè & comessantur, & propinant*: sed bellum acroama, *ποροῖοντ' ἡδη τὰ πρότε, ἐπεισέρχεται τις αὐτοῖς νεανίας, γυναιὶ & τὰς ὤμας, & πω μεθύων, φιδάλω φέρων εὐμαγέτη οἶνον καταφυγμένον, ὃς τὸν οἰνοχόον αὐτῆς παρ- ωσάμενος, κατὰς αὐς εἰς τὸ μέσον, δέξ' σκολιῶν σκολιῶν ἴστω τοῖς συμπόταις δεινέμεν τὴν μέθλην. διδόμενοι γὰρ τὰς ὑδρορροίας, καὶ τὴν πρὸς ἑαυτὸν ἔκαστος τε- ξαμένειν ὑποδέχμενος, ὡς περὶ ἀπὸ πνὸς δεξαμένης ἀπνῶς ἰπίνασιν, ὡς οἱ βόες, ποτὶ τὸν ὑφέλκεν ἐπειγόμενοι τοῖς λαιμοῖς, ὅσον αὐτοῖς ἀνωθεν ὁ φυκίης δέξ' ἡῖς ἀργυρέων ὀχετῶν ἐπαφίνοι: potione i. m. longius progressa, intrat ado- lescens aliquis, validis humeris, & nondum ebruius, vas magnum fe- rens & sustinens vini refrigerati. Atque is propulso ord. nario pincernâ,*

De Plan-  
tat. Noë.\*Duode-  
cim pocula.

Lib. x.

*in medio adstans, per obliquos canales quosdam, equalem omnibus distribuit ebrietatem. Partiti enim tubos illos, & ad se versum quisque accipiens & excipiens, tamquam è cisternâ vno spiritu bibunt, prorsus ut boues: adaeti tantum in guttur adtrahere & demittere, quantum supernè vas illud per argenteos si'anos siue canales infundit. O bellum morem! ô Græcis illis elegantibus dignum! tam herculè quàm alter iste (iuuat commemorare, vterque nouitius nobis est): alter inquam Philoni expressus, & apud stirpem illam Græcorû Alexandrinos vsurpatus. Certant vino, inquit, bibunt conferim & vix spiritum recipientes, cùm identidem pueros à poculis iubent infundere. & si vel leuiter tardent, acriter increpant, quòd calidum ijs (sic loquuntur) frigefaciant. Denique in pulchro hoc certamine μετὰ καλὰ ἀνδράσις ἀντιπρόσσωπον, ὅσα, ῥίνας, καὶ χειρῶν ἀκροὺς δακτύλους, καὶ ὅποια δ' ἀντὶ τῆς μέρης τῆς σώματος ἀπεδίδοντες: magna & pulchra inuicem patiuntur & faciunt, aures, nares, manuum extremos digitos, & siquam aliam corporis partem fors tulit, sibi mutuò prærodentes. O non amentiam, sed insaniam! & fidem mihi aliquis habeat, nisi ipsa verba fidei auctoris adnumerem? Vide autem blanditias. nam sic ego interpreter: & suaues isti compotorculi, vino madidi, sensuum inopes, ita se comprimunt, distrauantur, allambunt. Dij deæque, quid irati aut hostes aliud faciant? Sed populos omitto, ne meos fortasse opus habeam tangere: viros videamus (is enim præcipuus noster tunc sermo) & qui singuli fortiter certarunt hoc certamen. Ecce Alexander Macedo olim, ipse quoque vini audus & capiens, & addam, suo & alieno malo captus quoque, is dico præmium aliquândo publicè proposuit ἀνὰ ἑποσίας, siue meri potionis. Ludos rege illo dignos, qui per Liberi vestigia ibat scilicet, & hunc quoque honorem ei habebat. Ipse igitur editor & arbiter: certant plures. sed qui plurimum hausit (ait Plutarchus) Promachus quidam fuit, qui ad\* congios quattuor peruenit. Congius cepit olim libras decē circiter, siue sextarios sex: essent nobis tria vini pocula, largè. quod autem premium? talentum. quod etiam? mors. quæ homini post triduum aduenit: itemque aliis quadraginta & vni, qui miselli super vires certarant. Felicior alter apud eundem regem, in eodem isto vini modo, Proteus Macedo. qui, ut Ehippus scribit apud Athenæum, valido & sano semper corpore egit, etsi vino adsiduè immersus. Fuit aliquando, inquit, ut Alexander in con-*

uiuio



*vinio grande poculum posceret duorum congiorum, atque id Proteo offerret. Ille gratanter accipiens, & regem comitatus laudans, cum plausu omnium ebibit. Ac subinde idem poculum repetens, iterum eduxit, & obtulit impletum Alexandro. Quod hic quoque suscipiens ebibit, sed impar viribus non sustinuit, & in pulvinar reclinato poculum è manibus est elapsum. Vides & hunc Quadricogium potorem: & vix est vt supra donem. Nam Plinianus ille Nouellius Torquatus Mediolanensis (Gallus fuit, vindicemus hominem cum hac gloriâ) tres dumtaxat congios bibit: sed quod miremur, vno impetu, (Plinij verba) spectante miraculi gratiâ Tiberio Principe. Hem, vno impetu, id est *απὸ μὲν*? Et quod amplius miremur, in eo (iterum Plinij verba) rara hæc gloria, non labasse sermone, nec leuatum vomitione, non alterâ corporis parte, dum biberet: matutinas obisse vigilias: plurimum hausisse vno potu, plurimum præterea aliis minoribus addidisse: optimâ fide non respirasse in hauriendo, neque exspuisse, neque ad elidendum in pavimento sonum ex vino reliquisse. O potorem omnibus numeris perfectum! quis contendet? non tu Cicero fili, qui duos congios simul haurire solitus: sed quid ad hunc aut priores? Abi proles à patre degener, & nec in vitio fatis fortis. Firmus nominetur potius, qui Aureliani temporibus in Ægypto imperium vsurpauit. Is *vi-**

Lib. xiv.  
 Nat. Hist.

Spartian.

*nini non multum bibit, aquæ plurimum; mente firmissimus, nervis robustissimus. & tamen cum ad bibendum à notissimo quodam potatore, Barburo, prouocatus esset, situlas duas plenas mero duxit: & toto postea conuiuio sobrius fuit. Cui non dissimilis Bonosus, item inter minutos tyrannos, qui, vt Spartiani verba sunt, bibit quantum hominum nemo. De quo Aurelianus sæpè dicebat, Non vt uiuat natus est, sed vt bibat. Quem tamen diu in honore habuit, causâ militiæ. Nam si quando legati barbarorum, vndecumque gentium, venissent, ipsis propinabat vt eos inebriaret, atque ab his per vinum cuncta cognosceret. Ipse quantumlibet bibisset, semper securus & sobrius, & vt Onesimus dicit scriptor vitæ Probi, adhuc in vino prudentior. Habuit præterea rem mirabilem, vt quantum bibisset, tantum mingeret, neque vquam aut eius pectus, aut venter, aut vesica grauaretur. Is ipse cum, victus à Probo, laqueo vitam finisset, ioco locum dedit, Amphoram pendere, non hominem. Infelix quidem in Martis militiâ, fateor; sed hac Bacchi mirificus, & iuxta vel supra Torquatum Tricongium illum ponendus. Quid autem de Camatero Logo-*



thetâ pronuntiabo, qui Manuelis Byzantini Imp. ævo & rebus interfuit? nam & is palmam sibi poscit. Nicetas Choniates de eo: *Ingenio præstanti fuisse, eloquentia extemporalis studiosum & felicem: sed eundem omnium mortalium edonem & bibonem maximum. Et quamvis vinum avidissimè & largissimè sumeret, & spongiarum instar maderet, tamen mentem non mergebat ea copia, sed pedibus, capite, linguâ constabat, ut sobrius, imò crescebat in eo ratio & oratio velut igne illo humoris accensa simul & irrigata.* Hoc genere vitæ non solum Imperatori acceptus erat, sed & gentium dynastis. ad quos Legatus missus, alios in soporem collocabat, alios æquabat potionum veteres, quique amphoras, ut calices, digitis versare soliti essent. Sponsionem verò aliquando cum ipso Imperatore iniit, exhausturum se vas Porphyreticum aquâ repletum: quod olim in aulâ subdiali Nicephori Phocæ fuit, nunc visitur in huius Michaëlis cœlani aurato, quod struxit. Demiratus Imperator, Euge, inquit, ô Logotheta. vestes floridas, & minas aliquot auri accipies, si faxis; sin autem, ipse dabis. Ille nihil moratus, vas illud, quod ad duas chœas siue congios capiebat, corpore & capite inclinato, instar bouis, totum simul exhausit: & accepit statim ex pacto promissa. Quid dicitis? non hic palmam, ut aiebam, iure suo poscit, & quidem duplicem: non vini solum, sed aquæ singularis potor? Et ecce iam huic aut prioribus dabam: sed è Germaniâ superuenit qui reuocet, & quidem nouus nouitius athleta. Nuptias ante pauculos annos in Norico fuisse audio viri nobilis. ibi ad conuiuas hilarandos, certamen potionis propositum editumque, inter eorum ministros. Magno numero conuenerant: sed vnus forticulus paullò minus\* sex congis, haud longâ morâ, fertur ebibisse, & simul præmium meruisse. A me quoque, ô homo anorca, accipe: & fateor nihil simile vidisse, audisse, legisse. In vno quidem isto potionis genere. nam Edones magnos, & simul pottores, repperi fortasse, & super istum. Videamus. Mulier Alexandriæ olim fuit, quam Athenæus prodit, *Libras carnis duodecim edisse, panis quattuor chœnicas, id est totidem & amplius librarum; vini autem congiū adbibisse.* O mea Venus, ô delictum, bella es & digna marito, sed Vulcano. Super hanc longè (quid in viro mirum?) Imperator Maximinus. quem Capitolinus auctor, *bibisse sæpe in die vini Capitolinam amphoram: comedisse & quadraginta libras carnis; ut autem Cordus dicit, etiam sexaginta.* Scitis, quid illa  
amphora?

\* Othod-  
cimpocula.

*amphora ? quadraginta octo sextarios capit : id est , ipsos Congios octo. Trepidarem hæc dicere : sed bonus & priscae fidei auctor adserit , quam ego non fugillem. Sed audi & crede etiam maiora. Vopiscus in Aureliano principe : Vebementissimè, inquit, delectatus est Phagone. qui vsque ad multum comedit , vt vno die, ante mensam eius, Aprum integrum, centum Panes , Veruicem & Porcellum comederet. Clamas, & resilis ? sustine etiam : biberet autem, infundibulo appposito, plus Orcæ. Cetera liquent : de Orcæ, scio vas vinarium fuisse, & amphorâ sanè maius, sed quantum, mihi latet. Quid Clodius Albinus Imperator ? is, Capitolino scribente, tantum pomorum hausit, quantum RATIO HUMANA non patitur. Nam & quingentas ficus passarias, quas Græci Callistruthias vocant, IERIVNUM comedisse, Cordus dicit : & centum Persica Campana, & Melones Ostienses decem, & vuarum Lauicanarum pondo viginti, & Ficedulas centum, & Ostrea quadringenta. Hem, hem!*

— *dij talem terris auertite pestem:*

certè à nostris hortis, quos ille cum toto foro olitorio depascatur & vastet. Scio vos etiam nunc vacillaturos, & <sup>\*ἐποχῇ</sup> quâdam v-<sup>\*inhibitione.</sup> furos in assentiendo : & dedi tamen testes, dignos credi. Vultis & exemplum à superiore paullum æuo ? nam vetera nunc ferè hoc fatum habent, vt etsi vera, vix videantur : an sui magnitudine, an nostrâ declinatione. Sed addamus non tale aut tantum ; quod tamen venire in numerum possit. *Vguccio Fagiolanus* inter Italiæ tyranniones fuit, & sedes ei plerumque Luca, donec pelleretur. Exsul igitur & iam senex, apud Canem Scaligerum, Veronæ gloriabatur in mensâ : *se iuuenem quaternos capos altilis, & totidem perdices, item hædi clunes assos, & vituli insarctum pectus, præter salsamenta, vnâ in cenâ esitasse.* Atque hic homo non in præmium, sed in vsum & pellendæ fami faciebat : quid si exercuisset se, & nervos intendisset ? Satis talium. ite prodigia, & istos gurgites, pænè dicam, maris aliquis gurges mergat. Louanij, in nostrâ domo : quam quo fine incolitis, vt hunc tangatis, Deum precor.

## EPISTOLA LII.

*Bruxellam.*BALDVINO IVNIO *suo* S. D.

**E**CCE ad ipsum auunculum scripsi, & metum ademi, qui te à nobis amouit. Quid superest, nisi vt iterum te adinu-  
ueas, & Deas reuifas, quarum amore cales? O gratus ille mihi,  
ô tibi utilis affectus! & quid in hac ætate melius potes, aptius  
potes? Cole, cole nunc istum adolescentiæ agrum, bonâ fruge  
scientiarum confere: & maturior, accipies suaues illos Pruden-  
tiæ, imò & Sapientiæ, fructus. Miseros, qui aut nolunt, aut neg-  
legunt! miserandos, qui cum velint, non possunt! At tibi facul-  
tas inprimis adest, & alter ille tuus parens (scis me Thesaurar-  
ium dicere:) vberim suppeditat, quicquid studiis, & eorum  
instrumentis, est opus. Voluntas à te est, atque etiam in te est,  
quod gaudeo: vt serues, vel vt augeas potius, hortor. Mihi  
hoc crede. perueniet ad optatam calcem, quisquis seriò volet  
& niretur: & talibus utroque oculo Iuppiter annuit, Mercu-  
rius dirigit, ipsa Minerua manum & mentem iis, & cum iis,  
mouet. Abripior, & Scarbergerus abit. Louanij, pridie Idus  
Septembr. ∞. IO. XCIX.

## EPISTOLA LIII.

IOANNI DRENCKWAIRTO *Thesaurario.*

**S**CRPTIONI huic nullum argumentum est, nisi affectus  
smeus & mos maiorum. Vterque suadet, vt vota, quæ pro  
salute tua corde facimus, stilo consignem & ad te perferam: sed  
priùs ad illum calidè missa, qui compotes (ita spero) faciet voto-  
rum. Deum igitur rogo, quantum animo possum, vt hunc Sæ-  
cularem nouum annum felicem tibi tuisque decurrere, te valere  
per eum & vigere, Principibus & Reip. sine offensâ vacare, me  
amare donet, qui sum perpetuus & deuotus tuus cultor ac cliens,  
Louanij, postridie Kal. anni IOC. supra ∞. Balduinus tuus  
apud me valet, quod facere eum vis facit.

EPI-

## EPISTOLA LIIII.

*Mechliniam.*IOANNI BERNARTIO *suo* S. D.

**E**CQUID agis, mi Bernarti? Rarò, inquires, interrogas. Fateor, & ignauum me cum annis fieri, hoc quoque fateor: sed non in amore & interiore affectu remissum. *Omnia fert ætas*, ait ille, *animum quoque*. Sentire incipio, & ingenio tam diu, tam assidue exercito, torpor aliquis adgnascitur, & quod libenter facit, impromptè facit, aut nec facit. Ignosce. ita tu & tui ad æui hanc lineam veniatis, aut potius superetis, beati & felices. Quod precor tibi religioso & prisco voto, in auspicijs huius anni: quo me Italia sibi spondebat, & ego me illi: sed, ô numen quod nos temperat, quàm irritâ destinatione! In patriâ hæreo, neque res tantum abiit, sed desiderium, vt verum apud te liberè loquar. Et si assidue litteras etiam nunc recipio inuitantes, & nimîâ benignitate prouocantes. Sed quid verbis opus? Fatalem vim magis & magis indies agnosco, in publicis, in priuatis, in meipso. Ratio omnis vellet fortassè non peregrinari me, sed abire: tamen maneo & video diuinitus decretum, LIPSIVM IN BELGIS MORI. Fiat. apud multos incuriosos mei, paucos contemptores, fortassè & nonnullos æmulos: sed & amicos volentesque alios, inter quos *te* Mechlinia & *Oudartum* meum cum *Hartio*, sacra mihi nomina, habet. Eandem urbem vestram & iste insidere parat *Vibrandus Anskema*, Iurisconsulti nunc titulo donatus, iam olim inter Musarum cultores, imò etiam mystas. Vtrâque oratione valet solutâ & vincât: quod magis ex illo noto, nosces, atq. vt velis te rogo. Louanij, postridie Idus anni Sæcularis ∞. IOC. Vxori tuæ suauissimæ salutem per te nuncio, & liberis tuis.

## EPISTOLA LV.

*Gandauum.*

GEDRONI TSERHENDRIXIO, V. R. &amp; N.

**F**VNGOR munere salutationis per litteras, quoniam coram id non datur, vt solet, & quod mihi dolet. Suauis sæpè confabulatio nostra, & præsertim in re hortensi: quâ vterque delectabamur. Tu magis, quia solutior eras, & pænè sine alijs curis vacabas

HHh

bas



bas huic curæ. At mihi temporis iniuria omnem pænè hanc voluptatem deterfit. dico temporis, non ad spectu ad ista publica & tristitia ( quæ mitigo potius hac occupatiunculâ: ) sed hiemis iniuriam & acrimoniam intellego, quæ mihi hoc biennio funera continuata dedit, & florem omnem, vt sic dicam, florum meorum interfecit. Quicquid singulare erat, præsertim in Tulipis, habuisse me recordor, cum desiderio tristi & pungente. Miserris me? nolim, adiua potius, & quoniam diuitem atque vberem te audio, instar vel Phæacum regis, participa veteri amico, & qui in beneficij magni loco hæc, etsi fugacia, munuscula ponet. Confido te facturum. Certè si in causâ simili tu à me, vtrâque manu largiter ego donem. Nunc salutem, & hunc animum semper deuinctum. Louanij, postrid. Kal. Mart. ∞ . IOCI.

## EPISTOLA LVI.

*Mechliniam.*

NICOLAO OVDARTO V. R. S. D.

**S**OLEO volente animo, labente manu & pennâ ad te scribere, nunc ille contrahitur, & hæc resistunt. De republicâ me consulis: & quid scribam aut effabor? Istud mallet, & in tuum sinum interiores omnes cogitationes effunderem: à scribendo absterreo, & nimis iustas habeo causas. At Princeps vult, inquit amicus ille noster. Credo equidem, & eius certè interest fida & recta consilia dari: sed ego me in eâ classè non censeo, qui hoc statu rerum debeant aut possint. Adde quòd à republicâ remotus sim, auditione aliquid accipio, interiora rerum non noui: & quid ergo firmiter aut ex vsu suadeam? haud magis quàm medicus, qui egri sui temperiem & constitutionem ignoret. Vota tantùm possum addere, quid si & querelas? Hic quidem cottidiana materies, cum miseri rustici præter ora nostra victi abducuntur, haud aliâ specie quàm si hostes irruissent. O patria, ô ipsi Principes! nam vt illius salus agitur, sic dignitas istorum. At enim mox remedia à publico Ordinum conuentu . . . . .  
 . . . . . Ecce quæ possum aut volo hoc tempore. interea Deus illi Episcopo benè faciat, & nostro N. quorum vterque candidè & liberè, quæ ex vsu sunt, aut certè vi-

tè videntur. Nam quid asseram? omnia ista mihi tenebræ sunt, nec finem aut fructum video eiusmodi actionum : nisi si qua consilia specie tristitia, exitu læta, vt sæpè in humanis solet. *Occultat enim*, vt Plinius ait, *vtrorumque semina Deus, & plerumque bonorum malorumque causse sub diuersa specie latent.* Plinij illius Panegyricum librum breui à me videbis: & vetera illa monita ac consilia potius, quàm mea noua. At quis vsus? inquires. alibi fortasse, & vbi nolim. Quid faciam? nos, vt in theatris olim, spargimus: ille aut alius sinum aut manum implet. Vale mi optime Oudarte, & vide an malè illi (si sic pergitur) qui me nuper. sed tu iterùm vale. Louanij, Idibus April. ∞. IOC.

## EPISTOLA LVII

Bruxellam.

FRANCISCO BILLIODO S. D.

**N**IHIL minus quàm à te beneficium, aut potius beneficia, expectabam: quæ largiter, vtrò, & aperto animi sinu, mihi defers aut offers. Nam & nummos ad me mittis, ad textum aut supplementum Rokoxianis: & florum etiam lectissimos ex paterno tuo horto polliceris. què ille instructum, vt audio, & supra omnes Alcinoos pænè habet. Negem vtrumque mihi gratum esse? mentiar. gratissimum est, & pro veteri atque infito animi mei desiderio & sensu. Veteres omnes elegantias, & has Antiquitatum reliquias à me amari, notum est omnibus, qui leuiter me norunt: sed & flores & horti ornamenta in deliciis haberi, non puduit scriptis etiam publicè profiteri. Itaque vide libertatem & candorem, quo iam nunc apud te vtor in ipso hoc aditu amicitiae. grata, quæ misisti; grata, quæ mittes: arque vt mittas in Vere proximo (vix enim antè euellendi copia) non rogo te sed appello. Quid enim rogem, iam debitorem? Sed extra iocum. scriptio tua mihi in animo placuit, qui eam amicitiae conciliandæ esse voluisti: quam purè & sine fraude equidem offero, amans honesti animi tui, & ad honesta sic propensi. Eum vt in illa & in me talem serues, Deum & te rogo. Vale. Louanij, post. Idus Nouemb. ∞. IOC.

## EPISTOLA LVIII.

*Mechliniam.*HADRIANO VANDER-BURCHIO, *Filio, Senatori.*

**B**ENIVOLE à te factum & pro amico, quòd me & dignitatis tuæ & discessionis gnarum fecisti. Ego enim seriò tibi recipio, & fautorem me esse incrementis tuis, quæ virtus & ingenium conciliarunt : & vota interpono, ut plura adstruantur, quod in Principum gloriam & publicum bonum cedit. Illis & huic convenit, tales euchi & educi. Hortor autem te vel ex superuacuo (nam sponte facturum confido) ut in isto munere dignum te & parentibus, & ipso te præbeas; denique iustitiâ illâ, cuius sacerdotium nunc profiteris. Ecce in istis meis, quæ in simili occasione & argumento iam scripsi, si quid erit huic rei aut sensui, videbis, eliges : & hoc sine missi. Vale Vir Cl<sup>me</sup>, & animo à nobis non abi. Louanij, XI. Kal. Nouemb. ∞. Ioc.

## EPISTOLA LIX.

VIBRANDO ANSKEMA S. D.

**T**V verò iacere mihi videris, aliter à studijs tuis expectatum. Tædet status huius præsentis, & avidè mutes. quid? itane pessimus ille & abiiciendus est? mihi non videtur: nisi ei qui lucem, honorem, alta, id est mala quarit. At egote in nostrâ hac quietorum classe censebam, ut

— *secunda placerent*  
*Otia, nascentes quæ irent in secula libri.*

Transfuga es, & ad splendas illas partes abis? Splendidas, sed miseras, & in experimento demum scias. Non volo, inquires: sed à tricis imò forensibus istis liberari, & bonâ fide Musis operari. Velim mi Vibrande: & si tu sic seriò, etiam illuc potes. Pater quod ad vsum, & tolerandæ honestæ vitæ sit, affatim suppeditat. Si te excutias (liberè loquar) alium in hoc vlcere vnguem reperies, & mixtum aliquid à cupidine fortassè non bonâ. At tempora etiam accusas. Facile est, & quis non tecum? pretium non est artibus bonis, non ipsis bonis, & hæc omnia præferuidis & ambitiosis calcantur aut iacent. Vera sunt. sed in terrâ tu purum illum ætherem, & serenos semper animos, expectas? non

inue-

inuenies. nimbos magis, procellas, calumnias: & mihi crede, nos quoque (quibus aliquis inuideat) largiter & crebro sumus his iactati. Iactati, sed non afflicti: stetimus, & illud Pindaricum obmurmurauimus:

\* — ὁ μέγας δὲ κίνδυνος ἀναλκιν φῶτα ἐλαμβάνει.

Ignauī & viles magis tuti ferè & sancti sunt: alij prouocantur. sed nimirum vt arancarum casses animalia fortiora perrumpunt, sic istos à Fortunâ laqueos mens robusta. Aliqua tristitia, & quæ nolis, incidunt:

\* — τίς δ' ἐπὶ πᾶσι θεῶν.

Ἀ' παντ' ἀπ' ἡμῶν τὸν δὲ αἰῶνος χεῖρον;

Sicut stellæ in tenebris etiam fulgent; sic liquidus & libens viri sapientis animus etiam in istâ temporum caligine aut nube. Hæc solatia: nec auxilia tamen abnuo, quæ in meâ quidem sint manu. Quæ tu quod tam prompta censes, nimis falleris: nec fores vbique, non dicam commendationi nostræ, sed mihi ipsi apertæ. Occasio expectanda est: & præuertere aut facere eam, vereor vt succedat. obsecro te, nobis hoc crede,

*Qui periti sumus in vitâ, atque vsu callemus magis.*

Vale autem, & animo ne sic fluctuare: certus, quod millies milleni in hac ipsâ Belgicâ sint, qui optrent & reges sibi videantur in tuâ sorte. Louanij, v. Idus Ianuar. ∞. 1001.

Vxorem saluto.

## EPISTOLA LX.

*Vltraiectum.*

HADRIANO VANDER-BVRCHIO, patri.

GRATVM accidit mihi & munus tuum, & scriptio, vtrumque veteris in me animi testis. Est sanè hoc in fido amore, & qui in virtutis, vt sic dicâ, solo radices egit, vt nō magis quàm illa desinat, & æuo ipso crescat & viresumat. In tuo experior: sed & fratris Decani, quem viuere & vigere, etiam in silentio aliquo, mihi liquet. At munus tuum parte aliâ etiam gratum, quod ostendit te nec in occupationibus, quas assiduas habes, nec temporū hoc tædio aut caligine, deferere nostras illas Deas: quas pauci hodie æstimant aut amant. Gaudeo: & scio, præter honestam voluptatem, etiam lucem, & robur aliquod animo



ab iis inferi aut præferri, ô quàm necessarium in hoc æuo ! Frue-  
re, vt fecisti, & facis; sed & nos earum atq. honesti omnis aman-  
tes ama priscâ fide. Louanij, vi. Kal. Decemb. ∞ . IOC.  
R. V. fratrem tuum saluto, & Canterum veterem nostrum.

## EPISTOLA LXI.

NICOLAO HACQVEVILLIO S. D.

**A**D Historiam cum dare te cœpisti, fateris hæere in primâ  
viâ, & confusione rerum aut temporum, ignorantia eor-  
um quæ & quando legenda aut eligenda sint, pedem figere, imò  
tædio aut desperatione pænè referre. Non fiat mi Hacqueuilli.  
opem imploras, pro copiâ meâ dabo : & si non plenè ductor (oc-  
cupatio & valetudo nunc abnuunt : ) tamen director ero, & di-  
gitum intendam, quò & quâ contendas. Historia nobis propo-  
sita : quæ, & cuiusmodi ? nam variat : & summa eius diuisio est,  
*Mythistoria* & *Historia*. Illa, quæ fabulas vero mixtas, ista quæ  
purum & merum verum habet. In illâ poëtæ sunt, & id genus:  
qui oblectamenta auribus animisquæ quærunt, & floridâ istâ ve-  
ste ornant & augent corpus hoc veritatis. Veteres poëtæ, & rex  
eorum Homerus, pulchrè & sæpè vtiliter fecerunt : cum arcanos  
sensus aut altiora dogmata hoc quasi velo obnubunt & tegunt.  
Sed hanc partem mittamus, non nunc adeundam : altera est ve-  
ra *Historia* : quam licet bifariam partiare. Est *Naturalis*, est *Nar-  
ratiua* : sit venia sic loquenti, planè, si non purè. Illa est, quæ na-  
turæ faciem & facta reuelat, id est, rerum, stirpium, animalium  
ingenia, proprietates, vires tradit. Aristoteles, Theophrastus, *Æ-  
lianus*, Plinius fecêre : & plures, quos æuum nobis subduxit.  
*Narratiuam* dico, quæ res gestas actionesquæ prodit, sacras siue  
profanas. Ideoque à duplici hac materie iterum duplex, *Diuina*  
& *Humana*. Illa, quæ religionem, aut quod adhæret, tangit: hæc,  
quæ res plurimum actionesquæ humanas. Iterumquæ ea duplex,  
*Prinata* & *Publica*. Nam aut singulorum res, vitam, virtutes, vi-  
tia recenset : & Priuata est. aut quæ publicè, plurium vsui aut  
noxæ, sunt gesta : & Publicam appello. Omnes viles. propriè  
tamen & distinctè, Naturalis scientiam, Diuina religionem, Hu-  
mana prudentiam, omnes delectationem habent. Ad quas au-  
tem

tem te voco? velim ad omnes ire, sed in tempore. *Naturalem* nunc seponamus: *Narratiuam* ingero, quam vulgò & peculiariter Historiam etiam appellamus. Ad hanc priusquam venias, duo præmittenda sunt, *Geographia* & *Chronologia*. Illa, vt locorum, regionum, vrbiū notitiā aliquā concilies; hæc, vt temporum, quibus quæque res gestæ. Sed communem dumtaxat, & non illam exactam notitiā exigo: satis sit mundi partes situsque distinguere; prouincias, & in iis flumina, montes, opida clariora nouisse. In temporibus etiam, seriem eorum & ordinem tenere, & velut terminis quibusdam finire imperia, bella, euentus. Velim equidem, & tacitus sæpe opto, imò ipse imitor, esse qui breuiter & compendio, & quod caput est, iudicio, ab orbe condito velut Fastos concinnet: nec aliud quàm annos, & præcipua rerum, notet ac libet. Qui hætenus fecêre, aut confundunt nimis, aut diffundunt: & nec notabilia aut laudabilia tamen maximè excerpunt. Sed hoc dum fiat, potes Eusebio vtī, & nouellis quibusdam, qui herè & nuper prodierunt. Atque ista cū parauimus, age ad ipsam iam Historiam: & quam præmittimus? pietas vult *Diuinam*. Facilis ea est, nec diu tenebit. *Judaica* vetus est, è libris sacris. Iosepho, & eius interprete Hegesippo petenda: nostra hæc noua, id est *Christiana*, olim ex Eusebio, Sozomeno, pluribus, nunc ex vno Cæsare Baronio adfatim haurietur: & quid in diligentia viri tantā deest? Imò vt supersit, vereor: iis vtique, qui ex professō Theologos non agunt, & sufficit vniuersè initia, progressum, diffidia, capita & antistites religionis nostræ scire. Non abnuo. compendium bonum exactissimi illius laboris sit, non sit fortassè bono auctoris. Est & *Miscella* religionis historia. vt Mahumetanæ, quæ magnam orbis partem, à multis iam sæculis, obtinet; vt Sinenfium, Indorum, & qui alij vanam & simulacris feruam eam habent. Hæc quoque carptim quis neget viro Politico & experienti libanda esse: sed vt dixi, carptim. *Humana* superest: illa præcipua quò te voco. Præter prudentiam & rerum peritiā,

*Hæc tibi virtutum stimulos, hæc semina laudum,*

*Hæc exempla dabit:*

alibi vberius laudata & laudanda, nunc præeunda. Duplicem eam feci, *Privatam* & *Publicam*. Ab utrâ ordiemur? A *Publicâ*

ego cenſeo: & hæc, ordinis doctrinæque cauſſâ, quadruplex iterum eſto. Valdè, inquires, diuidis. Fateor. nec animi vel argutiarum cauſſâ: ſed quia vſu didici, nihil ad methodum, id eſt viam rationemque docendi vel diſcendi, aptius & efficacius eſſe. Itaque Socratem ſequor, Diuiſioni amicum: & cum illo, *diuinum virum habeo, qui commodè & oportunè vteretur*. Sed ad rem, quadruplex hæc Hiſtoria: *Orientalis, Græca, Romana, Barbara*. Prima, quæ primi aut priſci orbis res habet: cùm noſtra hæc omnia inculta, aut infrequentia, & certè obſcura & ignota. Itaque in Iudæis, Ægyptiis, Æthiopibus, Syris, Perſis, reliquâ Aſiâ, res ferè & nobiliores euentus tunc ſiſtunt: aut ſiquid admixtum, leue eſt, nec ſcriptione aut lectione diuellendum. Hanc primò noſci ſuaſeam: & peti à *Iuſtino* breuiter: vberius deinde ab *Herodoto*, *Diodoro Siculo*, & ſiqui Græcorum eam ſuis miſcent. Quædam enim *Polybius*, *Plutarchus*, *Zonaras*, alij ſuggerent, huc apponenda. Sed Diodorum ego laudo & approbo: vtinam plenum &, vt ſcripſit, abſolutum. Altera eſt, *Græcâ*. in quâ Spartanorum, Athenienſium, Thebanorum, & præcipuè Macedonum res ſunt: quos huc traho, & includo. Præter iam dictos, dabunt *Thucydides*, *Plutarchus*, *Arrianus*, & *Q. Curtius* è Latinis. Per partes colligenda eſt. nam qui totam & ordine ſcripſerit, totus ad nos non venit. Tertia *Romana* eſt: in quâ vbertim rerum & euentuum, eorumque inſignium: & quæ plures ſcriptores illuſtrarunt. O magnum, ô pulchrum imperium! & addo, diuturnum. ideoq. non mirum ſi viris factis que breuia illa & fugacia Græcorum ſuperauit. *Græci præceptis valent* (ait quiſpiam) *Romani exemplis*. Et hercules ita eſt. non fuit gens, puto non erit, quæ plura vel in militiâ vel in pace, laudis & virtutis ſuppeditabit. Itaque ad hanc, mi adoleſcens, ad hanc ſegetem veni, manipulos frugum collige, & in vſum tuum reconde. Sed vt ordine fiat, ea ipſa diuidatur trifariam: in *Veterem*, *Mediam*, *Nouam*. Prima mihi eſt, à Regibus & vrbe conditâ, ad Auguſtum: *Media*, cùm immutato ſtatu ad Principes ventum: *Noua*, cùm iterum mutato, ſedes ipſa Principatus Byzantium eſt translata. In *Veteri* ſcriptores Græci Latini que ſunt, ſed præcipui iſti: *Dionyſius Halicarnaſſæus*, *T. Liuius*, *Polybius*, *Plutarchus*, *Appianus*: quibus compendia adiungere liceat, *Velleij*, *Flori*, *Eutropij*, *Oroſij*. Velleianum laudabile fuit; ſed  
potior



potior pars periit. iudicio & ordine tamen scriptum, & quod exemplar pleniori Chronologiæ sit ad imitandum. Faciant huic parti *Fasti Romani à Carolo Sigonio editi*, & producti ad Augustum. At in *Mediâ*, noster *Tacitus, Suetonius, Ammianus, Spartianus*, & adiuncti Cæsarei Scriptores: è Græcis autem, *Dio Cæsius, Io. Zonaras, Herodianus*, legendi. tum & Compendium *P. Victoris*, itemque *Eutropij*. Adde ad seriem temporum, imò & rerum lucem, *Onufrij Panvinij Fastos*, ab Augusto ad Iustinianum diligenter & industriè consignatos. *Nova* superest. & in eâ ferè Græci isti, *Zonaras, Zosimus, Procopius, Agathias, Nicetas Choniates, Nicephorus Gregoras, Michaël Glycas, Georgius Cedrenus*: etsi hîc vltimus quidem, anilium sæpè tabellarum scriptor, & veri incuriosus vel ignarus. Iudicio legatur tamen, dabit quod iuuet. De *Romanâ* habes: quarta erat *Barbarica*: quid nisi lacinia & spoliū ab illâ veste? Nam hanc appello & intellego, cū scisso fractoque imperio, maior pars ad Gallos, Germanos, Turcas iuit, & alternatim hucusque mansit. Nec enim Gothos, Hunnos, Vandalos, Scythas aut illam faciem huc includo: quæ maneat in *Mediâ* aut *Nouâ Romanâ*, & iis inserta nempe legetur. Faciunt huc propriè tamen *Iornandes, Procopius, Agathias*, & siqui tales. Sed meam hanc Barbaricam varij scripsere, atque ipsi ferè barbari, & addam barbarè. exstantque *Germanici, Gallici, Britannici* scriptores, in vnum corpus nuper decorè & vtiliter conducti ac vulgati. Sunt & *Annales à P. Pythæo editi*: & cottidie huiusce argumenti prodeunt, iudicio eligendi. Scripsit & *Carolus Sigonius* de Regno Italiæ, quod huc facit: & *Io. Leönclavius* Turcica, vterque mihi bonus & laudatus. Quid omitto? *Læonicus Chalcondylas* se suggerit, in Turcicis Græcis quæ legendus, item *Guilielmus Tyrius*, & alij in transmarinis sacrisque bellis. Hem, inquires, quanta materia, & quæ silua? quis ingreditur sine errore, & egreditur? qui Ordine insistet, qui industriam & Curam adferret, iam dicenda. Ordine, inquam, in primis opus. & ne confusa & vaga lectio sit, aut desultoria & interrupta. Hoc plerisque evenit. & velut ex equo in equum se traiciunt, ab hoc scriptore in alium, ab isto argumento in illud: quo fructu? momentaneæ voluptatis, & ut tempus suum, imò & se, fallant. Apage tales istos, & ad *Amadæum* suum, aut si altius assurgere velint, *Heliodo-*



rum eant. Tu Ordine leges. quem ex ipsis à me dictis etsi potes instituere: tamen in exemplo dabo. Ecce Romanam *Veterem* legere decreui. ordiar ab vniuersali aliquâ notitiâ, & Compendium *Flori*, aut *Eutropij* præmittam. Tum à capite, & ab ipso *Liui*: cui *Dionysium* adiungam, & *Polybium*, *Plutarchum*, aut *Appianum*: sed quemque in consimili argumento. Cum peregero, ad *Mediam Nouamque* veniam, & constantiâ eâdem peragrabo. Et de *Ordine* facile est, atque animi tantum decreto opus: *Cura* plus habet operæ, & in eâ omnis est legentium fructus. Duo in hâc specto, siue exigo: *Attentionem*, & *Electionem*. Cum legis, non suspensum aut attonitum te habeat tantum nouitas aut magnitudo euentuum: insiste, inquire, cui rei hoc facere possit, & equem usum sui præbere. Mora hîc aliqua inter legendum & tarditas, fateor: sed nimirum, dicto veteri, *Nulla res potest esse eadem, festinata simul & examinata: nec esse quidquam omnium, quod habeat laudem diligentie, simul & gratiam celeritatis*. Tarda igitur, & quære. cum repperisti, tum sit *Electio*: id est, ut stilum capias & excerpas, & velut annonam in horrea quædam reponas. Ea distincta etiam sint, & iamantè libri parati, meo iudicio, quattuor; in quos, quidquid eligis, conferas & turò deponas. Nam memoriæ suæ qui credit tantum: quid agit? non dicam nihil, sed in breue, proficit: nec vlla ea tam vasta, capax, tenax est, quæ varia ista cum fide asseruet & reddat. Trade libris. in quo labor aliquis, & iterum in legendo remora: sed, mihi crede, utilis, si quidquam in omni ratione studiorum. Libri isti quattuor, totidem *titulos* habeant rerum, quas præcipuè in Historiis notes: *Memorabilem*, *Ritualium*, *Ciuium*, *Moralium*. Quid *Memorabilia*? res designo magnas, & cum admiratione aut motu legendas, siue audiendas. ut est notabilis *Potentia* alicuius regis aut populi, *Opera*, vel *Opes*, *Prodigia*, & noui aut insoliti *Euentus*. vno verbo quidquid non obuium, & magnitudine vel raritate se commendat. *Ritualia* autem, quæ pertinent ad instituta ritusq; veteres, siue quos in publico, siue in priuato vsurpabant. Alios enim istos Orientales, Græci, Romaniq; habuerunt: & ab eâ notitiâ, seria omnis intelligentia dependet veterum scriptorum. At *Ciuiilia* appello, quæ ad vitam & regimen commune faciunt, & hanc hominum iure & legibus deuinctam societatem. *Moralia* denique

denique, ea quæ priuatim ad nos & vitam formandam, virtutibus amicam, vitiis alienam. Ecce, quattuor hi sunt *Tituli*: quid superest? referre in eos, quidquid ad singulos illos facit, siue *Sententiarum*, siue *Exemplorum*: id quæ cum hac *Attentionis* curâ, & *Judicij* item normâ. Dic clariùs, inquires. Nempe quisque liber alios & minores suos titulos habeat: quia Natura & Memoria ordine & partitione istâ gaudet. Vt, ille *Memorabilium*, in ea quæ attigi: nec nimis sanè argumentum hoc patet. Latissimè *Ritualium*: ac diuidamus in *Sacra* & *Profana*. *Sacra* omnia publica: continent quæ *Deos*, & eorum *Nomina*, item *Cognomina*: tum *Insignia*, *Munia*, *Cultum*, & *Templa*. Amplius, *Sacerdotes*, aliosq. ministros: tum *Sacrificia* ipsa, *Hostias*, *Cerimonias* & ritus: deniq; *Verba sollemnia* & formulas precationum, & quidquid illos aut ista spectat. Nimis partiri, tenue est, & hîc inutile: spernes. Iam *Profana* sequuntur: atque ea duplicia, *Publica*, & *Priuata*. Illa, quæ communiter omnes aut plures tangunt, & publicis legibus aut institutis continetur. vt *Magistratus*, & singulorum *Munia*, aut *Ornamenta*: vt *Senatus*, *Militia*, *Prouinciæ*: *Prefectura*, *Officia*, & quidquid istis adhæret. tum *Leges*, *Iudicia*, & eorum ratio, *Supplicia*, *Tormenta*, *Pœnæ*: lætiora denique, *Ludi* & *Spectacula*, *Triumphus* & *Festi dies*. Ad *Priuata* venio, & iis subiungo, *Nuptias*, *Funera*, *Balneæ*, *Conuiuia*, *Vestes*, *Nummos*, & quæ longum sit complecti. Minuta enim etiam intercurrunt: sed in sermone ostendenda potius, quàm scripto adumbranda. Imò adeò minuta, vt nec *Titulos* suos grandiores quædam habeant: sed verbis signentur, & ordine isto litterarum. Ac si me audis, in plerisque eo vtêris: quia non ad famam aut pompam ista disponuntur, sed tui vsum. Sequuntur & excipiunt *Ciuitalia*: vtilissima pars iis, quos genus aut destinatio ad rempublicam vocant. Is liber tres partes habeat, antiquâ & verissimâ diuisione: status *Regum*, *Optimatum*, *Populi*. In quaque parte notes, & eò referas, quæ *Firmandæ* sint, aut *Vertendæ*: & hæc ipsa subtiliùs diuidas, vt à me in *Politicis* factum. Vt hoc exemplo cum fiduciâ: & conueniant vel qui noua adferunt, aut vetera referunt, non dabunt in ordine & methodo, quod fortasse anteponas. Sed vnum etiam addi potest, & debet. vel vt *Sententiæ* plures vni rei congerantur; vel vt *Exempla*. Hanc postremam partem non neglexi equidem, & habeo

sepositam inò paratam in scriniis, & auidam exire. Sed tu aut alius, non ideò remitte: & quisque sibi, vel firmitus, vel iucundius certè, tale aliquid struit. Postrema sunt *Moralia*. quorum duæ partes, *Virtutum & Vitiorum*. Velim & hæc disponi ordine litterarum: sed ita, vt *Virtute* præeunte, cuique bina sua *Vitia* sint subiuncta. Traho eòdem etiam non *Vitia* propriè, sed *Affectus*: & *Cupidinum* stirpes, *Spem*, *Metum*, *Gaudium*, *Dolorem* adnecto: tum etiam de *Beatâ Vitâ*, & quidquid in *Ethicis* sedem suam habet. Sed satis hæc communia in scripto præiui: in sermone alia. illud in fine te sedulò moneo, vt ne mole hac, quæ videtur, absterreare. Quid enim? tam varia, tam multa? inquires. Nihil est: inò incredibile, quàm citò hæc suscipiantur, & fiant, si tenor & constantia sit, & quisque dies opus suum probet. Triennij res, non diu te differo: mihi si olim talis monitor, vel citiùs absoluissem. Cogita te in ipso flore æui, & corpus labori, animum intentioni ferendæ esse: quid cessamus,

*Dum res, & ætas, & sororum*

*Fila trium patiuntur atra?*

Non fac, mi adolescens: cui ego factum consultumque tuâ causâ volo, tum & Cl<sup>mi</sup> V. Legati Regij: qui etsi connubio tantum tibi parens, tamen vel naturalem affectu & curâ præstat. Tu agnosce, illum cole, me & bona ama. Louanij, III. Non. Decemb. ∞. ICG.

## EPISTOLA LXII.

IOANNI DRENCKWAIRTO, *Thesaurario Belgicæ.*

**D**IVINA planè virgulâ (quomodo enim aliter interpreter?) factum videtur, vt ipsâ horâ ac pænè momento, quò tuas accepi, hic ad me veniret, quem vides. Est mihi cognatione aliquâ iunctus, orbus utroque parente, in stirpe honestâ exiguis & vix dicendis opibus: tamen auxilio amicorum ad Magisterij gradum peruénit. A quibus ipsis litteræ mihi commendatiçæ pro subsidio, vt Theologiæ studia, ad quæ adspirat, ordiri & finire feliciter possit. Equidè cum humanissimam, & cui obligor, oblatione tuam viderem, & vnâ istum: putaui, vt dixi, diuinitus fuisse hunc concursum: & eundem statui, eo fine, sedulò commendare. Non vt cognatum tamen, nec hos aspectus in istâ re ha-



re habeo : sed vt boni ingenij & industriæ, vt notæ modestiæ iuuenem, & qui toto animo ad Pietatem & sacra studia, imò & sacram vitam, id est Sacerdotium, contendit. Iuua eum in laudabili hoc cursu : nos quoque secundas faciemus, & in libris aliisque necessariis iuuabimus, pro parte. Ego spondere audeo vtilem Ecclesiæ futurum, & beneficij tui non ipsum solum, sed & nos memores : qui adsiduè nouis à te, nec inuiti, obligamur. Non enim hîc, vt in pecuniâ, redditione aut re opus, vt soluaris : sed agnitione & grato animo. quæ in nobis largiter esse & fore assero, quamdiu Deus ille dabit hîc esse. Ille te Ampl<sup>me</sup> & Nobil<sup>me</sup> Domine, longæuum reip. nostræ & Principibus præstet. Louanij, prid. Nonas Decemb. ∞. I. C.

## EPISTOLA LXIII.

*Mediolanum.*

ERYCIO PUTEANO suo S. D.

**E**GO verò honestissimum munus, à Senatu Mediolanensi in te collatum, & iudicio meo approbaui, & gratulatione etiam profecutus sum: quam scripto consignatam per Velsrum nostrum misi. An aliter possem? placet, placet hæc tui productio: sustine personam, quam sumpstisti, & mereare non vnâ palmam. Sola gloria multis

—— *quemuis perferre laborem*

*Suadet, & inducit noctes vigilare serenas:*

te & hæc, & merces quæ etiam functioni tuæ est adiuncta. Orationem, de quâ scribis, auspicalem tuæ operæ, libens videbo: libentiùs *Promissidem Epistolarum*. quidni? mihi inscriptam. Ambigis an amplectar? utrâque manu: veniat & ad libentem, & addam etiam merentem. Non negabis mi Puteane, si non seui-  
mus hanc arborem, tamen rigauimus, putauimus: & in parte fecimus, qualem alij mirantur, & ipsa esse gaudet. An iniurium, si fructus aliquos ex eâ mihi asseram? imò veniant & vescar istos primotinos, & hæc libamenta audacter nobis pone. Nos quoque iam edimus EPISTOLARVM CENTVRIAM III. ad solos Italos aut Hispanos (caussa discernendi sic fuit) siue qui in iis oris. In iis & tuum nomen interlucet, & Sacci nostri, & plurium ibi amicorum. Septalium esse in te, qui est, gaudeo, & beneficia hæc



mihi etiam inscribo. Quid si ad eum ipsum hoc scribam? puto, nisi abstrahor : tu vale, ille saluat. Louanij, xv. Kal. Ianuar. anni ∞. IOCI.

Hub. Audeciantius meus Carimen parabat Promulsidi tuæ præponendum. Est is qui nuper ad te scripsit. ama amore dignum.

## EPISTOLA LXIII.

Bruxellam.

PETRO PANTINO *Decano.*

**E**N CENTVRIAM nostram, de quâ antè scripsi. Dic seriò quid videtur? damus & subserimus alias? an satis est vnus huius erroris? Iudicium à te peto, quod pauci mihi donent (ô miseriam!) inter meos Belgas. Nam doctrinæ aut litterarum studia quò eant, vides. in terras certè alias : aut fortassis eò denique, quò olim Astræa. Nimbus à Galliâ dissipatus videtur, iterumque ibi \* *viremos alisp* : si tamen regiâ & bonâ fide hæ res geruntur. Nam sunt qui verentur ne fallax serenitas, & in nos incumbat ac detonet nubes illa belli. Abominor, & Deum patriæ tutorem precor, & tibi Vir Reu<sup>de</sup> & Clariss<sup>me</sup>. Louanij, x. Kal. Mart. ∞. IOCI.

\* *serenus*  
*act.*

## EPISTOLA LXV.

Mechliniam.

HADRIANO VANDER-BVRCHIO I<sup>to</sup> & *Consiliario*  
*in Senatu Geldriæ S. D.*

**E**N ad te quoque CENTVRIAM istam. quidni autem? qui & me amas, & mea æstimas; atque adeò istis quoque leuioribus pretium aliquod donas. Vtinam tecum alij! sed vereor vt tuum punctum amor mihi donet; alij refragentur, quibus iudicium in iudicio hoc adhibetur. Sed vt cumque, vel error tuus gratus est ab eâ causâ : & Numen precor, etiamsi ille desinit, ista perseueret semper. Vale Vir Cl<sup>me</sup>. Louanij, x. Kal. Mart. ∞. IOCI.

EPI-

EPISTOLA LXVI. *Bruxellam.*PETRO PANTINO *Decano.*

**T**v verò non ambigens & cunctanter, sed liberè & apertâ fronte petere debebas istud, quod tribui à me vides ambitioni etiam vulgarium ingeniorum: quid non Pantino meo, vndique sic merenti? Feci igitur, & hîc habes: vtinam pro tui pretio, pro meo affectu! Meletæas chartas æquarem, si hoc esset: nunc vires conantem deferunt, nec ad alta assurgimus vel studiis fatigati, vel languoribus fracti. Agnosce, & animum certè amicum ama. Louanij, v. Idus Mart. ∞. I. DCI.

## I. L I P S I

## SVPER SS. PATRVM SYNTAGMATE

nouiter à PETRO PANTINO V. R. & Cl<sup>mo</sup>

vulgato, &amp; eruditè verso,

Phaleuci.

**Q**VIS nouus liber hic? liber sacratus,  
Sacra nomina, res habet sacratas.

*Quis auctor? varij, vetusto ab æuo:*

*Cum mos & pietas vetus vigeant.*

*Quis produxit? & ipse moris, atque*

*Virtutis veteris: vetustiorum*

*Gnarus artium, & vtriusque lingue,*

PANTINVS meus. ille, comparatæ

*Cui nines videantur esse nigra:*

*Quem suum veteres velint Athenæ,*

*Quem suum vetus ipsa Roma dici:*

*Quem meum cupio, & meum esse iacto:*

*Cui, dum corpore mens mea illigatur,*

*Fido & firmo adamante colligabor.*

*Quod SANCVS pater audiat, FIDESQUE.*

EPI-

## EPISTOLA LXVII.

Bruxellam.

REMACLO ROBERTI S. D.

**D**E Transsylvaniâ initiora nos hîc audiebamus, & conatum magis turbandi pellendique, quàm effectû fuisse. Opto ita sit. quia hercules eâ prouinciâ, post Canisiam, nunc amissâ: quid spei super de Hungariâ maneat? Quæ & nunc tenuis, nisi alia consilia & fœdera Principes ineant aciungant. qui ferè (veteri Europæ morbo) suis diffidiis & bellis atteruntur, publici discriminis securi aut neglegentes. In Belgicâ nostrâ re, ego plagam aut plagas hâc ætate metuo: nec video equidem valdè comparatos ad arcendum. De Buscoducis ( quanti momenti opido?) occultus rumor est ciues languidiores fieri, & vt verbo dicam, nauscare. Si vis adhibetur, vereor vt, quod ferre possunt, ferant. Sed vobis hæc notiora. Quod nuper scribebas de liberis apud te, quosdam vidi, quosdam nunc non lubet nec vacat. NN. ego habeo, & obiter legi: neque nimis me cepit. Legatus Regius recenter de te amicè & benignè scripsit, sensitque. Ita enim de candore eius mihi polliceor, & dicta in rem collaturum, vbi occasio erit. Tu in eâ officium & salutem à me defer, & hanc ipse voto meo habe. Louanij, III. Idus Mart. ∞. IOCI.

## EPISTOLA LXVIII.

IOANNI DRENCKWAIRTO, *Thesaurario supremo.*

**D**VO voueo. & latum tibi hoc solenne, & plura, quæ valens letusque addas: tum & in me eiusmodi culpas, quæ tali pœnitentiâ luantur. Tu me silentio offenderis? non potes in tuis occupationibus quas noui, & quæ rempublicam nostram summam tangunt: nec, absque iis, causa erat aut materies literis respondendi, quæ nihil nisi affectus mei auram ad te mittebant. At tu benignè quasi offensam agnoscis, & optimo vino (gustavi enim heri) luis: quid nisi gaudente me in hoc affectu, & pro eo gratias agente, & perseverantiam optante? imò & sperante. quia à me, pro viribus quidem, semper alimentum ei erit in officiis & cultu, quem tibi debemus. De tuo Balduino, non possum nisi bona dicere, & meliora prædicere: ita & mores eius

eius & ingenium omnia ea præstant, aut spondent. Modestia & probitas adsunt, quæ à stirpe & gente traxit: adest industria, & acrimonia ingenij, quæ à Deo dona habet. Iudicium adhuc formandum in multis, vt hæc eius ætas est: sed & supra ætatem in multis rectum & maturum habet. Confidentia, & securitas, & illa dispositio sermonum paullatim accedent: & nos elaborabimus polire, & reddere te dignum. In studiis, iam diu est cum me auctore ius ciuile etiam adiunxit; titulum Baccalaurei meruit; & disputationes publicas ac priuatas (in quibus plurimum momenti est) adit. Itaque speratem, & ausim promittere eum aptum futurum, qui proximâ hieme Licentiæ titulo insigniatur. Præmaturum est, inquires. Ita, si ætatem vides: non est, si progressum, & communem nunc etiam morem. Mouet me & causa, quod velim tempestiuè eum ad res adinoueri, & tuæ auctoritatis velut manu educi & attolli. Nam spes certè omnis dignitatis eius in te est (post Deum quidem:) & te tamen mortalem esse, cogitare cogimur, etsi multos annos vouemus etiam & destinamus. Sed hoc totum iudicij tui & prudentiæ facimus: & tempus superest deliberandi. Ampl<sup>me</sup> & Nobil<sup>me</sup> Domine, vale. Louanij, VIII. Kal. Maias. ∞, MDCL.

## EPISTOLA LXIX.

*Lutetiam.*

ISAACO CASAVBONO S. D.

**B**ARONIVS meus nondum venit, tuas tamen, quasi metatores præmisit hospitio indicendo, sanè gratas. Placuisse ipsum vobis, gaudeo: vtinam diutius in illo sole velut colorem potuisset ducere! sed negauit ille, cui ipsum nihil negare ratio iubet. Dete quod addis, exuere paullatim scribendi edendique animum: malè narras, nolim. Tu in illo ætatis ingenique flore? & addam etiam, famâ ac fauore sic adspirante? Nam habes ea certè à doctis: ab omnibus si exspectas, tum licet alias res agas, & has paucorum hominum facias missas. Iustius mihi ea mens fit, annorum, laborum, morborum veteri: & cui omnis lex & mos det inissionem. Tamen perseuero, etsi vereor vt vel inuitum soluat illa \* *δυσίκατος ἀπὸ πρῶσις*, graue onus, & quam nullâ medicinâ aut curâ excutimus, vix leuamus. Itaque SENECA meus

\* *incurabilis morbus.*

KKk

diu



diu iacuit, nescio an attollendus. EPISTOLAS nuper dedi; sed ad Italos & Hispanos tantum: quia nihil ad vos, & logi aliquot aut inaniæ sunt, puditum est mittere. Sed heus, loci sunt in Senecâ, in quibus hæremus aut pendemus, & possis mihi subsistere. ut in illo Consolationis Heluianæ cap. x. *Ingens Capitoli vestigal*, de Apicij luxu. Quid hoc ad eum? an comparatio est? an & mutatio placeat? Consolationis Polybianæ, cap. xxxv. *In quas per templa aditur*: De Palatio accipimus, ubi templa, scio, sed an sic in aditu? & per ipsa intratum? De Irâ III. cap. xxii. *Huius nepos fuit Alexander, qui lanceam*. Mirum, si Antigoni illius nepos, qui ipsi inter successores fuit: & nec in nomine quid error, quia nemo talis inter Macedonas reges proauos. Atqui mox etiam addit: *Non habuit hoc autum ille vitium*. Plura talia alibi in isto aut noto, aut corrigo: sed hoc noto tantum. In *Miliidæ* etiam nostrâ, quid tibi videtur de *tripedali parmæ diametro*: de *Pili*, *paluari*? aliud à me sentis aut habes? doce volentem & imputaturum, & salve. Illud autem de frigore tuo in scribendo, iterum seriò ingero: \*Οὐκ ὁ δ' αὐτὸς νῦν ἔχει τὴν χολήν. Incalcesce. Louanij, ix. Kal. Maijas. ∞. IOCI.

\* Hac ipsa  
mens, mihi  
crede,  
mentem  
non habet.

## EPISTOLA LXX.

Antuerpiam.

IO. BAPTISTAE BARONIO S. D.

**G**AVDEO te rediisse, etsi præter opinionem meam factum. Causas parenti tuo fuisse non dubito, & vel illa causa sufficit, quod voluit parens. Quæ Gallia placuerit, quæ ibi homines, atque alia, seruabimus in sermonem, auidè tecum miscendum, atque etiam amplexum. Veni, veni. sed quando? de die scire velim. nam ego peregrinatiunculam paro in Neruios, & amici iamdiu cò inuitant. Nolim te me absentem requirere, & doleam si fiat. Tamen, ut tuæ litteræ erant, intra paucos dies, atque adeò hâc septimanâ, te expectamus. Domum è quâ egressus es nosti: caue aliam ingredi, quamdiu ego vivo. Vides non rogare me hoc, sed iubere. Neque enim omni vindictâ te munifî, & attineo vinculo aliquo obsequij, quod bono iure non laxes. Vale, & aum, parentem, fratres saluta. Louanij, VIII. Kal. Maijas. ∞. IOCI.

EPI.

## EPISTOLA LXXI.

*Dolam.*

IO. BEZANCENOTTO S. D.

**A**N & I<sup>ti</sup> titulum addam? certè donatum eo iam cum fratre esse, ex litteris colligo, quas ad me dedisti. Amo & scriptionem tuam, mi Bezancenotte, & iamdiu ipsum te: idque ob ingenij melioris dotes, quas Deus dedit. Excolere eas cœpisti, & proferre: sed cum ætate magis & magis: & nunc denique è scholis & umbrâ ad fori & rerum lucem actionemque venitis. in quâ versari vos cum laude, id est cum fide & probitate, velim atque optem. Doctrinam certè adferetis (nam & fratrem tuum includo: ) sed per Deum immortalem, Themidi vestræ Minervam etiam miscere, & Sapientiæ illa decreta adsumite, sine quibus in hac rerum caligine non est, mihi credite, pergere viam rectam. Vt in familiâ opus est herâ ac dominâ, quæ coërceat: sic in hac interiore œconomiâ, Sapientiæ illo imperio, quod affectus regat ac dirigat exultantes. Facite, ita Deus vobis fauceat, & honore simul ac virtute mactet. Louanij, prid. Kal. Maijas. ∞ . 1001.

## EPISTOLA LXXII.

*Bruxellam.*NICOLAO DE VVEERDT I<sup>to</sup> & Cognato.

**B**ENE est, benè est, pecuniam adnumeratam esse: nequid vltrà tergieretur vel mutet noster ille Proteus. liceat sic appellare meum Fabrum, virum bonum quidem, sed parùm in verbis aut pactis (sensi aliquoties) stabilem, & qui aliquid trahat à leuitate sui ignis. Nunc tenetur, & velanguis fiat, non elabatur. Hoc igitur lætum; illud morder, quòd de aduentu tuo distulisti. An mecum igitur in reditu vis, & iam nunc spondes? At ecce quia meliorem Bacchum, & è femore Iouis natum, gustare apud me noluisti; ego velut in pœnam, tristiores istum & Semele natum (Becani argutiolas agnoscis) bibendum ad te mitto. Rogo, extra iocum, munusculum volēs accipias, quod à volente scis mitti: & spero in suo genere non inter vilissima futurum. Gustus tui, tuam etiam addo, res erit: & si sedebit, ecce fontem è quo quotannis petas. Flores mei cladem, vt scripsi, magnam passi erant: reparauit in parte & supplementa accisis copiis misit Gaspar Taius, Goïckensis toparcha, sanequàm opportunè &

benignè. Gaude hoc mecum : nam & tibi in meo horto feritur & meritur , atque illo crescente crescet etiam tuus. Vale. Louanij, prid. Kal. Maijas. ∞ . IOCI.

## EPISTOLA LXXIII.

Brugas.

CORN. ANCHEMANTO suo S.D.

**V**ALERETE , & apud tuos etiam esse , mihi quidem placet. At non mihi, inquires, in hoc otio & desidiâ. Credo. sed patriæ & tuis aliquod etiam tempus dandum est, à quibus diutulè abfuiſti. Prouidè item & lentè agendum de Peregrinatione. quam ego in Galliam nunc non dissuadeam , qui res quietæ & firmæ videntur, per Allobrogicam hanc pactionem. Antea hercules hærebam, & ne nos traheremur in partes , id est in vetera mala & bellum. Itaque si amicis tuis idem videtur, & sedet te aliquò ablegare : age, cum bono Deo, fiat in Galliam, doctrinæ & elegantix iam olim sedem. De Italiâ, post illam deliberabimus. Tu tantum cogita iam nunc & imbibe, vt immunem te serues à noxis & vitiis , quæ in eâ regione, per bella ciuica maximè, pullularunt. Luxus, libido, *astutia*, regnum in multis locis habent : coercete te & abstine, & Honesti illum splendorem & Numen ante oculos pone, quæ fumos aut nebulas istas dissipabunt. Didicisse te ostende, non vt scias quid deceat, sed vsurpes.

*Et grauib. curis , animum fortita virilem,*

*Igneæ lætæq. frænctur corde iuuentus.*

Quibus curis? scientiæ & prudentiæ, quæ scopum peregrinationi tuæ habes. Addo Virtutem : quæ suprema cura, & finium, vt ita dicam, finis : quam sic stringe, vt ab hac vitâ citiùs , quàm ab eâ auellaris. Ita abi, & redi, semper meus, si illius. Louanij, VIII. Kal. Iun. ∞ . IOCI.

## EPISTOLA LXXIV.

In castra.

IOANNI SEVRIO, Legato Hispaniensi à Secretis.

**B**ENIVOLENTIAM, quam sermo tuus nuper spirabat, nunc & litteræ. quid debeo? quid, nisi eamdem beniuolentiam? quam animo huic firmo caractere impressam, audeo dicere, & non nisi mecum delendam. Tu fove, mutuū à me fiet. Conquereris de discessu meo inopinato : sed ita res tulit, & diutiùs domo



domo & scholis abfueram, quàm meus aut publicus etiam vsus esset. Ea causâ mihi subductionis. alioqui, Genium testor, suaue esset apud vestri similes agere; vt frontem atque animum exporrigerem, vel studiorum seueritate, vel temporum hâc inestitiâ contractum. Non licet, & in animi etiam libertate seruitus aliqua externa adiuncta, quam nullæ vindiciæ hîc quidem resoluunt. Publica per te didici, in spe magis quàm in re læta. Sed tamen aut ego nihil in Principum rebus video, aut aliud aliquid agitur & arcanè apparatur, quàm vulgares isti oculi aut mentes vident. Eâ cogitatione sæpè me firmo. & nisi sit; fateor liberè, vt nunc res eunt aut potius fluunt, nihil me pro votis bonorum, aut dignitate imperantium exspectare. O dii deæque (liceat sic indignantem loqui) in tantis opibus, & vbi omnia ad magnitudinem sic parata & ad manum sunt, tamdiu nos: sed desino. Numen videbit: quod gaudet inuertere ista humana, sæpè præter humanam spem aut mentem. Nostrium est, quæ non in nobis, ferre, & alto animo excipere omnem casum. De pace, siquid cum Turcis conueniet, mirabor, & gaudebo. Neque negem; hoc statum Christianæ rei, quamcumque illam optabilem & utilem fore. Mihi tua amicitia: quam delatam amplector, & tenebo: & tu me in sinu illo mentis. Louanij, III. Kal. Iul. ∞. 1001.

## EPISTOLA LXXV.

THEODORO CANTERO S. D.

**L**AETIS oculis atque animo litteras tuas vidi, legi: & pænè dicam,

— *Amyclais velut exsultauit arenis*

*Pastor, ad Jdaas Helenâ veniente carinas.*

Vetus inter nos amor, & ab honestissimâ studiorum societate est; quem temporum hæc iniquitas interpellare, non abrumperè potuit: & in me quidem viuit vixitque cum affectu & fide, qualem tu litteris his præfers, & volenti credenti que testaris. Ita sit vtrimque, & maneat: nec externa ista dissidia animos tangant aut polluant, ab eâ labe iure suo exsortes. Finem illorum si exspectamus, quando erit? cùm nos non erimus fortasse. adeo pertinax Fortuna Belgis incumbit,



— *que procudit enses*  
*Et socias inimicat vrbes.*

Heu, quot iam illa

\* *hominū*  
*validos*  
*Orco pro-*  
*ieciſſet.*  
*\*projiciet.*

\* — *ἰσθίμους καφαλὰς ἀΐδι πρὸς ἑαίης;*

& adhuc \* *ἄρπιδες*, vt rerum hæc facies minatur. Tu sapiens in-  
 terea & felix, qui quantum potes reductus à fluctibus terram  
 legis, & tibi studiisque asseris, vnico in his turbis solatio & le-  
 uamento. In me quidem sic experior,

— *quem mea tellus*

*Lare secreto tutoque tegit:*

libris & scriptis inuolutum. Ergo eundem animum iure tibi  
 gratulor; & siquid adiutum aut alleuatum hîc ire possim, habes  
 volentem & audientem. Significas de *Eleusiniis sacris* syntragma  
 te parare: sed in quæ etiam illa *Cybeles* & *Isidis* includas. Pro-  
 bo, & pergere adhætor: quia pars ea sacrorum multas *ἀρχαιολο-*  
*γίας* habet, & ad lucem etiam scriptorum nostrorum, qui primi-  
 tûs profana illa & superstitiosa abiecerunt. Equidem non deero,  
 vbi distinctè rogabis, suppetiari: atque adeò etiam nunc vtrò a-  
 liquid de Cybeleis sacris adiungo. In Suetonij Othone est, *Ex-*  
*peditionem impigrè incobasse, die quo cultores matris Deum lamentari*  
*& plangere incipiunt*: atque id inter tristitia omina recenset. Inter-  
 pretes referunt ad diem VI. Kal. Aprilium: quia in Ammiano ita  
 legerunt, lib. XXVI. *Ad diem VI. Kal. (Apriles) quo Romæ matri*  
*Deum pompe celebrantur annales, & carpentum, quo vehitur simu-*  
*lacrum, Almonis vndis ablui perhibetur.* Errant. imò ad IX. Kal.  
 Apriles referendum est, qui dies *Sanguinis* dicebatur. Is enim tri-  
 stis, & planctus tunc suos Galli ordiebantur, atque adeò corpo-  
 rum sectiones. Trebellius Pollio in Claudio: *Cum esset nuncia-*  
*tum IX. Kal. Apriles, ipso in sacrario Matris, Sanguinis die, Clau-*  
*dium Imp. factum, neque cogi Senatus, sacrorum causſa, posset.* Vides  
 diem sollenni veneratione, & illo nomine fuisse: quod Tertul-  
 lianus in Carimine ad Senatorem adfirmat. de Gallis:

*Mente fremunt, lacerant corpus, funduntque cruorem.*

*Quale sacrum est, vero quod fertur nomine SANGVIS?*

Causſam etiam ibi nominis habes, quia tunc sanguinem inci-  
 piunt fundere, ac perseuerant vsque ad diem illum (Ammiano  
 notatum) VI. Kalendarum, quo *Lauatio* instituitur, & luctus  
 suos

suos ponunt. Statius:

*Est locus ante urbem, quàm primum nascitur ingens*

*Appia, quâq; Italo GEMITVS Almone Cybelle*

*Ponit, & Ideos iam non reminiscitur amnes.*

v. Sila.

Itaque dies ille tantum abest vt funesti ominis, læti potius fuit: & vulgò *Hilaria* dicebatur. Leges in Lampridij Alexandro, *Hilaria matris deum*. De Lauatione porro, cùm alij, tum Prudèrius *de s. c. d. v.* hymno x. & Augustinus II. de Ciuit. cap. IIII. Herodian. l. I. Vides propensionem meam in te & tua studia, magis declarandam si sermonis alterni copia esset. Pollioni nostro dignitatem gratulor, Deum precatus vt bono publico exercendam. Liberi tui quid & quâ agunt? iam & alter vxorem habet? In honesto quidem otio, tuo exemplo, esse arbitror: faciant, te venerentur, nos ament. Louanij, prid. Idus Sextil. ∞. IOCI.

## EPISTOLA LXXVI.

*Brugas.*

IANO LERNVTIO S. D.

**Q**UID ait meus Audeiantius? irasceris, & tuum  
*Peruens difficili bile tumet iecur?*

Ego rideo, & adeò satisfactionem non offero, vt à te eam poscam. O mens pura, & innocentia sibi conscia! At aliquid in Carminibus tuis me fugit, nec liberè monui aut notauì. Prius potest, alterum abnuo: & quæ vidi, certè monui & scripsi. Fac me aliquid conniutente oculo, aut parùm præsentì mente, legisse. Id quoque potest, & vt distractiones meas omittam, quis, quem non in suis & alienis aliquid fugit & elabitur? Si quis est,

—— *immolet æquis Hic porcum laribus:*

ego fateor me inter Homericos sapè esse, & oculis non semper acutis, imò non apertis. Sed hoc mittamus. ego tibi, mi Lernuti, & fui seriò & ero amicus,

*Dum pecori lupus, & nautis infestus Orion.*

Sed de Audeiantio meo iterùm. adolescens adprobi ingenij est, & in Prudentium aliquid vellet, à te iniectum. Gisellini nostri illius quædam habes: per eum possent edi, & honore non solum saluo illius amici, sed aucto. Cogita, & scribe, aut si probas, mitte. Ostenda vos etiam exercet, sed spe tamen nunc certiore, vt audimus,

audimus, eius potiundæ. Deus faciat: vtinam ego te aliquando! In Neruiis nuper fui, anno proximo (si vita mihi & vires) Morinos fortasse vestros & te, te videbo, quod

*Mens desiderijs ista fidelibus*

nimiùm auet. Ita sim saluus, vt sentio & propono: ille modò

*Gentis humana pater atque custos*

te meq. in id tempus seruet. Louanij, prid. Idus Sextil. ∞ .IOCI.

## EPISTOLA LXXVII.

IOANNI DRENCKWAIRTO, *supremo Theſaurario.*

**E**XCVSARE metibi debeo, etsi immunem à culpâ, sed ne silendo faciam me illi adfinem. Nam fui Antuerpiæ nuper, & Bruxellâ reuerti ac te adfari mos meus ac tui cultus volebant: sed mutauî, & compendio Mechliniensî viâ redij, quia monitus eram Præsidis filiû cum Rubenio reuocari, & subito abeundum eis esse. Festinaui, vt Vale caperem & dicerem: in eâ tamen ipsâ re deceptus, & tutum non putarunt exspectare. Eant cum bono Deo: quid autem, si in tam bellâ occasione Balduinus tuus cum ipsis? Fateor de titulo capiendo hîc, decretum nuper à te esse: sed & in Italiâ posset: nec tales certè itineris comites semper ei erit nâcisci. Pro tuâ prudentiâ, Amplissime Domine, statues quod è re videbitur: nam mihi indicare conueniebat, tibi iudicare. quem Deus ille publico & nobis incolumem diutissimè seruet, perpetuo nostro voto. Louanij, xvii. Kal. Octob. ∞ .IOCI.

## EPISTOLA LXXVIII.

*Antuerpiam.*

BALTHASARI ROBIANO *Senatori.*

**A**MICVM amicis me fateor: & sum hercules opido vestro, & illi V. C. de quo in sermone nuper egi. Eò grauius fero inter se diffidere, & ad litem venire, meo voto, & tuo auxilio (ita cupio) finiendam. Annue hanc operam mi amice. quid honestius tibi, & fortasse vtilius vtrique parti potes? Opidum, tinon nunc, fortasse postea detrimentum, & quidem cum fanore, sentiet: at iste pondus grauissimæ litis excipiet, & in eius humeros, qui consortes sunt, maximè inclinabunt. Adiuuemus, & vocem

moni-



monitumque Rudolphi primi Austriaci audiamus. cui cum plures lites cum pluribus essent, vna atq. altera grauis cum Abbate Sancti Galli, tunc potente: accessit vltro & inuocatus ad eius conuiuium. mirante illo atque aliis (nam & inimicitiae, vt solet, ex lite ortae erant) ipse constanter perfedit, & sine conuiuij cum Abbate seorsim locutus transiit, & pacem cum eo pepigit; ita fidam, vt Abbas postea auxilio etiam ei in bellis fuerit, quae minuta (nam Comes adhuc erat) cum vicinis habebat. Sed vox eius abeuntis excepta à familiaribus est, totidem his verbis: *Quicumque tres lites habet, duas, si poterit, componat: hoc est meum consilium.* Et hercules meum, o Rudolphe: sed hoc amplius, etiam tertiam, vt nullum caput huic Cerbero superfit. Age mi Robiane, non ternae, sed ter denae aliquae vobis lites sunt: recidite istas maxime grades, & quae in mōstra aut hydras succrescunt. Quid magis solenne, nostris moribus & iuridicinā? Lis litem gignit, iterumque haec aliam, & catena fit quae heredes etiam ligat. Bonā Vveni nostri veniā hoc dicam, dubitare me an bono consilio in vitam & vsum Ius Iustinianæum à Lothario Imperatore reuocatum sit: sic dico, totum & plenum. Non quin bona in eo, arguta, & à saeculo veteri: sed nimis fortasse bona, arguta, vetera: & ideò seminarium ingeniis, ad calumnias fraudesq. pandendas. Dic fodes, quàm multa in eo, quae vsum hodie non habent? quàm multa implicata, & variantibus sententiis enodanda? quid si pugnancia quaedam dicam? sed vix ausim, & iuncti vimbonibus me inuadant. Et de iure ipso prisco, parum etiam sit: sed Commentarij quàm multi & pænè infiniti accesserunt? atqui & ij si concordant, vim legis in tribunalibus nostris poscunt. Amelij vetus querela an scomina fuit, *Jurisprudentiam multorum camelorum onus esse*: quid nunc dicam? elephantos ab Indiā adde, vix ferent. Atqui Platonis oraculum (recens à lectione sum) auribus meis insonat: *ὅτι παρ' οἷς νόμοι πολλοί, καὶ δίκαι παρὰ τούτοις, καὶ βίαι μοχθραί*: *Quod ubi leges multae, ibi & lites multae, & vita moresque prauī.* Audi, & scrutare: verè oraculum est, & de multitudinē litium, nostra Belgica, vicina Gallia, & Italia dicent. Quomodo autem non & mores prauī? nam primum concordia tollitur, odia aperta aut occulta in animis gignuntur, adde fraudes, insidias, & studium vincendi quouis nexu, ac supplantandi.



*Non enim, ut Cellus verissimè scriptum, bona conscientia, sed victoria litigantis est premium.* De multis hoc dico; absit de omnibus, & animus me meus refellat. Sed proborum causâ indignor equidem, cum Iasones istos video, qui palam ad Colchos & aureum vellus eunt. Et quidem non improbi solum, sed stolidi aut fronte ferreâ, qui & artem hanc protollendæ siue tollendæ Iustitiæ iactant. Memini olim fuisse inter Byzantinos Oratores, qui interrogatus, *Qualis Byzantiis lex esset? Qualem ego volo,* respondit: ô dignum, qui pateretur quod ego vellem! Sed an non hodie tales, qui leges, ut ceram habent? pro animo aut lucello suo huc illuc ducunt & flectunt? Mentiri optem: sed hoc vnice, ut Rex sit aut Princeps qui medeatur, & paucas, faciles, concordēs leges donet. Sed hæc *Monitis Politicis* seruentur, epistolæ modulo grandiora. Illud dere, quam institui, te rogo: pergas nauare operam, & ut pax coeat inter volentes. Noster certè cupit, & quoscunque interpretes eius aut pararios non recusat. Utinam tam in procliui Batava nostra pax sit! quæ ante annos aliquot prompta, magis magisque subducitur: & adeò non rem, vix nomen eius admittunt. Quid autem fiet, si Ostendam non capimus? quos illi animos? Sed capiemus, ita ominor: & utinam illos nosque fatietas pessimi & omnia atterentis belli. Vale V. C. & salueat noster communis Vveneris: an & hæc legat? legat, homo disparissimus iis, quos noto. Talium tacita vota, si non voces, sunt mecum. Louanij, XIII. Kal. Octobr. ∞. 1661.

EPISTOLA LXXIX.

*Brugas.*

LVCAE VVYNGARDO V.N.S.D.

**E**N meas litteras, quas tuæ non clicuerunt : sed ipsis tuis factis iure debebam. Quid enim minus possum pro donis sic vltro & vbertim missis, quàm gratias stilo dicere, animo habere? Et donis herclè meo animo lepidis, & quæ verè sunt illi recreando aut vegetando. Nam flores & hæc hortensis oblectatio ipsam vitam panè dicam mihi seruat : cùm à libris & studiis, siue etiam turbis aut interpellatoribus, illuc confugio, & ad spectu ac secessu me pascō. Quid sit in hac re arcani adfectus, nescio : nisi quòd & post vitam veteres, hortos & campos Elysios imaginati sunt ; & ipse Deus primo homini sedem beatæ vitæ dedit

dedit *ἑτάδυσον*. Desine, inquires:

\* *Μηδ' ἐξομώξῃ μερίαν τὴν σὴν ἐμοί:*

Non faciam, desino: & publicæ occupationes aliò te ducunt.

\* *Nec as-  
fricaso in-  
sanità tuam  
mibi.*

Quod proposui tamen, gratias ago: hoc ipso maiores, quò magis munus tuum commendo. De Theocriti versu quæsitum, *βολβός πρὸς κοχλίας* *ἔξηρέθη*: — non alium sensum arbitror, quàm *Bulbum* (edulem scilicet) & *cochleam electam*, & propositam ad comessandum. Ita solent etiam Latini. In Martiale aliquoties mentio, & iunctim lib. iv.

*Et ficus Libycâ gelata testâ,*

*Cum bulbis cochleisq̃ue caseoque.*

Etiam Romæ hodie cochleas solent apponere, illi vsui aut fini.

Sed hoc sensu, vide an non copulâ insertâ melius scribi: *κοχλίας τ'*

*ἔξηρέθη*. Valere te cupio, Vir nobilis, & \* *φιλοῦντα ἀντιφιλεῖν*. Loua-  
nij, III. Idus Octob. ∞. IOCI.

\* *amantem  
redamare.*

Iacobo Damhouderio salutem & gratias, rogo, à me dicito, qui & se floribus procurandis benignè impendit. Debeo.

## EPISTOLA LXXX.

*Tornacum.*

DIONYSIO VILLERIO V. R. & Cl.

**B**INIS me tuis affatus es, à tristi nostro (mihi certè) discessu: At ego filii. quid causæ? distractiunculæ, quæ præter mo-rem mihi me eripuerunt, nec nisi cogitationem & affectum pas-sæ ad te mitti. Audi, sodes, & miserere. Nuptiæ vno tempore in domo meâ, hospites, interuentores. De nuptiis, ut sagax es, credo audisse. ancillam mihi ab annis xxvi. tæsam nocturnæ solitu-dinis (quid enim aliud ipsa aut ego dicam?) viro se iunxisse, & conuiuia illa, choreas, nugas in meâ domo fuisse. Ecce sub cas-ipsas Bernartius mihi hospes, gratus sanè: sed cui me & tempus tamen impendi. Quid de exteris aduentoribus dicam? qui anno inclinante velut per agmina adfluxerunt, & salus capienda ab iis & danda, humanitatis quâdam lege, fuit. Atqui vix credas, quot horas & isti eripiant, etsi in breuib. fabellis. Iam sollennes & adfiduas occupatiunculas meas omitto, in dies docere, scribere, & quidquid muneri meo adhæret. Scio ipsum te ingemiscere in splendidâ hâc meâ miseriâ, & quam fama aliqua melior nobis donat. Quid etiam omitto? quid? vel præcipuum turbamen-

tum, quod tamen famam video ad te tulisse. N. N. triennium ferè in meo contubernio & curâ, præter omnem omnium opinionem, tantis opibus & spe relictâ, in diui Francisci cœtum se dedit, & diuino cultui mancipauit. Quàm ine percussit censes hoc  
 \* *inopin- 211112?* \* ἀδούκτων? & eò magis, quia auunculo & parentibus (nam & ij viuunt) magnam hanc in animo plagam futuram videbam. Itaque statim vxor illius & soror huc ad me, & mecum ad illum: conamur refrigerare aut abducere: at ille, veluti rupes, fermunculos nostros affilientes fregit aut repulit, & Deo duce vitam electam dixit, quæ nisi cum vitâ non eriperetur. Ita vltimus ille meorum me deseruit, & in solitudine iam reliquit. Quam tu damnas & dissuades, & atræ meæ bilis fomentum aut alimentum habes. Falli te puto: ego certè amo, & corpore atque animo eâ pascor. Quàm liberæ mihi nunc cogitationes sunt? quàm curis istis alienis aut externis non districtæ? quàm vagor itaque & diffundor? in cælum, terras, maria, in nostrum & alium orbem. Apagè à me, illum, qui

*Non horam secum esse potest, non otia rectè*

*Ponere, sequè ipsum vitæ fugiuit & erro.*

Ego sapientiæ non dicam indicium, sed initium tamen esse puto, secum consistere, & sibi vacare. O si rure hoc etiam liceat!

*Propter aquæ riuum, sub ramis arboris altæ.*

Sed bella hoc vetant, nec Ostenda illa etiam PACEM OSTENDIT. Classē in Hiberniam sex millium Iberorum appulisse autumant: illam magnam, Africæ inuadendæ paratam, tempestate disiectam, & re nullâ nec tentatâ quidem reuersam. Hæc in publicis sunt: etiam illud, Reginam Hispaniæ peperisse, sed prolem fæminam. In priuaris tuis quid? bibliothecam pergis instruere? Index hic Francosurtenſis quædam dabit. Io. Macarius, cum grâtâ tui memoriâ, ante biduum mihi adfuit, vnâ cum Wingij nostri fratre. Vterque gratus, & in mensulâ meâ miscuimus fabellas. Quando tecum iterum? dispeream nisi aueo: & fiet, ita tu atque ego valeamus. Louanij, 111. Idus Octob. ∞. IOCI.

De Neruiis tuis, ferio aliquoties à te quæsitum, quæ mihi visa hîc habes. Cæsaris & Strabonis tempore has sedes coluisse. Treuiro- rum finibus, ab Oriente; ad Occasum à tergo, Ambianis & Atrebatibus iunctos; Veromanduos, in Meridiem, Atuaticos in

Septem-



Septemtrionem despexisse. Porrectos in longum magis, quàm latum : ab Oriente in Occasum. Hodiernâ nomenclaturâ fines eorum si vis designem, arbitror supra *Namurum* (vulgò *Namurcum*) & ab *Arduennæ* finibus cœpisse; iuisse in Meridiem *Fumacum* versus, tum *Chimacum*, *Auenas*, *Bauaci*, *Valentiana*; & flexu deinde in Occasum & Septemtriones, *Orchiacum*, *Tornacum*, *Aldenardam*; iterumque flexu in Orientem & Meridiem, *Geertsbergam*, *Angium*, *Brainum*, *Gembblacum*, denique rediisse *Namurum*. Coniectura hæc nostra est: & quis aliud in his adferat? sed veterum profectò verbis sensibusque innixa. Nam magnos fines habuisse, Cæsar apertè indicat: qui ab *Ambianis* triduū iter se fecisse per *Neruios* ait, *priusquam ad Sabin veniret* (hodie *Sambram*) vbi copiarum & castra. A Treuiris autem cœpisse quod dixi, non id quidem Cæsar, sed apertissimè bis Strabo scribit, libro quarto: & à Germanis utrosque ortos, ipse ibi, & Tacitus in Germaniâ suâ, scribunt. Iungit & Panegyricus scriptor, *Neruiorum & Treuiorum arua*. At Tacitus *Bethasius* finitimos facit IIII. Histor. *Quilis Bethasios quoque ac Neruios in fidem acceptos copiis suis iungit*. Et antea: *Claudius Labeo quosdâ Neruiorum Bethasiorumque in arma traxit*. At qui isti *Bethasii* Brabantii nostri videntur, quâ parte Hannones tangunt: & hodieque iuxta *Hallas* vicus est *Beeths* nomine, qui vetus illud refert. Itaque fines eorum ab hac quoque parte satis stabiles videantur. Plura quæ dicam non habeo: nisi *Torniacum* vestrum (sic ibi scriptū) à Reginone nominari, in anno Christiano CCCC. xcviii. *Hilpericus*, inquit, *fugiens cum uxore & liberis Torniacum est ingressus*. At in Antonini itinerario est *Turnacum*.

EPISTOLA LXXXI *Audomaropolim.*

ÆGIDIO SCONDONCHO Sacerd. Soc. Iesū.

**A**BIISTI sanè à nobis, nec vel sollenne illud Vale dixisti aut scripsisti. Accusem? absit: scio vestrorum imperia, quibus statim & *ἐμπαύτως* sit parendum. Doluisse tamen me non nego, *\* simul ut dictum.* cui plures iam amici sic abiuncti aut erepti: inter eos Delrius ille, ad Europæ fines, sed suâ sponte, relegatus. Hemelarij nostri litteras legi, & ex iis disce etiam nunc *\* ταπεινοφυσίην.* Habet à naturâ *\* anima abijci.* modestum illud, & panè immodicè: erigendus est, quod sermo-



ne & litteris scio me facitasse. Et profectò nec Aula illa ei placet, vbi fumi & fuci multum; & Batauius ille candor non delectetur, non delectet. Nosti mollem frontem, parum aptam inter duos illos, & cum Homero, \* ἐδ' αἰδῆς μοῖσιν ἔχοντα. Itaque de mansione vix suadeam: cur non ad nos redeat, vitæ genus eligat, in quo & salutem & quietem suam curet? Mihi videatur: nec Batauia moueat, videnda obiter non insidenda. De me, in studiis scriptisque sumus, sed languidè, vt in languore. Non ille me deserit: neque ego tamen illa,

\* nec par-  
tè sortitos  
nèpe pado-  
tis.

\* Ante mi-  
hi quàm  
mortis nu-  
bes luminis  
velat.

\* Περὶ γ' ὅτι δὴ σωατοιο μέλαν νέφος ἀμφιγλύφει.

Tu vale mi Pater, tuo & plurium bono. Louanij, IIII. Kal. No- uemb. ∞ .IOCI.

## EPISTOLA LXXXII.

GERARDO BUYTEWECHIO.

**E**T addam MEO? an alia iam te habet? Habeat, sed non totum: & in te ius meum teneo, nec vllum vinclum no- uum ab illo veteri resoluat. Sed fauco & gratulor toto animo huic incepto, & Deum rogo id non prosperare solùm, sed prope- rare. Satis diu suspendisti nostra & parentum vota:

*Eia age, iunge toros, atque otia deme iuuenta.*

Omnia eò vocant. natura ipsa, quæ hanc legem iugandi & gig- nendi dedit, & sæcula per fationem propagandi.

*Sic rerum series, mundi quæ renascitur ætas.*

Vocant & tui, quibus vnicus es, & (nisi fallor) stirpis tuæ extre- mus. Patiare exstingui? non debes. & quamquam tempora tri- stia vel turbida cunctari suadeant; ætas tua recusat, & nunc fie- ri, quod aliquando possit, impellit. Habet etiam hæc vita suas voluptates & lenocinia, præsertim tali compare, qualem descri- bis, à stirpe, à parentibus, à se honestam, bonam, mitem. Euripi- dis effatum est:

\* Mortaliū  
quibus se-  
cunda na-  
tura  
Cedunt,  
beatavina:  
sed quibus  
aliter,  
Illi domi  
infelicitè  
agunt, &  
foris.

\* Γάμει δ' ὅσοις μὲν δὴ κατεστῆσι βροτῶν,

Μακάριαι αἰῶν' οἷς δὲ μὴ πίπτεται ἐν,

Τὰ τ' ἐνδον εἰσι, τὰ τε θύραζε δυσχεῖς.

Adsit illud, absit hoc à tuis nuptiis:

— *det Juno verenda*

*Vincula,*

*Vincula, & insigni gemit Concordia tectâ.*

Mihi in eo vno voto omnia inesse videantur, & vbi pax & concordia inter consortes obtinent, felicitatem illam & alia bona comitari. FIAT, FIAT: & amplius, huic felicitati fecunditas comitetur, vt verè illa sit *γυνή*, quam pulchrè *ἡ δὲ τὴν γυνήν* veteres magistri deriuarunt. Sed heus, scis & in domo meâ nuptias, & quidem duplices, fuisse? Verè in domo meâ priores. è quâ ancilla mea *Anna* illa, quam nosti, ante paucas septimanas enupsit: alteras è domo, si non in ipsâ. Tenes memoriâ N. N. gente vestrum, Thesaurarij ex sorore nepotem apud me tricennium circiter egisse? & modestè quidem ac laudabiliter egisse. Sed exitus fuit, opinionioni nostræ dispar, & relictâ magnâ spe opum (nam auunculo, non solum patri, heres destinabatur) in Diui Francisci familiam nomen dedit. Hòc ipso die manè publicè induit cœtus eius sacram vestem. Deus robur adspiret, & athletam ad metam sistat: etsi eursum hunc currere cœpit nobis omnibus insciis, neque enim dicam (de me quidem) inuitis. Reliqui etiam mei contubernales ordine abierunt, in Italian, in Galliam, Hispaniam, quo sua quemque sors duxit: & in solitudine sum, diu mihi optatâ, & in omni æuo dilectâ. O si com meatus ad vos sit, qui solet! testor Numen, oculis imò & osculis tuam nunc libem: vetamur. tu vicem meam facito, atque ita vt iterum nos lætifies, te patre, parentibus tuis auis. quos saluto, & gaudium illorum gaudeo, quod animi his luminibus cerno. Vale, & rem gere mi Buytewechi, verè *ἀνὴρ \* παρὰ τὸ ἀνδρο- \* à fodiens* *ρῦττειν*, ait vir sanctus: ne vt lasciuiosulum hoc culpes. Louanij, *do.* Isidorus Pelusiota, in Epist.

v. Kal. Nouembr. ∞. 1561.

# EPISTOLA LXXXIII. *Bruxellam.*

NICOLAO DE VVEERDT *I<sup>do</sup> & Cognato.*

**D**OLEO & gaudeo in vnâ tuâ, & vnius argumenti scriptio-  
ne. Dolco iterum præteritum me in officio, quod sic libes  
latusque obtuli, & vsurpem: gaudeo tamen peperisse tuam, &  
vinculis illis exsolutam, quæ etsi optabile periculum, periculum  
tamen ostendunt & minantur. Deus & ipsam det valescere, &  
prolem natam crescere, suæ gloriæ, gaudio longo atq. vsui vestro.

*Differs*



*Explicuit sua victor arma.*

Tu eo faciente facies, mi Hemelari: atque ita mihi salue. Louanij, prid. Kal. Nouemb. ∞. 1661.

EPISTOLA LXXXV. *Leodicum.*PETRO ORANO *J<sup>ro</sup>.*

**A**PUD te nec excuso quidem, quòd sileam. Non mihi semel liceat, quod tibi frequens, & pænè in morem vertit? Feci apud Carondeletum: & tu quoque è lustralibus illis aquis sume. Filium valere, gaudeo; & magis, quem volumus & destinamus, esse. Angit de lite, quam imminere significat in domo à Patruo relictâ: & si mei arbitrij res sit, ad concordiam potius inclinet. Cum Principe viro res est; & nosti Homericum,

\*Μῆτε σὺ πηλείδῃ δ' ἑλ' ἐρξέμεναι βασιλῆϊ Ἀντιόχῳ.

\*Nec tu  
Pelida regi  
contendere  
tentas  
Aduersus.

Fiat tamen, quod tu iudicabis, harum rerum vetus & gnarus. Billæum rediisse, gaudeo: idem breui de Principe vouemus, & in circumstantibus turbis aut periculis ex vsu vestro fore putamus. Te quoque valere, mei voti est, & semper me amaturum amare. Louanij, postrid. Kal. Nouemb. ∞. 1661.

EPISTOLA LXXXVI. *Romam.*FRANCISCO ORANO *suo S. D.*

**R**ESPONSVM debeo binis iam tuis litteris: imò non debeo, nec paria tecum facere in hoc genere aut induxi animum, aut copia mea ferat. Otij vos beatos! nos obruimur, & quod publicè minùs aut tardiùs aliquid præstamus, sit priuatis istis scriptiunculis, quæ à manè ad vesperam sæpè habent. Quid querar apud te gnarum? ideò ignosces, & animum semper in te agnosces, qui est & fuit. Litem tibi esse nolim: odi ipsum nomen: & vtique non cum illo è Dynastis: ac si me audis (ad patrem etiam scripsi) transigas & componas. Plumarum potius aliquid amitte, quàm vt de cute aut carne pericliteris.

*Contracto melius parua Cupidine  
Vestigalia porriges.*

& vitæ genus quod elegisti, in arcta te non detrudet. Et honos & vbertas, meo præfagio, te manent. Noster ibi Richardotus ecquid

M M m

apud



apud te frequens? credo non frigere amicitiam, quæ in domo meâ, & iure contubernij, incepit. Alter etiam mox frater, Guilielmus, ibi erit: & ante quinque septimanas à me dimissi illuc iturientem. Rubenium viâ. ô insignem iuuenem, & optimis litteris artibusque non tinctum, sed imbutum! At audi aliud, cum tuo miraculo. N. N. ille noster, quem iam Licentiæ destinabamus, in D. Francisci cœtum se dedit, amicis omnibus ignaris, inuitis, iratis. Quid tu ais? nône maior vis, aut altior vox, eum traxit? Publica sunt, quæ fuere, & fortassis erunt, lenta, ambigua, tristibus lætisque varianda. Ad Ostendam adhuc sedemus: de claudendâ à mari spes erat, benè si rata. Si fallit, vereor vt aliâ vi aut viâ aliquid fiat: nisi Deus palàm iuuat. qui nobis in tot malis constantiam, tibi salutem mi Orane feruet. Louanij, postrid. Kal. Nouemb. ∞. 1661. Audeantius te salutat.

EPISTOLA LXXXVII. *Hispalim.*

IOANNI WOUERIO S. D.

**E**STNE? amantes ad ineptias etiam labi? In te experior (ignosce) mi Woueri: qui sermone nuper, & nunc litteris iteras, vt aliquid pangam de vitâ meâ & scriptis. Cui rei autem? alijs? ineptum, aut superuacuum est: & nihil in illâ, quod nosse aliorum interfit. Tibi igitur? atqui in contubernio meo fuisti, & hoc pænè est, vitam meam totam nosse. Quid enim in eâ nisi equale illud & vniforme, quod vidisti? legere, docere, scribere: & cetera tranquillum, & ab actione remotum esse. Quid ergo narrem? non maiorum res gestas, non meas possum: & tenuia in nobis pleraque aut minuta. Tamen quia valdè cupis, & ego naturâ obsequens: accipe ea ipsa tenuia, & quidem à carceribus, id est, cum missus sum in hanc vitam. Id fuit, Dei benignitate, Anno ∞. 16. XLVII. die qui D. Lucæ sacer est, xv. Kal. Nouembris. Nox media me edidit: cum mater (ita narrantem sæpè audiui) superiori proximâ nocte, vidisset vigilans & ex omnis, duos puellios mirè candidos, per cubiculum inambulantes, mutuum se complexos. Interpretatio (si tamen vlla) ipsi nobisque incerta. In Iscano autem sum genitus, in municipio aëre, aquis, situ peramœno: quod

tertio

tertio milliari à Bruxellâ, itemque à Louanio abest. Vidisti ipse me ducente : quid describam? & locum adeò domumque nunc semirutam, in quâ sum natus. Non enim auitâ illâ nostrâ & paternâ, quæ incendio perierat, paullò post instauranda. Parentes mihi, *Ægidius Lipsius* & *Isabella Petirinia*: ille vnicus parentibus, hæc vnica: opibus & genere vterque perhonestis. Auus *Nicolaus Lipsius*, quieti & litteris operatus: propatruus *Martinus Lipsius*, vir ob doctrinam Erasmo familiaris, & à suis illiusque scriptis notus. Vxor aui *Margareta Eechoutia*, stirpe nobili: & maiores, pater, fratres eius, in Principum nostrorum aulis. Proauus *Iustus Lipsius*, cui vxor *Anna Linckebekia*, genere nobilissimo, sed in virili stirpe iam extincto. Ea in dotem villam, agros, domum contulit, quæ in Iscano: atque ea occasio mei illic nati. Nam pater & maiores, domo omnes Bruxellenses erant: atque ibi, aut in viciniâ, opes. Agitatum in sacro fonte & die meo lustrico, de Lucæ nomine imponendo, causâ à me dicta: sed pater abnuuit, & aui paterni, maternique nomen in me renouauit. Parentes Iscanum aliquot annos tenuit, quia & mater in propinquo villam & agros vberes habebat, supra Wavriam: & pater item in Iscano dicta bona. Ergo & ibi educatus sum: non sine duplici periculo, quod præsens vitæ meæ fuit. Puer quadriennis, egressus domo ad vesiculam leuandam, video niues (media hiems erat) in colliculum vtrisque, vt via media esset, scopis aggestas. Conscendo, in faciem cado, spirandi impos & iam suffocandus: nisi ancilla, quæ supernè verrebat, bono fato me respexisset, & erectum seruasset. Alterum, cum domus, vt dixi, repararetur, per tabulata & machinas fabrorum lusingo: decido quindecim pedum altitudine, cum sodali meo: qui crus sibi frangit, ego caput & sinistram aurem leuiter lædo. Tutela mea, Genius fuit: &, quòd cingulo sericeo suspensus in perticâ hæsi, donec eo soluto caderem, sed ictu molliore. Annos iam sex natus, Bruxellam cum parentibus migro. ibi studijs litterarum initior: facili promptoque ingenio adeò, vt præceptor me paruulum (in memoriâ teneo) genibus impositum, & sic recitantem, alijs ostenderet in æmulationem aut exemplum. Inter condiscipulos *Dionysius Villerius* tunc fuit: ô carum mihi exinde nomen. Grammaticalia statim hausi, & sponte ad linguam Gallicam etiam me dedi; quam è libris sine do-

ctore ita didici, vt scribere possem, etsi loqui & legitimè pronunciare non possem. Sed hîc mihi etiam discrimen, non nisi à Deo palàm depulsum. Cum æqualibus currere & lusitare, feriat diebus, extra urbem solemus: & euênit, vt circa Sennam flumen. Ibi cymbula ripæ applicita, & fune ad arborem religata, haud longè supra frumentariam molam. nos intramus, solui-mus, & agitamur: videt molitor, accurrit, & voce minatur. Mei deserunt, exeunt: pænultimus ego idem conor, sed pedibus priorum repulsa cymba, & à ripâ disiunctior, saltum fefellit. Capite igitur præceps in flumen labor, puero vno, qui post me, diuinitus animato vt pedem mihi prehenderet, atque ita suspensum tene-ret. Intereà molitor aduenit, attollit semianimem, aquæ satu-rum: & sospitator vtrique nostrum fuit. Vtrique inquam. nam & cymba prono fluxu (absque illo erat) ad molam ibat, eius vor-ticibus inuoluenda & mergenda. Sed ad vitæ meæ spatia redeo. Anno decimo Athum Hannoniæ ablegor, bonæ famæ scholam: atque iterum ibi Grammaticalia, prauo æui nostri more. Bien-nium in ijs detineor, mox carmen cœpi scribere: & anno tercio Coloniam Vbiorum porro, ad *Patres Societatis* mittor. Ij me Rhetoricis, ij Philosophicis imbuerunt: capere sanè proum, atque ibi & alibi antea (non per iactantiam dico) semper ducto-rem & principem meæ classis. Sub id tempus pietas pectus meum tangere, & Patribus ipsis velle accenseri: parentes sciuerunt, ab-duxerunt, & annos iam sedecim natum Louanium amanda-runt. Ibi litterarum & antiquitatis hæc studia ad se traxerunt: quorum tamen gustum amoremque Colonix infuderat *Gerar-dus Kempensis*, præceptor meus in Græcis, acerbi homo fati. Sed Louanij compares mihi comitesque in ijsdem studijs *Ludovicus Carrio*, *Franciscus Martinus*, *Arnoldus Deinius*; ductore omnium nostrum *Cornelio Valerio* & quasi chorago. Nam is *Petro Nannio*, qui primus honestum ibi ignem accenderat, successor datus: stu-dio non impar, ingenio inferior. Accessere mox *Martinus Del-rius*, *Victor Giselinus*, *Ianus Lernutius*, *Andreas Schottus*: interio-res isti, & ex asse amici: & vterque ille primus, arcti affectus, liberi oris. Dum autem inibi sum, & Iuris etiam artem libo, pater mihi fato functus est: vir acer, manu promptus, sodali-um ac conuiuiorum appetens, & qui hâc comitate amplum patri-mo-

Anno ∞.  
10. LXIII.



patrimonium valdè attriuit. Mater curam eius reliqui, & nostrum (mei & sororis dico) suscepit: matrona in summâ modestiâ virilis animi & consilij, & cui ex illo sexu, æuo, populo, non aliam iudicio præponam. Hæc meâ causâ Louanium venit, sedem transtulit, atque ibi ex hydrope non diu post obiit. Annum ægebam tum ferè decimum octauum, & publicè iam specimen aliquod mei dederam declamando in Scholis, aut disserendo. sed imago magisque Musa vetus me capere: & eius amore Italiam cogitare. Feci. sed libris antea VARIARVM LECTIONVM quattuor conscriptis atque editis, quos *Antonio Perenotto* Cardinali Granuellano inscripsi. Primus hic mihi aditus ad famam, etiam in illius patroni nostri domum fuit: in quam Romæ admissus, biennium circiter egi: cum omni benignitate ab eo habitus, & ad studia tractanda non incitatus solum, sed adiutus. Erant à Latinis ei epistolæ: sed otium & omne liberum tempus dabat inspectioni lapidum, locorum veterum, & si quid visendum noscendumque in vrbe aut circa esset. Bibliotheca etiam Vaticana mihi per eum & *Guilhelmum Zirletum* Cardinalem (aureo æuo dignum) patuit: & in ijs studijs curisque tempus illud sumpsi. Innotui *Paullo Manutio*, *Fuluio Ursino*, *Latino Latini*, *Hieronymo Mercuriali*, *Antonio Mureto*: familiarissimus *Plauto Bencio*, qui *Francisci* postea nomen sanctius cum sanctiore vitâ assumpsit. *Petrum Victorium* etiam, & *Carolum Sigonium*, per viam vidi: atque ego venerationem illis, ipsi affectum mihi exhibuerunt. Louaniū deinde redij, annū vnum egi, in \* æuū ipsâ adolescentiæ, \* *vigore.*

*Iucundum cum ætas florida ver ageret:*

& egi (simpliciter apud te dicam) haud vsquequaque ad prisce Catonis normam. Liber eram, parentum & tutorum expers: atque ita choreis, sodalitijs, nugis, ludum & libentiam aliquam ætati dedi. Sed non diu dedi. natura melior me reduxit, atque ego ad eum me subduxi peregrinatiunculâ: quam Viennam Austriæ, & in Cæsaris aulam, decreui, suscepi, perfeci. prius tamen & obitter Dola Sequanorum lustratâ. Ibi acerrima febris me pernissimè sustulit: quam contraxeram Oratiunculâ in honore & titulo *Gisellini* mei dictâ à meridie, & conuiuio mox infecuto. Euasi, Viennam perrexi: atque ibi *Augerio Busbequio*, *Ioanni Sambuco*, *Ioanni Cratoni*, *Stephano Pighio* innotui, & placui: atque ij re-



Anno 10. LXXII.

\*-à d'ysfa-  
raliter hoc  
decretum.

Anno  
LXXVI.

tinere me & illigare in ijs locis, non vnâ conditione conati. Frustrâ. nam patriam respectabam : & animo redeundi, per Boheimiam, Misniam, Thuringiam, & ea loca iter institui: cum acerbi nunciij de afflictâ nouis bellis nostrâ Belgicâ, patrimonio vi militum attrito, me pedem figere in ijs locis adegerunt. Ienæ paullò plus annum mansi, docui, & illa primordia mihi ad Professoriû hoc munus fuêre. Sed rebus paullum modò tranquillatis, oculos iterum ad meos & mea flexi, Coloniam Vbiorum veni, vxorem duxi; mei magis animi, quàm amicorum, impulsu. Sed, vt ille ait, *τὸ μὲν ἄρ' οὐκ ἐπέλωσαν θεοὶ αὐτοί:* & concorditer sanè viximus, fructus tamen matrimonij, id est liberorum, exsortes. Coloniae nouem menses substiti: TACITVM primò correctum, & NOTAS ad eum dedi: ibidem ANTIQVAS LECTIONES conscripsi. Inde in Iscanum meum migraui, animo destinato ruri agere, & tabernaculum vitæ in quiete illâ collocare. Bella vetuerunt, Louanium compulerunt: atque ibi (hoc tamen ex amicorum consilio) iuris studijs paullò magis seriò me dedi, & titulum etiam I<sup>ai</sup> publicâ inauguratione sumpsi. EPISTOLICAE meæ lucem tunc viderunt; & sub tempus LEGES REGIAE & DECENVIRALES concinnatae, non famę tamen sed auditorum gratiâ; quibus publicè interpretatus sum, itemque *Linij* quædam. Tum acriores procellæ iterum & venti, quibus nihil propius factum, quàm vt mergeretur Belgicę hæc navis. Fluctu, cum pluribus, eiectioni sumus in Batauiam terram: in sedimus, sed mente, vt stationem eam haberemus, non portum. Turbæ tamen è turbis mutare vetuerunt, & tredecim ipsos annos tenuerunt. Cur autem negem? homines benignos & beneficos repperi: sed relinquere eos Religio & Fama (acre vtrumque telum) adegerunt. Dum inibi sum scripsi,

ELECTORVM LIBRÒS II.

SATYRAM MENIPPAEAM.

SATVRNALIVM LIBR. II.

COMMENTARIOS PLENOS in CORN. TACITVM.

DE CONSTANTIA LIBR. II.

DE AMPHITHEATRO LIBR. II.

AD VALERIVM MAXIMVM NOTAS.

EPISTOLARVM CENTVRR. II.

EPISTOLICAM INSTITVTIONEM.

DE RECTA PRONVNCIATIONE LINGVAE LATINAE.

ANIMADVERSIONES IN SENECAE TRAGOEDIAS.

ANIMADVERSIONES IN VELLEIVM PATERCVLM.

POLITICORVM LIBRR. VI.

DE VNA RELIGIONE LIBRVM.

Plufcula, vt vides, & (vt in meis) optima ferè : quid mirum ? in flore æui & ingenij, in alto otio: nec valetudo, nifi fub extremos annos, titubauit. Tum hepaticus ifte morbus, & tabes an languor, inuafit : & quamquam remifit, bonâ fide numquam dimifit. Illinc digrefsi, Leodici aut Spadæ biennium propemodum egimus, valetudini per Acidulas illas refouendæ : tum Louanium regrefsi, vltimam, nifi fallor, & fatalem meam fedem. A quâ tamen variè auocati fuimus, à Pontifice, Rege Gallia, Venetis, Duce Etruria, Bononiensibus : fed placuit manfio, vt in æuo meo labente, & valetudine iam lapsâ. Stipendium mihi modicum: fed rex Philippus, faciente *Petro Enriquez* Comite Fontano, auxit, & Hiftoriographi etiam fui titulo donauit. Scripfimus autem Louanij,

Anno ∞.  
Id. xcl.

DE CRUCE LIBRR. III.

DE MILITIA ROMANA LIBRR. V.

POLIORCETICON, V.

DE MAGNITVDINE ROMANA IIII.

DISSERTATVNCVLAM, ET COMMENTARIVM IN  
PLINII PANEGRICVM.

Hæc octennio circiter, ad iftum annum ∞. IdC. qui nunc currit. Et plura ac varia affecta nobis aut profligata eſſe, non negamus: fed temporum afpectu quædam premi, & iudicio differri. En, mi Woueri, noſtram vitam & ſcripta: dic ſeriò, non ſubpœniter impetraſſe? de meipſo tamen aut indole meâ, tria etiam verba. Corpus & facies non indecora, vtique ante morbum: os probum, animus verecundus: ingenium docile & capax omnium, excipio Muſicam: iudicatio collineans & recta: memoria non ſine præceptorum miraculo, etiam in puero: quæ nunc, etſi elanguit, non defecit. Eloquentia nobis prompta, nec ſine Venere, in publico: priuatim, reſtricti magis, & minus amœni. Stili & inuentionum faciles: labori & aſſiduitati impares; & naturæ, quàm illis, in omni ætate obſtrictiores. In cultu, geſtu, ſermone modici:

modici : & exterorum qui *Lipsum* videbant, sæpè requirebant. Quod superest, bona. & bonos amaui, amatus sum : scientiam, & magis sapientiam, colui : lites fugi, honores fugi : domi forisq̃ue benignus, comis, & quem vereri posses non timere. Sed quò eo? tuus quoque me calor abripit : reprimo, & cum Euripide,

Συεσωφρονεῖν σοι βούλομαι, ἀλλ' εἰ συννοσῇ :

*Consipere, non desipere tecum debeo.*

Louanij, Kal. Octobr. ∞. Ioc.

## EPISTOLA LXXIIIX.

*Duacum.*

FRANCISCO MONTMORENCIO *Bersëij Toparchæ.*

**A**DOLESCENTEM nobilem *Gommicourtium*, cognatum tuum, mihi commendas : & est certè, quia tuus, & quia te & stirpe suâ ( ita vultus & sermones mihi dicunt ) dignus. Ego, quicquid in meâ copiâ erit, faciam libens, & promptiùs laxiùsque, quàm dicam. Significas etiam te, animi causâ, Dissertationem in publico habiturum super Peregrinatione. Quin laudabis eam, non ambigo : instrumentum profectò vsui rerum & prudentiæ. vt ingenuam voluptatem omittam, quæ in ipsâ est, & post ipsam. Nam & cogitatione, quis non eadem illa visâ, reuifit suauiter & gustat? colloquia, viros, vrbes, agros, filuas, montes, flumina: quæ mihi imagines sæpè ambulanti aut dormituri ingunt, & cum delectatione in ijs acquiesco. Platonem causâ suâ duxerint, vt è compolitâ republicâ eam tolleret, aut parcè & tardè indulgeret : manum aut suffragium ego non derim, & alijs suadeam, ipse vsurpem, hoc lustrare & vagari. Quid? Deus ipse, nōne hominem condidit, vt Philosophus optimi sensus ait, \* *Θεοτὴν αὐτὸς τε, καὶ τῶν ἔργων τῶν αὐτοῦ* ? Non iuuet & deceat me, cū mundanus sim, nosse & videre, quantum datur, hanc meam patriam?

\* *Spektationem sui & suorum operum?*  
Epictet.

*Si Ladas ego, pennipésve Persæus,*

*Aut si Pegaseo ferar volatu;*

ô quantum maris terræque obeam? quàm nota & noua regionum lustrem? Sed ligamur ætate, coniugio, languore, bellis: itaque

que intra affectum manemus, leuiter tamen inuidentes quibus licet, sed & indignantes quibus non libet. Vides quò eam, & quàm ipsa iniectio tua animum mihi mouerit & soluerit in has voces. Coërceo, eundem ad te mitto non peregrinatum, sed habitatum. Vale Nobil<sup>me</sup> Domine. Louanij, postrid. Idus Nouemb. ∞. IOCI.

EPISTOLA LXXIX. *Antuerpiam.*

BALTHASARI MORETO suo S. D.

**B**ENE factum de Corollario. merebantur & hanc laudem siue elogium nostri canes. Dic serio, non risisti cùm legisti? At ego & Equos laudatum ita iui, & Centuria sequens dabit. Libros Lutetiâ accepi, sanè gratos & in meum vsum. De Chronicis scriptoribus, postea videbimus: Vvno nunc gratia & salus esto. nam ego interea, vt spero, Antuerpiam & vos videbo. Tum de subsidijs operis, ad quod ædificandum inclino. Et si FAX mea est, quam velim item absolutam: & ausim dicere, nihil vtilius conceptum in rem litterarum. O subitam mortem illius amici! cui bono nunc illa, quæ falsò appellantur bona? quid possidenti dederunt? vmbra, non fructum: & vereor vt nec hic superstes impendat, & heredibus modò seruet. Ludibria humana! & fortunam meritò cæcam, quæ ad me aut alios non venit, aliter vsuros, imò & fruituros. Res nostræ publicæ me interim angunt, id est sollicitum habent quò sint euasuræ. Partes nostræ crescunt, animos & ordinem & disciplinam habent aut sumunt: nos in confusione, & nec monita sequi lubet aut exempla. Fati vis est, agnosco: cui parere & sine murmure obsequi vetus sapientum dogma est. Ego audio, te amo mi Morete. Louanij, xv. Kal. Decemb. ∞. IOCI. Parentes, & fratrem tuum saluto, ac redditum ei gratulor corde.

## EPISTOLA XC.

IACOBO ANGIANO, *Equiti, Toparchæ Kestergatij.*

**A**NTE dies plusculos vidi epistolam ad cognatum tuum Berlegemium, in quo & salus mihi per te missa, & amica

NNn

mentio



mentio veteris consuetudinis nostræ, iam à pueritiâ contractæ, erat. Gauisus sum, fateor. nam quî obliuiscar primos illos amores ac delicias, quas simplex & malarum artium rudis ætas gignit? Atque ea mihi inhærent, & suauis recordatione etiam nunc sensus titillant. Rogo igitur te, vt in legitimam & maturam, id est virilem amicitiam excrefcere iacta iam tunc illa semina velis: quod fiet, si recondita ea in hoc animo, velut aruo, affectu beniuolentiæ tuæ velut Zephyri flatu, & alloquio interdum vt imbre, educes ac rigabis. Quod autem petieras, in memoriam tuorum maiorum aliquid breue, & monumenti loco, pangi: ecce feci. duo hîc habes, vtêris alterutro, vt tibi visum: & siquid addi, demi, mutari censebis; significabis, & factum putabis. Nam ego Nobil<sup>me</sup> Domine, cultum & obsequia virtuti ac dignitati tuæ debeo, & hîc scriptione defero ac sub signo. Louanij, XI. Kal. Decembr. ∞. IOCI.

Historiam gentilis tui obiter vidi. totam adhuc non licuit; vsui fore video in ijs quæ paro. Remittetur, cum voles.

## EPISTOLA XCI.

*Mechliniam.*

IANO BERNARTIO suo.

\* Falsus  
fui. ex hoc  
ipso morbo  
post paucos  
dies obiit,  
paullum  
tricesimo  
anno ma-  
ior. Dolor  
mihi, &  
suis, &  
Musis,  
quas & in-  
ter leges  
colobant.

**Z**YPENVS, insignis iuuenis, & communis noster litteras à te tulit, ad spectu magis quàm lectu gratas. Nam de inuoluntudine tuâ habebant, mihi triste: nisi quod spero tentatiunculam modò esse, non firmum aut cum\* discrimine morbum. Quicquid erit, porrò significa, & Deum rogo vt læta. Te autem, vt in omni sorte toleres, & constes præceptis illis tuis, quæ Conso- lationi Boëtianæ miscuisti. Non est tibi integrum, mollem aut pro vulgi more & sensu esse, qui altas illas voces emisisti, & regnū omne fortunæ calcantes. Reminiscere, & vt alij velint, tu exemplo præi, & præsume. Alioquin, quid nisi citharæ similes sumus, quæ suaues sonos edit, nec ipsa eos audit: sic nos egregia monita & doctrinas, ipsi ab ijs expertes? Si in scribendo delectare nobis propositum, aut etiam alijs non nobis prodesse: desinamus hanc operam licet, facilius & promptius aliâ arte assecuturi. Clausula est, patiendâ humana esse. quare? quia *Deum sequi*, vetus & commune sapientum dogma est:

— *cuncta autem hac superum demissa supremâ*

*Mente fluunt.*

quod altiloquus ille pœta tuus dixit. Sed de Boëtio, non breui fruemur? addixit ita Moretus in suis ad me litteris: & puto ad te idem. Milites à Buscoducensi liberatione redeunt, & agminatim hac transeunt: ô liberatione nobis optatâ! Etsi ea Deo potius adscribenda, qui hiemem, niues, gelu induxit, & aërem commilitare nobis, omnesque in eo Genios, fecit. Sed periculo quàm propinqui fuimus? magnę, mire, non credendę in breui illo tempore Batauorum munitiones. Dixi tibi, & verum est, Romana opera & militiam imitantur: & ad illud Corbulonis, *Dolabrâ*, non gladio solùm, *victriciam querunt*. Sed quomodocumque, vicimus, aut obtinuimus: etsi cum tremore aliquo hæc securitas,

*Magnaque post lacrimas etiamnum gaudia pallent.*

Actum de hac vrbe & Academia erat, si ea in partes aduersas cessisset. Ad Ostendam quid fiet, in dies exspectamus, spei iam propiores, quia & illuc hiems ista præproperea nobis opportuna. Deus victriciam illuc, tibi valetudinem mi Bernarti donet, ac tuæ feruet: quam saluto. Louanij, VII. Idus Decemb. ∞. IOCI.

## EPISTOLA XCII.

*Romæ.*

ANTONIO RICHARDOTO suo.

**N**VLLE mihi litteræ tuæ suauiores (eo verbo vtendum est) his postremis, quæ de reditu tuo non spem sed fiduciam faciebant. O res breui sit! ô te meum, & tu me, amplectare! Non annos, sed lustra videris abfuisse: quos ego quidem magis numero, quia pauci mihi supersunt, senescenti, & cuius, cū pœta,

*Lenit albescens animos capillus.*

Dete igitur latum, de fratre Guiljelmo pendemus animi: & quid suspicabimur? Ne vos quidem aliquid audisse? nam nos certè (parentem etiam tuum includo) ab eius discessu nihil. Nisi si litteræ perierint, aut in viâ alibi hæserint, triste nobis omen ab hoc silentio detur. Sed Deus auertat, qui illum & te feruet, & vtrumque nobis, sed te statim reddat. Titulo Præfecti equitum donatum te à Principe, puto audisti: & ampliora te manent, cū adueneris, quæ magis in agis que, cum ætate, mereri te cupio: &

NN n 2

crefcere

crefcere vnà virtutis & prudentiæ ftudium atque amorem. O patriam nofttram adflictam, & confilij vel auxilij egentem ! Etſi confilium ſint; qui dare poſſunt, inter eos confilij caput tuus parens : ſed Deus inclinare & flectere ad ea corda Principum poteſt, itemq̃ue ea ipſa proſperare. Sæpẽ enim, aut non raro, optimè conſulta ſuccellus deſtituit, qui à cælo pender. Tu vale, & veni optatiſſime nobis, & D. Legato fratri tuo me & mea ſeriò defer. Louanij, xvi. Kal. Ianuar. anni ∞ . IOCII.

## EPISTOLA XCIII.

*Antuerpiam.*

IO. BAPTISTAE PEREZIO BARONIO S. D.

**T**RISTE mihi fuiſſe, & velut plagam in animo, hoc inopinatum de diſceſſu C. V. Ludouici Perezij aui tui, per te potes ſcire. Noſti amicitiam quæ inter nos vetus & fida fuit : quidni talis, ab annis iam triginta amplius contracta, & ſine offenſâ, imò querelâ, habita ac culta ? Scio & te tuosq̃ue, mi Baroni, indoluiffe in hoc caſu : qui alterum tamquam parentem amiſiſtis, in omni ſorte, conſilijs factiſq̃; adiutorem aut directorem. Itaque alterâ iam anchorâ nauis hæc veſtra ſpoliata eſt : Deus ſeruet illam ſacram, & parentem tuum diu velit ſuperelle. Quid tamen eſt ? dolere vos & ego debemus, & cauſa eſt : ſed cum modo, nec quò affectus ſolùm aut natura, ſed ratio trahit, audire & ſequi. Non enim vt puluis aut palea ab omni vento, ſic nos rapi à perturbatione debemus : ſed hanc coërcere, & animum pondere illo rationis & ſapientiæ ſtabilire. Quid autem ea dicit ? nihil inſolens eueniſſe, mortalem mortuum eſſe, nec diuulſum à nobis, ſed prægreſſum. In eâdem viâ omnes ſuius, ad eandem Fati metam tendimus, & pertingemus,

—*ſine reges,**ſiue inopes erimus coloni.*

Quod ergo omnibus, quod ſemper euenit & eueniet : cur vt proprium dolorem aut cladem interpretemur ? Qui periti cæleſtium ſunt, in Solis aut Lunæ deliquio non ſtupent aut timent : ſciunt enim mox redituram vtrique fideri ſuam claritatem : ſimile nobis Chriſtianis ſit. qui gnari diuinarum promiſſionum, non mortem hanc habemus, ſed tranſitum ad vitam. Pro breui iſtâ,  
turbidâ

turbidâ & impacatâ, æterna nos manet, curarum turbarumque expers. Iactamur hîc inter vndas, & noui semper aliqui alicunde fluctus: ô quando erimus vbi purum illud certumque serenum est? quò tempestas, imò nec metus eius, adspirat? Sicut fumus, quamuis crassus, cum altum petit, dissipatur & perit: sic necesse doloris omnem nubem, si cogitatione alta illa adeamus. Faciamus mi Baroni, nec illa plebeia cogitemus aut loquamur, Heu cur ille mortuus? cur me deseruit & reliquit? O stulte, debuit:

*Certa etenim vitæ finis mortalibus instat,  
Nec deuitari letum pote, quin obeamus.*

Ab Epicæteri potius sapientiâ illa mutuemur: *Non sum æternitas, sed homo: id est, particula Uniuerſi, vt hora diei. Venire igitur me oportet, vt horam; & præterire, vt horam.* Vidēsne in agris vt fruges fatæ in herbam, in culmum, in aristam surgunt, matureſcunt, & metuntur: sic in nobis. venimus in vitam, quidam in herbâ, alij in culmo pereunt, plerique in maturitate aliquâ metuntur: & quæ cauſſa querelæ est? Ante oculos sortis humanæ conditio ponatur: ita sati & nati ſumus. Enimuerò in nostro isto, ſi examinas, iuſtior gratandi etiam cauſſa, quàm querendi occurret. quòd æquabilem vitæ curſum, cum optimâ ſamâ, ſine Fortunæ inſigni plagâ, peregit: quod ad terminos etiam illos æui peruēnit, quò pauci omninò pertingunt. Vidit & reliquit familiam florentem, liberos, nepotes, pronepotes: vt nec obiſſe quidem videri debeat, qui in tot animis corporibuſque ſuorum viuit. Vt agricola parùm aut nihil dolet in arbore amiſſâ, quæ ex vno trunco plures frutices & iam pænè arbores dedit: ſit hîc ſimile. non tamen vt nihil, ſed vt modèſtiùs leuiuſque doleamus. Ille quidem in ſuperis locis, beatus inter beatos agit, vti ſperamus: & apud nos tamen memoria virtutum eius viuit & viuet. quid apud nos? apud alienos, & populum etiam hunc veſtrum: quem probitate illâ & benignitate ſuum fecerat, iuuando, conſulendo, conſolando, velut communis omnium parens. Hæc talia cogitemus mi Baroni. & vt ſpinas aut tribulos, etſi adhærentes aut amplectentes, dimouemus; ad poma aut vuas vltro manus porrigimus: ſic in isto caſu, quod iuuare aut alleuare poteſt, apprehendamus; pungentia illa & noxia, etſi offerunt ſe, depellamus.



lamus. Fac, te quaeso: ego tecum dabo operam: & communia hæc vtrique solatia (nam & ipse egeo) scito à me scripta. Louanij, VI. Kal. anni noui instantis ∞. MDCLII. quem voueo parenti tuo & tibi feliciter labi.

EPISTOLA XCIIII. *Pragam.*

IOANNI HOLLANDIO.

**G**AVDEO te rediisse incolumem, aut certè nunc esse incolumem, vti epistola tua mihi dat augurari. Nam diutinam valetudinem te passum intellexi, & dolui: spero omnia mitiora nunc fore & meliora, in patrio tuo solo. Sed & hoc gaudeo, talem rediisse, qualem scriptio ostendit: ita me Deus, plena honestissimi desiderij & studij, atque vno verbo, Bonæ mentis. Rogo te, perge in hac viâ & virâ, & reipublicæ ornamentum vel subsidium dona, vbi non laboranti? Certè apud nos aspera omnia & in ancipiti, & non ab vno hoste laboramus. Sunt qui in aperto, sunt qui cuniculis oppugnent: atque vtinam vt vires, ita consilia sint, ad resistendum! Qui volent, differant: sed mihi firmum, plus mentem quàm manus valere, plus industriam quàm omnes opes. Confluant à veteri orbe, confluant ab isto nouo: alimenta malorum erunt, non remedia, nisi cæcum illum Plutum Prudentia dirigat & moderetur.

*Sed quid vana cano? quid fixos arceo casus?*

in supero illo consistorio decretum, quid nobis vobisque, & quomodo fiat. Iuuat videre interdum occultas fatorum vias, & quàm ipsis nobis contra nos vtantur. Quæ causâ est? illa, in quâ sistimus:

*— nusquam pietas, non gentibus æquum*

*Fas aut cura Iouis.*

Sed heu, inopinata etiam de vobis! tabellas illinc laureatas expectabamus: cupressinæ aduenerunt. Triste mehercules & pænè funestum, de Canisâ: vtique si hostis occasione suâ & viribus norit vti. Solimannus aliquis si esset, Germania vbi esset? At Deus hæc moderatur, & sistet vt spero impetum barbarici hostis, & nos vitam, ipse fortunam emendabit. Louanij, VII. Idus Ianuar. ∞. MDCLII.

EPI-

## EPISTOLA XCV.

IOANNI DRENCKVVAIRTO, *supremo Thesaurario.*

**C**OGNATVM hîc meum vides, & beneficio deuinctum tibi clientem. Sed beneficio, quod plenum firmumque nunc effici, est in tuâ manu. Nam ecce Quæsturæ munus ante bien-  
nium amplius, te vno procurante, accepit: sed honorarium cer-  
tum nullum adiunctum, quod nunc ij qui ab ærario Brabantico sunt videntur adsignasse. Sed cum ea res firmitatem aut vires habere non possit, nisi collegij vestri auctoritas & approbatio accedat: rogo benignè eam impertiri digneris, & beneficium tuû absoluerè atque exornare. Iure equidem pro illo laboro, quia neptem meam ex sorore vxorem habet: & eius liberi inter here-  
des meos erunt. Plus autem famæ, quàm opum relinquere ijs possum: nec has valdè ambio, tuam & bonorum gratiam. quam Deus adhuc mihi dedit, & rogo seruet. Idem te Ampl<sup>me</sup> & No-  
bil<sup>me</sup> Domine incolumem, ex nostro voto, id est vel tria sæcla. Louanij, prid. Idus Ianuar. ∞. IOCII.

## EPISTOLA XCVI.

*Sauonam.*

IVLIO SALINERIO S. D:

**B**ENE de moribus meis iudicas. tales sunt, nec faciles & in-  
genui solum, vt scribis; sed mites, placidi, oleo tranquillio-  
res. Impotentia tantum à me abest, quantum potentia. Quid  
ergo ambigis in Tacitum edere, quæ concinnasti, etsi à me meis-  
que, vt ais, diuersa? Tu verò securus ede, non offensæ meæ, sed  
certus gratiæ: si digna illo scriptore & doctorum auribus dabis.  
Equidem & ego iam olim aliquid in illâ materiâ pinxi aut scul-  
psi: sed nihil est Protogenis aut Apellis: alius quicumque ma-  
num addat, inò & cupressum appingat. Testor supremum Nu-  
men, gratum & venerabilem mihi fore, per quem

*Respicere ignoto discam pendentia tergo.*

Ego enim vt omnia viderim? non si Mineruæ aurea lucerna, vt  
verus verbum est, illustrasset. Euripidæum illud rotundum &  
verum:

\* Αλλ' εἰ γὰρ αὐτὸς πάντ' ἐπίστασθαι βροτῶν  
Πέφυκεν· ἄλλω δὲ ἄλλο πρόκειναι γέρας.

\* Non vnus  
aliquis sci-  
re natius o-  
mnia est:  
Sed aliud  
ali pramiū  
posuit Deus

Audis,

Audis, mi Salineri? tibi quoque præmium paratum, & labori sua merces: profer. Qui putat se in his antiquis, & æuo obscuris, aginæ semper æquilibrio ferri: errat, & non Varro ipse fecit in alienis scriptis (testimonia sunt) doctior tamen illis ipse qui scripserunt. Multum est legisse, inquisiuisse; plus rectam iudicii normam attulisse; sed totum, attigisse. quod Fortunæ aliquando est, non doctrinæ. Enimuerò longius ibo, & philosophari tecum lubet, & decet. quid hæc sunt, aut quanti pretij, diuinasse & correxisse? In præsentī, delectatiuncula; in præsentī, gloriola: post quinquaginta, aut pro magno centum annos, nemo te aut me auctorem inscribet. Non putemus nos Troiam cepisse, cū depositum alteri locum sanauimus: quid? vnum alterumque verbum. O si animum, ô si mores! ô si illam Sapientiæ officinam ingrediamur, ἱατρῆον ψυχῆς, atque ibi Æsculapio & Hygeiæ faciamus ac licemus! Non me diffundo. illud ex animo & interiore pectore, per me tibi liberum sentire, dissentire: neque sum ille Alexandro sublimior, qui nefas putem oppugnari. Facito. sed si me, non meâ causâ, audis, modestè & modicè: & veritas, non ambitio, finis elucescat. Conuiuari, inequitare, alienum est non à doctâ solū mente, sed humanâ. Nōne & tibi fieri potest, nec vlla cautio errorem (in his quidem Criticis) vitet? Et à me vt sis securus; alius pro me, aut post me, optionem & succedaneum se dabit. Mihi quidem in his & maioribus frigus iam adhæret: siue ab ætate; siue à Sapientiæ consultis: nec in magno habeo, quod olim in summo. Menedemi dictum aureum, & sublimiori, id est tuæ menti, imprimendum: *Qui Athenas nautarent, primò Sapientes esse, tum Philosophos, tum Rhetores, denique rudes & idiotas.* Adfirmo tibi, nemo propius rem tetigit, vilius aperuit: & solida, non in ventum docta mens, quò diutius discit, in replura, in opinione pauciora nouit. Mi Salineri

\* hæc tibi  
Et mente  
pariter at-  
que linguâ  
ediffero.

\* — ταῦτά σοι

Τὰς νῆς θ' ὁμοίως, κ' ἀπὸ τῆς γλώσσης, λέγω.

Vale. Louanij, v. Kal. Febr. ∞. MDCL.

EPISTOLA XCVII. *Francfurtum,*

IANO GRVTERO.

**Q**VERELAM tuam in litteris ad Sweertium vidi, parùm meo animo iustam, & tamen gratam à causlà primâ & origine: quam confido amorem & desiderium esse. Quidni sic afficiaris erga amicum veterem, & quod caput est, doctorem? Formauimus certè te mi Grutere, & in optimâ studiorum viâ præuiuimus, quam felici dehinc pede calcasti, & vt porrò facias voueo & hortor. Scis etiam præcipuam aliquam curam & affectum nostri in te fuisse, nec vt in theatro aliquo missilia hæc tantùm in vulgus sparsisse. Te iunximus propiùs, & in sinum tuum, vt sic dicam, contulimus: quæ Deo & ingenio faciente deinde auxisti. Hæc non vt exprobrem dico, vix vt imputem: sed vt ostendam quis fuerim, & ex eo quis sim etiam discas. Quid enim me mutarit? vnum in te aut circa te est, quod optem aliter: reliqua constant, & te mihi firmant. Atqui filui. Quid? non Leodico ad te scripsi? In publico videbis mox epistolam, si non antè acceptam. Vtrùm ego à te intereà, haud commemini: hoc tantùm, in litteris ad Ortelium de me sæpè fuisse. Abeant ista: amemus, quod agimus agamus, rem litterariam & nos iuuenus. Seneca communis ille noster, quàm præcepta huic rei donat! quàm ab his inferis ad alta, à vanis ad solida, à turbidis ad quietia ducit? Sequamur, & ita in illo emendando simus, vt ab eo quoque emendemur. Vale mi Grutere, & amate hæcenus & amande. Louanij, postrid. Idus Febr. ∞. IOCII.

## EPISTOLA XCVIII.

HENRICO SCHVLTETO.

**L**ITTERAE tuæ, quibus amicitiam meam appetis, tuam de-fers, gratæ fuerunt, mi Schultete. Amor, humani generis nectar, suauior gratiorque est, cùm à superiore illo Amore venit, id est Honesti & Boni: ex quo velut traduccem esse tuum istû scio. Amas illa, & ob illa me, quia & à me amari (nec falsò) censes. Vtinam & compotire detur! studeo equidem, & omnibus inge-



\**presumptam sapientiam.*

nij machinis hoc conor. O triumphum, qui peruincit! quamquam nec superari hîc turpe est, dummodò arma non proijcias, & victus quoque velis vincere. Progrediamur, si non peruenimus. Nam laudes, quas tu plenâ manu in me cumulas, non nisi oculis libo, in animum non admitto, nec assensus mei suffragium dono. Imò esse qualem describis, vix opto, certè non spero. Odi istam nunc crebram \* *δοκίμοσφίαν*; cùm illud Aristarchi locum vindicat, *Olim vix septem sapientes repertos, hodie vix totidem rudes*. Maneamus in modestiâ, in bonorum studiis, nec vela ad blandientium sermonum auras explicemus. Quod me rogas de *Numeris Platoniciis*, libelli res non epistolæ sit: nosti implexum illud à se, & interpretantium variâ tractatione districtum. Da aduocationem: at amoris tuo vel statim respondeo, & meum fideliter reddo. Louanij, prid. Kal. Febr. ∞. 1601.

## EPISTOLA XCIX.

HYGONI GROTIŌ.

\**sermonis concinnitates.*

**A**DAMVM tuum vidi, partem legi, & ex eâ omnia probaui. Nam similem te tui esse, faciliè præcipio. Dicerem miratum me, nisi priora tua hoc verbi & affectus iam exemissent. Ita iamantè te dedisti, & hoc ingenij specimen, vt bona & alta à te exigere debeamus, non solum expectare. At placuit mihi etiam vnice argumentum, & quòd ad seria, id est Sapientiæ illa studia te dones. Leuia ingeniorum, qui tantum animi delicias confectantur, verborum elegantias, & cum Euripide, \* *λόγων εὐμορφίας*. Nos verò ad rem gradum addamus, & nihil pensius tractemus ijs quæ ad verum animi cultum, id est ad Salutem ducunt. Intellectualis philosophia magna studij huius pars est, quam feliciter in *Adamo* tuo libasti. Perge, hanc ama, & sine vento scientiam, & sine nouitate doctrinam. Publicâ viâ qui excidit, & semitas querit, errores & flexus quærit. Sperne, ita Deus te hîc honestum, alibi beatum velit. Louanij, III. Nonas Februar. ∞. 1601. Patrem & Patruum ex animo saluto.

EPI-

EPISTOLA C. *Mediolanum.*ERYCIO PUTEANO *suo.*

**P**ROMVLSIDEM tuam vidimus, id est vina & mella. Planè pro suo nomine liber est: & acumen siue acrimoniam in sensibus habet, & in verbis puritatem, atque etiam suauitatem. Quid amplius dicam, nisi illud,

*I bone, quò tua te virtus vocat, i pede fausto.*

Ad alia, longius longiusque mi Puteane: sed pede semper recto, id est per viam quam veteres calcarunt, & ego monendo aut docendo præiui. Nouitios istos si audias, stolidos aliquos Hermas; deflectas, & ad languida quædam aut frigida te dones, quæ ipsi Tulliana vocant. O quàm indignetur & colorem non teneat, si resurgat ille Tullius, & hæc cernat! Ille altus, ille excitatus, & alacer, plenus spirituum & sanguinis, prober hos tabidos, iacentes, & verè \* *χαμαιπετῆς λόγους*? Atqui phrasin eius & verba habent. Nescio. dicunt: sed hoc scio, non verba, sed pectus & vim mentis esse, quæ disertos facit. Scitè nuper à Politiano dictum, meliorem honestioremque leonis faciem esse, quàm simiæ; etsi ista ad hominem propius accedit. Nihil est hoc imitari, si à te nihil inspiras; imò si omnia tua nō facis, & velut è proprio fonte emittis.

\* *humiserv-  
pentes ser-  
mones.*

—— *qui sibi fidit*

*Dux, regit examen.*

Alij seruiant, mendicent: fama aut vita non respiciet, quicquid hoc est scriptorum. Stuporem! ad vnus illam imitationem nunc nos vocari: quod nemo veterum aut priorum somniauit! Scilicet plus cordis nostri magistri habent, quàm Fabius & ipse Cicero, qui ad omnes non oratores solùm, sed historicos, poëtas etiam ducunt. Sed omitto has lacunas, quæ non nisi ab imbre implentur, à se arentes: tu inter viuos, vt dixi, fontes esto, & quod sequi solet, perennes. Sed heus, quod vltimò scribebas, te meâ causâ Romam, quale est? impetrandi ciuilis illius tituli? Si ita, quo titulo te afficiam nescio, beniuolentis nimium, an parùm sapientis. Et quid tibi aut mihi vis? conciliare magnum hunc honorem? Non recusem si detur equidem, vel ob nomen illud prisce vrbis: sed si vltro. te autem, id est me (quis enim aliter interpretabitur?)

OOOz hoc

hoc agere? Abstine, ita liuor aut calumnia ab utroque nostrum abstineat: nec in istis elogijs posueris fundamentum famæ. Magis fortasse, si rara essent. scisne Alexandrum olim, cum ciuitate donaretur à nescio quo populo, contempsisse & irrisisse: sed cum legati addidissent, *Nemini hunc honorem delatum, nisi Herculi atque ipsi*: tum denique amplexum, & à socio illo pretium dedisse? Non idem hîc erit: & cum bonâ veniâ dicam, magna illa ciuitas se impertiuit non nimis magnis. Finio, tu ambire ultra caue vel sensu, non dicam vultu aut voce: & me tantum ama. Louanij, postrid. Kal. Nouembr. ∞. 1661.

F I N I S.

#### APPROBATIO.

*Miscellanea hæc Epistolarum Centuria J. Lipsi Professoris ac Historiographi Regij, utiliter admodum imprimetur.*

Gulielmus Fabricius Nouiomagus, Apostolicus  
ac Archiducalis librorum Censor.

## P R I V I L E G I U M C Æ S A R E V M.

**R**VDOLPHVS SECVNDVS diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatia, Sclauoniæ Rex, Archidux Austriæ, Dux Burgundiæ, Stiriæ, Carinthiæ, Carniolæ & Wirtembergæ, &c. Comes Tirolis, &c. Nostro & Sacri Imperij fidei dilecto IUSTO LIPSTIO gratiam nostram Cæsaream. Postquam inter alia, quæ DEVS immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, ut tanquam Dij quidam splendescere in terris videantur: rem sanè præclaram sequæ dignam illi præstant, qui diligentem iis ipsis in litteris ac disciplinis operam ponunt; præclarissimam verò & Reipub. utilissimam, qui eas ita excolunt, ut aliorum menti docendo, scribendo lumina præferant, eosque ex ignorantia tenebris quasi manu educant. Quos excitare, quos amare atque animare ad dignitatis nostræ munus, ad quod Diuino vocati beneficio, concessumque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Litteris possint, acceperimus, insignes te animi ingenii que tui doctores tibi à natura inlitas à primis temporibus ætatis tuæ ita litterarum ac disciplinarum studiis excoluisse atque exornasse, ut olim iuuenilibus adhuc annis præclara florescentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituiti, dum vetusta Latine antiquitatis rudera in nouam subinde structuram singulari artificio eleganter conuertisti: ad exquisitam ad eò & raram doctrinam, quæ magnam de te apud doctos quosque viros opinionem excitarit, peruenisse, eamque variis abs te libris acri & graui cum iudicio scriptis atque in lucem editis ostendisse, ut in eo quod tam feliciter tractes scriptiois genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. utilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue versaris, flores colligere, concinnare, quibus Lectores mirifice recrees, & eorum pectus ad prudentiam, probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patrocinioque nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro priuilegioque te & Typographum tuum aduersus quorumcumque fraudem, qui lucri causa, quod fieri solet, eadem excudere aut typis imitari fortè velint, munitoscupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum,



aut aliorum, qui librariam negotiationem exercent, eos libros, quos tu editurus es, quocunque modo, caractere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq; ac Dominiorum nostrorum hæreditariorum fines triginta annis proximis à primo editionis die computandis, absque tuo tuorumve hæredum consensu audeat: Hac autem lege addita, ut tria ut minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, cum non solum eiusmodi libris, tibi, hæredibusve tuis, auxilio Magistratus, ubicunq. reperti fuerint, vendicandis, priuari, sed triginta etiam Marcharum auri puri multa, cuius semissis quidem Fiscus nostri Procuratori, fraudis vindici, alter verò semissis, tibi hæredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscunque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiæque exercent, ne quemquam hoc Priuilegium nostrum impunè violare, spernere aut negligere patiantur: Sed, si quos contumaces compererint, constituta à nobis multa, eos puniri & quibuscunque modis coerceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti, Anno Domini Millesimo, Quingentesimo, Nonagesimo secundo: Regnorum nostrorum Romani decimo septimo, Hungarici vigesimo, & Bohemici itidem decimo septimo.

*Subsign.*

**RVDOLPHVS.**

Iacobus Curtius à Senftenaw.

*Ad mandatum sacre Cæsareæ M<sup>ti</sup> proprium.*

Io. Baruitius.

*Additum sigillum Cæs. M<sup>ti</sup> in cerâ rubrâ.*

SVMMA PRIVILEGII REGIS CATHOLICI.

**P**HILIPPVS Dei gratia Hispaniarum, &c. Rex Catholicus, diplomate suo sanxit, nequis, Iusti Lipsi Historiarum in alma Vniuersitate Louaniensi Professoris, & item Historiographi sui libros quoscumque, à Censoribus legitimis approbatos, præter ipsius, heredumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has inferioris Germaniæ ditiones importet, venalesve habeat. Qui secus faxit, præter librorum confiscationem triginta marcharum auri puri illatione mulctabitur. Vti latius patet in litteris, datis Bruxella, XIV. Febr. M. D. XCVII.

Signat.

Verreycken.

SVMMA PRIVILEGII REGIS CHRISTIANISSIMI.

**H**ENRICVS Dei gratia Galliarum & Nauarræ Rex Christianissimus, singulari priuilegio sanxit, nequis per vniuersos Regnorum suorum fines, Iusti Lipsi, quos vel hætenus edidit, vel in posterum editurus est libros, excudere intra decennium præter voluntatem ipsius possit. Qui secus faxit, præter librorum confiscationem, ter mille florenorum illatione mulctabitur; vti latius patet in litteris, datis Parisiis, XIII. Iulij, M. DC. V.

Signat.

Perrochel.

**T**ibi IOANNES MORETE, pro amicitia quæ mihi cum Plantino (heu, quondam meo) & Plantinianis est ac fuit, tibi, inquam, permitto, vti EPISTOLARVM mearum CENTVRIAS typis tuis excudas ac diuulges. Nequis alibi alius præter te, cupio siue iubeo, ex lege quam magnus Cæsar & Reges dixerunt.

Iustus Lipsius.



IUSTI LIPSI  
EPISTOLARVM  
SELECTARVM  
CENTVRIA QVARTA  
MISCELLANEA  
POSTVMA.



ANTVERPIÆ,  
EX OFFICINA PLANTINIANA,  
Apud Viduam & Filios Ioannis Moreti.

CLD. ICD. XI.

*Cum Privilegijs Casareo & duorum Regum,  
& Principum Belgarum.*





D. IOANNI ANDREAE  
PROCHNICO

EPISCOPO CAMENECENSI, &c.

Magni animi & virtutis viro,

CENTURIAM *hancce* LIPSIANAM,

*iussus dedicat consecratq;*

IOANNES WOVERIVS *Antuerpiensis.*



I amicitiam, quæ in-  
ter te, ILL<sup>ME</sup> DOMI-  
NE, & immortalis me-  
moræ IUSTVM LI-  
PSIVM fuit, eiúsque  
principium, progres-

sus, insuper & fructus mecū examino;  
illud sanè occurrit, mutuam vtriusq; pe-  
ctoris caritatem, in angustum nimis hu-  
manæ vitæ momentum incidisse. Imò

post periculum credidimus, quàm vicini ingratitudinis necessitati, imminentis fati properantia LIPSIUM incluserat; cum non aliter viuis cum beneficijs tuis paria facere potuerit, nisi vt mortuus præstaret. Sanè ego proximus, & quem quasi initiatum amoris vestri sacra non excluderent, scio; cum antea vitæ & cunctis hisce mortalibus repudium constanter dixisset LIPSIUS, prætimuisse tantum, ne cum BENEFICENTIA PROCHNICIANA sibi viuendi spatium deesset. Talis enim ista fuit, tantoque impetu iam securum vicina libertate senem inunda-uerat; vt, si callidè mentem tuam producere nobis liceat, iudicemus, te cum abeunte tunc LIPSIUSO festinasse. Verùm, non aliter quàm vehi suetos vel minimum grauare pondus solet, ire si cogantur; ita farcinæ quoque huius insolentia,  
omnes

omnes solitum adficere benefactis, onerabat. Vindicare se igitur cōstituit, & Sapientiæ suæ memor, ne intestatus vno die viueret, sic cum gratitudine transegit:

*Iam nunc parata est Centuria Epistolarum selecta; quam, si quid mihi continget, in arcâ meâ reperies, à te edendam, & ILL<sup>MO</sup> PROCHNICO ex meâ destinatione inscribendam. O Virum ab aureo auro! In Præfatione DIC, quæ ego deberem.*

Dicam, nec verbis tuis, VIR SVM ME OMNISQVE NVNC PARTICEPS AETERNITATIS, sed exemplo; te ingratitudinis vel supremum superasse ingenium, dum nec mortem beneficijs opponis, nec vulgi iudicio vteris, desinentium vota quod maximis meritis æquiparare solet. Meritò spreuit, ILL<sup>ME</sup>, magnus ille animus omne erga benefacta artificium; ne vel sic quidem, obstructum sibi humani generis nomen, vnius priuati debiti compensatione laxaret.

\*

3

Itaque



Itaque hac conscientia quoque lætus de-  
cessit ; & , augurari vti licet , inter inge-  
nij scientiæque bona numeravit , nemi-  
nem hisce instructum mori ingratum.  
Nam temporibus moribusque nostris  
ignotam liberalitatis tuæ industriam, quâ  
denique defunctum superasti , qui pro-  
spicere potuit ? Reliquias, ( ô pietatem! )  
& iam sepulti amici ossa, marmoreo con-  
dere cippo frustrâ conatus , in cælum, vt  
sic dicam, excurris; & iacenti proximam,  
DIVAEQUE MATRI sacratam aram,  
sumptibus tuis decorari iubes , vt, quod  
mortuo impendere non potuisti, diuina  
reciperent . Stabit cum sæculis monu-  
mentum; & ab ipsâ Sarmatiâ auro imbu-  
tum PROCHNICI nomen, vt viuentis  
LIPSII amoribus permixtum , ita sepul-  
ti quasi cum cineribus conditum, futura  
tempora venerabuntur ; omnisque ætas  
testa-

testabitur, dignum te fuisse, quicum immortalis ingenij studia desinerent. Sed & dignus tu eras, cui mens tam inclyta absq; fortunâ cōtigisset: nunc dum regale decus maiores tuos illustrat, altâque ab origine per Duces de Bybel deriuatus in te sanguis natales instruit; quod nescienti collatum, etiam virtutibus præscribitur. Ecce benignitatem fortis tuæ accusare malo, quàm exclamare, ô virum fortunâ suâ dignum! Sæculi me indignitas impellit; contra quam testari numquam desinam, quantum supra fortunæ corporisque bona, animi virtutes emineant. Nam pænè ceterorum mortalium dum prima tibi vota vltro obuenisse conqueror, simul adfirmo, propriâ sic luce te exsplendescere, vt talem fortunam facere potuisses, nisi accepisses. Olim inter Principes fuit, qui par imperio videbatur, nisi

imperasset. Nos inuidiæ factorum obijci-  
mus, ideo sceptrum maioribus tuis perfidiâ ereptum, ne tu dignissimus regnares.  
illis enim te imputare malo, quàm ipso-  
rum facta pro virtutibus tuis narrare:  
quod ijs sufficit, quibus nobilitatis satis  
magnum præsidium, languens vita at-  
que ignobile est otium. Contrà, te ad  
verum decus nitentem, ingenij cultus, il-  
làque studia exceperunt, à quibus facilis  
in omnes dignitates decursus est. Deni-  
que vt nihil nisi summum eligeres, sacra  
placueret; sanctisq; altaribus purum ad-  
mouisti sacerdotem. Qui cùm infra di-  
gnationem titulus non esset, tamen ita  
totius Poloniæ suffragijs certatum est, vt  
passim spes suas ambitione donarent, nec  
fauentium aliter vota declinare posses,  
nisi peregrinatione te eriperes. Sed num-  
quam Virtus se deserit; & huius cor-  
poris

poris quasi opacitatem, boni nominis fama, tamquam vmbra, semper consequitur. Italiam elegeras, & in eâ Romam, Reginam orbis. Sed & ibi popularium tuorum te cura sequitur, Serenissimique Regis fauor inuenit; vt quem Cracouiensis Ecclesiæ clero præposuerat, Regni Neapolis legatione ornaret. Quo in munere, an fidem, industriam, prospicientiam; an magis cum summis æquabilitatem, cum paribus humanitatem, erga inferiores munificentiam, hic perstringam? Iniuria virtutum sit, coarctare famam; & dignam annalibus memoriam, vnius paginæ angustijs strangulare. Te vel ideò, quia vitare soles, sequentur præconia; neque æternitas magis deerit virtuti tuæ, quàm nunc dignitas. Cui grande augmentum vti CAMENECENSES Insulæ nuper attulere; ita tamen ad maiora adhuc



Heriberto Rosvreyo Soc. Jesu xliij.  
 I.  
 Iacobo Augusto Thuano, Presidi  
 xxv.  
 Iacobo Carondeleto lxj.  
 Iacobo Resta V. N. ix.  
 Jano Bernartio ij.  
 Jano Lernutio lxxxj.  
 Firmie Pierffenao I<sup>to</sup> lxviij.  
 Ioanni Andreae Prochnicio Lega-  
 to Regis Polonie xcvj.  
 Joanni Baptiste Baronio suo  
 xxxviij, xlix, lxxiiij.  
 Joanni Bucharjo Doctori Theolo-  
 go xiiij.  
 Ioanni Buiffonio Consiliario l.  
 Ioanni Hemelario suo lxxviij.  
 Ioanni Moreto xxix.  
 Ioanni Seurio lx, lxxij, xcv.  
 Ioanni Vergerio Aurano lxij, xcij.  
 Ioanni Wouerio suo xlv, lix,  
 lxxxij, lxxxiiij, c.  
 Iulio Casari Carocciolo lxxix.  
 L.  
 Ludouico Septalio V. C. lvj.  
 Lupercio Leonardo Argensola  
 xxvj.  
 M.  
 M. Antonio Bonciario lxxviij,  
 xc.  
 Marco Antonio Perezio V. N.  
 xlvij.  
 Marco Velfero lij, xcviij.  
 Marquardo Frehero I<sup>to</sup> xliij.  
 Martino Ant. Delrio Soc. Iesu  
 xxij.  
 Maxamiliano Vignacurtio V. N.  
 xxxiiij.  
 Maxamiliano Vriendio j, xvj,  
 lxxv.  
 Maximiliano Ploumierio lxxxv.  
 N.  
 Nicolao Montmorencio, Toparcha  
 Vendesio xviij.  
 Nicolao Oudarto xliij, xcix.  
 Nunno Mendozæ V. N. &  
 Principi à cubiculis xxviij.  
 P.  
 Petro Brachio xciiij.  
 Petro La-torrio Quintanadueñas  
 xxij.  
 Petro Pantino V. R. viij, xix,  
 lxxx.  
 Petro Peckio Consiliario xxviij.  
 Philippo Arenbergio Baroni Se-  
 uenberge xxxj.  
 Philippo Boskhiero, Ordinis  
 D. Francisci xxj.  
 Philippo Rubenio suo vj,  
 xxxviij.  
 R.  
 Remaclo Roberti xlvij.  
 S.  
 Sebastiano Rolliardo I<sup>to</sup> lxxxviij.

I

IVSTI LIPSI  
EPISTOLARVM  
SELECTARVM  
CENTVRIA IV. MISCELLANEA  
P O S T V M A.

EPISTOLA I.

I. LIPSIVS MAXAEM. VRIENDTIO S. D.



ARMENIAM alterum à te habeo  
mi Vriendti, prius de me (in ijs de  
Cruce) alterum ad me, quod recen-  
ter nunc & amāter mittis. Vtrum-  
que mihi à se gratum. quidni à te  
scriptum, homine elegantis & do-  
ctrinæ veteris, & qui, cum Lucrerio  
— *Museo continguis cuncta lepore?*  
sed & ab argumento ea grata, quia  
aut estimationem mei habent, aut

amorem. Hoc postremum eximiè, & mittis etiam velut para-  
rium amicitiaë inter nos conciliandæ. Ah mi Vriendti, quàm  
ferò, & quàm penè frustrà! Nam nolo erres, ego te à primo illo  
gustu auaui, & certus sum idem mihi à te factum. Conspiratio  
quædam inter nos est (palàm video) non studiorum tantum, sed  
animorum & iudiciorum. Itaque amicitia ipsa iam fuit, sed te-  
ctior: referanda est & in claram lucem mittenda, te nunc inui-  
tante. Fiat cum bono Deo, & Fidium illum inuoco (sive San-  
cum à fanciendo vocari placet) me sanctæ & veræ Amicitiaë le-  
ges tecum culturum, quamdiu in terris his colam. O multa in

A

ijs tri-

ijs tristitia!ô hoc recens acerbum, de fato nostri Gubernatoris! sed cum sapientiâ ista mitigantur, tum nonnihil & melle hoc amicitia. quod gustatum regustare mihi sæpè animus, si te quoque habeo promptum & volentem. Confido, imò scio: & aut neminem in Belgicâ hac noui, aut te ex scriptione tuâ (imago ea animi est) mi Vriendti. Alligemur: en dextram, cedò tuam. Louanij, XII. Kal. Mart. ∞. 10. xcv.

EPIST. II. *Mechliniam.*

IANO BERNARTIO S. D.

**D**EBO vltimis tuis responsum, fateor, si morem communem spectem: non debo, si aut valetudinem, aut decretum iam meum. Paria vltà facere in hoc genere, neque lubet, neque licet. Valetudinem prætexui, & verè: quid si occupationes, & interpellationes etiam addam? Iuro tibi amice, mirari ipsum me, cum dies lapsus est, vires aut mentem mihi ad tam varia constitisse. Sum in hac scânâ, & Fama produxit: sed ego illam desero, & hanc sperno, quam tueri per ista non est tanti.

*Semita certè**Tranquilla per Virtutem patet Unica vita:*

at virtus in secreto etiam est, imò contagia ista vulgi fugit. In Statio te pergere, benè est. de loco isto, in Siluis:

Lib. v.

*Omnia nam lætas pila attollentia frondes,**Multaque fumosa signatur lancea pennâ:*

seorsum à te sentio. Nā tu ad sagittas refers, de quibus Plinius: *Volucre fecimus ferrum, ut citiùs mors ad hominem perueniret.* Non opinor: ne illud quidē, in armamentarijs signatas ab Abascantio, id est seruatas læceas veteres, & fumosâ pennâ insignes. Quæ mea mens? Critica. errorem scripti arguam, & *Laurea* legam: quod vitij & in Senecæ Consolatione ad Heluiam olim notabam. Hæret nempe cum priori versu, imò versibus, sententia: & Domitiano blandiens, de more, Statius; Vndique laurus & victoriæ, inquit, ab Euphrate, à Rheno, ab Istro: & fasces & pila laureata, lictorum siue speculatorum (qui litteras tunc victoriales adferebant) & *multa laurea signata nigrâ pennâ, siue atramento.* Neque enim aliò, quàm ad epistolas victoriæ indices hæc retulerim,

lerim, è prouincijs solitas mitti. Hoc placet. tamen in libro meo scripto cum reperiam, *Nullaque fumosa*: suspicari etiam incidit, an non mos fuerit, Speculatoru lanceas in clade aliquâ & retri-  
sti, pennâ attrâ insigniri, celeritatis simul & funeris notam.  
Enimuerò tale Scholiasstes vetus ad Iuuenalis versum:

— *tamquam & diuersis partibus orbis*

Sat. III I

*Anxia præcipiti venisset epistola pennâ.*

vbi commentatur: *Anteâ siquid nuntiabant Consules in vrbe* (lege *vrbem*) *per epistolas nuntiabant. Si victoriæ nuntiabantur, laurus in epistolâ fiebatur* (puto, *figebatur*: ) *si autem aliquid aduersi, pinna figebatur.* Dixi: iudicabis, & valebis. Louanij, III. Kal. Mart.

∞. IO. XCVIII.

### EPIST. III.

BALTHASARI DE ZVNIGA, Legato Regio.

**B**ENEFICIUM est meminisse te Lipsij, quid appellare & scri-  
pto alloqui: præsertim in ijs occupationibus, quæ militares  
& molestæ circumstant, atque vtinam felici mox euentu! Multa  
sperare nos hoc iubent, Deus, causa, Principes, Fatum Austria-  
cum: sed tamen sic produci obsidionem, nec ex voto, nec opi-  
nionem nostrâ fuit. Dicam, quod videtur? Vt Teucer ille, apud  
Homerum, sub Aiakis clypeo latēs Troianos inuadit & interfici-  
cit: sic occultos isti tutores & auxiliares habent, quorum viribus  
opibusque subleuntur. Non nescitis: sed tantum remedium  
est, scire non videri: vt nuncquidem est status rerum. Si miles  
tamen noster perseverat, nec aliquid turbat; confido equidē de  
vrbe illâ, & ab eâ alijs obtinendis. Sed cura hæc vestra sit, quos  
ad Remp. Deus ille admouit. nos vt nautæ vndis agitati, nō illas  
respiciunt, sed in celū & astra oculos tollunt: sic inter turbas me-  
dias, ab ijs animū abducimus, & ad altiora, certè quietiora, ap-  
plicamus. Libri & scriptiuncule nos habent. inter istas Philoso-  
phia vetus, ordine & breuiter à me explicanda: idque in Sene-  
cæ nostri gratiam, nec tamen solius eius vsum. Alij quoque scri-  
ptores lucem mutuabuntur. Epistolæ etiam nostræ plusculæ  
breui diuulgandæ, & videbis, & (quæ tua harum quoque re-  
rum peritia est) censebis. Ill<sup>me</sup>. Domine saluū te breui, & publi-



ca vota in tuto exspectamus, & cum suspirio optamus. Louanij, v. Kal. anni noui ∞. Idcirco quem feliciter ordire & decurre. Ciceronis locus, de quo quæris, sententiam habet, Duillium non contentum vnius diei triumpho, imaginem aliquam & instar eius vſurpaſſe in vitam reliquam: idque in publico, cum à cenâ rediret, *cereo funali* (sic in Cicerone lego) & *tibicine præunte*. Idem Valerius lib. III. cap. VI. Flor. II. cap. II. & Silius, in his versibus:

*Cui nocturnus honos, funalia clara, sacerque  
Post epulas tibicen adest, castosque penates  
Insignis lati repetebat murmure cantus.*

Hæc autem idèò triumphum referebant, quia *Faces* & *Funalia* in eo vſurpata, itemq. *Tibicines* ad sacra in Capitolio peragenda, & qui cum alijs eius generis præibant. Vulgò non hæc nota.

## EPIST. IIII.

Antuerpiam.

ANDRÆAE SCHOTTO V. R. Presbytero Soc. Iesu.

**T**RISTIS legi de fato, quod oculis tuis euenisset: etsi nolum hercules te eâ re tristè. Quàm ab honestâ causâ contraxisti? studia & perpetua discendi docendique cupiditas vitium & tabem hanc attulerunt: vt nec meminisse eius possis, nisi vnâ optimi in remp. litterariam animi operæque. Lacena illa ad filium, ex vulnere claudicantem, *Maeste, gradum non pones sine memoria virtutis*: idem in te. oculi cum negabunt, merita succurrent orbitatis eius causa. Illud te seriò hortor, imò & rogo, vt dum Sol nondum plenè occidit, ea quæ in scrinijs tuis affecta habes, perficias, & emittas in publicam lucem. Scio pluscula tibi esse. certè de SENECA patre cur omittas aut tardes? Vtile illud ad eloquentiam scriptum est, & quod in vno velut corpore præfert tot membra veterum Oratorum: tuus autem in eo labor vetus, & mihi notus iam olim, & laudatus. Quin multa etiâ addideris, nec ambigo. quando enim tu cessas? Itaque nostrâ & iuuentutis causâ hæc ede: tum & tuâ, quia gloria te manet, audacter me spondente. Etsi vitæ & votorum tuorum modestia non eò adspirat: sed tamen si hanc neglegis, nos vide. Vide & Belgicam,

in

in quâ cum vno iam aut altero hoc agis; & abit à nobis, mi Pater, melior illa omnis mitiorque Musa. Clausula est, ne claudes hæc tua:

*Parcentes ego dexteras*

*Odi, spargere rosas:*

quæ suauiter nos & posteros recreent ac delectent. Vale. Louanij, VII. Kal. Mart. ∞. MDCL.

EPIST. V. *Patauium.*

GVILIELMO RICHARDOTO SVO S. D.

**I**RATVM me fuisse, atque etiam nunc esse, debeo fateri. Quid? tres totos menses vos abfuisse, & nullum verbum? Imò quartus iam mensis præcipitabat, & tunc denique de aduentu vestro Dolam. Gaudeo incolumes; doleo & iterum irascor, sic incuriosos nostros, aut negligentes. Simile in Italico itinere. venisse in Italiam, Mediolani fuisse, Puteanum nostrum vidisse priuatim, & in publico audisse, ex eius litteris dudum didici, requiro etiam nunc vestras. Vnas diu post sanè accepi, quæ hoc significarent tantum, Patauij vos esse: cetera prioribus & vberioribus litteris notificanda. Eas non vidi, quibus creditæ sint, vos videte. Ecce, habes causas iræ, & vel ipso te iudice non iniustæ; nec tamen Achillæam illam putes, *σεῖσσι ποτέ πλεον ἂν ἀμείνωντος ἐν φρεσὶ* — non

*• firmiorē  
in pectore,  
quàm adamas.*

*frangi facilem, tamen ut placabilis essem:*

maximè erga tales, quos corde amo, & nec offendat cum offendunt. Vnum hoc tantum, Emendate. Gratium porrò, Patauium allubescere, ipsam (ut commemini) gratam amœnamque sedem, sed studioforum ingenia siue mores exasperant: nec ea licentia pro boni cuiusquam gustu, non pro eorum item usu. Sed eò ventum est, artes & studia titulus fiunt, & satis est hunc inscribi. Nostræ hinc res languidæ, lentæ, cum tædio bonorum & pænè desperatione. Quando enim, aut quis exitus? Ordo & compositio apud partes nostras sunt, aut crescunt: nos qui fuimus, aut deteriores sumus. Abijcio publica; in priuatis, solitudo & studia me habet, illa quidem etiam inopinata. Nam Baldvinius noster mihi & rebus nuntium remisit, & condidit se in cœ-

\* Mirum  
sed verum.

tum D. Francisci, Deo consecrandus. \* Θαῦμα, ἀλλ' ἔσθ' ὅτι: res ita gesta, & quidem subito, pridie nuptiarum quas ancilla parabat, & patrauit. Nobis molestia, discursus, scripta, rescripta, & quæ non ignoras. Nam inuitissimo auunculo hæc gesta. De studijs porro, EPISTOLAE meæ iam lucem videbunt, tributæ in *Centurias quinque*. Plures non libuit addere, & vel sic satis exposui me ad ictum. Vestra in ijs nomina: ego vt in animis vestris, quia commeruisse videor, rogo vel posco. Vale mi Richardote; & vel hoc interim scribe, te valere. Louanij, vii. Kal. Mart. ∞. IOCII.

## EPIST. VI.

Patauium.

PHILIPPO RUBENIO *semper-* suo S. D.

**M**EDICVS à me abit, ego scribo: nōne hoc lætum? Sanè tristior mihi hæc hiems fuit, & assiduus per eam

\* Iouis plu-  
uia super  
latam ser-  
uam.

— Διὸς ὕμνεος ὑπὲρ χθονὸς ἀρτυτέδιο.

Sed nec publicè aliquid, quod gaudeatis audisse. Quid de vobis? increpabo etiā, & hercules tardi in scribēdo fuistis, aut, quod malim, infelices in mittendo. Tres menses totos nihil à vobis auditum: deniq; incipiente quarto, Dolam venisse, tum diutulè post, Patauium. Binas in vniuersum vestras vidimus: neque illas quidem vberes, quas initio aduentus in Italiam scribitis dedisse. Vestri hīc neglectui eas, aut nos (vt liberè dicam) habent: & alioqui illigantur, & animis distringuntur ad Ostēdam. Inauspicatum inceptum! cui nec nunc finis, nisi in spe, atque eā languenti. Italiam autem placere tibi gaudeo mi Rubeni; & magis placebit, opinor, magis intrata. Nam limitem adhuc eius infedistis, imò nec eius propriè, sed Gallia; si cum antiquis terminare lubet & loqui. Velim autem, vbi tempestiuum erit, de ipsote mihi scribas, quæ sedulò curo atq; amo, ecquid destinaueris, manere, redire, quàm vitæ viā inire. Apud nos, si sic pergitur, Scythica barbaries breui, & quod nō dico. Deum meum testor, fastidire me & patriā (venia dicto sit) & vitam pænè adderem, sed CONSTANTIA vetat, & in extremo hoc spatio gressum firmat. Edidi CENTVRIAM vnā ad *Germ. & Gallos*; tres ad *Belgas*, vnāquē *Miscellaneam*: his quattuor vltimis nomina

etiam



etiam vestra, vt antea animo, inseruntur. Videbitis, si tamen hæc ad vos perferentur. De *Seneca* aut alijs, nihil addo: \* — εἰ γὰρ καὶ λὸν (ait diuinus vir) ὑπερβιον διχεται αὐται. Valetudo me ligat: & pænè illud iam placet fedetque

\* *non boni  
supra vires  
iactare.*

\* — μεγάλη παῖς δούεις ἐν ἀνθρώποισι σιωπή.

\* *magna in  
hominibus  
doctrina,  
silentium.*

Deum precor, mi Rubeni, te longæuum, & in melius æuum, quale ingenium tuum merebatur. Louanij, vi. Kal. Mart.

∞. IDCII.

Balduinum nostrum, statim à discessu vestro, \* ἀπαύξαοθ' ἐκ κόσμου, καὶ πάσους παῖς βιοτικῆς ἡδονῆς ἢ μερίμνης, credo te audisse. Agit etiam nunc in cœtu Diui Francisci, hac vrbe.

\* *abivntiā  
à mundo,  
& omni us  
vite vo-  
luptatibus  
aut curis.*

## EPIST. VII.

Craconiam.

ANDREAE SCHONÆO I. V. & S. Th. Doctori.

**L**ANGVOR me habebat, nec ab eo promptus eram ad scribendum: tamen me fecit tuus amor, mi Schonæ, quem in litteris ita palam, quàm si in ore atq; oculis, ostēdis. Itane procul, & in illis quoq; regionibus ego, id est litteræ amatur. Nam quia libasse eas censeor, vos in me inclinatis: gaudentem, & libentius quò eundum est euniē, quòd spem relinquam doctrinæ in Europâ hæsuræ, quæ vos etiam in ultimo eius limite adspexit, imò arctiori amplexu sibi iunxit. Deus bone, quis bono & veteri ævo de vobis hoc sperasset? cū horror illic & squalor, nec nisi Martis sedes, & incolis cordi \* — πόλεμός τε καὶ φύλοπος αἰνή. Quàm mutastis? & humanitate, elegantia, omni cultu animi, prouocare audetis letissimam quamque gentē. Mirus Prouidentia ordo! & cælestis ille agricola has illasq; partes excolit, & velut nouales quosdā agros, alternis serit. Quid Græci, quid placet sibi Itali? Græcia & Italia nuper in Galliâ, & nunc in Germaniâ aut Sarmatiâ reperiatur. Macti estote, applaudimus: & tibi priuatim mi Schonæ, qui vtraq; oratione, solutâ & ligatâ, potes pollésque. Vidi enim, & ipse ille qui attulit Comes Teuczinius, lumen & decorem infudit, nobili stirpe atque animo iuuenis, & qui crescit in laudem vestri regni. Hac quoque parte vos beatos! apud nos in omnia alia studia nobiles versi, & inuoluit eos \* — πόλεμος καλὸς αἰὲν αἰταυτος. Sed frui Comite vestro

\* *bellum  
& discor-  
dia vindex.*

\* *belli sine  
fine castro.*



vestro diutiùs, mihi votum fuisset, linguâ diserto & prompto, mente & iudicio bono: sed via eum trahebat. me languor sistit, non aliquis nouus, sed ille vetus, & qui in tam pertinace luctâ deijcit, vel supplantat. Bonâ fide, ego ire me sentio ad metam: quid mali aut noui?

— omnes vna manet nox

*Et calcanda semel via leti.*

Tu longum longumque vale mi Schonæ, & optimas ibi artes propaga. Louanij, postrid. Idus Mart. ∞ .I.CCII.

## EPIST. VIII.

*Bruxellam.*

PETRO PANTINO S. D.

**C**ENTURIAS à me cape, & in ijs te lege. Sæpiculè, sed non toties quoties in animo te memoro & gesto. Non lubet profari *ἐν τῇ ἐπιστολῇ*, neque me decet: sed tamen quæ tam inter Epistolas sunt, quæ famam habere nunc & olim possint. Neque enim omnes: & quasdam non iudicio meo edo, sed alienæ ambitioni (apud te liberè) aut & amicitiae dono. Tu si es, quem cupio & censeo, & addam, scio, compotem me iudicij tui fac: id est censuræ. Non est sera emendatio, & altera editio est in manu. De publicis fileo, & linguam mordeo: tamen populariter ruinas video, & ille Iupiter

\* Ordine  
corripit,  
qui caus-  
est, qui ne-  
que caus-  
est.

\* Μάρτυς δ' ὁ θεὸς ὅς' ἀνός, ὅς ἐστι καὶ ἐγώ.

Feramus, & vno verbo, PHILOSOPHEMUR. Vale V. R. & C<sup>me</sup>.  
Louanij, Kal. April. ∞ .I.CCII.

## EPIST. IX.

*Mediolanum.*

IACOBO RESTAE V. N.

**A**MICA atque diffusa scriptio tua, etsi in morbo, ad respondendum impulit: neque animo contractiùs, etsi manu fortasse fiet. Nam hanc egrè, illum alacriter ad te moueo & mitto, libenter apud tales hæsurum, & vel ætatem acturum. Prudentia & virtus tua (non blandior) ex ipso characterismo scripti-  
onis tuæ innotuit: neque opus testimonijs vel productione Puteani nostri fuit. Itaque amicitiam libens volensque tecum pango

pango: fouendam deinceps litteris, colendam etiam officijs, quę intercapedo quidem hæc locorum admittit. Nam bonę & antiquę fidei in his talibus sumus: vtinam & ingenium, aut opera eius, quę tu æstimas & attollis! Enimuerò qualiacumque, cara tamen habeo, quia me carum vobis talibus reddunt. Vt persequeres mi Restā, ego rogo, & ambire me quod ambiebas subfigno. Louanij, Kal. April. ∞. MDCLII.

## EPIST. X.

Tornacum.

DIONYSIO VILLERIO S. D.

**H**EVs tu, inclamo. Itāne de salute meā sollicitus, vt nec verbo inquiras? Ad extremam lineam pænē redactus fui: & vbi à te cura aut solatium? Sed, quod ipsa scriptio excitatior tibi dicat, iterum meliusculus sum, & virium aliquid ac spirituum recepi. Antuerpia me vidit, nunc Bruxella, sed & Hallæ, ac votum hîc Diuę Virgini (disce è Carmine) persolui. Vides me arma suspendere, & totum moliri. Toto certē animo, in hoc turbido & ambiguo statu rerum: cū meditari & firmari satis est, aduersum imminētia aut præsētia mala. Quid priuatim? vidistin' qui me lacescant: improbus & imperitus aliquis (vtrumque verē dixerim) ab Italiā: qui glaucomam ob oculos obijcit, velo libri antiqui. O meum risum! scio, & publicē testatus sum (nam respondi) nihil eius esse, & mantellum diligentiore inquisitione huic mēdacio detraxi. Totum sanē scriptum, si quis inquirat, — *apina tricaque, & si quid vilius istis*. Tamen, vt dixi, respondi: sed ita me Deus, cum pare impare cōpositus, & Gręco verbo, \* *χρῆς κὲ πέρξαι εὐ συμφωνεῖ*. Indignor, non homini qui scripsit (ambigua sanitas eum excusat: ) sed qui legere & æstimare etiam præ se ferunt, quadrante non emenda. Ipsam rem dico: & cū cogito, pænē poenitet respondisse. Eò ventum esse? vt pro benefactis & promeritis conuicia & calumnias referamus? Nam cum poētā:

\* — τὸ μὲν λάχρον γέρας ἡμῖς.

Beata in secessu vita, sed & in tenebris: quoniam reuerā pauci qui, non dicam præmia, sed iudicia laboribus nostris donent. Feramus: & cum Theognide sentiamus,

B

\* *Εὐ εἶς*

\* *Colla & petra non cōueniunt.*

\* *hac talia pramianostra.*

\* Fac bene,  
sed tibi fac.  
quid fama  
præmia  
quæris?

\* Εὖ ἔρδων εὖ πράττει. τί κ' ἀγγελλον ἄλλον ἰάλλεις;

Nobis, inquam, viuamus, Deo & nobis morituri. Valere te cupio, mi optime Villeri: nam de rep. nec verbum lubet addere: à te tamen audire. Louanij, Idib. Iunijs, ∞. 1611.  
Wingio Canonico mihi percaro salutem dico.

## EPIST. XI.

Lug. Bat.

GERARDO BUYTEWECHIO S. D.

**L**IBENS intellexi de vxoris vtero grauido, libenter audiam (Deus breuī faciat) de soluto & leuato. Sit hoc gaudium tibi, sit tuis, & ciuem aut ciues paullatim patriæ dones, bonos è bonis. Sed quid tu ita nihil de alijs? an non epistolas meas vidiſti? in ijs vnam alteramque ad te, aut de te? Plures non libuit, temporum metu, & ne beniuolentiæ specie noxam noceam. Quid autem de ijs ibi censent? quid Scaliger? quid etiam agit? Breui & libellum pugnatorium videbis, quo Italo respōdi propter incurrenti. Inuitus hercules, sed amici protruserunt. nam libello quidem eius, si examines, nihil ineptius aut imperitius: tamen applaudunt quidam, quibus suaue sit vmbra aliquam luci huic fieri. Iudicia! & tempus est desinere me omnis ſcriptionis, si hæc obtinent. Vale mi amice, cum Tuâ, & futuro Tuo. ita Deus (iterum rogo) donet. Louanij, Idib. Iunijs, ∞. 1611. Parenti vtrique saluere & gaudere.

## EPIST. XII.

Antuerpiam.

FRANCISCO SWEERTIO F. S. D.

**L**IBENS tuas litteras nunc vidi, è quibus quæ apud partes nostras feruntur aut iactantur omnia didici. Nam Demetrianas cum lego, ipsos & eorum sensum videor audire. Neque ambigo apparatus & vires aliquas esse: an tantas, an in tempore, & quod caput est, feliciter exferendas, suspendo, & optimo magistro Tempori committo. Quod de Italo meo scribis, & te auidè exemplaria expectare, videbis breui (nam & brevis libellus est) ac simul eius imperitiam. nam impudentiam omitto, quæ mundo innotuit: per me autem, illa. Equidem nihil minus libenter

benter facio,quàm repugno,etiam lēsus, etiam in facili & iustā  
causā: sed hīc aui gratiā aliquid dicendum fuit. quia plerique  
fauent contra nos dicentibus, & sine examine, pedibus in partes  
illas eunt. Retrahendi sunt, & vel inuitis oculis fulgor veritatis  
inferēdus. Audacter dico, qui mea leget, quales sumus, illum &  
me norit. At de Britannicis iudicijs, risi. Etiam N. (doctus &  
industrius vir) me miseratur? Ego illum, si seriò ita sentit: & om-  
nis doctrina vetus & vera, nugę & ludi sunt; aut talia habenda à  
modicē doctis, quæ scripsit LVCIUS meus dicam, an Apuleij?  
Satis hīc. ego in scripto repressi, & Europæ ostēdi futilia hæc iu-  
dicia nec nauci esse: nec patē Pygmęum imponi in colosso. Ta-  
citus & ego (liberē, liberē dico) non sumus ad hos arbitros aut  
Censores. Sed iterum de republicā. quæ me hac ætate solici-  
tum habet: tu si quid audies (& audis) scribe, sine præstationis  
periculo, & ut audies tantum. Vale mi Sweerti, Louanij,  
VIII. Kal. Iul. ∞. MDCLII. Tuam saluto, & prolem crescere voueo  
ac valere.

## EPIST. XIII. Tornacum.

IOANNI BVCHAERIO Doctōri Theologo.

**P**OPVLAREM tuum, & nostrum auditorem Vacquerium,  
libens vidi, magis quia à te veniebat, & litteras etiam, id est  
pignus affectus tui, ferebat. Amo & æstimo te iam dudum, nec  
à temporibus iudicia mea pendēt, quę Ratio format, illa æterna,  
& à fluxu casuum euentuumque non suspensa. Vbicumque es,  
quocumque munere aut fato, scio te BVCHAERIUM esse, id est  
virum seriò probum & doctum, & amore taliū dignum. A me  
præsto, tu redde, ab affectu quidem merenti. Ille, quem vides,  
vester est: commendo, nec onus tamen impono, qui scio te in  
externo solo esse, & alienæ sæpè gratiæ indigere. Sed vultum at-  
que animum exhibe: sufficit: nec Deus ipse vltrà poscat. De  
Galliā autem vestrā, quæ ista sunt? quis non misereatur gentis,  
in quiete inquietæ? etsi causas tamen intimas nos diffici parum  
scimus, neque cupio equidem, nisi quatenus posteris opus sit  
tradi. Dies hoc dicet. te Reu<sup>de</sup> & Eximie Domine, inter ictus  
Fortunæ stare cupio, & te nixum ac Deo, spernere quidquid as-  
B 2 fultar,



sultat, vt fluctus quosdam aquæ abeuntis, & alludentis non lædētis, vbi robustior materia occurrit. Louanij, Kal. Iulij, 60. 10CII.

## E P I S T. X I I I I.

Valentianas.

HENRICO D' OVLTREMANNO, *Senatori*. S. D.

**E**T libens, & iudicio feci, quòd tuum nomen Centurijs nostris inferuerim: boni militis, & vel inter Triarios, vt sic dicam, accensendi. Non amor hoc solum in me, sed eruditio tua & ingenium postulant, clara & rara inter meos Belgas. Itaque, meritò feci, & doleo pluries non fuisse: quia nouum & nuperum scilicet inter nos commercium hoc litterarum, etsi amore non nouo. Quod autem nunc scribis de Arriâ illâ Pæti, & laudem eius & factum meum probas, ô quàm mihi gratum! O quàm non plebeïæ mentis talia hæc iudicia! Nam sunt qui aliter, inter graues etiam viros, & nihil nos mirari nisi nostrum, id est Christianum, volunt. Quæ & ipsa herclè miranda & super-miranda fateor: sed quæque suis finibus & æuo claudenda, & aliâ atque aliâ lege vel adspectu laudanda sunt. Vt inter gentiles, quis ex vtroque sexu, quis ex omni natione, super hanc Arriam iure se attollat? Et stili mei penicillo factum hoc vnum eius satis expressum censes: ego ambigo, & dicam magis adumbratum. Certè illa lux præstringit ingenij aciem, nec plenè etiam admittimus, nedum vt efferamus. Simile in Martialis vltimo versu tu iure notas: nec est pro robore fæminæ in omnia constantis & inuictæ. Sed ô tuum ingenium, & simul vbertatem, in reformando! testor Genium, admiratus sum. Triginta quattuor sensus (tot adnoto) pro vno substituiisti: & quosdam argutos, & altos. Placent maximè isti,

*Si ferrum hoc refugis, hoc mihi Pate dolet.*

*Hunc cape, libertas hic tua Pate sita est.*

*Pate feri an trepidam vis iuuen & ipsa manum?*

Nec alij degenerant: etsi Martialem excuset, quòd robore iam expresso, affectum illum & castum amorem coniugis voluit etiam notatum. In Coreti nostri fato dolui, non dolui. Nemo bonus optet pessimo hoc æuo esse diuturnus: & nescio an de altero optet.

optet. Monumentum ei à te positum placet : atque ecce versus etiam meos repono, sed alterius rei, quos hîc inclusi. Te nunc animo, etsi aballoquio auerto. Vale V.C. Louanij, vii. Idus Iul. ∞ .IOCII.

## EPIST. XV.

Duacum.

BARTHOLOMAEO PETRO LINTRENSI *Doctori Theologo.*

**E**PISTOLAM tuam, quam affectus solus expressit, accepi, & curam in eâ mei amaui. An possim aliter? vice parentis in me afficeris, & sollicitè de valetudine non quæris solum, sed iuuas. Consilia enim suppeditas, nec à ratione absona, & vsurpanda profectò, si imbecillitas illa & defectio virium etiam nûc me haberet. Sed nuntio tibi, quod gaudeas, melius sculè esse. Antuerpiam, Bruxellam, Hallas profectus fui: & vel ipsa peregrinatio, vel Diua illa Virgo, quod libens credo, me recreauit. Sanè Patronam eam iamolim adoptaui & colui, & sensi variè auxiliarem. Votum quod ei voui & solui, hîc habes. De scriptis meis, polliceri haud multa possim, nec magni labori adhuc subsistere: tamen conficere quædam animus est, iamdiu affecta. Interuenit etiam nescio quis Italus (transfuga & malarum partium, vt audio) qui publico scripto me laceffiuit. Aliquid reposui, & me mittente breui videbis: etsi non magnum aut valdè serium, sed talibus vel ipsorum causâ respondendum est, vt desinant vanitatis, & quod non sunt ne esse se putent, aut putètur. Quod ad *Catonem* attinet, certum nec illum nec prisci æui auctorem esse, imò nec Aufonij in eo stilum aut ingenium agnosci. An ille tamen, quem sagaciter eruisti, videndum ac pensitandum est. De me, certè nihil nunc ad firmem: hoc tantum, colite in isto animo & amari. Louanij, vi. Idus Iulias, ∞ .IOCII. cum hostis castris nostris propinquus esse nuntiabatur, id est nobis: etsi de consilio eius nihil etiam liquebat. Nostri in tuto, si tueri se satis habent: in pugnae discrimen rem mitti ego nolim, & ratio fortasse mecum.

## EPIST. XVI.

*Gandaum.*

MAXAEMILIANO VRIENDTIO.

**A**PAGE, plurifariam in epistolâ, et si amicâ & gratâ, peccas, *Scipione* isto te niti dicis. tunc? qui alteri trepidanti apud me potes scipio esse. Peream, iterumque peream, si non te inter primos meos Belgas ab elegantia ingenij & morum æstimo, & quod sequitur, amo. Nempe ostendisti, inquis; & me in Centurijs illis, ut capite censum, habuisti. Eras mi Vriendti, iudicio inter Classicos te censeo: sed quid factum? vnam epistolam ad te scribere memini, ea quæ sita nusquam cõparuit, & Audeantius qui mihi à manu est, bonæ fidei iuuenis, querelam & pænè dolorem in eo meum dicet. Men' tui pudeat? quem iactare & ostentare apud exteros etiam velim, debeamque: & meruisti. Emendabimus, & quamquam à te vitam & famam habes, tamen si non te, affectum erga te (ita viuum) ad posteros propagabo. Mitte, sodes, exemplar epistolæ illius, si tanti fuit ut scruares. Italo in me iniurio nuper respondi: videbis, &, scio, ridebis. Tuum Carmen in amatum mihi Symbolum & ANTIQVOS MORES, nimis libens legi: ama, ama & illos ô Vriendti, & me, pectore eos teque amantem. Saluto Hardwynum nostrum. Louanij, ipsâ horâ pænè quâ tuas vidi. prid. Idus Iul. ∞. IOCII.

## EPIST. XVII.

NICOLAO MONTMORENCIO, *Toparchæ Vendesio.*

**D**VPLEX beneficium accepisse me interpretor, & scriptio-  
nis tuæ, & doni quod misisti. Ipsa profectò scriptio grata,  
primum sed firmum testimonium animi tui sic in me affecti.  
Quid de bono dicam? breuiter sed fideliter, carissimum esse & à  
semereri. Materies, quæ pietatem, id est caput virtutum, an om-  
nem virtutem dicam? tangit. Quisquis eâ caret, aut negligit,  
quid veri nõ dicam Christiani hominis, sed hominis habet? Ad  
eam nationes, nos quoque peculiari Dei gratiâ instituti su-  
mus: teneamus & amplectamur, vnicam quietis hîc ancoram,  
vnicum ad perpetuam salutem viaticum & viâ. Ego verò tanto  
carius

carius hoc tuum habeo, quod uti fruique cottidie eo cogito, & domi vel in ædibus sacris habere hoc precationum vel meditationum instrumentum. Hortatore me nō eges: est nobis & omnibus: testari tamen possumus, laudabilius aut utiliùs operam tuam poni non potuisse, nō si Patriæ aut Principi vitam & sanguinem impenderes: ô quàm meliùs Deo, & cultui eius progando, hunc animum, hunc stilum! Nobilissime Domine, valere te, & semper hoc agere, Deum precor. Louanij, Idibus Iulij, ∞. IOCII.

## EPIST. XVIII.

*Amstelrodamum.*

HENRICO LAVRENTII SPIEGELIO S. D.

CERTE animum meum tetigit tua scriptio, & corde profecta amicitie commemoratio, quæ inter nos fuit. Fuit? imò est, atque erit, quamdiu alter nostrum erit. Significas autem de consorte vitæ & thori, quam iterum tibi is adiunctum: & quid dicam aut suadeam? Priorem tuam vidi & noui, probam, modestam, & tui planè ingenij: de istâ (si iudicio elegisti) idem mihi sperare datur, & Deum rogo vota nostra adimplere. Magna res est, ut inquis, in istud mare se dare, in quo fluctus, vèti, procellæ interdum: & ipsa res coniugij, priusquam animi coeant, molestias & auersiones suas (interdum & contentiones) habet. Mirum cogitatu, quòd Deus homini solatium & leuamen faminam dedit; sæpè autem contrà est, & nescio quo nature vitio in pœnam & noxam abit. Absit ut tibi eueniat, qui miti ingenio amorem prouocas: & si melioris animi aut sanguinis aliqua contigit, cælum in terrâ hac (vaticinor) habebis. Ut tua nunc ætas & prudentia sunt, iudicio elegisse debes: affectui si obsecutus es,

*Non illigatum te triformi**Pegasus expediet Chimera*

Deus hoc nolit; & in extremâ ætatis metâ spatium decurrere det cum gaudio, & ex prole etiam, si in Fati tabulis ea scripta. Quod voves de coniunctione & colloquio iterum nostro: utinam esse possit, utinam vel spes sit! Sed cum tempora video, quæ supremus ille Arbiter disponit & ordinat, vereor ut hîc videre  
inter



inter nos vetemur, non tamen amare & animis iungi, quod facio, & à te fieri deprecor. Vale mi amicissime Spiegel. Louanij, vi. Idus Sextil. ∞. IOCII.

## EPIST. XIX.

Bruxellam.

PETRO PANTINO V. R.

\*inflatio  
& utris.

\*tranquil-  
litas &  
quietis a-  
mans.

**E**N libellos nostros, inspice, & ride. facies certè in altero, ubi res & verba eò ducent, & fallor, aut paris mei stupor. Lufimus hoc irritati, non tamen irati: quod scriptio ipsa dicet, in quâ lepidi aut amœni aliquid, vix asperi aut amari. Quid autem exigas aliud? non fuit ille hostis cum quo statim & collato pede pugnaremus: velitandū verbis fuit, & velut præpilata ista dictorum spargenda. Reuerà enim nihil ille nisi \* φύσιμα καὶ μόλως: nos dispunximus, ventū eduximus, iacet & flaccet. De meis ista: in tuis, querebaris nuper de onere, quod nouum munus imponit. Videris deponere velle: nec dissuadeam, vt \* φιλοδιδον καὶ φιλήσυχον illud ingenij tui noui. Sed deponere; id est cum pace & veniâ Principum: nec abijciendi iustibi cense. Tua hoc prudentia moderabitur. quæ vtinam & in publicis nostris luceat! Nam ista quò eunt? quid si Galli etiam se miscant? Timeo, quod prouidi omnes: & eueniet, si vera quæ de occultis illis cõitionibus narrantur. Si quid certum habes, significa, me ama, & vale. Louanij, v. Idus Sextil. ∞. IOCII.

## EPIST. XX.

Valentianas.

HENRICO D' OULTREMANNO S. D.

**C**ARMEN tuum in Senecam accepi, bonâ fide, bonum. Vtar, sed quando? quando, inquis, Seneca tuus prodibit? Definire non possum, vt hæc sunt tempora, sed & vt mea valetudo. Nõne illa vides ad Martem omnia, non ad pacatas nostras Diuas? Iamdiu quidem ea turbida, sed nunc maximè,

*Nunc mare, nunc filia*

*Thrëicio Aquilone sonant.*

Vides exercitus & instructas vtrunque classes: & nos in medio aut propinquo, ab euentu pendentes. Nõne hæc sunt, quæ

— *vita*

— *vite rationes vertere possint,*

*Fortunasque tuas omnes turbare timore?*

Sunt, si vulgum spectes: à quo tamen iamdiu electione & iudicio me excreui, Virtuti & Constantiæ propior, & externa ista leui & spernente oculo delibans. O si valetudo tantum mihi firmior! nihil me turbet,

*Non si terra mari miscbitur, & mare calo.*

Hæ cogitationes meæ aut interna exercitia sunt, mi d' Oultremanne, quibus me firmo aut erigo: & sine prouocatione aut instantiâ, in Fortunam accingor.

*Quò me fata trahent, Virtus secura sequetur.*

Sed cum Enniano Neoptolemo, *Philosophandum, verum paucis.* Libellum hunc vides: an & is pro philosopho? An non melius ex alto despicere, & nec audire quidem pueros istos vagientes? Fortasse. sed nec illud inutile, semel qui finis ostendere, & illos ad Delphicum illud ducere, vt *Se norint*. Feci, iudica, & serio amantem ama. Louanij, xix. Kal. Septemb. ∞. MDCL.

## EPIST. XXI.

*Lucemburgum.*

F. PHILIPPO BOSKHIERO, *Ordinis D. Francisci S. D.*

**F**ATEOR & agnosco culpam, quæ videri potuit, & non fuit. Silui ad tuas, sed quâ causâ? morbi an lāguoris, qui tenuit & ad beata loca (ita sperabam) pænè traxit. Deduxit inquam, non traxit. nam cur inuitus è vitâ abeam, in quâ manere nihil inuitet? Procellas & nimbos vides, vt in noui orbis quibusdam damnatis insulis, sine pausâ perpetes; vides & vitia magnis auctibus crescere: vides ipsas delicias nostras & meliorum mentium, dico litteras, cursu non gradu abire. Itaq; pransus paratus eram, vt ait ille: Imperator tamen in statione etiam manere iussit; & nutui eius audiens esse debeam, nō solum decreto: Eidem tu mi Boskhieri, qui corpore disiūgeris, nec vultus aut sermonis mei copiam habere doles. Cur autē? in exiguo ista sunt: animis adesse atque hærere possumus, & testor te meo carum esse. Scripta tua faciunt, in quibus non imitatio, sed imago mei, & pænè ego. Affectus in eo tuus elucet: sed & ingenium, qui tam feliciter quod vis potes. Adolescentem à te commendatum vidi, af-

C

fatus

fatus sum paucis: sed in ijsipsis paucis agnoui ingenuam mentem, & melioribus natam. Qui has fert, dedi & libellum à me ferendum, nouitium nostrum foetum. Ridebis pugnante Lipsium: quo nihil (verè dicam) mitius: sed, vt poëta ait,

*Sapè etiam instanti lesa repugnat ouis.*

Et causas rescripti alias publicè dedi, leges, & me amabis, & quod adhæret, precibus iuuabis apud Numen, cui cottidie facis. Ita salue R. P. & mihi percare. Louanij, xvii. Kal. Sept. ∞. ICCCII.

## E P I S T. X X I I.

*Gracium.*

MARTINO ANTONIO DELRIO *Presbytero Soc. Jesu.*

**T**v ad extremas Germaniæ oras, ego nuper ad illas Fati vltimas relegatus videbar: iterum viuo (sic loquendum est) & semper in te meus amor. EPISTOLAS nostras vidisti? te in ijs, etsi alia duabus etiã Centurijs seruantur. Nam partiri me vides, & in quamq; Centuriam plures annos velle insertos. Quid autem hoc tui silentij? ægrotas, fastidis, an (quod abhorreo) cõtemnis? Vidisti n' illa Itali, qui proteruè me laceffit? hîc Rescriptum meum habes, breue sed forte, aut fallor, & tibi ac cuicumq; bonæ mentis iustum probumq;ue. O petulantiam simul, & inscientiam! De æuo quid sperem nescio, cùm has exerrationes video, & probatas etiam, quibus ego probari me pretium censebam. Quid est? mens me aut illos deferit? an bonâ fide, & liberè, melior ille doctrinæ Genius Europam nostram fugit? Hæc priuata: publica in metu, & nobis proprio. Hostis adfuit, equitum peditumq; vi succinctus: vigilarunt Principes, & ille abiit, alibi vires (vtinam pari fortunâ!) explicaturus. Vobis quoque Bel-lona vestra, sed fatali hostium ignauia parum etiam damnosa. Deus ita porrò donet, & optimos illos Principes saluos auctosq;ue velit, te imprimis mi Pater. Scribe, scribe, aut irasci me non dicam, sed posse. Louanij, xvii. Kal. Sept. ∞. ICCCII.

EPIST.

## EPIST. XXIII.

Bruxellam.

PETRO LA-TORRIO, *Quintanadueñas.*

**S**CRIPATIO & animus tuus mihi grata: è quibus illa in me affectum, hic in virtutem & sapientiam præfert. Perseuerare te, in isto maximè, id hortor mi La-torri: quo fine in vitam venisse nos, & diuinâ illâ imagine ornatos, non ignoras. Consulis me de itinere tuo, an mansione. Breuiter, mihi mansio placeat: & vbi meliùs, quàm apud domesticum illum tuum magnum doctorem? Auunculum dico. cuius prudentia, virtus, etiam doctrina mihi nota. Ad illius Scæuolæ latus hæreas, & affectum eius tibi pignora: quod non aliâ re magis facies, quàm studio & promptitudine discendi. Quid si etiam (sed de eius consilio) de vinco aliquo iugali cogites? Quod ætas tua non abnuat, sed nec vtilitas: ac sæpè, vt noster Tacitus, *matrimonium ad maiora nitenti decus ac robur fuit*. Sed de consilio, vt dixi, eius à quo pendere debes, & vt cum Lucretio hoc dicam,

— *ad cuius numen nutumque moueri.*

Habes sensum meum, sed compendio: multiloquium & occupatiunculæ & natura mea refutant. Louanij, vi. Kal. Septemb. ∞. MDCII.

## EPIST. XXIIII.

Antuerpiam.

HENRICO VWENO I<sup>ro</sup> S. D.

**I**VRE extollis liberalitatem Arschotani Ducis: rara est, & apud nostros præsertim populares. qui quiduis magis in pretio fortassis habent, quàm id cui pretium non reponant. Sed ita mores & iudicia: cum quibus pugnare me iubet, quisquis ad scriptiorem vocat. A quâ, vt ista omitam, valetudo tamè satis auocat; non illa nunc quidem abiecta, sed non iterum per studia (satis sensimus) abijcienda. Libellum nostrum non displicuisse, gaudeo: hoc scio, æquis & iniquis arbitris hominē illum repulsum & reuictū. Alius exorietur, & iam audio: eamus, & hoc sine laboremus. Omitto: de rep. magis angor animi. Grauiam relicta discessu, an fugam dicam, nostrorum hîc audimus. Adfuit mihi



ex Italicis copijs vir nobilis & doctus, qui narrauit visa. Quid autem de Brabantiâ nostrâ speres, si illam & quæ adhærēt (Burscumducis, & reliqua Geldriæ) amittimus? Consilia nostrorum iamdiu non capio: qui spem totam in Pluto reponere videntur, sed vtinam non cæco! A Galliâ pax & serenitas iterum nuntiantur: palàm quidem. quæ in animo nubes aut nimbi aggregentur, nunc suspicio, actiones postea dicant. Valere te, cum Tuâ, mi Vvене amicissime opto, & Robianum illum nostrum saluere. Louanij, vi. Kal. Sept. ∞. ICCCII.

## EPIST. XXV.

Lutetiam.

IACOBO AVGVSTO THVANO, *Senatus Præfidi.*

**F**RATRIS tui filium, & in eo THVANOS vidimus, id est, magnorum illorum virorum nō stirpem solū, sed mentem. Multa in eo comitas, virtutis & doctrine amor, & qui breui sermone se planè in pectus nostrum immisit, & vt sic dicam, illatebrauit. Nec tui affectus nos celauit, etsi olim cogniti: sed sic perseuerare & viuere, id quoq; gratum, & à tali teste, audire. Vtinam illa tua consors viuat! quam abisse, nunc deniq; mihi auditum. De inualetudine olim aliquid: sed exitiabilem fuisse, hoc fugiebat. Scissem, & solatij aliquid à me habuisses: an & eguisses? Nam tuus IOBVS domi, & à te, omnia dicta aut dicenda suppeditabat. In historiâ tuæ gentis & Regum te pergere gaudeo, & quàm materia & filia rerum cotidie crescit? Illa nupera coniuratio prodigiosa fuit; extincta ab Hercule: quando nostra hæc bella? Lenta, pænè dicam perpetua:

*Et vereor ne tarda prius per membra senectus*

*Serpat, & in nobis vitæ claustra resoluat,*

quàm ponere aut remitti videamus. Te & vestrum regnum obiter semel vellem, & acre atq; internum votum est: an damnabor eius, nescio: sed cupiens sum, & tui amans, Vir Amplissime, cum Casaubono, quem saluto. Louanij, vi. Kal. Sept. ∞. ICCCII.

EPIST.

## EPIST. XXVI.

*Madritum.*LUPERCIO LEONARDO ARGENSOLAE S. M. *ex animo* D.

**O** AMICAM tuam scriptionem ! ô elegantem & eruditam ! Et pararium tu etiam alium quæras meo amoris ? Mihi crede, vel alter hic titulus iungat & adstringat: quid vterque, & sic eximius ? Imus, imus quò nos trahis, & amicitia ac fidei dextram reddimus porrigenti . Tibi tantum ? imò & fratribus tuis duobus, quos ab eadem duplici notâ cominendas: & vt nunties ijs de affectu meo mutuo, hoc rogo. Mi Luperce, tales Geryonæ plures in Hispaniâ nobis sint, regnû teneant, sed in litteris: quoniam illud sceptrorû magnanimo dicto spernis . Sed quò pauciores ibi, magis fortasse lucetis, sicut in nocte clariora illa astra. Quod autem hortaris me ad edenda porro quæ concepi & affeci, ac nominatim vestrum Senecam: velle non abnuo, vtique de isto, quem amo & æstimo super omnes ( audebo dicere ) Sapientiæ doctores. Gloriamini. & quamquam Hispania illa multa pacis decora tulit,

*Nil tamen hoc habuisse viro præclarius in se,  
Nec sanctum magis, & mirum rarumque videtur.*

Itaque iure operâ ei damus, & adminiculamur, quâ possumus: sed inualetudo tardat aut sustinet, tum & ætas mea frigus iam & ignauiam habet . Quid etiam ? assidua tristitia hæc tēporum, bellorum implexa series, animum non erigit: imò sapientiâ & constantiâ opus est, vt à lapsu teneamus. Sortem nostram, etsi dissitus, audis: & nisi adamantinus es, miseraris. Vobis gratulor in illâ pace ingenium atque has artes colentibus: & vt diu liceat, Numen precor. De consilio tuo scriptionis, & vt mare illud Pacificum siue Mortuum (ita eleganter iocaris) nauiges ac teneas, omnino probo ac consuadeo: ad nostrum istud Arctōum si venis, pericula sunt, & nec Vlysses tutò nauiget:

*— ita perfurit acri*

*Cum fremitu, sauique minaci murmure pontus.*

Tuta, tuta, id est vetera, & me eorum amantem, ama. Ego te & tuos fratres, certò & *fide antiquâ*. Louanij, IIII. Kal. Sept. postridie quàm tuas vidi, ∞. IOCH.

## EPIST. XXVII.

*Bruxellam.*NUNNO MENDOZAE V. N. & *Principi à cubiculo.*

**R**ESPONSVM hîc habes ad amicam, similiter elegantem, & eruditam (hæc iungenda sunt) Lupercij epistolam: qui à se meretur amorem, sine vlllo interprete aut proxenetâ. O virum veteris Genij, & melioris æui! Has scintillas epistola eius iacit, quibus me quidem in amorem sui accendit. Sed respondi, & titulum adieci, quem tu in magno ponebas, AMICI LIPSIANI: verè ita sum, & ero, qui sic virtutem, doctrinam, & elegantiam amant. Plures modò Hispania vestra nobis donet! quod fiet, cùm Deo visum, & Parnassus ille qui in Græciâ exaruit, frondes & aquas suas in Iberiâ proferet & fundet. Opto, opto: nos & vos beatos! Quod scribis porrò, in ipsis castris mentem & affectum tuum ad me isse, gaudeo. & repono tibi seriò, nec immemorem tui aut incurium Lipsium egisse. Sed heu, quam parum adhuc ex voto militares nostræ expeditiones! Quid in Fatis sit, nescio: sed in causâ optimâ spem talem non defero, & quamquam tarda aut ambigua ea videtur, vindico & ad bonos bonam traho. Deus adfirmet, & te Ill<sup>me</sup> Domine, seruet. Louanij, III. Kal. Septembr. ∞. MDCL.

## EPIST. XXVIII.

*Mechliniam.*PETRO PECKIO *Consiliario.*

**L**AETAM mihi tuam epistolam! ex animo fateor: à tali, & sic scriptam. In alijs curis studijsque fuisti, sed felicitas & altitudo ingenij tui fecit, vt optima semper amares, nec hoc tantum, sed haberes & potireris. Rarâ hodie sorte. & ferè qui ad res aut negotia se donant, artes aut elegantias, id est animi illû cultum, negligût: tu vtrâq; iunxisti, & quid nisi Mercurium cum Mineruâ? Nam Marfyam me appellare, dedecet: & ille eloquij & simul lucri Deus foro potius, meâ quidem designatione, præsit. Sed extra omnem iocum, prudens simul atque elegans es: & tales nobis ad reip. clauum sedeant & gubernent. Veteres vestri Iuris consulti nōne tales fuêre? omnium confessione, qui vetera no-

ra norunt: nec ego de bono aut felici sæculo spero siue spondeo, nisi iterum antiquemus. Diuisio ista artium scientiarumque ab imbecillitate nostrâ est, & eius confessio: vos isti, melior progenies, iterum connectite,

— *quod numquam sine pernicali*

*Discidio potis est seiungi, seque gregari.*

Quid te hortor? si dehorter, tamen facias, & vis optimæ naturæ, id est melior in te vel apud te Genius, peruincat. Quod autem & meis libellis eò te duci scribis, benignitatis tuæ est.

— *sic Cereri sua dona merumque Lyæo*

*Reddimus, & diues prædæ tamen accipit omni*

*Exuuias Diana tholo.*

Non, inquam, iuuant te nostra, sed delectant. Quo fine & ista accipe, recenter in Italum quemdam (si nomen non imponit) rescripta. Ille in me, ut videbis, petulanter incurrit: excepi, opposui, & scuto saltem me defendi. En nostra præmia! quando rudem accipimus, an nobis damus?

— *suspiro ruris amæni*

*Riuos, & musco circumlita saxa, nemusque.*

Liceret frui menses an annos paucos, ante mortem! Sperare vix dat ista Belgicæ

*Fortuna, sæuo leta negotio, &*

*Ludum insolentem ludere pertinax:*

& tu quoque, opinor, vides & doles. Sed ite tristitia. in amore tuo acquiesco, quem vultu & sermone nuper, nunc scripto affirmatum, rogo te, iterumque rogo perseverare, in amore & cultu tui meriturum. Louanij, VII I. Idus Septembr. ∞. ICCCII.

EPIST. XXIX. *Antuerpiam.*

IOANNI MORETO S. D.

**I**TANE filiam tuam abijisse? abijt. Dolorem dedisse? dedit. Ferenda tamen hæc sunt mi amice, ut omnia quæ diuinitus immittuntur, & Æternæ illi legi seriò subiicienda hæc voluntas. Nemo hominū eripuit, non vis alia aut casus: ille tantum, cum quo nec pugnare possis, nec iustè de eo queri. Ius suum tenet in dando, & adimendo. Plures liberos habes, sed in ijs quoque Fa-



tum idem potest polletque: vtere tamen & fruire (longum spero) dum indulget. Habe, vt amissurus; amiseris, tamquam habeas. Quomodo? suauis memoriâ retinendi sunt; & hoc ipsum quod frui sumus, in lucro & beneficio ponendum. Ingratus ille, qui præteritorum oblitus, præsentia tantum cogitat aut futura. Imò, quod Philosophi dicebant, certissima illa voluptas est, quæ fuit. Amplius mi Morete. Deus sine solatio te non reliquit: non fuit tibi vnica. Vt igitur tunicam si amisisses, aliam sumeres & te eâ tegeres: sic nunc fac, pro filiâ ereptâ aliam substitue, imò & filios, & certam iam posteritatem nepotes. Amabas quæ periit, sed & reliqui sunt quos ames. Itaque vt concludam, dolere tibi licet (quis parenti abnuat?) mærare non licet; lacrymare, sed non plorare. Inter exempla roboris, vnum Plantinum tuum meumque cogita: quem ego in eiusmodi casibus nō fortem solum, sed pænè durum vidi,\* — *ὡσεὶ κίεας ἢ σίδ' ἡερῶν*. Imitare, tuam solare: quod & ego conatus sum epistolio adiuncto. Louanij, vii. Idus Sept. ∞. ICCCII. Aula hîc fuit, Præses Richardotus in meâ domo.

\* ut cornu  
aut ferru.

## E P I S T. X X X.

Antuerpiam.

BALTHASARI MORETO SVO.

**T**RISTIS audiui de morte Hadrianæ sororis tuæ. Illiusne, quæ ante paucas septimanas vegeta & valida hîc fuit? quæ florem primum adolescentiæ suauiter ostendebat? illius. Vides mi Morete, quàm fata ordinem non seruēt, & quos vota ac spes nostra vitæ longè destinabant, eos abripi, & superstites relinqui languentes aliquos aut senes. Philosophemur, & de nobis quoque cogitemus, hodie fieri posse, quod intra decennium aut lustra aliqua solet. Nihil est tam certum, quàm incertum illud mortis. Itaque Ægyptij olim sapienter, qui *Domos* has nostras, *Hospitia* appellabant, *Sepulchra* autem, *Domos*. Nam mora quàm brevis sæpè in illis est? quàm in istis certa & æterna? Imus, & ibimus: pauci cogitant, nisi cùm in metâ sunt, & iam iuerunt. Tu hæc & plura tibi, sed & parentibus subijce: matri maximè, quam scio dolere in hac iacturâ, vel potius mærare. Iacturâ, pænè eius propriâ: & solatiū vel auxilium in hac habebat, maiusque

que sperabat . Sextum Tomum Annalium accepi, atque illud  
folleenne, Gratias dico. Vale. Louanij, vii. Idus Sept. ∞. MDCLII.

EPIST. XXXI. *Bruxellam.*

PHILIPPO ARENBERGIO, *Baroni Seuenberga.*

**S**ICVT aspectus tuus nuper gratus iucundusq; mihi fuit, &  
videre hanc indolem ad alta & honesta omnia natam: sic  
nunc tua scriptio, quę me in iudicio illo & honestissimâ opinio-  
netui vehementer confirmavit. Genus vtrunque inclutum, &  
stemmata Regum Principumq; præfers: sed quàm ea ipsa illu-  
strare aut ornare studijs Virtutis & Prudētię potes, ad quę ad-  
spiras? O nobilissime adolescens, huc te dona: & cetera externa  
aut aduenticia esse cogita, hæc animi ipsius propria, & æterni il-  
lius æterna bona. Et iam viam ingressus es, quę rectā eò ducat,  
imò multum in eā progressus: sed hoc (da veniam) monenti mi-  
hi crede & obsequere, vt nō ad delectationem aliquam nudam  
istā referas, sed ad finem fructumq; duplicem, quem ad signa-  
ui: Virtutem dico, & Prudentiam, summa in humanis bona.  
Sicut floribus alij ad odorem aut ad spectum vtuntur tantum,  
apes etiam ad mellificium: sic sedulę mentes debēt, in fructum  
& vsum traducere studia hæc litterarum. In quibus, vt tua nunc  
ætas & conditio est, Historiarum lectio vel primum locum sibi  
vindicat, vtile ad rem publicam, & consilia actionesq; dirigen-  
das, instrumentum. Adhibe. & Iustinum, me sua fore, lege velut  
variarum rerum, gentium, temporum compendium: tum &  
Plutarchi Vitas, in quibus summatim Gręca & Romana habes.  
Liuium deinde, Polybium, alios licebit adiungere: & cum æuo  
crescente non peritia solum & iudicium, sed & amor crescat le-  
gendi cottidie & discendi. Hæc olim palæstra & velut gymna-  
sium Principum erat, ante susceptam rēpublicam, in susceptā:  
& vt alia exempla omittam (sexcenta sunt) vnius Theodosij Iu-  
nioris eo suggestum. Is de die quidem, iam Imperator, militię,  
Senatui, iudicijs, & vno verbo negotijs vacabat: noctu autem  
studijs librisque se dabat, candelabro ita affabrē & ingeniosē  
facto, vt sponte oleum in lucernam instillaret, nec ministris aut  
interpellatione opus haberet, ad lumen alēdum aut producen-  
dum.

*Vide Sozo-  
menum in  
Præfat.  
Hist. Eccle-  
siastica, &  
lege.*

dum. Rarum magnūq. exemplum est, vobis in agnis imitandum: fac Perillustis Domine, & in tenebris istis rerū quasi fidus te datum cense, ad lucendum & dirigendum. Mea scripta, quæ Ill<sup>mus</sup> Parens tibi dedit, siquid eò faciēt, gaudebo: & magis, si te perseuerare in optimè cœptis audiero, nec abduci ab eā, quæ mundo huic imperat, Vanitate. Louanij, iv. Id. Sept. ∞. IO CIR.

## EPIST. XXXII.

*Valentianas.*

HENRICO D' OULTREMANNO, S. D.

**O**TVAS epistolas! amor eas insidet. ô tuum carmen! vultus & eruditio commédant. Mi d' Oultremanne, iam diu est cum vulgo te excerptum vidi, sic sublime ferri magis & magis cognosco, cum admouemur. Parco dicere, non sentire. O patria, quæ ceteris abundas, quàm virorum hodie sterilis aut inops es! Videmus, dolemus: & posterī etiam, vereor, dolebunt. Nam litteræ, aut cultus iste omnis animi (Phœbum me puta) intra lustra bina aut terna, non nisi nomen & vmbra erūt. Eò magis tu & similes (etsi quàm pauci similes?) eminetis, & arcto vinculo itis me iunctum: neque nos

*Supremâ citius soluet amor die.*

Hæc benignè, sed & candidè: & ne vñquam mihi aliquid ex sententiâ, nisi hæc EX ANIMI SENTENTIA dixi. Sed heus, tūne ad nos? inuito, & rogo. videam hospitium quod melior ille animus insidet, mortale immortalis. Aula hîc iam nunc, & alij hospites, non ab Helicone, aut nostro fonte illo madentes. Res non ex voto, vt scis, tamen vultu constant, & vt cum poëtâ dicam,

*Gloria mixta malis, afflicta æque ambitus aule.*

Terror hîc nobis, & discrimen etiam incumbunt: CONSTANTIA alleuat, & Prouidentia alligat:

*Crux est si metuas, vincere quod nequeas.*

Ad carmen tuum redeo, quod auribus meis inerrat: edi & viuere dignum, seu viuo ipse, seu non viuo. Nam seposui & adgregavi ijs, quæ à morte etiam velim (& sola illa quidem) vulgari. Tu mi d' Ouldremanne,

*— cui liquidam pater**Vocem*

*Vocem cum citharâ dedit,*

his talibus, verè scitamentis Musarum & bellarijs, pascere atq;  
erigere nos perge. Pascor & erigor enim, quò rariores istę Diales  
epulæ à meis Belgis. Nam ab exteris, non nego, offeruntur inter-  
dum. Tu me semper, semper amaturum, ama. Louanij, prid.  
Idus Septembr. ∞. IOCII.

## EPIST. XXXIII.

*Bruxellam.*

MAXAEMILIANO VIGNACVRTIO V. N.

**E**PISTOLAM tuam libēs vidi, legi, etsi querelis mixtam, sed  
quas amor tuus in pietatem & virtutem, & me quoque,  
temperarit ac lenirit. Doleo equidem in Aulâ te sic iactari: sed  
Aulam cùm dixi, quid miri est? Mare qui intrat & nauigat, flu-  
ctus expectat; qui Aulam, hos motus. Illud suauius, cogitare de  
Franc. Balduini, magni sanè viri, scriptis eruendis & concinnan-  
dis: fac mi Vignacurti, & rem publicam ac posteritatem hoc  
munere auge. Quod in extremo autem de meâ etiam illâ Prę-  
fatione est: non offendor libertate: absit: sed audi tamen quod  
res est, & ratio approbet, talia illa scribi non vt testimonia, sed  
incitamenta. Monemus magis qui esse debeant, quàm testamur  
sic esse. An nouum fit? Traianum tu illum (etsi egregium Prin-  
cipum) credis tu fuisse ad Plinij laudationem? Idem in alijs: &  
Reges aut Principes cùm laudamus, nō adulamur, sed per am-  
bages & flexum ducimus, quò nos & bonum publicum velint  
eos ire. Ego tuum ingenium, & in purâ virtute asserendâ purum  
animum amo; vtinam æuum ita sit aut fuerit, vt induamus &  
vsurpemus! Spem non video, & tamen tecum & te amo: tu me  
mi Vignacurti. Louanij, xi. Kal. Octobr. ∞. IOCII.

## EPIST. XXXIIII.

*Bononiam.*

GVILIELMO RICHARDOTO S. D.

**V**LTIMAE tuæ me delectarunt, bonæ mentis atque etiam  
diCTIONIS plenæ. Amplecteris virtutē, & quæ eò ducit, do-  
ctrinā, & pręcepta nostra sarta tecta habes: quæ nuper in litteris  
repetij, affectus magis mei testandi, quàm vsus tui causâ. Etsi



cur non repetam atque ingeram? Sicut matres, quæ pueris bellaria & fructus in sinum ingerunt, sollicitè succingunt ne excidant: sic nos satagere conuenit ne pereant, quæ optimè monita olim insinuauimus, & nunc per litteras renouamus. Quod probas & gaudes de responso in LVCI VM, fecimus & fortè an iam videris: haberes certè me mittente, nisi sarcinas istas cursores tabellarij ferre grauerentur. Sed respondimus \* *μεγαλώς ἐν χυναίως*, vt in istos decet, qui non nisi remoræ Bonæ mentis sunt, & Virtutis ex professo hostes. Itaque vt leones, aspicimus, & contemnimus:

\* magnificè  
& generoso.

\* canes autem  
tam gaudere  
videbis,  
latrantemq;  
vni.

\* ——— κύνες δ' ὑπὸ κερχχαλῶσι

Πυκνὸν ὑλακτιόωντες.

Fratrem tuum reducem auidè exspectamus: pater hîc adfuit, domum meam honestauit, & hospitem magnum mihi dedit. Ad publica ibat cum Principe, ô vtinam læta! Sed quid tibi dicam? patria iacet, affligitur, & per seditiones istas (quæ iam in morem, & pænè dicam laudem verterunt,

*Prô curia, inuersique mores!*

periclitatur aut perit. Deus sustentet, te mi optatissime Richardote nobis feruet, & oculis atque amplexui meo iterùm sistat. Louanij, x. Kal. Octobr. ∞ . I O C I I.

## E P I S T. X X X V.

HADRIANO SAISSEVALLIO, Gallo, domi nobili, S. D.

**P**ARANTI abitum, quod petieras, mitto, atq; ad eò partem animi tecum mitto. Fateri debeo, comē te, & cum modestiâ suauem, in omni conuictu fuisse: quod gratiam tibi vel amorem apud me aliosq; peperit, & pariet quò hæc & te feres. Ista à Naturâ habes bonâ tibi parente: perge Disciplinam addere, & serijs seuerisque etiam studijs animum formare. Germaniam insidere te suadeam, & probitatem illic natiuam videbis & grauitatem: adsume vtraque, nō in tuâ gente semper (vt nunc æuum) reperiēda. Habet hoc commodi peregrinatio, quòd fas per eam miscere mores & temperare. Vt autem in Musicâ è diuersis vocibus concentum quærimus, & probamus: sic in vitâ, è varietate harmoniam. Sed & alius fructus. Ingenia quædam transla-

translata proficiunt. & vt fæminæ interdum, antè steriles, alijs viris iunctę concipiunt: sic illa fecundantur mutatione, & sub alio aliq; doctore. Perge cum Deo igitur: qui te meo voto sospitet, & bonum clarumq; reddat.

## TESTIMONIUM.

QVICVMQVE HAEC LEGETIS,  
OFFICIA, CVLTVM, SALVTM DEFERO.

**V**IRI boni est virtutem amare & adiutum ire, sicubi ignota ea est, vel testimonij & subsidij eget. Quod promptè in isto V.N. HADRIANO SAISSEVALLIO, atque etiam meritò, facere me profiteor: quippe qui eum ab annis pluribus nouerim, consueuerim, & virtutis semper, antiquæ pietatis, doctrinæ & humanitatis reppererim peramantem. Quisquis noscet propius & accedet, idem mecum fatebitur, nec ei testimonium istud scriptum. Sed sicui subitò occurrit aut obijcitur, vt solet, præsertim cùm nunc peregrè ad mercatum optimarum artium eat, hunc rogo fidem nobis habere, istum amare & fouere, affectu illo & auxilio dignum. En me sponsorem, non pœniturum eum si quis benignè complectetur aut faciet: me etiam creditorem, & in accepti tabulas beneficium hoc relaturum. Scripsi & signaui

Louanij, VI. Kal.  
Octob. ∞ .IÖCII.

Iustus Lipsius Professor, &  
Historiographus Regius.

EPIST. XXXVI. Lugd. Bat.

CAROLO CLVSIO S. Maximam D.

**O**MEVM Clusium! iure sic appellem, & in hoc exsultem. Constanter & acriter valdè me amas, nec scriptio solùm tua, sed res & munera adfirmant. Iterùm dico, Meum. Quid autem ego? hilum in affectu non cedo, & semper Clusius mihi in animo, sepè in ore. Deus fecisset, vt habitatione iunctiores fuissimus: multa conuersatio & voluptas comitata essent. Nunc vetus illud obtinet, Deum sequi & obsequi. Quę de re Christianâ publicâ in Pannoniâ nuntias, haud læta vsquequaque sunt, aut mixta: imò nūc terrores meri, & fugæ, & cędes. Illa Alba-Regia

nuper recepta, iterum erepta est, promiscuâ omnium qui inerât cæde, aut seruitute. Tartatorum vis ingens in Daciam irruptura sperabatur: copijs nostris exiguis, & lentè etiâ paratis. Hæc longinqua: in propinquo nobis turbæ, nec bellum solum sed seditio affligit. Eritne finem his videre, & semel optatam illam faciem Pacis? Numen faciat: ego te illic & amicos. Quod ad scripta tua reliqua, doleo in morâ hominis, nobis amici. Monebo hercules, & vt publica ea faciat publicâ omniû nostrum, qui doctrinam amamus, causâ. Illud in clausulâ iucundû, de vigore oculorum tuorum in hac ætate, mirando mihi & inuidendo. Heu, vbi ego sum? quattuor lustris minor cecutio; & nisi vitrea auxilia subleuent, vix legam aut scribam. Pænè indignor: & magis, quia veteres hac alleuatione vsos non lego. Atquin & illi nonne assidui in studijs? Quid dicam nescio, nisi sortem sic nostram esse: ferendam igitur, & te mi Clusi ætatem amandum. Louanij, III. Kal. Octob. ∞. IOCII.

## EPIST. XXXVII.

*Antuerpiam.*

IOANNI BAPTISTAE BARONIO suo S. D.

**E**QVIDEM gaudeo patrem in tua vota, & mea consilia, consensisse. Non tamen quia tua vota, sed quia de plano ita iudico, id fore ex re & vsu tuo. Adnitere, ne opinio hæc nos fallat; & peregrinatio tibi sit, quod debet, morum & vitæ formatio ac magistra. Inprimis autem, mi Baroni, modestiam retine, & ad te subinde, inter vana aut vaga illa redi. Sicut currus in præcipiti aut decliui fune retinentur, & se sistunt: sic animus debet, vbi quæ allubescunt aut inuitant. Talis Italia erit, ô pulcherrima & cultissima terrarum! sed Sirenas & Circas etiâ illic cogita, & esse quæ videas, sed & vites. Plura à me audisti, aut & in meis legisti: non itero. fiducia in ipso te habeo, quem Natura ad Virtutem & Modestiam genuit: ne degenera, & ipsum te ac nos audi. Ecce litteras ad nostros illos, quibuscum viuere te iuuat atq; expediat: aliud si in re tuâ possim, pete, & factum puta. nam seriò te amo. Louanij, III. Non. Octob. ∞. IOCII.

Deum ductorem & tutorem tibi precor imo corde. Scribe de viâ,

viâ, si vacat, & cùm illiceris: non deero respondere, & consiliari atque auxiliari, si opus.

## TESTIMONIUM.

**E**XTEROS & non plenè & certò notos tralatitia humanitas nostra commendat: quomodo non istos, qui è domo, disciplinâ, & velut sinu nostro prodierunt? In ijs est IO. BAPTISTA BARONIUS, vir nobilis, ingenio & moribus laudatissimus, & cui ego vel liberos meos (si Deus dedisset) similes esse exoptem. Quadriennium circiter apud me egit, ad aliena loca it visendi discendique gratiâ: comitor eum beniuolentiâ, & hac etiam commendatiunculâ apud amicos. Videte & excipite libentes, obsecro, vel meâ causâ: paria fecero in re simili aut aliâ, sic iuste & honestè rogatus. Testor & signo

Louanij, III. Nonas  
Octobr. ∞. IOCII.

I. Lipsius Professor, &  
Historiographus Regius.

## EPIST. XXXVIII. Bononiam.

PHILIPPO RVBENIO SVO S. D.

**A**NTE dies octo scripsi, iterò in occasione, quia Baroni-  
us noster ad vos abit. O quàm libens! tam libetè illum vos  
videte, & suscipite: quod eius & meâ causâ confido facturos.  
Velit contubernio etiam vobiscum iungi, & pater cupit: pote-  
stis, donec Roma vos alteri subdit. Facite, me petete. Adolescen-  
tem nosti, commodum & comem. De patriâ ille dicet, aut fama  
iam dixit. O res tristes! *κείται πάτρος*. Medicina tamen illinc <sup>\* Iacet Pa-</sup>  
expectatur, an non sera: Comitem Fontanum venturum mus- <sup>trocius.</sup>  
sant, nostros abituros: sed adhuc mussant. Interea hostis Gra-  
uiâ potitus, Buscoducis imminere dicebatur, solitariæ iam &  
pænè desertæ. Pars exercitus in seditionem (sollemni iam more)  
lapsa, ferrum & ignem nobis minatur. Hostes iudicati sunt de-  
creto Principum: nondum vindicati. Undique nobis terror:  
quem pellere Philosophiæ præceptis conor, & Senecam ad Hel-  
uiam matrem (de Exsilio est) publicè eo lectum. Ite tristitia. in  
priuatis ijdem sumus. Lucio illi Apuleiano respondimus, vidif-  
se po-



se potestis. Alia vix cogito, subduci tempus est & viuere nobis ac mori. Louanij, III. Nonas Octobr. ∞. MDCLII.

Hæc scripta etiam D. Præposito funto, ad quem ego nuper vberimè: saluere nunc opto.

## EPIST. XXXIX.

Lugd. Bat.

FRANCISCO RAPHELENGIO SVO S. D.

**E**XCVSARE te silentium tuum mi Raphaelengi video, an & probare? An ipsi tibi, non dicam mihi? Ab affectu hæc querela est: & nisi ille esset, non requirerem affatus istos litterarios, qui me fatigant, nec sinunt iuris aut quietis meæ esse. Sed amo te iam olim: & quia hoc, curo: & vtrumque, desiderium excitat audiendi de absente & sciendi. Sed mitto præterita, & dono: excusa vnâ re, vt emendes. Epistola quidem hæc tua copiosa, & ante oculos mihi posuit peregrinationes tuas omnes, & plerasq; actionum. Quid secutus sis, video: otium & quietem, quâ ingenuę mentes capiuntur, internâ tamen semper aliquâ actione & motu. Fratris mors reuocauit: id est Deus. pare, & fatis obsequere, & personam sustine quam imposuerunt. Deferere te hoc munus, ab auo iam transmissum, mihi nō placeat: nisi nimis sapere tibi placeat, & idcō non sapere, quia nimis. Vbiq; locorum quies esse animo destinato potest, in Baijs medijs, in Alexandriâ, aut Româ: & semper ab externis ad se redire fas, qui illa nō estimat, & hæc amat. Ego munus meū in publico fungor, colloquia varia & vana etiâ habeo: vna ambulatiūcula in horto aut mœnibus me mihi reddit, & in Elysijs campis, id est tranquillitate, reponit. Qui locis ista alligat, fallitur: etsi eligere mallē, si copia esset: sed mores, opes, fata prohibēt: & ijs obsequi igitur, sapiētia est, & cogitare se hominē non Deum esse. Ipsi Genij munia sua & leges habent, nec errant liberè aut otiantur, siue operantur. Sed de peregrinatione. iudicia tua scribis super Italiâ, Germaniâ, ô mihi proba! Omnino ita est. conueniunt in illo genere, qualitate aliâ differunt quam exponis. Pauci hæc ita iudicent: tu macte. Sed & Belgicam nostram quod ante oras omnes terrasque Europæ ponis; nec aberras. illa superat, si homines, industriam, comitatem, mores, bona terrę nata aut inuecta respicis: superat, inquam,

inquam, nec Europæ solùm tractus, sed orbis vniuersi. Vnam Sinarum ditionem excipio: si vera, quæ de eâ famâ ferûtur. Scire iam potestis, quia vestri, strenuâ & felici temeritate, ad ea quoque loca, vt audimus, equis ligneis vehuntur. Vtinam pax modò hanc nostram respiciat! quod vix iam vouemus, adeò non speramus. Alioqui huc te vocem, & viuere & mori in genitali tuo solo, in oculis nostris, aut non longinquum, velim. Vide, & sustine etiam: si fortasse Deus, præter spem aut speciem, aliquid misertus nostri donet. Nam mihi crede, in electione cuiuscumque loci discrimen est: aut inibi, aut à te, aliquid mali turbæque erit: exemplum à Plotino Platonico cape. Ille vir sapientiâ inclytus, eius & quietis suæ studio, Romam reliquit, Campaniam elegit, aëre, copiâ, fructibus, delicijs celebrem: & vbi pax inmotâ (illo quidem æuo) & nec metus belli erat. Iuit, insedit: quid factum? Consilia humana Fatum vicit, morbus totum corpus inuasit, membra & nervi riguerunt, oculorum orbes caligarunt, & putre denique corpus sanguinis corrupti vitio cōrabuit. Vbi es humana prouidentia, aut electio? Vides, mi Raphelengi, hominem humana ubique pati: locum non excipere, sed animum vincere. quem fas semper exerere, & quietum ac modestū sine peruicaciâ aut arrogantia sapere: quod facere te hortor, & pro amore in te rogo. Itaque de domo aut alijs, nihil festinare suadeam: maturè & circumspectè omnia. quia, vt ille ait,

\* ——— *φρονεῖν μὴ οἱ παῖδες, ἐκ ἀσφαλείας.*

\* *hauit  
ta cul-  
ris  
est pruden-  
tia.*

Vale mi Raphelengi, cum fratre Iusto, & sorore. Louanij, xi. Kal. Nouembr. ∞. IOCII.

De Pollione nostro, triste quod nuntias. De morbo audieram, à te de morte. Singulariter amaui: sed quid est? decuriam amicorum hoc anno amisi, siue præmisi. nam & ego sum in cursu.

EPIST. XL. *Bruxellam.*

GVILIELMO GREVIO *Nepoti suo ex sorore S. optat.*

**A**CCEPI primas tuas litteras, quibus ostēdis aliquid in studijs doctrinæ te promouisse. Pro ætate, non queror: industriam adiungi velim & incitatum animum, qui ad optatam nobis metam te sistat. Quid metam? semper hîc in viâ sumus,  
E & nul-

& nulla ætas, nullum ingenium, ad vltima Scientiæ aut Sapien-  
tiæ perducet. In Deo hæc perfectio: sed nos nempe imago eius  
sumus, & ideò conniti pro captu & viribus debemus accedere  
proximè, & referre illum in nobis ac circūferre. Nam in exem-  
plum nati sumus, atque etiam auxilium: iuuare nos, tum alios,  
& æstimare vnus corporis membra esse. Magnus hic orbis est:  
sed vna ciuitas. conspiremus in mutuos vsus, & ad hanc rem à  
pueritia aptemur. Tua nunc hæc ætas est: in palæstrâ es ad di-  
scendum & exercendum: excitare ô meus sanguis, & me quoq;  
ad instar aliquod propone. Vides tot annos nō mihi vixisse? la-  
borasse & operatum esse reip. voce aut scriptis? Sequere. atque  
vtinam diem videam, quo spes alluceat te per hæc & illa vete-  
rum vestigia iturum: mea, & pænè me, impendam, vt appara-  
tum & instrumenta habeas, id est libros & doctores. Etsi de do-  
ctore, iam curauimus: habes virum præter vulgus doctum, &  
tui amante: audi, sequere, obsequere, magis quàm ipsos quibus  
vitam debes. Nam nasci vulgare est: benè institui, altera vita est,  
& quæ ad Æternam illam ducit. Vota apud te **DEVS OPTIME  
MAXIME** concipio, vt quoniam me prolis exsortem voluisti,  
hunc è Sorore (nimis olim carâ) nepotem ad veræ doctrinæ &  
virtutis studia ire patiaris, aut potius impellas: nobis solatium &  
gaudium, tibi gloriam, alijs lumen & exemplar. Fiat, & tu con-  
tende, aut iam nunc abdicote & sepõno. Louanij, prid. Non.  
Nouembr. ∞. 1611.

## EPIST. XLI.

*Frankfurtum.*MARQUARDO FREHERO *J<sup>r</sup>.*

**M**ELLI mihi fuit, ex interuallo regustare tuum amorem.  
Coram fecerâ, cūm Frankfurtum me fors duxisset, et-  
iam mox per litteras: abiunctio deinde longior, & meæ an tuæ  
occupationes interpellarunt. Si vis, illuc redeamus, & exferat se  
amor qui in pectore hæret, & ab eo numquam exfulauit. Tua  
interea vidi, & in ijs te redamaui: præsertim illa Historica, quæ  
blattis & tineis tu inuidisti, & è situ eruta illustrasti. Vtile opus,  
magis quàm hæc recentia, & turbida quædam velut musta,  
passim nobis à crudis studiorū ingenijs propinata. Ad metam  
litteræ

litteræ properant, & nimia fecunditas ista vires exhaurit, si lustrum etiam vnum alterumque manet, Constantij SAPHYRVM iam nunc lustravi; nec de gemmâ aut sculpturâ scio, te in eâ artificem & variè celatorê agnosco. Benè, quòd nostro VELSERO inscripseris: & cui amanti magis aut intellegenti? Vir magnus est, vel maximis comparatus; & BOÏCA eius iam vidi, nondum legi. Nos nescio quid philosophamur, quò ætas & Genius ipse meus vocant: nec scio an alijs, sed nobis (ô quàm decorè aut vtiliter per hæc tempora!) philosophamur. Teamamus, & amaturi sumus, melioris animi & iudicij virum: tuam etiam MARGARIM, tuâ; Vtenhouij, eius causâ. Talis illa mulierum non mereatur? dissuauior: sed castè,

— *fuge suspicari*

*Cuius vnderum trepidauit ætas*

*Clandere lustrum.*

Louanij, postrid. Non. Nouembr. ∞. 1701.

## EPIST. XLII.

*Antuerpiani.*

HERIBERTO ROSWEYO Soc. Jesu.

**L**EGI tuas, & quæ è Batauis adiunctæ. Ad has in tempore respondebo: nec enim est quod properari poscat: & ipse scriptor mihi notus, non quidem ab illâ primariâ notâ, & amicitie tessera, id est Pietate. De Oratiunculâ illâ meo nomine vulgarâ, quid miri est? sic lubet ludere, imò non ludere sed rem facere, Typographis dico. Eorum instinctu, & malitiâ deinde se præbente, præclari isti foetus oriuntur: quorum illum nuperum quàm in ipso penè partu extinxerim, Epistola mea ad Senatum Francofurtensem, iam publicata, dicit. Simile in isto, inquires. Nō faciam, quis finis sit? magis prouocem his oppositionibus: nec meum est, sed Principum, his falsimonijs mederi. Gladio aliquo iustitiæ rescindēda ista, igne Decreti abolenda erant. Viderint, qui habenas tenent: ego per ista non deterior, ne turpior quidem apud eos, qui sanâ mente sunt, nec nobis iniquâ. Aliorum scabies facilè suscitatur his frictionibus, fateor: pruriant, garriant, me pausarium non habebunt. Sed de Oratiunculâ illâ, scito etiam non nouum esse, est ipsa, quæ ante decem annos publica,



blicata, à me refutata aut reiecta publicè in ijs De Cruce, AD  
LECTOREM. Vale V. R. & P. Rectori ex animo à me salutem.  
Louanij, postrid. Non. Nouembr. ∞. IOCII.

## EPIST. XLIII.

Brugas.

ANTONIO RICHARDOTO suo S. D.

**E**PISTOLAM prò te vidi, & scito me doluisse. Nam auidè te  
exspectabam, iamdiu non visum, & in animo tamen ge-  
statum: atque ita me Deus ille in superis locis, vt ego te hìc con-  
spici cupiebam. Caussæ tamen dilati aduentus (non enim omis-  
si) quia iustæ videntur, querelam desino: & gratulationem po-  
tius nuptijs amatae sororis tuæ subiungo. Deus velit eas lætas  
faustasq; nunc & in posterum esse, & proles etiam, familiæ ve-  
stræ fulcra. Floret ea, & cælesti quodam fauore adsurgit: sit lon-  
gum, & vos quoque pergite mereri. Apud me non es, sed meus  
etiam nunc es: itaque curo, & monita mea interuenient, spero,  
semper grata. Ab animo certè meo debent. Vidisti Italiam &  
oras exteras, multa in frontem pulchra & splendentia: redi iden-  
tidem ad vera & interna bona, atque ijs te exorna. Aula te nunc  
habebit, aut habet: aula: id est, quantumuis composita, in quâ  
vana & splendentia multa sint, sed fallacia, & fuco quodam  
circumlita, introrsus vacua aut praua. Nosce, & te excerpe, &  
vera ac solida illa affecta. O quàm me, magis te, iuuat, si Se-  
necam interdum legas seriò & scrutèrè! Quàm ille te firmet  
contra lapsus, & res omnes pretijs suis doceat æstimare? Scio in  
hac ætate non omnia talia gustum habere: sed te volo esse ex-  
mimum, & à meâ disciplinâ profectum, incedere velut exem-  
plum. Bellæ est elegantia, & comitas ista morum: quis nescit  
aut negat? sed Sapiencia si adiungitur, & eius mater aut proles  
Modestia, quantum decus accedit? sic vt auro, à gemmâ. Satis.  
audi & ama ista, ac me tui peramantem. Louanij, xvi. Kal.  
Decembr. ∞. IOCII.

EPIST.

## EPIST. XLIIII.

Mechliniam.

NICOLAO OVDARTO *semper-suo* S. D.

**M**IRATVM me in lectione litterarum tuarum dicam? licet. Iratum? non licet: & tamen pænè debui, in opinione de me, tam alienâ à me, & quæ in somnio caput hoc numquam inuasit. Ego migrem? ego Leodicum? Nam quâ caussâ? Res turbidæ sunt, scio: nisi mutamur, deteriores etiam futuræ: quid tamen ad me eximiè, vt ante alios, & præter alios, de abitione cogitem, id est fugâ? Ego verò à vitâ potius, quàm vt sic ab honesto, & illâ CONSTANTIA, quam stilo illustravi, & factis nō obscurabo. Heus tu, quisquis tibi auctor (bonâ veniâ etiam illius, quem reuereri me scis) à vano sumpsit, aut à se pænè dicam, sumpsit. Nihil rei, nihil sermonis, nihil cogitationis. Possum me purgare planius? Vnum hoc nunc tamen habe. Si res prorsum ad vltima, id est ad incitas eant, libenter me Leodicum sedem refugij lecturum, urbem Deo & religioni iam olim amicam, in me pronam, & quod inuitet, viris aliquot egregijs prudentiâ & doctrinâ inessam. Habes de istâ re, & quidem Sibyllę dictis veriora. De publicâ, piget scribere, an & pudet? Vbi consilia? vbi vel umbra prudentiæ, in re præsertim militari? Ridentur vetera, & nos eorum amantes: sed ij qui amplectuntur, quàm nos rideant, & verberent etiâ, vides. Audi iterum aliquid, quasi à Sibyllâ aut Marcio. Quamdiu in nouis istis, id est vilibus & prauis manemus, melior & altior Fortuna nos despiciet, nec Victoria alas suas huc vertet. Vrgent illi, *accipiter velut molles columbas*. Omitto non læta: cum Pantino sentio, nec sentio: remedio locus est, si morbum agnoscit æger. Si non, Belgica per me esto

*Victima nil miserantis Orci.*

Vale mi optime, & constantem me inter omnes fluctus (ita videbis) constanter ama. Louanij, XIII. Kal. Octobr. ∞. MDCL.

## EPIST. XLV.

*Antuerpiam.*

IOANNI WOVERIO SVO S. D.

**V**ENISTI? mihi nondum, nisi videro. Ades, amplectar te & teneā, & animos ac sermones vnā misceamus. Quando facis? anni mihi, dies: magis quā pupillis istis

— quos arcta premit custodia matrum.

Gaudeo Italiam, Hispaniam, Galliam, denique & Batauiam vidisse: in hac vltimā illum quem amo. Et amari te ab eo nuntias, volenti & credenti. Sed ista & alia corā: reperies me capite semicanum, aut certē mento: animo fortem, corpusculo, vt soleo, id est Augusti verbo *betizantem*. Veni, veni, refice hoc, & illum auge: quod rogare me dicam, an iubere? Vtrumque, neque vindictā etiam te manumisi. Domum meam nosti: caue in aliam, & hoc quoque ego ac mea (nostī illam Iunonem? ne offende) iubemus. Louanij, postrid. Kal. xbris, ∞ IOCH.

## EPIST. XLVI.

*Harlemum.*

GERARDO BYTEWECHIO S. D.

**L**AETVM auditu de tuā prole, mihi qui amicus sim; quid tibi qui pater? Euge! hæc crescat, vivat; & aliam, ac melioris quidem sexus, Deus ille communis omnium parens donet. Ecce fructum & gaudia coniugij mi Buytewechi: sed & curas suas trahent, & habet istam vt vsu, non mancipio datam, si sapis. Homo hominem genuisti. EPISTOLAS meas non displicere illic, hoc satis est: probari omnia, egrē id mihi probes, in isto æuo, & dissentiente plurifariam sensu. Sed satis, non carpi: & si faciant, quid ad me? Animum & me bonū fuisse cū scripsi, hoc scio: & suis quæque temporibus aut hominibus aptasse. quod vnum in Epistolā arbitror requiri, à prudente quidem & æquo censore. Alij abeant, valeant, vapulent vel cum LVICIO nostro. Sed heus, vos nunc nōne feroces? omnia rident, terrā, mari: vtinam nos vnā, & vetus illud corpus iterū simus. Io. Wouerius valdē mihi amatus iuuenis te quæsiuit Lugduni nostræ, non repperit: exspecto reducem, & is quoque (ne nescias) ædes meas insedit.

Fructum

Fructum rettulit, virtuti amicus, vanitati extraneus, & qui rectâ viâ ad Sapientiae ædem tendit. Vellem vidisses. At Nic. Micaulium nostrum nec vltra videbis, qui abiit

*Illuc, vnde negant redire quemquam.*

In flore æui fuisse scis, in viâ ad honores, & merebatur: Deo visum eripere, & apud se (ita sperare Pietas eius iubet) habere. Nos trahimus animam, & animo etiâ stamus; corpusculo languidi, nec de firmitate aut diuturnitate eius spondentes. Sed hæc quidem, non dicam cura, vix cogitatio me vltra habet: sto succinctus, & cum innuerit ille Imperator, viam carpo. Sandelinus ille noster nuperrimè apud me fuit: ô si tu vnâ! sed libens vidi, & in eo Barauiam, semper mihi caram regustavi. Valere te cupio mi Buytewechi, quod ex te est, ex quâ est, ex quibus tu & illa estis. Louanij, postrid. Kal. xbres, ∞. IOCII.

## EPIST. XLVII.

*Bruxellam.*

REMACLO ROBERTI S. D.

**M**ALE & per errorem hoc consul Grauiensis, quod binas ad te dedissem. ego verò nullas, neq; occasio fuit: & abeunt saltem ad te ferendam mandauerâ, & siquid haberes de republicâ vti significares. Fecisti in his litteris: atq; vtinam lætiora fas nuntiare! Hostes abierunt è prouinciâ spoliata aut vastata, cum prædâ & famâ: nos quid? sumus qui fuimus, id est tardi, frigidi, & quæ nec ad te stilo committâ. In animo isto dolet, qui video fundamenta status huius labi aut ruere: in promptu tamen remedijs, si consilia alia essent. Sed omitto: ego seriò mecum philosophor, nec meditatione solum, sed stilo. Per vetera Sapientiae præcepta eo, & animum ijs ad virtutem & robur firmo. Reuerâ etiam, cum altiùs mentis oculos sustuli, quid aut quantula hæc Belgica nostra est? cultissima terrarû fateor, quas sol videt: sed terra, sed regiuncula, & non dicam cum Vniuerso, sed cum Terrâ ipsâ comparata, portiuncula exigua & velut punctum. Quot tu mutationes, clades, cædes, in noto & ignoto orbe cottidie cõmitti censes? Vulgaris ea mens non attendit: quæ in se non abit, nec scit Mundum hunc ciuitatem sibi esse. Mihi est, & amplector, & curo: ac si mala fata hanc partem premunt  
aut



aut perdunt, multum soli superest quod colam, & vbi tolerem hoc quidquid reliquum est vitæ. Queri aut angi, stultum est: specto, exspecto, & Deum sequor. Iste mi amice, tuam & tuos seruet, & mutuum inter nos amorem. Louanij, postrid. Non. Decembres, ∞. MDCL.

## EPIST. XLVIII.

*Antuerpiani.*

MARCO ANTONIO PEREZIO V. N.

**A**DMIRATIO simul & dolor me inuaserunt, cum de inopinato obitu soceri tui, & amici nostri, intellexi. Heu, quid homines sumus? quàm fragilis materia, vt leui casu rumpenda? Profectò exempla ista cum è proximo incurrunt & nos feriūt, meritò animum ad cōditionem & cognitionem sui aduocent, & quàm totum hoc viuere lubricū sit, breue, nihil. Annus iste vnus in domo tua funera duo habuit: quis scit an ante exitum non etiam habebit? Voueo, sed non spondeo: & omnibus euenire, quod illis, potest: cogitemus, & in ista armemur. Vnde? à constantiâ, id est à Deo, cuius supremæ voluntati nostram hanc subiungi par est, & æquis oculis animisque spectare, quidquid iussit. Imò & subire quidquid iussit: nō aliter quàm cælum, stellæ, ær, maria, & omnia illa magna opera parent cōditori. Cleanthis illi versus, pro verâ & Christianâ sapientiâ sunt scripti:

*Duc me parens, celsique dominator poli,**Quocumque lubitum: nulla parendi est mora.**Adsum impiger: fac nolle, comitabor gemens.*

Hoc faciendum cum alijs, tum tibi Vir nobilis, qui inter huius æquanimittatis & constantiæ exempla, in familiâ Patruī tui es eductus. Vis aliquid illustrius? ille vir mihi semper visus verum Philosophum agere, & vitâ, nō sermonibus, exprimere eum atque referre. Obsecro te, in hoc tristi casu oculos mentis nunc eò flecte: & post Deum, robur ab illo etiam sume. Fateor cum incommodo familiæ ereptum vobis hoc fulcrum, & prudentia eius vario vsui domi forisq; etiam esse poterat: quid tamen est? nōne supremus ille pater & rector etiam viuīt, & curam tutelamque suorum gerit? facit & faciet: magis, si in illum spem & cogitationes tuas mittes. Iam vos ipsi eò xui & experientiæ venistis,

venistis, vt per vos sapere, regere, & per vestigia maiorum virtutem colere, rem non negligere, possitis. Itaq. minore dolore hoc ferendum, quòd nunc ablati ille director est, cum operam eius neque ætas, neque prudentia vestra, nimis requirebat. Vnus est Baronius meus, cui immaturus perijsse videri potest: sed nec potest, quia scio te in locum eius vicemque venturum. Duo nomina, Fratris & Patris, simul sustinebis: atque vt facias, amanter te rogo. Etiam illud, vt tu atque vxor optima animum erigatis, & solatium non à ratione solùm, sed à liberis etiam vestris capiatis: quos Deus plures dedit. formate & dirigite in eius gloriam, & vestrum & familiæ gaudium atque honorem. Ita sit, & eidem Deus illos vobis, vos illis longum seruet. Vale Vir Nobilis & Cl<sup>me</sup>. Louanij, vi. Idus Decembr. ∞. IOCII.

## EPIST. XLIX.

*Bononiam.*IOANNI BAPTISTAE BARONIO *suo* S. D.

**I**NOPINATA multa homini, & sepè tristitia: in re discere. Parens, heu, tuus vltimùm tibi visus abiit: & subito abiit, dolore & admiratione nobis relictâ. Et si istâ quidem vix mihi. scio enim Parcâ adsiuè super caput stare, & ictu aliquo percellere nec expectato. Sicut in aquâ pisces ludunt, in aëre aues volitant, securæ insidiantium: at illos hamus adducit, istas rete inuoluit: sic fit nobis, & aliquè è magno grege adsiuè venatur & capit pallens hæc Diua. Solare te à communi lege, ad quâ aptari non Sapientia solùm suadet, sed Necessitas cogit. Si æquanimis fers, simplex dolor est: si aliter, alter. Bononię te nunc esse, speramus: si es, fruire optimo illo veteris tui contubernij consortio, & dolorem alloquijs etiam illis mitiga aut merge. Rubenium ama & adhære: bono tibi erit, hoc mihi crede. Ceterum amisso hoc fulcro, nō diu peregrinari aut animo indulgere ego suadeam: veni, tua cogita & cura: sed & de Tuâ aliquâ cogita, si animus & amici ita suadebunt. Certè in Italiâ desiderare te nolim, etiam illâ insidiatrice aliquâ: per Germaniam redi, & hanc obiter lustra. Ista mihi nunc visa: sed sic vt te audiam, siquid melius inijs: tu Rationem semper, & cum illâ tuos. Louanij, v. Idus Decembr. ∞. IOCII.

F

EPIST.

## EPIST. L.

Montes.

IOANNI BVISSONIO *Consiliario & Syndico  
Ordinum Hannoniae.*

**E**PISTOLA tua subita & inopinata ad me venit, sed, Fidem testor, grata. An non à te esset, quem animi tacito iudicio & sensu iamdiu æstimauis, & addam amaui? Bona & certa de te Fama hoc fecit: nec nisi opinio Virtutis tuæ affectum illum mouit, nunc augendum & asserendum à tam amicâ tuâ scriptione. Quàm volupe mihi est accessisse: vel eo fine, vt inclusum illum meum aperire, sine occasione non reuelandû. Vt pyrites gemma ignem in se habet, sed non nisi attritu exferit: sic in me, habui amorem, sed tacitum, litteris tuis nunc eductum. Non fallam te vir optime: qualem vel epistola hæc mihi ad firmat: non, inquam, fallam, & te, Virtutis ac Doctrinæ sacerdotem, cum vtraque illâ seriò & fortiter amabo. O vtinam in miserâ patriâ multi hoc ingenio, & habitu sint!

— *quis pudor, & Iustitia soror  
Incorrupta Fides!*

Quàm plerique vela gratiæ, commodo, deterioribus affectibus pandant, sciote te mecum videre, & dolere. Belgicum ingenium è Belgicâ migrat, & Felicitas etiam illa vetus vnâ migrat, fortasse non nisi votis reuocanda. Sed à re, id est à te non abeo: animo animum tuum amplector, & *Dexterâ* hac fidem *Sanctæ amicitie* consigno: nouam, sed vt ille ait, animis deinceps nō annis æstimandam. Ita esto. & Fides iterum aduocata *Epistolam* claudat, quæ cœpit. Louanij, xvii. Kal. Ianuar. ∞. MDCL.

## EPIST. LI.

Bruxellam.

HENRICO VAN ETEN, *Præsidi Aerarij Brabantici.*

**Q**UEM hîc vides, virum eruditum & in Theologiâ acrem, causam scriptioni meæ præbuit: voluitq. commendari in re, quam ipse dicet. Rogo audias, & si æqua aut publicè profutura (neq; enim aliter) exponet; rogo & audiētiam & fauentiam ei accommodes. De inualetudine tuâ nuper aliquid, sed obscure & per



& per nebulam audiui: credo podagram fuisse, atque vtinam fuisse. Reliqua in te integra: ætas, corpus, animus ( quod caput est: ) & hic præcipuè nobis colendus. Quò magis adolescimus, id est maturescimus, videmus nihil in homine, præter interiorum illam partem, colendum: & reliqua adiuncta, vt verè & fortiter dicam, nugas & fumos esse. Quid si nec esse? solum illud æternum EST; & nos cùm ei accedemus, & conabimur Virtute assimilari. Illa æterna, & in parte nostri æterna: quò eo? Exorbito? vix apud te, quem scio & meditationum, & lectionum, & sermonum talium esse. Quid tuus Filius nunc in Galliâ? ibi hæret, an reuocas? Ipse quoque maturescit, & admoueri reip. ( vtinam tranquilliori! ) vtiliter potest. Fauco illi, te Nobilis & Cl<sup>me</sup> Domine æstimo atque amo: deberi mihi alterum vtroque nomine puto. Louanij, xvii. Kal. Ianuar. ∞. IOCII.

## EPIST. LII.

*Augustam.*

MARCO VELSERO S. D.

**H**ISTORIAM BOÏCAM tuam vidi, etsi non te mittente. Hoc culpo leuiter, illam toto pectore & ore laudo. O dignum priscâ gloriâ gentis scriptû! dignum optimis his Principibus! dignum & te mi Velsere. Exemplum præiuvisti hodie ad id genus scripti: quod iacuisse à mille ampliùs annis boni arbitri fateri debemus, vtinam per te excitandum! Sed præiuvisti, iudicio, industriâ, stilo. Vna Præfatio tua de opere præiudicat, plena prudentiæ, & decoris grauitatis. Hęc ego amicus, sed non vt amicus: boni peritici; iudices omnes dicent, quos in hoc æuo optem tibi magis, quàm præstem. Quòd autè meum breuiter nomen inferueris, pluris æstimo, quàm si ab alio, & alibi diffusam laudem. Gratiâ tamen an dicam, ambigo. si enim à iudicio tuo est, debuisti: si ab affectu, ego debeo. Vt cumque, amo te amantem, etiam nec amantem. ea est tua Virtus. Louanij, postrid. Natalis Christiani, ∞. IOCII.



GODEFRIDO HERTELIO S. D.

**L**ITTERAE tuæ tardè mihi delatæ, etsi viæ haud magno interuallo. Vide autem an non promptè respondeam, iam nunc vt eas legi. Amo enim vos tales, mi Herteli, bonâ & erectâ indole, ad bona & recta euntes. Itaq; & coràm vel iuuare voce & lectionibus soleo, vel animo fauere certè, & monitione etiam, vbi locus, excitare. Idem litteris, sed breuiter facio. Vidisti viâ, quâ ad Honorem & Virtutem eatur? inisiste obsecro, nec praua aut plebeia iudicia diuertant: quæ nimis hodie ad vanitatem aut leuitatem inclinant. Eadem ad superbiam & confidentiam: cui nullum fulcrum aut fulmētum, nisi ab inscitâ est, & destinato optimorum contemptu. Quàm te iuuabit grandiore, & æui iudicij q̃. maturiorem, solidiora hæc amplexum esse? fruges, non flores captasse tantum? Facere te hortor toto animo, & eodem anno: quod etiam hoc *Testimonio*, vt i cupiebas, expressi. Louanij, v. Idus Ianuar. ∞. IOCIII.

QVI HAEC LEGETIS,

SALVTEM ET OFFICIA MEA DEFERO.

**I**NTER exteros, qui in hac studiorum sede egerunt, GODEFRIDVS HERTELIVS, gente Germanus, fuit, cōmendatus mihi ab Jll<sup>i</sup> Viro Matthæo Wackhero, sed qui ipsius se vitâ & moribus magis deinde commendauit. Vixit enim hic circiter trienniū modestè quod ad vitam, industriè quod ad studia: & vtroque vel bonam vel excitatam indolem ingeniumq̃ ostēdit. Juris studia scopum habuit, adiumenta & directionem etiam litteras: atque his causis honorem inter consortes studiorum assecutus, Collegio studioforum Juris præfuit Decani titulo ornatus. Ab his inijs ad altiora progressurum, spes & votum nostrum est: fauor modò bonorum adiuuet. quem impetratum ei cupimus, atque vtinam aliquid faciat gratia nostra! Rogamus, & saluere vos iubemus, qui hac legistis. Louanij, vi. Idus Ianuar. anni ∞. IOCIII.

Iustus Lipsius, Professor, &  
Historiographus Regius.

EPIST.

EPIST. LIIII. *Mediolanum.*ERYCIO PVTEANO *suo.*

**V**IDI, vidi Septalij nostri ad Aristotelem, ô gratum mihi & æstimatum opus ! Fateor amasse virum, in te & me amicum: sed nunc pernouiſſe, qualem prædicabas. Fruere illo, me invidente: cui hoc mali fati eſt, non habere conſortem ſtudiorum aut ſenſuum meorum, & ſolitarium pergere hanc viam. *Stoïca Philoſophia* valdè nunc exercet, quam Senecæ illuſtrando præmitto, & ſeorſim edo. Alio æuo bona hæc fore, opinor aut ſcio: quid iſto, quod in dies magis ( apud nos quidem ) ab omni Honesto abit, neſcio: & periclitabor tamen, & Bona docebo atque ingeram, etſi non alio quàm conſcientiæ huius fruſtu. Ill<sup>um</sup> Borromæum ſic in me eſſe, intra me gaudeo, & laudibus de illo tuis applaudo. Sed tu Romam? excuſus opinor cauſſâ, nec manſionem te cogitare. I & redi, vbi ubi ſemper meus. Louanij, xvi. Kal. Febr. ∞ . IƆCIII. S. D. Au-  
deiantius tuus.

EPIST. LV. *Antuerpiam.*

GEORGIO VWENO S. D.

**P**RAETER opinionem Antuerpiæ manes, non præter animum meum, qui hoc probat, & conſilio ſtatuiſſe parætē tuum cenſet. Ætas tua iam matureſcit, ingenium adeſt; forma iudicium apud illum, quo meliorē directorem nec votis optes. Cum feceris, & in viâ rectâ fueris ſtudij præſertim, cui manciparis, Legalis: age, ad nos redi, & reliquum illum curſum decurre, cum tuo & reip. bono. Nam & hanc in oculis tibi eſſe cupio, & ciuem te adſictæ Belgicæ cogitare. Habes & in contubernio patris cognatum Bylium, bonum adiutorem, & honeſtis omnibus artibus iamdiu tinctum. Ab hoc quoq; hauri & diſce: atque vt poſſis, Modeſtiâ retine ( habere enim mihi adhuc viſus ) nec opinio vlla te inſlet, peſtis omnis proſectus. Sicut in Iberiâ equas à vento Fauonio concipere aiunt, ſed euanido foetu: ſic in iſtâ re ſit, & qui ab Opinione blandiente grauidi, ſerium nihil  
F 3 pariunt,

pariunt, tumidi tantum vtres. Audi me, & ama. Louanij, xvi. Kal. Febr. ∞. IOCIII.

Ciceronem te non deponere, hortor, & stilum interdum ad eum conformare. Parenti scribere nunc prohibeor: breui faciam. Saluta hunc, & illam: atque vnà Robianum & Schottium, ex animo.

## EPIST. LVI.

Mediolanum.

LVDOVICO SEPTALIO V. C. S. D.

**O** NVNC denique Septalium mihi notum! ô virum in animo isto magnum, & probum! ô mihi etiam amicum! Nam hæc omnia Commentarij tui me docuerunt, nunc denique inspecti, etsi nondum te mittente. Sed vidi, & medius fidius digna omnia summo illo viro, cui lucē præfers, & Philosophiæ simul ac Medicinæ; cuius vtriusque multa pars & arcana in libris ijs tractatur, & Septalio interprete egebat: id est vtriusque illius perito, & Philologiæ simul: quam decorè & vtiliter his quoque iuisti intermixtum. Itaque eruditum & elegans simul opus est; & quisquis in hoc Senatu nostro talis est, iudicio meo *consiscet consentietque*. Maeste amice! & veteris Italiæ gloriam asserere, & ostende magnas illas animas viuere in posteris etiam & spirare. Vtinam pluribus! & longa atque immota ista Pax vestra exciter ingenia ad optimas artes, non ad lasciuia aut vanitatem, quò eunt. Atquin & mihi partem laborum tuorum inscripsisti, & ea ipsa quæ *de Labore* erant. Gratum censes? ita, vt nullum munus suprà possit: & quid super immortalitatem sit? quam etsi à meis quoque scriptis sperare leuiter possim, fidentius iam cum tua accedunt: tua, quæ *ære perenniora* censeo: & talis meus in te amor erit, debitus nunc, antea delatus, aut tuo certè relatus. Salue, & ita ego sim saluus. Louanij, xvi. Kal. Febr. ∞. IOCIII.

EPIST.

## EPIST. LVII.

Lugd. Bat.

CORNELIO VAN-DALIO S. D.

**N**VMQVAM ego temi Van-dali, nisi in litteris istis vidi, & iam autumo nouisse. Quid? exteriorem te? minimè, sed ipsum te, id est interiorem animi faciem, ita me Deus, pulchram & Honesti illius amantem. Itaque iam nunc amo, & faueo: horroretiam in optimâ viâ, quam inisti, recto & indefesso pede pergere, tuo bono, aliorum exemplo. Quidni exemplo? supra vulgum aliquid vos tales estis, quos Deus ut lumen præluere voluit, & ingenij dotes has frui dedit: ne aliò vertite, nec insitas scintillas & <sup>\* ἐκείματα</sup> per neglectû suffocate. Scribis cogitare te <sup>\* fomites</sup> aliquid in Agellium, & subsidium postulas. Illud laudo, & scriptorem ego habeo purissimæ latinîtatis, & planè ad comœdiam antiquam: istud non abnuo, sed nunc differo, à valetudine & otio negatum. Illa tristis, hoc nullum est: perge tamen, nec differ. & quid Tiresiam etiam quæris, cum Phœbum illic habeas? Adi, & consule: scio posse, imò & velle. Louanij, xv. Kal. Febr. ∞. MDCLIII.

## EPIST. LVIII.

ILL<sup>mo</sup> ET EXCEL<sup>mo</sup> Principi CAROLO  
Duci Croyo & Arschotano.

**N**ON epistolam à te, sed thesaurum accepisse mihi visus sum (ex animo scribo) in tam effusâ declaratione benivolentiæ tuæ, ô quo meo merito paratæ! Itaque ego illam inter reposita & cimelia habeo, atq; habebo, quâdiu in humanis rebus ero. Gratitude referre me quî sperè, aut quî possim? nisi solo animo, què tu magne Princeps non vinces; & si ille quod vult possit, beneficia tua profectò æquet. Nunc voluntatem in solum deferro, atque etiam ipsam rem, quanta ea ab ingenio aut stilo meo (hæc meæ opes & dotes sunt) manare vniquam potest. De republicâ vix aliud sciberelicet, quia nihil in eâ aliud. Languemus, medicinâ quæ solet: hostiles minæ & apparatus. In Embdanâ regione omnia illis prospera, & confectum penè iam bellum.





iuro tibi confici me; quòd confectus non sum, mirari. Louanij,  
XIIII. Kal. Febr. ∞ . IOCIII.

## EPIST. LX.

Bruxellam.

IOANNI SEVRIO S. D.

**D**IGNITATE te auctum ab optimo Principe, animo meo gratum est: & gratius, te nuntiante. Significas enim hoc ipso, censere te lætitiā conceptum ex eo à me iri: nec falleris, concepi. Mereri enim te arbitror, & posse ac velle patriæ prodesse, & Principibus operā nauare. Certè mi Seuri dona à Naturâ, id est à Deo, habes: sed & probitatem obseruauī: illa exsere, & hanc abhibe; tuo & publico bono fiet. Legatum non volentem te dimittere, hoc opinor: atque vtiā ille optimus optimum aliquem, & tui similem, in locum possit surrogare. Multa requiruntur: & quædam etiam, quæ fortasse non opus requiri. sed præsens hic status rerū suspiciones mouet, & circumspicere omnia cautè iubet. Quando autem abis? quodcumque, à me nō abi, & animo semper, interdum & litteris iungamur. Sed & cum consorte aliquā tuā nunc iungere: quò ætas vocat, & certa nunc dignitas inuitat. Ipse bonus ciuis esto, & relinque qui post te sient. Ego philosophabar in his turbis nostris, aut & periculis: nam paullatim ad limitem hæc loca admoueri, nō ignoras. Loca etiam per se parum tuta aut firma: quid refert, si Deus tutela nostra est? Ego ita confido, & vt tua sit, corde eum precor. Louanij, XIIII. Kal. Febr. ∞ . IOCIII.

## EPIST. LXI.

Leodicum.

IACOBO CARONDELETO (*quod Deus approbet*)  
*recens Præposito Leodicensi designato.*

**M**AGNUM equidem gaudiū sensi, in dignitate quā recēter es auctus. Merebaris eam, aut aliam vel grandiore, virtutis & prudentiæ tuæ prærogatiuā: & tacito murmure fortuna à nobis accusabatur, quæ in comitijs suis alios anteferebat. Nam voto etiam nostro, vt hoc nūc edam, in patrio nostro solo expectabaris: & aliquid allaborasse me scio, sed illā cecā non

G

fauente.

fautente. Iam oculos aperuit, honorem tibi non dedit, sed soluit: quo ut diu frui vtriusque Reipublicæ, sacræ & profanæ, bono possis, Reu<sup>de</sup> & Generose Domine, intimum meum est votum. Deus audiat, & coram gratulari me aliquando, periculorum securum, sinat. Louanij, xi. Kal. Febr. ∞ .IOCHII.

## EPIST. LXII.

Louanij.

IO. VERGERIO AVRANO S. D.

**A**DES, ades cum istoc tuo impetu (ita scribis) & palam mihiingere non honesti studium tuum solum, sed profectum. Bonâ fide, epistola tua istum præfert, & simul ingenij tui acumen, & à cælo aliquem ignem: quæ fateor me amare in iuuentute, & ut signum, imò ut sponso rem optimi animi habere. Hunc excolamus, mi Vergeri. primùm illis sapientiæ diuinę studijs, deinde & ornamentis siue adiumentis, quæ huic omnis antiquitas admouit. Subit me delectatio Græcos illos veteres Latinosque legentem, pietatis nostræ assertores aut propagatores: subit interdum (dicendum est) & miseratio, cum video non pari splendore aut dignitate tractari. Age, tu & quibus Deus benigniùs fauit, excitamini, & iungite per imbecillitatem aut imperitiã disiuncta. Sed ad tuam rem, & scriptionem. Consulis me de epistolâ ad Antistitem vestrum. Dicam? bona & arguta est, & tale ingenium tuum vbique præfert: hoc industria tua addet, ut colorem & phrasim prisce eloquentiæ magis ducas. Natura ubi talis, non ambige vel leui operâ de successu. modicâ, inquam, cõformatione opus, & velut Mercurio, qui digitum in viam intendat. Alij laborent, & imitentur: tu cum Pindaro scito, \* τὸ δὲ φύσιν κρᾶντος ἀπαν. Ad solum Tullium te vocant: vocent, nec me volente audies; quia Genius aliò trahit. Sicut in humano genere vultus multiformes, & alius aliter pulcher aut decorus est: sic in eloquentiâ scito, nec omni industriâ paria bunt. Lenis aut mitis aliquorum oratio erit, & ut stagnum; aliorum, flumen referet; quorundam, torrentem. Vis vno verbo? ignem, aërem, aquâ, terram in stilo reperiẽs: ut aliquid horum regimen in corpore & mixtione istâ tenet. Hoc fateor, & suadeo, connitendum esse ad optima, & arte ac ductu quodam adhibito:

\* Naturâ  
quodque  
optimum.

bito: sed non vt vis Naturæ adferatur, & ne fiat, vt veteri pro-  
 uerbio monemur, *inuit à aliquid Minervâ*. Vbi sola imitatio est,  
 & huic adhæremus: quid fit? persona scenica. & vt quidam ma-  
 gnorum virorum habitum, atque incessum, aut gestus imitan-  
 tur, cetera & interna dispares; sic dictiunculas aut clausulas ali-  
 quas Tullij, si fortè, referimus, ad vim & Venerem eius non ad-  
 spiramus. Itaque audi magis hæc, etsi magnorum virorum mo-  
 nita, quàm ausculta: ætas tibi dicet, vera me dixisse. Tu interea  
 age, quod cœpisti, & cælesti isto liquore perfusus, ad aquas et-  
 iam Heliconias accede; sed ignem tamen tuum retine, à cælo, à  
 cælo infusum. Scintillam etiam eius in affectum mei exsere: ego  
 fouebo & augebo in Amicitia legitima flammam. In Musæo  
 nostro, VII. Idus Martias. ∞. MDCIII.

## EPIST. LXIII.

ILL<sup>mo</sup> ET EXCELL<sup>mo</sup> *Principi CAROLO*  
*Duci Croyo & Arschotano.*

**H**EVRIA tua (quæ antiquorum Heuerléa est) venit ad Te  
 ILLUSTRISSE PRINCEPS, politâ manu desculpta: &  
 qualem aut opere, aut mente, iam deformasti. O visendam HE-  
 VRIAM, & dignam exteris in imagine & adumbratione etiam  
 ostendi! Factum est tuis auspicijs: prodit & se promit: sed Tuis  
 primùm oculis, vti par est, se exhibet, versu aliquo nostro obiter  
 insignita. Neque istæ curæ Te nunc dedecent: qui ante octode-  
 cim annos, bello & militiâ, REGI PRINCIPIBUSQUE fortem  
 felicemque operam nauasti: & fidem in illos, caritatem in pa-  
 triam, pietatem in Deum affatim ostendisti. Honestum igitur  
 otium si exerces, quid mirum est? Neque tamen, nostro voto,  
 diu exerceas: iterumque Patriæ subueni, heu, laboranti & im-  
 ploranti. Deus illam respiciat, PRINCIPIBUS TIBIQUE  
 inspiret bona consilia, simul & facta. Louanij, 1x. Kal. Mart.  
 ∞. MDCIII.



## IN HEVRIAM

III<sup>mi</sup> Principis Prætorium

## CARMEN.

**M**OESTA Ô BELGICA *nostra tolle vultus,*  
*Tolle, & lumine lætiore lustra*  
*Magni PRINCIPIS hoc opus; sacratum*  
*MVISIS & VENERI, & venustiorum*  
*Quidquid est hominum. superba gaude*  
*His adaucta Palatijs, & Hortis,*  
*Hisce Fontibus, hisce & Arboretis,*  
*Xystis, Limitibusque, & Ambulacris.*  
*O dispar facies vetustiori!*  
*Antè scabra loca hæc, & absque cultu*  
*Horrida, ardua, iniqua, sabulosa:*  
*Nunc quàm splendida, quàm polita rident!*  
*Ades, GRAECIA tu vetus, vetusque*  
*Ades ROMA: mea ecce BELGICA audet*  
*Se conferre. & an ausit anteferre?*

EPIST. LXIIII.

Panormum Sicilia.

GOMESIO DE AMESCUA 1<sup>to</sup> S. D.

**E**GO ad tales litteras, & à tali, fileam? differam, aut contemnam? O vel cogitationem in me iniuriam! & vide quàm hoc factum. Binas tuas, id est, priores ante annum & sesqui datas, alteras ante menses octo, nunc denique accepi, nunc, horulâ antequam ista ipsa scribo. Rem dico. in mensâ erâ, tuæ dantur, lego, allubesco, manum à cibo ad calamum transfero: est hoc cessare, aut adspernari? Talem dignitatem non debeo, tale ingenium non possum: quod vel vtravis epistola satis mihi ostendat. Sed in priore affectum tuum promis, & laudes meas tangis: illum toto pectoris ostio admitto, has semiclauso, & vt amicæ proculos illos solent. Velim agnoscere, conscientia mea reijcit,

reijcit, nec nisi conatu talem adfirmat. At tu non quæ edidi solum amas, sed in futura etiam immines, & aues quæ peperî, & quæ parturio, scire. De illis, *Epistola* meæ vltimæ dicent, quarum *Centurias quinque* pronuper dedi: in ijs vnam, quæ de *Vitâ meâ* est, & *Scriptis*. Si tanti est, vide. Postremum hoc meum opus; mentior: successit opella, *De Bibliothecis*, & *Disputatio in Italum* quendam, qui proteruè incurrerat, comiter aut & comicè à me reiectus. Non sum pugnax, ipsa Pacis proles: sed cadere debebam, nisi leui manu petulcum hunc arietem reiecissem. De edendis autem, nunc cum maximè in manibus habebam *L. Annæum Senecam* vestrum: quidni vestrum? origine, ingenio, eloquio Hispanum aut Hispaniensem, & certè æternum tractus illius decus. Hunc auidè & iucundè illustrabam, breui Commentario: sed & seorsim *Philosophiam Stoicam*; quâ tenebrosâ, frustra facem alluxerim illi. Iuuabat, inquam, hoc opus, quia sapientiam animo, non scientiam solum, infundebat: & mores cum ingenio & linguâ pariter formabat. Si viuo tres quattuor menses & valeo, ibit in lucem. *Monita & Exempla Politica* affecta etiam habebam: de *Institutione Iuuentutis* libellos tres: *Admiranda Iudaica, Egyptiaca, Iberica, Gallica*: tum *Historiarum compendium*, si Deus dabit. Nam nos quidem

*Tollimus ingentes animos, & maxima paruo*

*Tempore molimur:*

sed ille stat vitæ laborumque arbiter, & producit, aut incêdit. Ecce ad priorem epistolam habes: estne aliud? etiam, caput scriptionis, sic seriò amantem seriò me redamare. Louanij, xvi. Kal. April. ∞. 1603.

## EPIST. LXV.

*Madritum.*

BART. LEONARDO ARGENSOLAE S. P. D.

CERTE frater Lupercij es, & quidem germanus. Quàm vel in amore mei conspiras? nam de laudibus, omitto: quas dictare iste potuit, debet pudor meus adspernari. Sed amorem talibus ingenijs non ego reddam? facio, & tam ex fide, quàm Virtutem & Doctrinam amo: cuius vtriusque vos veros alumnos in animo laudo & agnosco. O Hispania vestra stirpes has

\* prater  
multorum  
sensum,

plures proferat! de quâ tu verissimè, sentire eam longæ Pacis mala, Luxum, Cupidinem, & quæ sunt aliæ viriliû animorum pestes. Dicam tibi liberè meum sensum? sed \* *ὡς δὲ δόξαν πλεοναυ,* scio. Novus orbis victus vos vicit, & insitum antiquitus robur libavit, aut fregit. Numquam alius fructus mollium diuitiarum fuit: vide omne ævum, & dices. Nos ipsi Belgæ quid nisi pœnas iamdiu luimus auiti luxus? & lucemus: ita abstractiā minantur. Et opes quidem abiuvare à nobis, vitia manent: fastus, lasciivia, & extremum malorum Impietas, quæ Belgas à Belgis diuellit. Nam nos, meo hoc tractu, in religione quidem antiquamus: vtinam cetera sic puri! Ac de studiis optimarû artium, ante annos aut lustra aliquid fuit: nunc scito, \* *πάντα ταῦτα ἐν γέ-  
λασιν καὶ παιδιᾷ εἶναι.* Possunt aliter per continua & infausa hæc bella? quæ atterunt, non finiunt: nec licet optantibus vel semel perire. Benignior Deus aspiciat,

\* hæc om-  
nia in loco  
aut ludi-  
brio esse.

— qui solus opem, qui summa medendi

*Jura tenet:*

& idem me nunc ægrum sospitet, te valentem mi Argensola feruet. Louanij, xv. Kal. April. ∞. IOCIII.

## EPIST. LXVI.

*Veronam.*

ANDREAE CHIOCCO V. C. & Doctori Medico S. M. D.

**A**MO te de hac vnâ & primâ tuâ scriptione, amo mi Chiocce. Quid ita? quia optimum & interiorem tuum animum mihi ostendit, non mei & doctrinæ tantum, sed, quod caput, Virtutis & Sapientiæ amantem. O bona & recta tua in hanc rem iudicia! ô meritas inclamationes in vanos istos litteriones!

\* cuiusmo-  
di plures  
Nutritio-  
ra hacni-  
gra impo-  
stos &  
agytas.  
\* beatus.

\* οἱ τε πολλοί

*Βόσπες γὰρ μέλαινα πολυπερέας ἀνδρώπες.*

Ego, bono Deo duce ( hac parte \* *ἐν δαίμονι*) ab adolescētiâ spreui falsam hanc lucem: ad solida iui & scriptis meis miscui, quatenus occasio aut argumentum fuit. Parabam magis facere, & totus in *Stoicâ Philosophiâ* illustrandâ, & ab inferis adeò reuocandâ, eram, ad Senecæ mei lucem: sed Deus intercessit, & signum (nisi fallor) discessus clarum mihi misit. Sum quinque iam se-  
ptimanas

ptimanas non in solito illo & veteri languore, sed in pectoris morbo: qui atterit, tabefacit, & vitæ hanc lampada, itemque laborum, alijs tradere impellit.

*Linquenda tellus, & domus, & placens*

*Musa:*

neque inuitus faciam, nullâ in parte magis Philosophus, quàm in meditatione hac mortis. Ede illa ipsa, quæ iam affecta, inquires. Ita & alij amici increpant. sed mihi sedet Virgilij consilium, felicius patrandum, nihil edi, nisi à viuo me, & manu meâ missum, ac perfectum. Ignis edat, quidquid ego non edam. Itaque multa sub terram feram; eruenda alijs aut tenebris obruenda, non refert: non vixi infructuosus aut inglorius: & Sapientia & Virtus viuet,

*Ipsa suis pollens opibus, nihil indiga nostri.*

Ecce de meo sensu. addam de amore in te nouello, sed serio & acri: paucos me è scriptis meliores simul & doctiores agnouisse. Itaque amo, amo. Fas mihi sit, & vitam & valetudinem sub tali Imperatore (agnoscis Medicinæ veteris vocē) agere ac moderari: libens velim, & vel in manibus ac sinu tuo mori. Plura non possum, serio æger. Memoriam mei tibi commendo, & fiduciam amoris quem tuo præsto. Louanij, xvi. Kal. Maijas, ∞. IOCH.

# EPIST. LXVII.

*Lugd. Bat.*

DOMINICÓ BAVDIO S. D.

**S**VAVE simul & triste mihi fuit tuas legere. Suaue, ab affectu in me veteri & fido, & quem sine fidei hercules iniuriâ non mutes. Nam & ego firmiter & fortiter te amo. Triste autem, ob casus aut fraudes quibus iactaris: neque nunc in portu aliquo anchoram iecisti. O nostri Bataui, quid agitis? reuelate oculos, & noscite & admittite, aliter aduocandum. Indignor, & <sup>\* ardet mihi pectus.</sup> *δαίς.* <sup>Tal. nos trop</sup> cum Homero, cum ista ingenia & artes neglegi aut contemni video, quæ omnibus infulis erant exornanda. Quò imus: ad veterem squallorem & tenebras: atque vtinam angur fallam. Eò minus triste mihi, abire & abiungi: quod morbus nunc



\* vorator, nunc cum maximè minabatur. Morbus nescio quis \* ἀδυσία,

\* Qui lue  
tabificami-  
nuit vires  
animi.

\* — ὅτε μάλιστα

Τηκεδόνι συγρη μέλειον εἰλετο θυμόν.

Sed Deus ille, auctor mei, videbit: & alteram sententiā, vtram-  
cunque me volente, feret. Adolescentem probi oris & inge-  
nij, tinctum optimis artibus, Corn. Van-dalium, libens vidi, &  
amare non solum fauere cœpi. Crescant istæ stirpis feliciū ar-  
borum, vtinam feliciore æuo! Vale mi Baudi. Louanij, postrid.  
Non. Maijas, ∞. 16CIII.

## EPIST. LXVIII. Ipras.

IIRMIÆ PIERSSENÆO I<sup>to</sup> S. D.

**L**ITTERÆ tuæ mihi pergratæ, & magis Carmina, quæ in-  
genij tui & affectus in me (iste etiā elucet) monumentum  
publicasti. Sed & priuato versu me compellasti: ita me Musæ, ad  
illarum Genium factæ, & quod in ipso morbo (is me nunc men-  
ses duos habet) leuamen fuit legisse. Ah mi Pierssenæ, quā a-  
lieno à Musis æuo Musæ hæc pangis! quā pauci, non dicam  
amant, æstimant, sed vel simulant æstimare! Trahunt pedibus  
hæc talia, & vel simias pluris, quā litteratos censent. Senecæ  
dictum vanitatis arguitur: *Numquam ita in virtutes cōiuratum iri,  
vt non Philosophie nomen sacrum & venerabile sit*: ridetur. Ego  
iam pridem hæc scio, & ideò tolero, vt solemus vetera & fami-  
liaria iam mala. Quid Deus Europæ nostræ destinet, nescio:  
vtinam ne Honestum à nobis auferat, & litteras doctores eius  
aut præcones. Quæ fama sine ijs est? & sequitur, *Contemptu fa-  
ma, contemni virtutes*. Sed de æuo frustra querar: fatali hæc lege  
eunt: te magis hortor, animo stare, & rectum clauum tenere, vel  
Neptuno insaniente. Constanter ego facio, nec iudicia hæc ali-  
quid in me mutant, nisi fortasse scribendi edendiq; libidinem:  
quorsum enim ista imperitis, aut ingratiss? Neque tu solus oleum  
& operam perdidisti in nuncupatione: alij pariter, nisi siqui sint  
ingenio & ore ferreo ad exprimendum. Age, exsurge, ad melio-  
rem tui partem vertere: atque illa te à terrenis & vilibus ad cæ-  
lum ducet. Vale mi Pierssenæ. Louanij, xi. Kal. Iunias,  
∞. 16CIII. cum tuas vidi.

EPIST.

## EPIST. LXIX.

HENRICO VWENO S. D.

**D**OLVI discessisse nuper, cùm ipse aduenisses. Scis (sine blanditiâ) quàm amore & sermone tuo delector: in quo isto, & suaue semper aliquid & prudēs, & probum etiam ac Virtuti amicum. Mi Vwene, hoc caput est. hanc nisi amamus & colimus, malo fato venimus in hanc vitâ, cum poenitentiâ aut poenâ finiendam. Sed heus, an non ego breui finiam? rescribo enim omnia, quæ ad Robianum nostrum optatiora vobis scripseram: ut Luna hic morbus est, imò plus aliquid quàm illa, nec in septimanas, sed in dies atq; horas mutat. Hoc biduum pessimè habui; nec voto, sed opinione tamen, propono mihi meum finem. Melancholia est, inquires. Sapiëntia est, & nihil melius quàm crebrâ tali meditatione ducere animum ad contemplationem animæ. Multi necessitate aut impetu ad eam alacres venerunt. Nihil est, non nisi ex iudicio & ratione certa illa tranquillitas oritur, ad quam me compono. A libris abstineo, vix has litterulas tales scribo. Vale mi amice Louanij, postrid. Kal. Iunias, ∞. IDCIII.

## EPIST. LXX.

FRANCISCO SWEERTIO S. D.

**V**NA cum tuis iniunctas è Germaniâ accepi, à nouo aliquo amatore: cui nunc tamē non respondeo, & ut puellæ, pro-canti paullum me subduco. Valetudo nunc non est his talibus, varia, & anceps, an & præceps etiam dicam? Interdum cadere mihi, & ire palam ad finem videor: interdum exoriri, & melius habere. Leuiter fero. *quis enim queri potest, se in eâ conditione esse, in quâ nemo non est?* Homo natus sum; & ex quo natus sum, ducor ad mortem. Triste hoc cogitare, inquires. Non mihi. & quid si non cogitem? eò minùs ducar? Sicut qui in naui sunt, dormientes ac vigilantes vehuntur, cum sensu, sine sensu: sic nos eò prouehimur, & aliquando abripimur aut mergimur, velut tempestate. Philosophiæ fatis est. ad Gruterum si scribis, de valetudine insperge, & amicam salutem adde. Viringo quæ dicta vo-luisti,

H

lulisti, factum. Tu me ama; & si quid scitu dignum habebis, fac  
consortem. Louanij, IIII. Nonas Iunias, ∞ . DCIII.

## EPIST. LXXI.

Leodicum.

CAROLO BILLEO, Equiti, & Ser<sup>mo</sup> Electori  
à Consilijs interioribus.

**D**OLOREM, qui animum tuum percutit, mœstus ipse animi  
audiui: & quamquam amici non desint, quos plures vir-  
tus tua & fortuna habet, qui verbis aut litteris solètur; tamen &  
ego venire in partē volui, & officium meum vel superuacuum  
offerre. Atque vtinam superuacuum! vtinam ad animum iam  
compositum verba faciam! quod etsi à prudentiâ tuâ sperem,  
vix ab effectu, quo illam consortem vitæ & thori meritò es pro-  
secutus. Optima fuit, suauissima fuit, fœcunda mater, sedula li-  
berorum & domus tuæ curator & custos. Quidni in amissâ do-  
leas, & talem, numquam habiturus, desideres? Permittit etiam  
Sapientia aliquam hanc confusionem & dolorem: sed aliquam.  
frænât enim mox, & ad rationem reducit, & in cā tranquillum  
pacatumq̃ue sistit. Quid enim diu aut immodicè lugeamus,  
quod non posse, sed debere euenire, præsciuius? Nam morta-  
lis erat: neque amnis aut perennis aliquis fons, sed tortens, qui  
impetu currit, & decurrit. Verissima imago est: vide hâc vitam.  
Collectu humorum aliquo nascimur, raptim cū æuo labimur:  
& alij breuius, longiusq̃ue progressi, finimus. Atqui triste illud  
finire. Triste, si verè tale esset: nunc mutamur magis, quàm desi-  
nimus, imò nos Christiani, diuinâ clemetiâ, in meliorē sortem  
imus. Quis æs aut metallum perire dixerit, cū liquefcit & sta-  
tua ex eo funditur? Non perit, sed honestatur: & idem in nobis,  
qui ex informibus & infirmis in splendidam illam imaginem  
Dei transimus. Itaq; abeat dolor: imò latitia (det mihi veniam  
affectus tuus) succedat, ipso affectu eò ducente. Nempe amasti  
illam, & amas: quidni optimè igitur illi esse velis, inter beatas æ-  
ternasq̃ menses? Nec tamen tota à te abiit: respice liberos, quos  
numero tibi, & ex vtroque sexu, reliquit. Habes grandiores, è  
quibus fulcra & nepotes iam speres: habes minores, è quibus so-  
latia & gaudia, cottidiano occurfu & sermone, captes. Hos pe-  
ctori



ctori insere, ori interdum admoue: & in istis viuere illam, & te affari, non falsò crede. Sed à domo etiam tuâ, ad rempublicam, cui natus & destinatus es, redi. Illa altera tua vxor est, huic iungeris, nec à ciuitatē eius potes auelli. Hanc amplectere; & magnis illis cogitationibus, affectuum scintillas preme, siquæ exurgent. Cogita & Principem, tui amantissimū, & tui profectò egentem: vince dolorem vt huic vaces, & magnitudinē animi indue sublimi viro dignam. In theatro positus es, conijciuntur in te oculi: sustine personam, nec defice circa extremum hunc velut actum. Quid enim tibi blandiar? vt diutissimè viuas ( & ita voueo ) tamen pauca lustra supersunt, & sequēris illam præmissam. Ecce, Amplissime & Nobilissime Domine, haud magnam, sed à magno affectu epistolam: quem in te & tuos constanter seruabo, quamdiu Deus in terris me seruat. Vale, & illo ipso faciente, firmare: quod pectore cum rogo. Louanij, vi. Idus Iunias, ∞. ICCCIII.

## EPIST. LXXII.

*Insulas.*IOANNI SEVRIO, *Graphiario in Senatu rationum Insulensi*, S. D.

**T**ITVLVM hunc tibi antea gratulatus sum, nunc rem & possessionem. Fallor enim, aut illic agis: debes meo iudicio; & hoc quoq; ( verbo olim monitum ) consortium assumere, rei & domus tuæ curatorem. Quid in istâ ætate differs? Ea labitur, vita labitur: & sæpè post moram pœnitentia succedit, & indignatio, Quare non feci? Fruere annis, ô fugacibus! & ego iam & olim sensi; iam maximè, qui multos egi, & præter meminisse quid seruauit? Aliquid in publicum laboraui fortasse: sed annorum nota, non ipsi exstant: neque hæc omnia mihi in magno, qui abiens video, NEC TANTI HVMANA esse. Epitaphia hæc mea inscriptio erit, si Deus & amici volent: ego iussi quidem, nec Timonis aliquo animo, sed Zenonis. Heus, inquires: etiam nunc de Epitaphio? non conualuisse te audimus? Audisti fortasse, & ego tale aliquid nuntiem: sed quàm infirma hæc firma nostra sint, quàm labi nos in ipso statu faciles, nimis sum expertus. Blandiens ventus non me inducet, quin tempestatem & nimbum mox exspectem. Extra Philosophiam, & communi

H 2      linguâ:



linguâ: meliusculè, sed ambiguè valeo; & dies, imò horæ panè, alternant. Tu vt animo in primis, deinde & corpore valeas, illo me ames vnà cum Remaclo nostro viro optimo, meum est votum. Louanij, 111. Idus Iunias, ∞. 156111.

## EPIST. LXXIII.

Bruxellam.

FERDINANDO DE SALINAS, *Consiliario  
Senatus Principum.*

**A**BEVNTEM Riuium nostrum, veterrimum è meis discipulis, & addam felicissimi inter eos ingenij & profectus, elogio an testimonio apud te prosequi, animus adegit magis, quàm res exegit. Quid enim apud te opus, qui nosti? qui notum amasti? qui amatum re & beneficentiâ iuuiisti? Nec enim me celauit, aut debuit, quâ liberalitate nuper eum affeceris, & ad culmen illud honoris euexeris, quod tibi meritò inscribet. Laudandum te vndique. qui optimas artes ipse colis, cultores alios subleuas, & instar Dei illius, bonus ipse bonos optas, imò facis. Opportunè in hoc æuo, quod talia calcat aut præterit: opportunè in isto eius (Riuium dico) articulo, qui in viâ & salebrâ hærebat, nisi à te eductus. O fac porrò! Vt enim fruges non bonitas soli tantùm gignit, sed cæli Solisq̃ue fatus & temperies educit atque elicit: sic ingenia & artes, non à Naturæ tantùm velut solo alenda, sed vestrâ procerum benignitate, & velut cælesti aurâ, fouenda atque attollenda sunt. Ceriè iste noster per aspera adhuc iactatus, viam non deseruit: spero mitior fors ridebit, & Comici illud expeter,

*Fortiter malum qui patitur, idem post potitur bonum.*

Hoc ego amico meo opto, & te Nobilis ac Clar<sup>me</sup> Domine, in virtute tuâ, & comite eius dignitate, diu viuere & vigere. Louanij, prid. Idus Iunias, ∞. 156111.

## EPIST. LXXIV.

*Romam.*IO BAPTISTAE BARONIO *suo.*

**V**IX posui tuas, & respondeo. Amor in te meus fecit, ille perpetuus (ne ambige) & paternus. Sed ego ipse quàm pænissimè nuper defeci? steti in extremâ Salutis lineâ, pedem reduxi, & iterum valere videor, sed languori etiam vicinus. Fragile vasculum sum, vt rem dicam, & fractum audietis, priusquam frangi. Tu autem Romæ? Neapolim isse te tuæ, an Richardoti, mihi significarunt. Sed & mansionis decretum profers, non pro tuorum hîc arbitrio, vt nuper coràm Antuerpiæ audiui. Ego quidem haud dissentio, & faciliè ætatem hanc tibi donem, sub Autumnum suadeam redire. Non Roma, non Romanus aliquis (Romanam fugio dicere) vltra teneat: & cum manes, apud te etiam mane: nec laxa nimis aut diffunde. Vt vinum vigorem & florem seruat, sed clausum; apertum exhalat: sic tibi fiet; virtus apud secretum manebit, vanesces si vulgaris. Paucis & bonis assuesce, atque ijs notis: cetera liber esto, & præsertim in spectionibus illis antiquis. O suaues, ô vtilis! mihi si liceret, fructum capiam quem non cepi. De Ill<sup>mo</sup> Baronio, gaudeo sic in me esse: cum scribam ad eum (sed materies exspectanda est) per te fiet, atque aliquid etiam de te inspergam. Publica hîc, vt semper ambigua, turbida: voluntas in Britannîâ noui Regis pariter anceps, tecta; & partes nostræ sibi, & nos vindicamus. Quies & pax his regni auspicijs conuenit: seruaturum puto, saltem temporariam: ego affectum in te, mi Baroni, æternum. Vale. Louanij, Kal. ipsis Quintilibus, 1603.

## EPIST. LXXV.

*Gandauum.*

MAXAEMYLIANO VRIENDTIO.

**L**IBROS Carminum tuorum diutile ante litteras accepi, quas adiunctas tamen fuisse suspicor, missui illi condimentum. Etsi quo condimento opus eiusmodi bellarijs? quæ, mihi crede Vriendti, veterem Græciam ac Latium sapiunt,

H 3

ô sua-

ô suauia mentibus, quæ melioris doctrinæ gustum ac sensum habent. Illæ quidem hæc tua

*Iurent Albano Musas in monte locutas.*

Alia iudicia assis ne æstima, quæ quid sint Veneres aut Charites nesciunt, & quid quid ad Monetam non facit absunt laudare. Nos & dilecta ingenia oblectasti, Belgarum gloriæ addidisti:

— *sume superbiam.*

*Quæsitam meritis:*

imò non sume, & in Modestix finibus siste. quia si vlla dona à Deo, ista ingenij, & maximè vaticinij sunt: illi adscribamus, &

*Qui dedit hæc hodie, cras si volet auferet.*

Vt non ille palàm, etas occultè faciet, & cùm in annis grauis eris, lentitudo & frigus aderit, nec felix stili iste calor. At in me amando maneat nec vel euum refrigeret, meo quidem voto imò & exemplo. Louanij, III. Non. Quintil. ∞. IOCIII.

# EPIST. LXXVI.

*Bruxellam.*

FRANCISCO TREGIANO, BRITANNO V. N.

**L**ITTERAE tuæ, mihi pergratæ, etsi grata & non grata quædam dicunt. Illud displicet, in Aulâ te hædere, vbi vada & Syrtes, an & Circe aliqua etiam occurrit? Nec vna, vt fateris: & vides & rides ineptias, qui à vitreâ illâ Deâ alliciuntur, tanguntur, & quid nisi in pecudes, si non feras, mutantur? Amadim suum, & tales scriptores legunt, loquuntur, cogitant: id est \* φλυα-  
cam? Atque hic est \* ὄλβος, quem illi putant,

\* nugæ & ineptias.

\* corruptelas & p. stes.

\* felicitas.

\* Es gratia

vitalis, cū

suauis, onâ

lyrâ, atque

omnium

vocum in-

strumentis.

\* Achia,

non iam

Achiui.

\* Vna non

duos nos

embracipit.

\* ——— κὶ χάρις ζω-

θάλμος, ἀδυμελεῖ

δ' ἄμα μὲν φόρμῳ ἢ, φαρμῳ-

ροισί τ' ἐν ἔντεσι ψαλόν.

A me abeant, à te etiam, quæso ——— \* ἀχαλίδες, ἐκ' ἐτ' ἀχαλοί. Fa-

teor varia studia finésque esse, & cùm Thebano vate,

\* μία δ' ἐχ' ἀπαντας ἄμμε θρέψει

μελέτα:

& fateor etiam, optimæ Sapientiæ studium rarum esse: sed ta-  
men ad hoc te voco: ego, an altius ingenium iam diu tuum? Cer-  
tè Deus

tè Deus tale dedit: cui si cultus, vt cœpit, accedit, & cursus per  
 viam rectam: quid non sublime & *\* θαυμαστόν* de respondeamus? *\* Admira-  
 bile*  
 Scripta, quæ vidi, asserunt: & hæc facient, quæ videnda iam mi-  
 sisti. De Republicâ nostrâ quæ nuntias, spem quàm rem bonam  
 habent. Sed ista *\* βραδύτης* nostra, quâ sollenniter iam vtimur, *\* Tarditas.*  
 quid in bello præsertim magnum pariat? Scio nec *\* ἀεγρέτειαν* *\* Precipi-  
 tantiam.*  
 optabilem aut laudabilem esse: sed tamen maturitatem & quæ  
 Delfinum ancoræ suæ iungat. Fabium in defensione non ab-  
 nuam; in aggressu Achillem, Alexandrum, Cæsarem præopté. In  
 vestrâ autem *\* νάσω πολυμάλῳ*, quid nouus *\* σκηπτέρος* faciet? utiūm  
*\* ὁδὸν ὀρθλὴν τῇ δίκῃς καὶ ἀληθείας βαδίσει, ἢ τὴν σκολιὰν τῇ ἀπάτης;* Sub initia  
 ægretè dijudices, vbi multa tēporibus & hominibus danda, con-  
 tra animi etiam sensum. Legatum nostrum comiter & (pro mo-  
 re gentis vestræ) splendidè acceptum audio: cetera modò respon-  
 deant. quod breui videbimus: & quando ipsum te, mi Tregia-  
 ne? cui gratias ago debeo quæ pro narratiunculâ facti admirandi:  
 admirandi, sed & per me in locò ad posteros (ineretur enim) *\* Insulâ  
 pecorosa.*  
 propagandi. Vale: & longior eram, nisi auocarer. Louanij, Kal.  
 Sextil. ∞. IOCIH.

## EPIST. LXXVII.

Romam.

IOANNI HEMELARIO *frat.*

**H**EVs tu, semper te amo, sæpè cogito, rarò scribo: & omnia  
 causas suas habent. Amor ab amore tuo est, & ab indole  
 optimâ, quam semper in te vidi, & magis exultam, & virtuti as-  
 sertam, magis amo; cogitatio ab eodem; scriptio rarior ab occu-  
 patiunculis, item quæ à valetudine, ita me Deus, tenui & negotijs  
 non subsistente. Otium & quietem flagitat, non solùm poseit.  
 Vnius te monui olim, & moneo: in hac ætate vigente & floridâ,  
 plusculum animi & fiduciæ fume: & te atque alios item noris;  
 te, qui sis, qui non sint, illos. Neq; ad elationem voco, quam odi  
 portis inferni deterius, cum Homero hoc dicam: sed ad animi  
 iustum medium quæ tenorem, in quo virtus. Rubenium meum  
 vides? modestia ipsa est: animum? scit cæleste aliquid seesse, &  
 lucere debere, atque eò contendit. Hominem te Deus fecit, nec  
 ex istâ ingeniorum plebe: cur ordinem deseras, & subsellia po-  
 tius



tiùs quàm fellam curulem eas infessum? Non meo voto aut iudicio facies: erige te, & pietate volente, sidus in hoc mundo esto. Genus vitæ elegisse Sacrum scribis. Semper te eò destinaui, & gaudeo spem meam affirmasse. Ego alta cogito, alta: id est cælum, quò me languores perpetui isti ducunt, non enim trahunt. At tu valetudinem integratam gratularis. Falsus es. non est quæ fuit, neque erit: sed viuimus tamen, & metæ vicini non tam reduximus, quàm frænauimus præcipitem gradum. Abire etiam non metus aut mora est: à prauis, à turbidis. & Deus ferreo sæculo me inclusit, & quod mitius metallum non spondet. Publica eunt, vti consilia sunt: nam Fata iniustè accusemus. Vale mi optime Hemelari, & amande semper ama. Louanij, XIII. Kal. Septembr. ∞. IOCIII.

## EPIST. LXXVIII.

*Perusium.*

M. ANTONIO BONCIARIO S. D.

**L**ITTERAS tuas, amorem & elegantiam spirantes, accepi, & animo caras fuisse, libens profiteor ac testor. Nam amari à nobis Italiam, quis nescit? & viros certè, siqui in eà, vetere & nuperà etià illà Italià, exhibent se dignos. Tu ille es mi Bonciari. quod epistola tua mihi dicit, vna nec diffusa, fateor: sed vt Collosi magnitudo vel in breui sigillo se ostendit; sic ingeniū & doctrina etiam in tenui & extemporaneo scripto. Itaque & ab hac causlà te amo: quid cùm Bencium meum, qui heu fuit, velut auspiciem amicitiae adhibes: quomodo non vltro me in vincula ista donem? Facio serio: hoc præfatus tantum, amare me iuxta tecum, aut suprà, posse: paria officijs aut scriptionibus vix posse. quia & sæpè ita distringor, vt non liceat; & languo etiam, vt non libeat hæc vsurpare. At, vt dixi, amabo, & id iudicio: certiore illo, quàm tu in laudes meas iuisti, quas inerrare auribus meis patior, sed non in longum, notitià mei reuocante & abnuente. Sicut tamen Stratocles, opinor, olim Atheniësis cum res prosperas nuntiasset falso: increpantibus deinde dixit, Quid enim mali si meà operà biduum lætiores egistis? tale aliquid mihi euenire fateor, & breui lætitià perfundi elogiorū talium; sed breui, & perfundi. Ego nūc totus in *Stoicis* & *Senecæ* eram, post ancipitem

pitern sanè morbum:& brevì illa videbitis, si mea Parca menses etiam aliquot parcit. Tu vale, Vir inter paucos mihi deinceps amande, atque æstimande. Louanij, xii. Kal. Septembr, ∞. IOCIII. statim à tuis litteris acceptis.

## EPIST. LXXIX.

Neapolim.

IVLIO CAESARI CARACCILO S. D.

**I**LL<sup>ME</sup> DOMINE, Litteras tuas accepi, & generosam indolem, & beniuolentiam in me spirantes. Gavisus sum. nam animum meum seriò afficit, cum vos è stirpe nobili & altâ, dignos eâ video, & non incumbentes maiorum famæ tantum, sed à se tradere & propagare eam aptos. Fateamur sanè, vt à radice & stirpe bonâ fructus tales, sic à nobili semine germinata lia expectanda esse: sed quanto optabilius spectare, quàm expectare? In te ego video, qui iam olim optimis artibus, & quæ ad Honorè & Virtutem ducant, imbutus, perseveras easdem colere, atque eos etiam amare & æstimare qui colunt. Hæc res me tibi cõciliauit, & locis diffitû coniunxit, affectu quidem. nam vt corporibus, non datur, non dabitur, vt mea quidè valetudo est, haud facta ad peregrinandum, imò nec ad diurnandû. Annis graues non sumus, sed laboribus fessi aut fracti sumus: & respicimus exitum, vt ij solent, qui in custodiâ molestiore tenentur. Nil circa nos, nisi bella & turbæ: & inter dispares agimus, quod liberè & verè apud te profitemur. Scripsi iam nunc ad ANNAEVM SENECAM, & Stoicam totâ Philosophiam libaui: eo certè fructu, vt mihi robur imprefferim, dum alijs idem paro. Sicut in naui qui transfert & vehit, idem vehitur: sic mihi factum in Scriptore, quem natû seruatumque censeo bono generis humani. Vale Ill<sup>me</sup> Domine, & Honestâ ac me ama. Louanij, Nonis Septembr. ∞. IOCIII.

## EPIST. LXXX.

Bruxellam.

PETRO PANTINO V. R.

**R**EDITVM ego & salutem ex animo tibi gratulor, belli & morbi periculis euoluto. Vtinâ de patriâ sic loqui liceat! quid loqui? vtinam sperare! Sed heu, vndique <sup>\* ἀτυχία</sup> tristiora, <sup>\* Infortun.</sup>

<sup>a</sup> Mala cō-  
filiā.  
<sup>b</sup> Nulla cō-  
filiā.  
<sup>c</sup> Puāndā.  
<sup>d</sup> Exitia-  
lia.  
<sup>e</sup> Mentis  
expers.  
<sup>f</sup> Dissidere.  
<sup>g</sup> Malos  
euentus.  
<sup>h</sup> Tāquam  
sub man-  
dragorā  
iacemus.  
<sup>i</sup> Fatale, nō  
vitabile.  
<sup>k</sup> Nebulo-  
sam.  
<sup>l</sup> Non sine  
labore.

tristiora, quia causam<sup>a</sup> δυστυχίαν nostram, an<sup>b</sup> αἰουλίαν, habent. Illa nuper ad Hoochstratam, quā<sup>c</sup> ἐπετίθεισα? ista ad Buscum-  
ducis quā<sup>d</sup> ἤλεθεα? Et hosti quantum accedet, nobis decedet  
eā captā, quisquis planē<sup>e</sup> ἀφρον non est, videt. Ego tibi de me fa-  
teor, <sup>f</sup> ἀθύμως ἔχων, cum continuas istas <sup>g</sup> δυσπραγίας video: & nec  
erigi quidem nostros ad emendandum. Consiliorum eandem  
viam imus, frigemus, tardamus, & planē<sup>h</sup> καθάπερ ὑπὸ μανδρα-  
γόρου καθέσθμεν. Mi Pantine, fato preminur: <sup>i</sup> τό γε νόστιμον, &  
φθικτόν: erga alia curēmus. Quid? ego animum & me, à Senecā:  
quem iam denique paro edere, & Stoicam illam <sup>k</sup> ζωώδη doctri-  
nam in lucem redegi, <sup>l</sup> οὐκ ἀπένως. Intricata res: peruici. *Vestam*  
non displicuisse, gaudeo: nec miror eius cultori. Vale V. R<sup>de</sup> &  
æternūm care. Louanij, IIII. Idus Septemb. ∞. IOCHII.

## EPIST. LXXXI.

Brugas.

IANO LERNVTIO *semper-suo.*

**L**ONGAM, liberam, & verē amicam tuam epistolā: & om-  
nibus his nominibus, inprimis ipso Lernutij, gratam. Am-  
plector te, sed animo: brachijs si possim, & ore adfari, quā om-  
nia in notæ fidei sinum hunc effundam? quā me reuelem, &  
quidquid in aumario pectoris huius condo? Nunc quoque in  
parte faciam, sed parciū: & scis chartæ non omnia tutō credi.  
Audi à principio, vestigia epistolæ tuæ legentem. Commendas  
primò Robertum Schilderum: dignum, & ex sermone agnoui.  
Adolescens est mente & studijs bonus, & qui ad optimas artes  
pleno gradu incedit. Quā pauci nostratium cum ipso! quā  
ludibrio aut contemptui est nomen hoc omne litterarum? Vi-  
des mecum & doles, feres etiam vt fortes decet. Meliora tibi ne  
sponde: ad vltimas inscitæ lineas imus. Intereā tamen nos ali-  
quid etiam pangimus, & in litore isto sulcos ducimus: quo pri-  
uatim aut publicē fructu, non habeo adfirmare. Imò bellè tibi  
est, inquis. Non pessimè, fateor. si de magnis opibus aut gratiā  
præsumpsisti; muta, medijs in istis sumus. Vultus aut sermo  
quorundam arridet: qui capiunt pauci sunt, & quod sequitur,  
feriō ament. Vnum tibi dicam, interpretare. filios si habeam,  
litterulas me auctore non discant. Addis in epistolā de meis  
quædam,



quædam, & putas, liberè. Non liberè, sed amicè & decorè: atque obsecro aliàs vsurpa. Scribis in Politicis cetera exacti operis videri, abesse de Legatis. Verum est, & poterat locus ijs esse inter Administros. Sed quia temporaneum hoc munus (olim quidem) neque illi apud Principes aut Respublicas perpetui; abstinui dicere: & quia rem totam istam non maximi vsus censeo, quidquid aliter iudicare hodie consenserunt. Et in Notis tamen dicere destinaram, ac collecta ista habeo: sed augendi aut recolendi eas animus abiuit. Ais dein de Epistolis meis, & de vnâ illâ \* insertâ. Quid dissimulem? rem tetigisti, ambituuncula mea fuit, & quæ sita gratia illius, qui in aperto nondum mihi rettulit, nec referet, vt tecum quoque opinor. Quid tamen est? benignitas mea orbi innotescat, & quàm æqui in aliena ingenia simus, etiam fortasse super æquum. Non mihi fit: fiet aliquando, & confide Genio nostro; viuet ac vincet. De annis ætatis meæ cauillari etiam quosdam. Quid hoc est, & quî possunt? In illâ de vitâ, palàm & verè scripsi tali anno & mense me natum: calculatore nō opus ad hoc æui, quot eos inscribam. Sicubi autem alia aut \* aberrans scriptio, non memini, nec puto: si tamen, emendetur. Item de valetudinis crebris querelis, risum habet. Ab alijs etiam audio: atqui, ô boni, miserationem debebat. Non facimus maiora ista verbis, res vtinam non clamet, vtinam non ipsa scripta colorem ab effecto animo & corpore ducant! Hoc fine, & excusandi mei, interdum infero: quid si etiam contra importunos, & irrupentes istas muscas? Hæc scribere, hæc facere me volunt, suadent, iubent: arripio illam ægida, & rationem qui non audiunt, hoc scuto terrente depello. Sed cogitent etiam, seorsum & apud plures non iniuste dicta: quæ nunc in vno fasce adspecta fastidium habent, nec leguntur vt diuisa. At de Bufbequij morte, scio errorem: sed adnotabitur. & tamen famam Epistolæ, non historiam iui insertum. Estne aliud? propria etiam tua, sed amica, sed iusta (agnosco) querela, de primis libris meis non semper ad te missis. Gaudeo requirere & poscerè, & culpam excusare nolo, sed emendare. Habes hîc *Epistolas*: habebis *Politica*, quæ iam reciduntur. Habebis & magnum *Senecam*: in quem vtinam dignum aliquid moliti simus! *Stoicam* tamen *doctrinâ* seorsum illustrauimus, & ipsum breuibus Notis, & (In-

\* Editur a-  
libi xviii.  
Kal No-  
uembr. pro  
xv.



uidia audiat) alibi bonis. Omnibus placere, nec spero, nec opto quidem: mihi hoc opus vnâ causâ, quòd fortiozem aut meliorem me fecit. Salue, & ama me ex animo, qui eo tuus sum, mi anime. Louanij, XI. Kal. Octobr. ∞. MDCLII.

## EPIST. LXXXII.

I. LIPSIUS IOANNI WOUERIO *suo* S. D.

**F**ELICITER, acclamo, mi Woueri: vtinam præsens possem! Sed vel sic absens facio, & corde itero: nemo magis ex illo. Equidem iam diu tibi felicem talem copulam destinabam, & merèti: vt tua probitas & modestia, atque etiam ingenij & morum elegantia est, quâ vel imperitos meliorum tuarum artium & partium ad te ducas. Benè est, habes. Nam de dote, vberem audio; de parentibus, honestissimos; de ipsâ aliquid ipse dixerim, & probè memoriâ teneo vidisse. Suauis mihi visa, morata, proba: si nihil horum esset, apud te fiat. Iungere, fruire, & nouellas stirpes, paruulos Wouerios, nobis pange. At me quòd velut auspicem nuptijs tuis optas, vereor vt fiat. Mea *ad Senecam* iam mitto Antuerpiam: ipse venire imminente hieme, & attenuante valetudine, dissuadeor. Sed venio, non venio, mente & cogitatione adero: teque & tuam, mi Woueri, tam fideliter amabo, quàm æternum Numen me velim. Id porrò cœpta tua secundet, & ferente aurâ in portu votorum tuorum nostrorumque sistat. Vale mi optime. Louanij, v. Kal. Octobr. postridie quàm Bruxellâ redij, vbi dies duos modò hæsi.

## EPIST. LXXXIII.

*Bruxellam.*

ÆGIDIO MARTINIO *Syndico ciuitatis Bruxellensis.*

**E**PISTOLAM tuam fateor gratam mihi fuisse, sicut & sermonem, quem tecum ante menses duos circiter in hac vrbe ferebam. Vtenim in isto prudentia tua, & erga me ac parentem olim meum affectus, elucebat, ac iure capiebat: ita in litteris hæc ipsa exprimis, si nō clariùs, certè firmiùs, quanto conceptæ scriptioni maior esse fides & auctoritas, quàm extemporalis fermocinationi solet. Itaque meritò & rependo affectum tibi, &

bi, & in filium etiam, quem hîchabes, deriuo: quem si non caussam, tamen occasionem huic amicitîæ nostræ dedisse, videor posse affirmare. Enimuerò quid officij manare à me propriè in te possit, vix video: in filium fortassis aliquid, quem in hanc Academiam, velut ad mercatum optimarum artium, misisti: & dirigere hîc eum, atque etiam instruere, pro otij & virium mearum copiâ, aliquid possum, & volo. Ciuem enim patriæ amantem me profiteor: cui quid ampliùs conferre aut commodare possum, quàm vt liberos cùm ipse non habeam, alienos, & præsertim vestros talium, qui aliquando ad rempublicâ ad-mouendi sunt, formem ad eam ac concinnem? Adnitar equidem, aut potiùs tot annos iam adnifus sum, quâ scribendo, quâ docendo conatus meliorem & doctiorem reddere iuuenturem. Is enim, Deo teste, laborum meorum finis scopusque est: & Fa-ma si sequitur, non magis huic laborauimus, quàm is qui in So-le currit, vmbrae causâ id facit. Sed de filio tuo, tantò libentiùs manum illi porrigam, quò magis beniuolentiæ tuæ nunc debeo; & quia ingenium atque indoles etiam eius inuitant, ad bonum honestumque facta. Gaude in tuâ stirpe, & solatia inter afflictæ patriæ turbas, è domo tuâ magis magisque (Deum ita precor) cape. Eundem, Vir Clariss<sup>me</sup> & Prud<sup>me</sup>, vt te reipublicæ, cui laudabiliter operam præbes, incolumem seruet. Louanij, v. Kal. Octobr. ∞. IOCIII.

EPIST. LXXXIV. *Antuerpiam.*

IOANNI WOVERIO *suo.*

**E**T quando magis te meum ostendisti, quàm in hoc *Eucha-ristico*? à cuius lectione duplex affectus me habuit, lætitia & pudor. Lætitia iterum duplex. vel quia laudabar à te. gra-rum autem & optabile placere ijs, qui ipsi nobis placent: vel quia sic laudabar, id est scitè, doctè, disertè. Hæc enim qui in scripto tuo non agnoscit, aut liuor aut stupor eum habet, & in veruecû patriam à nobis relegetur. Quàm inuentiunculæ mul-tæ raræ, & argutæ sunt! quàm imagines sepositæ, & tamen ap-positæ! quàm ipse stilus sine tumore altus, sine affectatione eru-ditus! Mihi hæc sic visa, fateor; & placuerunt omnia, præter ar-

gumentum. Nam quòd me laudandum sumpſisti, quì laudem? Pudor ille retinet, quem dixi: qui etiam nunc habet, & pugnat iudicio, & tua cùm aineim, damno. Non sum ille quem facis, & in sublimi sic locas: descendo, & conscientia me detrahit, & nemo meliùs quàm ipse me noui. Quid tamen est? cùm tua relego, pudor iterùm pænè exſulat, & videor aliquis eſſe, quia tam fortiter & impreſſe vis eſſe. Ita ſentis quæ dicis, ita tibi approbas, vt me quoque in partes trahas, & credere adigas, quæ nec credo. Non plenè quidem credo. nam tangere te interiores meos affectus, qui de proximo noſti, non diffiteor: & laudabiles conatus exprimere, ſi non ſucceſſus. Omnia cur reiſciam?

*aliquem mens ſpirat honorem*

*Conſcia factorum.*

Nam vt candidè tecum, & ſenili quadam libertate loquar, dona habui & exſerui, quæ non omnes mei ſtudij aut æui. Iudicium inprimis Deo acceptum refero, & ab eo ordinem in ſcribendo & diſpoſitionem, vel paucis veterum vbique ſic uſurpatum. In ſparſâ quauis & confuſâ materiâ ſeruaui, & partiri ſemper aptè ſtudui: quod Socrates alibi apud Platonem *diuini viri* cenſet, ego *diuini doni*. Et ab eo donum alterum adſcribo, Eloquentiam: quæ in ſermone aut ſtilo aliqua fuit, atque ea facilis & profluens: quod in ſtriçtâ & argutâ breuitate nec habeat quiuſ, nec credat. Illa ipſa breuitas, quod imputo, ſine tenebris fuit: & multa paucis ſic dixi, vt influant & ſe diſſundant, & vel plura videar dixiſſe. At tertium & præcipuum, quod iudicij, ingenij, eloquij, ſtili quidquid in me fuit, in publicum contuli, & uſui, non pompæ, volui ſeruire. Vide mea vel à iuuenilibus annis, ſemper ſcintillæ aliquæ ad Virtutem aut Prudentiâ prælucentes: ſemper animus ille apertus, amans generoſi & honeſti. At grandior paulò, non iam occulto aut obliquo tramite, ſed palàm & rectà illuc iui. Ego ad Sapientiam primus vel ſolus mei æui Muſas conuertì: ego è Philologiâ Philoſophiam feci. Vide *Conſtantiam* meam, dicet: vide *Politica*, idem: & hoc vtrumque opus eſt, cui vita fortasſe cum Latinis litteris manebit. Quid in *Tacito*, *Plinio*, *Epistoſis*, *Militiâ*, *Admirandis*, *Senecâ*, nònnè finis idem & fructus apparet? Hæc ſunt, quæ in cenſum, ſed nò à me deſero: ingratus ſim, niſi diuina dona agnoſcam, & gloriam ab



ijs etiam tribuam auctori. Sed ecce longius eo. scriptum tuum remitteretantum, & cum vero elogio volebam: de me siquid addidi, apud telicuit, mei sic inmodicè amantem. Louanij, III. Nonas Nouembr. ∞. IOCIII.

EPIST. LXXXV. *Bruxellam.*

MAXIMILIANO PLOVVIERIO.

**L**ITTERAS quas daturum me dixeram ad Buiffonium, ecce hîc habes. Mittere eas tuæ curæ erit, quam vltro tibi imposuisti, pro affectu quem in illum & me habes. In me certè, nuper in sermone largiter declarasti: & si non verba, ipse vultus & oculi tui fecissent fidem. Et si quid ambigerem? eadem uterque amamus, id est Bona & Honeſta: ex quo sequitur & adhæret, vt inter nos etiam amemus. Senecæ nostri dictum est, è Porticu promptum: *Inter bonos viros amicitiam esse, Deo conciliante.* Est ea veritas. Deus, imò & natura, faciliè iungunt, studijs & voluntatibus iam iunctos. Itaque sicut credidi promptè & libens de tuo in me affectu, velim te pariter de meo: quem bonum, fidum, atque etiam firmum reperiens, nec nisi cùm ego soluar soluendum. Id fortasse breui, vt ætas & valetudo mea sunt: tamen nec paruus circulus minus perfectionis quàm magnus habet, nec Amicitia tempore, sed veritate æstimatur. Vale mi Plouuiieri. Louanij, VI. Kal. xbris. ∞. IOCIII.

EPIST. LXXXVI. *Lutetiam.*

SEBASTIANO ROLLIARDO Icto.

**B**RUXELLAE & in Aulâ eram (ô sedem pro Lipsio!) cùm tuas accepi. Gratas, suaues: quid opus me affirmare? semper vegesco, & velut effloresco, cùm aliquid à meo Rolliardo. Atquin & libelli tui adiuncti, dona Musarû: ille de Passeratio, bonus, & pius, ac manibus eius ritè ac meritò à te factum. Vbi hodierna gratitudo? quid autem in mortuis speremus? vix viuus aliqua manuum applosio, & vocis fauentia: & irrifus aut pastortitiæ *oues* excipiunt, & à tergo manus motæ. Ferenda hæc omnia, pro æui Genio, aut iter hoc famè deferendum. Nuper ego aliquid



aliquid *de Vestâ*: probare te gaudeo, etsi melius illud iam damus, & addimus quædam, & mutamus peccata *ἢ ἀποστέλλας*. Etiam *Porticus Sophiam*, in duo volumina distinctam: sed tenue & argutum opus, & aliquis dicat *χελιδόνων μυροῖα*. Æuo nostro obtinent iudicia, quæ olim calcata; & scis quàm diuersa tota hæc studiorum via. Sed tamen Senecæ causâ id quoque exantlandum fuit: feci, & gaudeo factum. Quod à vestro Autocratore vocatum me, & perhonestè, censes: ita est. nec tamen audiui-  
mus, & à patriâ, in hac ætate atque imbecillitate, nemo me com-  
moueat,

\* Non mihi  
sident,  
quantum  
est culpul-  
tare arena.

\* Οὐδ' εἰ μοι τόσα δοίη, ὅση Ἰαμαθὸς τὰ κύνες τε.

Apud te seriò dico. Labet hæc patria nostra, siue ruat: ego cum illâ ad discriminis aut fati metas eo. Ad easdem illas, & vltrâ, te mi Rolliarde optime & doctissime amo. Louanij, viii. Kal. Febr. ∞. IOCIIII.

## EPIST. LXXXVII.

Florentiam.

## CVRTIO PICHENAE.

**A**LTERAS tuas vidi, & Inscriptionem veterem adiunctam, fide exscriptam: sanè bonam & rerum veterum, de quâ iudicium meum ad Mercurialem vestrum iam perscripsi. Marcelli honori non esse positam opinabar, sed Caij aut Lucij Cæsarium: quò ratio magis, & eum ibi notatum ducit. Felices vos in talibus istis curis, in altâ & beatâ pace: nos litui circumstrepunt, & in ipsâ hac studiorum sede, arma & miles. Tædet temporum; & nisi Philosophia subleuet, iamdiu iaceam, & in parentis magnæ sinu recondar. In Tacitum aliquid à te promiseras hisce Nundinis: librarius Syllabus negat, & nomen tuum non ostendit. Ego *de Vestâ* nuper aliquid, & nunc melius vberiusque damus: item *Stoicam Philosophiam* sexlibris comprehensam. noli erigi, non est pro vestrà Aulâ. Spinæ sunt, aut Paradoxa: & in re fortassis alta, in specie non videntur. Senecam adiungimus, & hoc fine Antuerpiam imus. de quo sic iudicare te, gratum mihi neque inopinatum fuit. Quæ bona mens aliter potest? ego autem etsi propiùs te, nec nisi ex scriptis, haud noui: tamē tam scio de sensibus tuis, quàm de meis, panè dicam. Vides quid mihi vindi-

vindicem? nec faller me scriptorum tuorum character, in quo probitas & iudicij rectitudo comparent. Pauca verba facio, quia ab equi lapsu saucius & æger: ama me, seriò & constanter idem facturum. Louanij, III. Kal. Febr. ∞. IOCIIII.

## EPIST. LXXXVIII.

*Veronam.*FRANCISCO POLAE *I<sup>to</sup> ex animo S. optat.*

**T**V verò Vir Cl<sup>me</sup> non prouocas me ad amicitiam, sed adigis: nec amore solùm (cui meum quî negem?) sed iudicijs & beneficijs: sic enim *Elogia* tua iure debeo interpretari. Legi, amaui magis quàm probaui: nam quomodo tam honesta, vel magnifica potius, de me & ingenio meo possim? Mi Pola, veteres haud temerè Amori oculos clausurunt: affectu, non iudicio, videt: & habet pulchra atque haberi vult, quæ ipse censet. At sæpè fallitur: & tamen vel sic amandus est, quia ex sensu suo & candore, sine malâ fraude, agit. Tu verò is es, qui iudicio alibi & in alijs præstes, imò etiam in grauioribus causis præeas: sed verecundia mea & modestia sequi cunctantur & retractant, & de me ad me appellant. Quid tamen facio? quid ipse resisto, & te sisto? quin vela potius affectui tuo pando, & adspiro: & ama vel falsis me causis, dum ames. Hoc valdè cupio: de reliquis ætas sequens dicet, quæ Gratiæ aut Inuidiæ expers, ingenijs suum cuique pretium repender. Ego affectui tuo serium affectum: per Genium Famæ iuro. Louanij, prid. Kal. Febr. ∞. IOCIIII.

## EPIST. LXXXIX.

*Valentianas.*

HENRICO D'OULTREMANNO V. C. S. D.

**D**II deæque, tuos versus! stupui simul, & rubui: illud in ingenio tuo, sic acuto, sic vario; istud in laudibus, quas supra modum is in me effusum. Non me fallis, ô amice: fontem à te, non à me habent: id est ab affectu tuo, non merito Lipsiano. Sed benè tamen, quòd versus sunt: & vel eo titulo præscribant, fidem non promitti. Ego aliquid subitò in eos lusi, & hîc habebis: sed vix versus. ita humiles sunt, & languidum incedunt, vt vel recto oculo tuos vix ausingere. Antuerpiæ iam fuif-

K

sem,

sem, nisi casus me tenuisset, & verè casus. Equuleum ex dono habeo, quo vehi soleo ad exercendum & ambulandum; alienis scilicet pedibus, ætate iam grauiore. Ille meus vector mecum lapsus est, & crus & tibiā, sed leuiter, adflixit. Ita domus me habet, non tamen lectus: & cū iste, tum *Exsequias Lipsio licet ire.* adeo quies mihi inimica est, & gaudeo ac viuo motu. Bruxellæ etiam fui, & vidi Comitem Stabuli Castellæ, Principem iam olim in me affectum. Item in litteras. quas vtinam Deus & Æuum coli magis velint, quàm tristem hunc Martem! Sed heus, ecce Versus

\* \* \* \* \*

Iam place tibi in tuis bonis, qui tam malos meos vides. Quæris quod è tam magnâ tuorum copiâ approbem imagini nostræ subscribi? istud, nec voto melius optari potest.

LIPSIADAE, *velum est Timantis, imago. videri*

*Non nisi sub piceâ Sol quoque nube potest.*

Hoc mihi & Modestique meæ amicum, vt emittam argutissimam inuentiunculâ cetera bona, aut optima: sed Inuidiam habeant, me quidem viuo. Ne prouocemus: inter nos amemus, seriò, acriter, constanter, Louanij, Kalendis Februarijs, ∞. I O C I I I I.

## E P I S T. X C.

*Perusiam.*

M. ANTONIO BONCIARIO S. corde D.

**Q**UAS natali meo ad me dedisti litteras accepi, etsi seriùs, imò tardiùs: neque enim serò ad me aut frustrâ tam amicæ litteræ possint peruenire. Amaui te meritò, vt primùm ex epistolâ & te, & affectum in me noui: & magis amare cogor, quò propiùs certiusque (Virtus hoc habet) noui. Nam & epistola hæc certè, optimi & pulcherrimi animi index, delectauit: & Carmentuum ad DIVAM LAVRETANAM valdè opinionem detemeam auxit. An non faceret sic eleganter, doctè, altè, piè scriptum? Atque ipso tempore venit, quo ego in pari argumento eram, aut potiùs summam illi manu iam imponebam. Nam & ego, mi Bonciari, peculiari semper in Matrem-Virginem cultu & affectu, DIVAM HALLENSEM scripsi, & benefi-

cia



cia eius ac miracula partim solutâ, partim strictâ oratione, sum complexus. Nihil expecta ad tuum Carmen: aliquid ad animum, quo erga Diuam nolo vinci. De *Senecâ* etiam meo breui arbitraberis, fecerimne pretium operæ post Muretum, & Gruterum, & alios: quod profecto, vt rectè iudicas, arduum sit nec alicuius è populo præstare. Non me attollo, nec debeo: sed aliquid contulisse in Sapientiæ illum patrem, res, spero, apud te dicet. Libens autem (vt ad tuas iterum litteras) legi de Carolo Emanuele Pio à Sabaudiâ, stirpe & ingenio & studio illustrissimo adolescente: quem quod erga me etiam affici scribis, gaudeo, & in beneficij loco hoc pono. A te, an ab illo accepti? nam & te iudicio aut testimonio aliquid contulisse, vel ad eliciendum, vel ad augendum affectum, pænè habeo persuasum. Et si talis illa indoles sponte etiam amat, & surgit ad complectendos, in quibus Honesti aliquas flammulas videt. Vt perseueret, à mecum roga, & mutuum facere affirma. Vt tu pariter, mi Bonciari, rogatus esto, ô inter paucos Italię tuæ lumen. Louanij, XIII. Kal. Mart. ∞ .IOCIIII.

## EPIST. XCI.

Veronam.

ANDRAE E CHIOCCO S. D.

**A**MOREM tuum variè & ἀφθόνως ostendis, neque vlla epistola à te est, in quâ nō illum nudum videam & expressum: idque sine colore aut fuco. Non redamem te? sic facio, vt Deum me velim: & Deum ipsum testor. Scripsi ad te ante dies quindécim: & iterum debeo, vel Bonciarij nostri causâ. Quàm ille de me benignè & \* μεγαλείως nimis, & vellem in publico temperasset. <sup>\* magnificè.</sup> Nondum eò venimus, vt Sol noster vimbram non habeat, & claritas aliqua non liuoris nubem. Sed ille verò fortiter, tamquam ego sim \* τενύπτερος ἐν ὅρισι τοῦ αἵθερος: quod non eius amoris, non <sup>\* latipennis in aui-  
bus aquila.</sup> tuo etiam credam. Nam & tu hîc \* ὑπὲρ τὴν αἴθραν, & ad extrema laudum iuisti, me non sequente, & in terrâ etiam meâ hærente. Non sum aut ero ille \* ἀρωμύνης. Sed ad ipsum Bonciarium scripsi, iam è litteris ad me & famâ notum, & certè à niueo isto petore (vt doctrinam omittam) amandum. Nec tu arbitrare de alijs Italis qui melioris & prisce, vt sic dicam, sanguinis sunt, me <sup>\* super me-  
ritum.  
\* qui calum tangit.</sup>



dubitare. Fuerit vnus ille nescio quis hybrida, qui proteruiter in me immerentem: sed ab alijs quidni affectum expectem & exposcam etiam, quem scriptis dictisque meis omnibus in eos ostendi. Dabunt, & dabo: & crescentes istos ingenij flores tuo fauore irrigabimus potius, quàm liuore amburemus. De\*tecum sentio: acre ingenium, iudicium est vbi desideres, & addo maturitatem. Stemma illud, tuo commodo, vidisse velim. Ego pluscula nunc edo, *Ad Senecam* Notas perpetuas; item *Diuum Hallensem*, miraculis apud nos claram; item *Monita & Exempla Politica* libros duos, in gustum; itē *De Magnitudine Hebræâ* libros quattuor. Quid ais? cessauimus hac hieme? Cum tuo autem Pindaro, *ἄνθ' ἐν Ὀδείοις ἐδ' αἰεὶ χοντὰ μέγιστα* quæ. Vale Vir Cl<sup>me</sup> & aternum meus. Louanij, prid. Idus Mart. ∞ IOCIIII.

De Ill<sup>mo</sup> vestro nuper ad te, nūc ecce ad illum. At tu Flaminium nostrum Valerinum à me amplectere, & grates gratias pro scito Epigrammatio redde. Coràm ego hoc facere *ἡγριέλομαι ἵππο*.

## EPIST. XCII. Lutetiam.

IO. VERGERIO AVRANO S. M. D.

**G**AVDIVM mihi ab aduentu tuo, & felici itineris metâ; sed maius gaudium ab affectu, quem purum & magnum in me ostendis. Et accipio equidem, & sine retractatione admitto. vel quia candorem tuum noui; vel quia à meo metior, qui talis talem poscit. Nihil mihi das, sed soluis. Perseuera tantum, & ipsum me, non quæ alij de me, vide. Ille \*\* cur mihi infensus, vel certe aduersus sit, nescio: non meruisse, hoc scio, & vt alia mihi detrahat, virum bonum sciat, & candidatum bonarum artium ac veræ Philosophiæ, neque aliud iacto. O miseri, quò rapimur ad emulatiunculas aut calumnias, in alios Lyncei, in nos Homeri? Mi Vergeri, hoc in primis vitare te hortor & rogo, in alios inquirere, te negligere: contrà fiat, benigni in omnes, seueri vel asperi in nos sinus. Socratis præceptum vetus erat:

\* *Aedibus in proprijs, quid rectè alin-<sup>is</sup> ge-  
ratur?*

\* *Οἱ, τί τοι ἐν μεγάροις κακὸν τ' ἀγαθὸν τέτυκ'?*

Hodie contrà fit, & emissitios omnes oculos habemus. At illi, vt volent, iudicent: ego in viâ rectâ constanter ambulo, ab æmulatione, ab ambitione prauâ auersus, & quò debeo versus, id est ad Sapien-

Sapientiam & Deum. De ipsâ Galliâ, scis quàm amem: sed non hos nouiticos libros, quos mittis, leuium & exsultantium ingeniorum fœtus. Nihil in ijs solidi, maturi, aut, non dicam vetere, sed nuperâ Galliâ digni. MILES ille quidem palàm \* *ᾠδὰς ποιεῖ*, <sup>\*dementis, aut emmino insanit.</sup> ἢ πάντες πασι ληρεῖ. Alia de illo audieram: sed cùm legi, errorem meum, furorem illius vidi. A Thuano ipso Historiam expecto, vetere amico nostro, & tum arbitror. De doctrinâ vel industriâ, non ambigo: sed, vt hoc æuum est, rarâ quadam prudentiâ opus ad placendum, vel potius non displicendum. Sed qui sapit, posteritati etiam scribit. Nos in languore, plus solito, sumus: sed te, mi Vergeri, & acre tuum ingenium non languidè amamus: fac mihi idem, vel eo nomine merenti. Louanij, vii. Kal. Iul. ∞. IOCHII.

EPIST. XCIII. *Lutetiam.*ABRAHAMO BIBRANO *Equiti Silesio.*

**A**NTE paucas horas tuas accepi; vide quàm gratas: differre in diem responsum non potui, & animus adegit statim reponere & pariare. Pariare, inquam, ab affectu quidem: quem puto me nō tuo magis, quàm meritis & huic indoli debere; addam etiam industriæ, à quâ magna ego quidem spero. Delectat in animo, cùm video Germaniam sic excoli, & has velut faces accendi, quæ magis magisq. illustrabunt. Perge amice, & me vel opinione futuri oblecta: nam rem vt videam, vix in valetudine hac sperem, quæ præcipitat, non iam labitur aut labat. Non sunt verba: tristior vobis fama vereor vt dicat. Nimirum eundū est, & faciendum quod facere nati sumus. Benè, si non omnis mei sub terras memoria ibit. Viuat in vobis amicis aliqua; in te mi Bibrane, quem in hoc album nunc adscribo. Lapidem quē mittis, vidi cum admiratione aliquâ, & rarum, perrarum, exteris Regibus sic poni. Vix tamen est, vt supposuerit, nisi doctior aliqua manus: nec credo. Tamen ambiguum etiam reddunt, quæ in historiâ haud certa vndique notas: & examinanda sunt, neq; temerè & de plano sententiam feram. Illud de plano promitto, amicū te mihi nouum, sed carum esse: perseueremus quod cœpimus, constanter. Louanij, xvi. Kal. Sextil. ∞. IOCHII.

## EPIST. XCIV.

*Burdigalam.*

I. LIPSIVS PETRO BRACHIO S. D.

**O** GRATVM mihi de te, quid ab ipso te audire: quem ego quidem fuisse arbitrabar, & in beatis iam locis cum Amata tuâ perennare. Nam anni duodecim & vltra sunt, cum silentium à te fuit, nec nisi memoriâ Brachius apud me vixit. At epistola hæc tua amica, larga, elegans, te, amorem, ingenium, omnia viuere & vigere ostendit: atque vt diu sit, à propitio Numine veneror & precibus quæso. In me certè, idem amor tui: non vires aut ingenium, quæ fuerunt: & hac parte ruere me sentio, nec gradu sed cursu ad metam ire. Itaque & scripta hæc mea (non enim cessamus) senile illud & effæctum fortasse afferent: nec tu me cense flumen perenne (vt scribis) & inexhaustam fecunditatem esse. Do manus, & Valetudo vt corpus, sic animum libat: nō tamen Sapientiæ illa decreta, quæ firma in ipso herent. Dedi STOICA quædam nuper, & nunc SENECAM ipsum: haberes à me, nisi interualla hæc terrarum impedian, & beneficium meum ex impendio onus reddant. Tuos equidem versus libens viderim: & vis sincerè libentissimè Epistolas, quibus in tuâ linguâ vix est vt politius, & sine affectatione, maturâ quadam elegantia & alacritate suauius prodeat. Ita ceseo. & à me, scio, quos melior Deus tali animo donauit. Hæc nunc pauca, in occasione mittendi subitâ: at via facta est, sæpè comineemus. Me quidem & Iustitia adigit diligere sic diligentem. Vale V. C. Louanij, XVI. Kal. Sextil. M. DCIII.

## EPIST. XCV.

*Insulas.*

IOANNI SEVRIO S. D.

**F**RATREM tuum vidi, litteras tuas vidi: illum & istas per-gratas. Casu incidit, vt cursor adestet ab Aulâ, qui dimittendus cum litteris fuit, & fratri non potuerim dare tempus, quod largum esse affectus meus volebat. Neq; enim de eo ambige. sum constans in amore, cuius causa & solum, vt sic dicam, firmum est: superstruximus, & ædificium nimbus aut procella quælibet



quælibet non euerter. Silui, fateor, etiam tu, sed amor in animo est, & cogitationibus suscitatur & uiuit. Hoc mihi factum, certò scito: & de te idem spero, non cum ero solum, sed cum hîc non ero, id est verè ero. STOÏCA nostra uidisse re video: sed lege ut femina aliqua Bonæ Mentis, non ut totam messem colligas, & Æuum nosti. Nosti & valetudinem meam? languemus: Decreta bona sunt, & fortasse Iudicia: sed promere omnia, & decorè producere, illa (Valetudo, inquam) & alia quædam vetant. Vno verbo, volo quæ non possum. At tu fastidire mihi in munere tuo videris, quod alij multi ambiunt: quid causæ est? Si me audis, quietem specta, & illi aliquod fulcrum: cole deinde animum, & quæ amas ama. Homines sumus, multos imò omnes feruitus aliqua alligat, catenâ aureâ siue ferreâ, sed ligat. Nemo animum. ille emicat, & euolat, & orbis terrarum ei est angustus. Cogita, in libertate es: & pone teneriores illas cogitationes, quas Imbecillitas aut Ambitio dictant. Ad morem vulgi si respicis, nusquam in tranquillo eris: appetes, aut fastidies: ad Naturam, id est Rationem, si te vertis, ubiq; portus & quies ostenditur; intra & nauim siste. Hæc nunc breuiter. Seneca meus plura dicet, sed ipse. nam ego brevis fui, nec vllò in scripto minùs libuit diffundi aut euagari. Cùm illum examino, quid addi potest? à nobis nihil, nisi aliquid ad lucem: ab Epicteto multum, quem tu robur & fulcrum iunge. Vale mi Scuri. Louanij, ix. Kal. Sextil. ∞. IOCHIII.

EPIST. XCVI. *Neapolim.*D. IO. ANDREAE PROCHNICO Legato Ser<sup>mo</sup>*Regis Polonia.*

**B**ONA fide fatebor, litteris tuis sic candidè & calidè scriptis, motum aliquem animi me sensisse, & ipsum quoq; incensum esse ad redamandum, & affectum reponendum, quem lustiriæ quadam lege debebam. Quid enim æquius, verius, quàm amare qui amat, & quod sponte ac Naturæ quadam lege debemus (homo enim sociale animal) promptius fideliusque præstare, altero inuitante? Inuitas enim me, Ill<sup>me</sup> Domine, aut trahis potius, coipso quo te ostendis. id est, dona animi atque ingenij  
tui



tui exferis, quæ vbertim magnus ille Deus in te contulit atq; effudit. Non amem te appetentem? si nolis amem, modò vt norim:& vltro faciam, quod te video fecisse. Itaq; manus offero & iungo: parum est: offero animum & Vulcanio modo iungo, atque amicitiam inco, non nisi cùm soluar, soluendam. Veteres illi astrorum quedam defluvia conciliare nos volebant: ego ad morum consensionem ingeniorumq; verius referam, aut certè propius: & qui eadem atq; honesta volunt, necessum est vt inter se etiam velint atque ament. O quàm ego illum Honesti ardorem vestigijs litterarum tuarum colligo! beatus es, & in siste, coipso præmium habiturus, quo amas. Me autem etiam amas, quia in ijsdem sensibus tecum putas: nec vanè, si de conatu vides: quia tendo ad optima, etsi multa retrahūt, & valetudo in primis, quæ à viginti iam annis votiua non fuit. O quoties in viâ iam aut cursu retardauit, & ad optima pergentem, mihi alijsq; vtilia, desistere cœgit & reduxit! Nunc magis, quàm antea: cùm ætas ingrauascit, & illa incumbit; ego succumbo, etsi animo reductor, & illo solo sto etiam & sustento. At tu, quæ tua benignitas est, medicinam etiam promittis: quam auidè accipio, non equidem vitæ auidus, sed vt munera saltem mea fungi possim, dum viuo. Nam nunc profectò languco, & in illis etiam deficio. atq; vt artifex peritus, si citharam pulsat fidibus solutâ aut dissonam, artem quidem tenet, non exercet: sic mihi fit, qui scio quæ non exfero, & animum attollentem se corpus deserit, aut humo affligit. Ignosce tu, & alij: in primis autem, si sponte amasti me, nunc respondenti hoc perseuera & præsta: & me inter eos numera, quos ex asse (Deum testem aduoco) tuos dicas. Amicitia hæc, vt mundus, initium habuerit, non etiam finem. Vale Ill<sup>me</sup> & Reu<sup>me</sup> Domine. Louanij, vi. Kal. Sextil. ∞. 1661111.

## EPIST. XC VII.

EVSTATHIO WOLOVICZIO V. R. & N. *Lithuano.*

**N**VMQVAM mihi grata eueniant, nisi grata epistola tua obuenit. Quid ita? quia sic amanter scripta, quia ab homine è longinquis illis oris missa, ad quas vel LIPSII nomen peruenisse multum sit, quid affectum dicam? Nam de æstimatione & laudi-

laudibus, tibi remitto: etsi nec eę ingrata, fateor. quia nec irride-  
re, nec palpari te scio: ergo amare. Nam iste, iste affectus, est pa-  
ter earum laudum. Velsero etiam nostro, inter multa, hoc de-  
beo: qui pararium se & conciliatorem interposuit honesti nostri  
amoris. Cuius viri vsum-fructum pænè equidem tibi inuideo:  
in quo thesaurum earum rerum habes, quæ homini ingenuo  
appetendæ sint, vel amandæ.

— *illo se pectore multa vetustas*

*Condidit, & maior collectis viribus exit:*

vetustas, inquam, vel artium vel morum: & utroque titulo in  
Europâ nostrâ claret. Sed de me, venio in amorem tui candidè,  
firmiter: & vis sponsonem? Demetrium Solikouium (ô virum  
magnum!) in ijs locis amisi: veni in locum, amabo ut amavi.  
Ultrâ non possum: si placet, responde. Munera, quæ ad me mit-  
tere scribis, nondû vidi: & via longiuscula est: ego ad te DIVAM  
meam HALLENSEM, amicitiaę tesseram: & sic admitte. Vale &  
me ama, cùm ero: memento, cùm non ero. Louanij, III. Kal.  
Sextil. ∞. IDCIIII.

Litteras adiunxi à populari tuo, qui hîc nunc agit, sic rogante.

## EPIST. XCVIII.

*Augustam.*

## MARCO VELERO.

**I**N laudes meas nuper ibas, & STOÏCA nostra, faciebas ADMIR-  
RANDA: nondum in accepi Codicem retuli; expungere li-  
cet, si pœnites: & vereor, cùm legeris, iam fecisse. Primus aspe-  
ctus, ut in multis, solet imponere: illa æuum ferunt, quæ ad ma-  
num relata possunt placere. Sed utcumque est, animus meus  
vobis, & mihi materies illa placuit: hoc etiam, quod absolui, &  
labore, suprà quàm credat vulgus, sum defunctus. E latebris il-  
la mihi educenda, & morosè disponenda fuerunt, ut corpus  
doctrinæ facerem: & sic tamen (hanc legem mihi dixeram) ut  
nihil nisi ad Senecæ lucem præcipuè esset. Sed edidi: abeant, &  
famam, quam Deus & Genius dabunt, habeant. securus scri-  
ptorum sum, ut anxius scribendorum. En hîc ad Wolouiczium,  
operâ tuâ nostrum: tu autem merito tuo semper. Louanij, III.  
Kal. Sextil. ∞. IDCIIII.

L

EPIST.

## EPIST. XCIX.

*Mechliniam.*

NICOLAO OVDARTO

**S**ILENTII mei causa, quòd DIVAM nostam expectabam, vna mittendam: sed operæ morantur, & tuum desiderium non fert moram, & scire vis de valetudine nostrâ. Capenon le-  
ta, mi Oudarte: & ea quoque silentij causa. Tres menses iam, & ex quo ultimùm te vidi, sum in assiduo languore: nec releuor, etsi omnia conatus. Vires abeunt animi & corporis: & ad mar-  
corem, hydropem, an utrûque imus? Vt Deo visum erit: nam de viâ parum est, modò ad optatam metam, id est ad ipsum. Cor-  
pusculum hoc est, vt putre & caducum ædificium: sæpè fulsi & sustinui, vndique nunc labat: & cogitandû est, non quî seruem, sed quî exeam. Dolet de *Senecâ*, quòd ultimam manum non li-  
cet imponere: atq; illa est quæ decorem dat, & consummat. Hęc ita scribo, non quia desperem me posse resurgere, sed quia expedi-  
dit sic opinari, & præsumere quidquid hominem manet. Nau-  
ta in tempestate, & cùm mors ante oculos, omnia tamen facit, & fracto etiam velo aut malo nauigat: idem ego, facio faciamque  
omnia, & Deo euentum & me permittam. Is te mi optime & a-  
micissime Oudarte post me seruet, quod mihi solatium & alte-  
ra pænè vita erit. Louanij, XIII. Nonas Sextil. ∞. MDCLIII.

## EPIST. C.

*Antuerpiam.*

I. LIPSIUS IOANNI WOVERIO suo S. D.

**S**ILVI ad tuas nuper: neque rei multum erat, de quâ rescribe-  
rem, & ego languidus, vel cum illâ iustè sileam. Vt tibi di-  
cam, non me reficio, nec in veterem statum gradumq; repono:  
neque valdè nitor aut cupio, vt id quoque liberè promam. Quid  
opus est? si annos computo, satis diu vixi; si famam, satis; si vo-  
luptatem aut molestias, illam gustavi & his satur sum:

*Cur non, vt vitæ plenus conuiuia, recedam?*

Si etiam ea, quæ vitæ meæ genus & professionem spectant, in-  
tueor; piget videre quæ video, & tempus, antequam alia video,  
abire. Litteræ vanitas fiunt; malignitas, acerbitas, pugnae fiunt:  
vides

vides cottidiana, & à magnis, exempla. Remedium quî demus? ne consiliûm quidem, aut monitum: partes & religio intercedunt. Tu Modestia, tu Sapientia, quid nisi nomen estis? Atqui & ego prouocor in hunc campum, & publici iam libelli volant. quid censes? spectaculum me fore? Ingenuus sum, & nullum auctoramentum ducet ad hos ludos. Neronis potius mihi votum illud sit, *Nescire litteras*. Reum me facere aliquis potest, nemo nocentem: & ad loquendum cum iniuria prouocet, arcet & cohibet non ratio solum, sed natura. Ego ita sum, facilius culpâ quàm proteruiam admifero, & damnari, quàm malo more vindicari. Scilicet ego rescripto meo alogias aliis excutiam, scilicet me maiorem aut meliorem, quàm sim, faciam, & posteritati iudiciorum legem aut modum donem. Nugæ. & si à magnitudine animi aliquid sumendum sit, iactare me malo, quàm defendere. Ego inter mei sæculi ingenia gloriam, si non palmam, fero: & hoc amicis meis volentibus dicam, confitentibus etiam qui non amici. Et ab aliquot libellis, siue etiam epistolis, æstimemur: sanæ doctrinæ, & fortasse eloquentiæ sumus, nec à melioris æui laude nimium segregandi. Quorsum ista? familiariter, & apud amicum: denique *gloriosa est virtus*, ait quispiam, *nec ostendit se solum, sed ingerit*. Ad rem redeo: neque viuere nunc valdè appeto, & pugnare etiam fugio, in quemcumque, à quacumque causâ. Cum volumus, initia à nostrâ manu sunt; cum cœpimus, non est finis, & extra lineas res abit. Quisquis aliter, ipse viderit. æui prioris euentus adhuc me docuit, neque scripta ista perennare, neque scriptores in gloriâ esse: & malo apud posteros modesti, quàm acris ingenij, cenferi. At tu amicû me, vt semper, cense mi Woueri. Louanij, vi. Idus Maijas. ∞. 1606.

## A P P R O B A T I O.

Hic liber Epistolarum Clarissimi quondam IUSTI LIPSI diligenter examinatus, nihil repertus est habere contra fidem Catholicam, aut bonos mores. poterit ergo ad multorum vtilitatem imprimi. Quod testor  
20. Decemb. 1606.

Egbertus Spitholdius S. T. L. Canonicus  
& Plebanus Antuerpiensis.



# PRIVILEGIUM CÆSAREVM.

**R**VDOLPHVS SECVNDVS diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatiaë, Sclauoniæ Rex, Archidux Austriæ, Dux Burgundiæ, Stiriaë, Carinthiæ, Carniolæ & VVirtembergæ, &c. Comes Tirolis, &c. Nostro & Sacri Imperij fidei dilecto IUSTO LIPSTIO gratiam nostram Cæsaream. Postquam inter alia, quæ DEVS immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, vt tanquam Dij quidam splendescere in terris videantur: rem sanè præclaram seque dignam illi præstant, qui diligentem iis ipsis in litteris ac disciplinis operam ponunt; præclarissimam verò & Reipub. vltissimam, qui eas ita excolunt, vt aliorum menti docendo scribendo lumina præferant, eosque ex ignorantia tenebris quasi manu educant. Quos excitare, quos amare atque animare, ad dignitatis nostræ munus, ad quod Diuino vocati beneficio concessusque sumus, inprimis pertinere existimamus. Cum itaque ab iis, quorum nobis spectata fides, quique iudicare de Litteris possint, acceperimus, insignes te animi ingeniique tui dotes tibi à natura insitas à primis temporibus ætatis tuæ ita litterarum ac disciplinarum studiis excoluisse atque exornasse, vt olim iuuenilibus adhuc annis præclara florecentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituisi, dum vetusta Latinæ antiquitatis rudera in nouam subinde structuram singulari artificio eleganter conuertisti: ad exquisitam adèò & raram doctrinam, quæ magnam de te apud doctos quosque viros opinionem excitari, peruenisse, eamque variis abs te libris acri & graui cum iudicio scriptis atque in lucem editis ostendisse, vt in eo quod tam feliciter tractes scriptionis genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue verseris, flores colligere, concinnare, quibus Lectores mirifice recrees, & eorum pectus ad prudentiam, probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patrociniòque nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro priuilegioque te & Typographum tuum aduersus quorumcumque fraudem, qui lucri causa, quod fieri solet, eadem excudere aut typis imitari fortè velint, munitos cupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum aut

aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq; ac Dominiorum nostrorum hereditariorum fines, triginta annis proximis à primo editionis die computandis, absque tuo tuorumve heredum consensu audeat: Hac autem lege addita, ut tria ut minimùm cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, cum non solum eiusmodi libris, tibi, heredibusve tuis, auxilio Magistratus, vbicunq. reperti fuerint, vendicandis, priuari, sed triginta etiam Marcharum auri puri multa, cuius semissis quidem Fisci nostri Procuratori, fraudis vindici; alter verò semissis, tibi heredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscumque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiãve exercent, ne quemquam hoc Priuilegium nostrum impunè violare, spernere aut negligere patiantur: Sed, si quos contumaces, compererint, constituta à nobis multa, eos puniri & quibuscumque modis coerceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti, Anno Domini Millesimo, Quingentesimo, Nonagesimo secundo: Regnorum nostrorum Romani decimo septimo, Hungarici vigesimo, & Bohemici itidem decimo septimo.

*Subsign.*

RVDOLPHVS.

Iacobus Curtius à Senfftenaw.

*Ad mandatum sacra Cæsarea Majestatis proprium.*

Io. Baruitius.

*Additum sigillum Cæs. Majestatis in cera rubra.*

SVMMA PRIVILEGII REGIS CATHOLICI.

**P**HILIPPVS Dei gratia Hispaniarum, &c. Rex Catholicus, diplomate suo sanxit, nequis IUSTI LIPSI Historiarum in alma Vniuersitate Louaniensi Professoris, & item Historiographi sui libros quoscumque, à Censoribus legitimis approbatos, præter ipsius, hereditumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has Inferioris Germaniæ ditiones importet, venalesve habeat. Qui secus faxit, præter librorum confiscationem, triginta marcharum auri puri illatione mulctabitur. Vti latius patet in litteris, datis Bruxella, XIV. Febr. M. D. XCVII.

*Signat.*

Verreycken.

SVMMA PRIVILEGII REGIS CHRISTIANISSIMI.

**H**ENRICVS Dei gratia Galliarum & Nauarra Rex Christianissimus, singulari privilegio sanxit, nequis per Vniuersos Regnorum suorum fines, IUSTI LIPSI, quos vel hætenus edidit, vel in posterum editurus est libros, excudere intra decennium præter voluntatem ipsius possit. Qui secus faxit, præter librorum confiscationem, ter mille florenorum illatione mulctabitur; vti latius patet in litteris, datis Parisiis, XIII. Iulij, M. DC. V.

*Signat.*

Perrochel.

**T**ibi IOANNES MORETE, pro amicitia quæ mihi cum Plantino (heu, quondam meo) & Plantinianis est ac fuit, tibi, inquam, permitto, vti EPISTOLARVM mearum CENTVRIA S typis tuis excudas ac diuulges. Ne quis alibi alius præter te, cupio siue iubeo, ex lege quam magnus Cæsar & Reges dixerunt.

*Iustus Lipsius.*

SVMMA PRIVILEGII PRINCIPVM BELGARVM.

**A**LBERTVS & ISABELLA CLARA EVGENIA Archiduces Austriæ, Duces Burgundiæ, Brabantiae, &c. Serenissimi Belgarum Principes, diplomate suo sanxerunt; nequis IVSTI LIPSI Historiarum in alinâ vniuersitate Louaniensi olim Professoris, itemq; Historiographi & Consiliarij sui libros quoscumque, præter Martinæ Plantinæ viduæ & Balthasaris & Ioannis filiorum Ioannis Moreti p. m. voluntatem, vlllo modo imprimat, aut alibi terrarum impressos, in has Inferioris Germaniæ ditiones importet, venalésve habeat. Qui secùs faxit, confiscatione librorum & aliâ graui poenâ mulctabitur, vti latiùs patet in litteris, datis Bruxellæ, xvii. Ianuarij, M. DC. xi.

Signat.

*S. de Grimaldi.*

Et in Concilio Brabantiae,

*I. de Buschere.*





IVSTI LIPSI  
EPISTOLARVM  
SELECTARVM  
CENTVRIA QVINTA  
MISCELLANEA  
POSTVMA.



ANTVERPIÆ,  
EX OFFICINA PLANTINIANA,  
Apud Viduam & Filios Ioannis Moreti.

CIO. IO C. XI.

*Cum Privilegijs Casareo & duorum Regum,  
& Principum Belgarum.*

THE JOURNAL OF THE

ROYAL ANTHROPOLOGICAL INSTITUTE

OF GREAT BRITAIN AND IRELAND

VOLUME XXII. PART I.

1892.

LONDON: PUBLISHED BY THE INSTITUTE.

1892.

PRINTED BY THE INSTITUTE.

1892.

1892.

1892.

1892.

1892.

1892.

1892.

1892.

1892.

1892.

ILLVSTR<sup>MAE</sup> STIRPIS,

EXCELLENT<sup>MAE</sup> INDOLIS

THOMÆ SAMOSCIO

MAGNI IOH. F.

VETERIS AC NOVI SAMOSCI DOMINO,

PRINCIPI IVVENTVTIS.



OSTVMÆ huius, & vltimæ LIPSIANARVM Epistolarum Centuriæ, ILL<sup>M</sup> nominis tui gloriã prætexere, THOMAS PRINCEPS, non

tam nostri instituti, quàm defuncti Auctoris quasi est mandati. Si enim non tantum quæ istis in paginis plurimis locis de Heroicæ virtutis PATRE tuo scripsit, legimus; sed magis quæ sæpè, imò semper



de illo dixit, recolimus : tunc subit, non  
modò omnibus præsentis æui summatis  
bus æquiparasse, sed planè cum olim in-  
comparabilis famæ hominibus compo-  
suisse. Nam vt illius temporis vel pau-  
ca strictim nomina reuocemus ; quid in  
Catone, Tullio, ipsóque etiam Iulio, sic  
gloriosa suorum æstimatrix vetustas ex-  
tulit, quod non meritò in IOANNE SA-  
MOSCIO MAGNO POLONIAE CAN-  
CELLARIO ET EXERCITVVM PRÆ-  
FECTO, ventura posteritas agnoscat &  
veneretur? Adde, quòd illi adiuti tem-  
poribus lætissimis, Italiâ Româque cul-  
tissimis : quibus debere mores illos, tam  
felicitatis fuit ; atque iisdem nostrâ æta-  
te & remotissimis SARMATIAE in lo-  
cis excelluisse optimæ maximæque est  
laudis. Catonem sanctitas, & infra-  
ctum pectoris robur probauit. Cice-  
roni,

roni, Eloquentiæ decus , & seruatae Patriæ gloria, parem gratiam reddidit. Denique Iulium , non tam à Dis origo, quàm per omnia diuinæ potentiae æmulus animus , sideribus assignauit . Citra assentationem , MAGNANIMI Patris FELIX Fili , loquor: ànne in illo tuo pariter & Patriæ Parente , rectitudinem Resp. aut constantiam etiam in aduersis vmquam desiderauit ? Eloquij sanè disertissimi & salutaris opis bona sic semper subministrauit ; vt , ne secum desinerent , etiam prospexerit . Postquam enim , optimarum artium cultus quid regnorum præsidibus prodesset , suo satis exemplo confirmasset ; Musarum celeberrimum Athenæum, HIPPEI SAMOSCIANI cum titulo , publicis & perennibus POLONIAE vsibus consecrauit.ô laudem,& famæ,quia non inter-

ituri fructus, æternitatem ! Superest Cæ-  
fareæ imaginis typus, quem militiæ ar-  
tibus, patientiâ, successibus nostro sæ-  
culo sic reddidit, vt post veterem illam  
memoriam, vno tātum dissimilitudinis  
genere, ab illâ Veneris ( sed quam Mars  
armatus amauerat, stirpe discesserit. Qui-  
bus enim ille armis patriam oppressit, hic  
seruauit. Quibus Gallias ille toto decen-  
nio, sed sibi, subiugauit; hic à SARMATIAE limite, bono publico, Dacum,  
Parthos, ingentibus submouit stragibus;  
Moschum Lithuaniam expulit, Sueciæ  
Tyrannum non semel fregit. Denique  
XXIII. annis inter militares florentissimi  
regni viros sic belli præfecturam susti-  
nuit, vt gloriâ plenus, offensæ nescius,  
ab armis non antea quàm è vitâ discesse-  
rit. Talem LIPSIVS HEROÏA, quoad  
vixit, suspexit; idque, si fata tulissent,  
pluri-

pluribus sempiterni ingenij monumen-  
tis testari constituerat . Verùm ah ! non  
toto vertentis anni spatio illum suum  
P O L O N I A extulit, huic Europa etiam  
cum lacrymis parentauit . Ita nihil sum-  
mum diu consistit ; & qui humanum  
fastigium excessere animi, vti cælo pro-  
ximi, ita citò ad illam beatitudinis ædem  
& lubenter transeunt. Nec aliter tamen  
(habet hoc omnis inclyta virtus sui præ-  
mium ) à nobis & terrestribus hisce re-  
cessisse vterque videri potest, quàm à lu-  
minis sui auspice , & roseâ vt sic dicam  
matre, antelucanus Sol solet . Iste enim  
apud originem ortúmque totus aspicitur,  
quia adhuc terris adhæret : sed mox vbi  
cæli conuexa scandere cœpit, omnes bo-  
nis illius fruimur , nemo intentè aspicere  
conatur . Tale meritò fulgidissimis hisce  
eueniet, in cælestem claritudinem , à vi-



talís huius lucis tenuitate sublimatis, quid-  
quid enim à vicinitate mortalitatis, quasi  
nubium nebularúmque adhærescere vi-  
detur, dies demet; supràque ætatis suæ  
conspectum prouecti, sempiternâ sæcu-  
lorum veneratione vigeant. Verùm  
huiusmodi, & recurrentis doloris singul-  
tibus æquales, dum cogitationes conte-  
ximus, ecce alterum mœstitiæ huius  
membrum illis superest, qui desertam  
tuam pueritiam, annósque infra primam  
adolescenciam positos, cum miseratione  
æstimant. Hos licet indoles tua securos  
facere possit; tamen Illustrissimi dignita-  
tibus, coniunctissimi sanguine & amicitia  
SAMOSCIANA quatuorviri, ætatis  
& familiæ tuæ curatores, pro te spõdent:  
GEORGIUS SAMOYSKI EPISCO-  
PVS CHELMENSIS, NICOLAUS  
ZEBRZYDOWSKI PALATINVS ET  
GENE-

GENERALIS CRACOVIENSIS,  
MARCUS SOBIESKI PALATINUS  
LUBLINENSIS, STANISLAVS ZOL-  
KIEWSKI CASTELLANUS LEO-  
POLIENSIS ET EXERCITVVM  
PRAEFECTVS CAMPESTRIS. Hem,  
quanti, qualésque viri te manibus suis  
gerunt, oculis obseruant, cordibus cu-  
rant! Imò totum simul SARMATIAE  
Regnum, quos à PATRIS tui morte  
oculos turbauit, in te reficit: te MA-  
TRIS tuæ aureum partum, Patrij non  
magis sanguinis sobolem, quàm virtu-  
tis heredem, cum solatio aspicit & amat.  
Erigere

*O decus eximium, & magnis virtutibus auge*  
tuorum de te conceptam spem, exspe-  
ctationem omnium. Nos quoque pro-  
cul positos de te cura exercet; dum quis  
vultus, ætas, profectus tuus sit, studiosè  
inqui-

inquirimus. Cresce & adolesce, G L O -  
R I O S I S S I M E P R I N C E P S, vel in reli-  
quæ Europæ inuidiam; & non summo  
adhuc studio, languidas tuæ fortunæ pas-  
sim adolescentium institutiones, te supe-  
rasse audacter cense. Tamenim spernitur  
hoc futuræ vitæ summum bonum, vt  
vbique pænè gentium ignoretur. Omnis  
tamē ætas docuit, humanitatis artibus, &  
florientibus ingeniorum virtutibus, im-  
peria crescere & florescere. Maacte tu sal-  
tem. nam paterna per vestigia euntē par  
pro paribus virtutibus æternitas manet.

Vouemus & F E L I C I T E R acclama-  
mus,

L I P S I A N I T E S T A M E N T I *Curatores;*

N I C O L A V S O V D A R T V S, *Canonicus & Officialis Mechl.*

G V I L I E L M V S W A R G N I R I V S, *Canonicus D. PETRI Louan.*

I O A N N E S W O V E R I V S *Antuerpiensis.*

I N D E X

# I N D E X

## E P I S T O L A R V M

### CENTVRIÆ V. MISCELLANÆ.

**Æ** GIDIO Schondoncho V. R.  
xvj.

Andrea Chiocco V. C. xxxvj. xlvij.

Andrea Schotto V. R. xcvi.

Antonio Persio xxxvj.

Ascanio Columna S. R. E. Cardinali lxiiij.

Auberto Miræ Canonico x, lxxix.

Augustino Valerio S. R. E. Cardinali xlviij.

#### B.

Balthasari Moreto suo lx, lxxxj, xcij.

Balthasari Robiano, Consuli iij.

Bartholomæo Petro Lintrensi, Doctori Theologo xxvj, lx.

Bernardo Macieiovvskio, Episcopo Cracouiensi xxij.

Bonifacio Benilaque S. R. E. Cardinali lxxiiij.

#### C.

Carolo Archiduci Austriæ, Imp. nepoti & pronepoti xcj.

Carolo Duci Croyo & Archibotano xxvj.

Carolo Philippo Rodano, Episcopo Brugenfi lxix.

Claudio d' Ausquio, è Soc. Jesu iij.

Curtio Pichene xxxiiij.

#### D.

Davidi Hilchenio, Regi Poloniæ à Secretis lviij.

Demetrio Soliconio, Archiepiscopo Leopolitano xxij.

Dionysio Villerio V. R. xvij, xxvj, lxxvj.

Dominico Auengochéa I<sup>do</sup> Senatori Regio xix.

#### E.

Emanueli Pio S. R. E. Cardin. liij.

Erycio Puteano suo v, xij, lxxvj.

#### F.

Florentio Vander-Hario Canonico lxviij.

Francisco Harleo Abbati S. Victoris l.

Francisco Marie Sagri Illyrio xxxij.

Francisco Quenedo Viro Perillustri lv.

Frederico Borromæo S. R. E. Cardinali lxxxviij.

Frederico Morello vij.

Frid. Taubmano lxxxviij.

#### G.

Gaspari Diemeno lxxviij.

Gaugerico Riuio I<sup>do</sup> suo lxij.

Georgio de Magna Concice Minchez xxiv.

Gerardo



Gerardo Buyter vvechio suo xlvi.  
Guilielmo Richardoto suo ix,  
xxxviij.

H.

Hadriano Flerontino I<sup>ro</sup> xcix.  
Henrico Halmalio V. N. xciiij.  
Henrico Vanden Eede, cognato suo  
lxxij.  
Henrico Vvveno I<sup>ro</sup> vi, lxxvi.

I.

Jano Grutero xlv.  
Joanni Aquilario Aluarado xliij.  
Joanni Andreae Prochnicio Lega-  
to Ser<sup>mi</sup> Regis Poloniae lxiij,  
lxxxiv.

Ioanni Baptista Baronio suo xviiij.  
Ioanni Bapt. Sacco xiiij.  
Ioanni Bapt. Salazario lvj.  
Ioanni Bapt. Siluatico lxxx.  
Ioanni Buiffonio Consiliario  
xxxviij.

Ioanni Chokiero I<sup>ro</sup> xxviij.  
Ioanni Gauerellho I<sup>ro</sup> lxxv.  
Joanni Mirao Episcopo Antuer-  
piensi xc, xcvi.

Joanni Richardoto, Praefidi  
lxviij, xcviij.

Joanni Samoscio, Regni Poloniae  
Cancellario j.

Ioanni Vergerio Aurano suo xliij.  
Ioanni Wouerio suo lxxxiiij,  
lxxxvi.

L.

Leonardo Lesio, Theologo Soc. Je-  
su xxj.

Ludonico Beccatello lxx.  
Ludonico Nonio Doctori Medico  
liij.

Lupercio Leon ardo Argensola xx.

M.

Marco Antonio Bonciario xlix,  
lxxj.

Marco Velfero V. I. xj, xl, xliij,  
li, lxxxix.

Matthiae Houio, Archiepiscopo  
Mechliniensi xv.

N.

Nicolao Hacquenillio xij.

Nicolao Oudarto suo xxxj, lxxxij.

P.

Paullo V. Pontifici Opt. Max.  
xcviij.

Petro Colins xxxix.

Petro Orano I<sup>ro</sup> xxix.

Petro Pantino V. R. lxj, lxxiiij.

Petro Peckio Consiliario xciiij.

Philippo Rubenio suo viij, xxx,  
xliij.

R.

Remaclo Roberti ij.

S.

Sebastiano Maccio Durantino Vi-  
ro Perillustri liij.

Seraphino Oliuario Sacri Palatii  
Auditori xxxiiij.

S. R. E. Cardinali lxxv.

Simoni Simonide lvij.

Stanislao Krzistanouuicio lxxxv.

Oratio de Calumniâ, loco cen-  
tesima Epistola.

IUSTI LIPSI  
EPISTOLARVM  
SELECTARVM  
CENTVRIA V. MISCELLANEA,  
POSTVM A.

EPISTOLA I.

I. LIPSIVS IOANNI SAMOSCIO, *magno Regni  
Poloniae Cancellario, & Exercituum Praefecto.*



LL<sup>ME</sup> DOMINE, Deum ego te-  
stem capio interioris meae volunta-  
tis, quam saepe adspirauerim ad te  
scribere, & cultum promere quem  
virtutibus tuis debitum, in isto  
velut Vestali secreto clausum ser-  
uabam. Adspirabam; sed occasio  
numquam fuit, aut rima aperta  
per quam erumperet: nunc vide-  
tur factum, & Simonides atque  
Hilchenius tui, manum praebent, & praecunt ut veniam &  
me sistam. Ego facio: scis quomodo Vir maxime? ut si vel ad  
Regem aliquem magnum venirem, tui verens reuerensque,  
& mixto affectu amans. Profecto in omni genere virtutis tuae,  
in bello, in pace, parem hoc saeculo, imo & superiore: parem?  
yix similem habuerunt, & libero ore ac puro iudicio profite-  
mur. O Stephanum regem magnum! sed & magno te adiu-  
tore & administro: qui alter heros, bene coniunctus cum  
heroe illo eras. Fructus Europa vidit, audiuit, & tui etiam nunc  
sentiant: & tu gloriam peperisti, quam edax illud tempus non  
absumer. Quam gloriam, mihi crede, illustrat & auget varia &

remotior doctrina, quâ ipse es imbutus: & quam in oris illis tuis suscitatus & propagatus. O nate in exemplum virorum Principum, atque utinam sint qui imitentur! Non me fugit, quam humanitatem, aut potius benignitatem, iterumque potius beneficentiam, nostratium quibusdam etiam exhibueris, qui peregrinati illi sunt; & inter eos Douſæ filius: qui Douſa (dolenter scribo) ante dies circiter quindecim fatalem suam metam adiit. Cui me etiam sæpè valetudo tenuior, & omni motu afflictior, admouet: viuo tamen hætenus, & tuus viuam cultor, mirator, cliens. Ill<sup>me</sup> Domine, non epistolam hanc cense, sed animi interioris sensum: iterumque testem illum, quem nemo fallit, inuoco: & tutorem eum tui aduoco, venerorque. Louanij, VI. Idus Nouembr. ∞. IDC. IIII.

## EPIST. II.

Bruxellas.

REMACLO ROBERTI S. D.

**R**EMITTO Soranzam tuam, de quo equidem benignius iudico, quàm de illo Peregrino, ut se appellat. cuius causa ab initio ut bona fuerit, corripit eam malè & asperè agendo. Et in reges cui hæc libertas aut ius datum? Sed omit-  
tamus. scio alia aliis iudicia: ego autem Horatianum illud sub-  
murmuro,

*Non ut porticibus, sic iudiciis fruar iisdem:*

cum vulgo, dico. Ad Legatum librum mitto, & cum salutis & obsequij mei delatione trades. Statui omnino, quod scribis, aliquid ad eum pangere: sed opportunitas expectanda est. Ex animo apud te depono, digniorem hoc & alio honore ego, è nobilitate, in Belgicâ nondum vidi. Sed patriæ nostræ quid fiet? Hostis vigilat, apparat, inuadet: nos sedemus, frigemus, & votis auxilia optamus. Ventura, an iam venerunt? nam herè aures meas fama tetigit, triremes cum milite in Morinos appulisse. Ego autem non tam de milite, quàm de consiliis laboro: & Mineruam iungi equidem velim cum nostro Marte. Qui Mars nec Pannoniis secundum se præbet, si vera quæ hîc sparguntur de nouâ illi clade, an prodicione. neque enim di-  
stinctè

stinctè & liquidò etiam scio : si per te, gratum erit. Vale vir amice. Louanij, postrid. Kal. Mart. ∞. I D C I.

EPIST. III. *Antuerpiam.*BALTHASARI ROBIANO, *Consuli.*

**A**NTVERPIAE vestræ hoc, an Deo & Fato adscribam? sed vtri, ego melior valentiorque paullò sum, post libatum aërem vestrum, perambulata[m] urbem, flumen nauigatum, denique post sermones suauissimos vestros & conuictum. Non sum quidem (ne fallam) in veteri illo virium vigore : sed spero paullatim tangere, si Deus manum non subducit. Spero, non confido. quid enim certi hîc est? & quid hanc vitam, nisi vt mare, dixerim esse? Semper in eo fluctus aliqui, sæpè tempestates, iterumque malacia & risus. Tale in vitâ : iactamur, concutimur, curis, aut morbis : denique iterùm hæc meliore & mitiori sorte, aut valetudine, mutantur. Optem in republicâ nostrâ sic esse! alternum, inquam, aliquid interuenire. Sed quid nisi adfiduæ procellæ sunt? & iam ab annis plus triginta oculis non vsurpauimus amœniorem aliquam lucem. O Deus, itâne semper iudex & vindex nobis es? numquam geres & efferes etiam patrem? Spero equidem, & vel vicinorum exemplo confirmor. qui cùm aut in bellis palàm, aut eorum metu essent, præter opinionem pace fruuntur : & bonis nobis apertum semper stabit templum hoc Iani? non stabit : inducias, si non pacem dabit, & respirare paullùm, si non reualescere, patietur. Corde eum rogo, & te V. Cl<sup>mc</sup> Reip. tuæ, quæ te & quam tu amas, diu saluum esse. Ecce autem & Carmen subito scripsi, argumento quod initio dixi: habe & lege, si est tanti. Louanij prid. Kal. Iunias, ∞. I D C I I.

Duos illos nostros saluere cupio, Schottium & Vvenum.



# AD ANTVERPIAM, & inibi AMICOS.

**A**Ntuerpia, vrbium ocule, amata Lipsio,  
 Et aestimata vrbes supra omnes Lipsio,  
 Quàm volupe mi te luminibus istis fuit  
 Vidisse nuper, atque amœna mania  
 Lento perambulasse identidem pede?  
 Quàm volupe pariter, illum amicorum gregem  
 (Ita dico: plures namque sunt) illum gregem  
 Sermonibus fruitum esse, vel conuiujs!  
 O neëtar, ô ambrosia, & ô meis malis  
 Leuamen vnum! tibi, quod animam ducimus,  
 Adscribo: tibi, quod tangimus chartam & stilum.  
 Tu sola morbi Phœbus audies mei,  
 Tu sola sospitator Æsculapius.  
 Quid me futurum porrò, nouit hoc Deus,  
 Vitæ arbiter necisquæ: sed ero, non ero,  
 Tuus ego viuus, mortuusquæ. quod hac manu,  
 Hac mente testor: MAGNVS AUDIAT DEVS.

## EPIST. II II.

*Insulas.*

CLAUDIO D'AVSQUIO, è Soc. Jesu S. D.

**M**ANVM tuam agnoui, & libens vidi: quod si non illam,  
 stilus tamen prodebat. Quàm pauci enim sic scribant  
 (neminem dicere religio sit) inter meos Belgas? Sed domum te  
 redisse, & placere eam, hoc placet: quod idem mihi. Ego cursu  
 vorforiam cepi, nec vela aut remi faciebant satis: adeò fugiebam  
 istos amicos quidem, sed qui

\* Conuiuia-  
 tur, & in-  
 terponunt  
 pocula  
 Bacchi.

\* Εἰλαπνύζεις, ἀνέσις τε αἰδοπα οἶνον.

Corpusculum meum & viriculæ, vt sic loquar, non subsistunt  
 nunc istis. Sermones alioqui capiunt, & illa comitas Antuer-  
 pienfium propria: sed huic quoque melli fel suum, & natali for-  
 te nostrâ

<sup>a</sup> — ἔποτε φύλα διηπαθείων ἀνθρώπων

Τερπωλῆς ἐπ' ἐν ἡμέρῳ ὅλῳ ποδῶ.

Ergo pedem struxi, & redij. Apud me nunc sum, sed nondum ille, qui Italo respondi. Tunc <sup>b</sup> θυμὸς καὶ αἷμα, vt ais: nunc intantum nihil aut feruens, sed <sup>c</sup> πάρεσις καὶ χάλασμα καὶ ψυχρότης. Agnosco imbecillum illud <sup>d</sup> καὶ ἀπετάστατον hominis, & vitam hanc fluxum & refluxum vel Euripi illius esse. De Basilio tuo, putem ex illo promisso publico te posse in vtramque aurem. Nam de nomine tuo omittendo, & tam insigni plagio, quā possit: Æuum ad omnia praua, fateor: sed nondum, opinor, <sup>e</sup> ἀναιδέϊν ἔτιως ἀχάλινος. Si erit, nos in gyrum reducemus vel publico scripto. nam mihi hæc pernōta. Ad Silium quod attinet, nihil te moretur, si decreuisti. Amicus ille ab Antuerpiā, <sup>f</sup> μεγαλοπράγμων magis, quā <sup>g</sup> ἀράκης, nec vltra verba aut promissa res ibit. Imparem etiam puto, vt rem dicam. <sup>h</sup> οὐδὲ τὸ Δευκᾶ, puta ab Alexandro mihi impressam <sup>i</sup> σφρηγίδα σιωπῆς. Sed neque suadeam <sup>j</sup> ad illum, ob causas quas coram mallem. Vale V. R. & animo huic care. Louanij, v. Idus Iunias, ∞. 16011.

<sup>a</sup> — namquam hominum infelicia scilicet Gaudia libamus plena & solida. <sup>b</sup> spiritus & sanguis, <sup>c</sup> remissio, & languor, <sup>d</sup> & frigus, <sup>e</sup> & imitabile <sup>f</sup> Impudentia sic effraus. <sup>g</sup> magna actiuans <sup>h</sup> De Duce, <sup>i</sup> sigillum <sup>j</sup> silentij.

## EPIST. V.

Mediolanum.

ERYCIO PVTEANO suo S. D.

**V** IDEO te meas non accipere, atque ita frustra pænè sumere operam scribendi. Cuius culpa est? non mea hercules, qui tritā & vt putamus tutā viā mitto. Fraudes vbique, vnum remedium ferre. Sed hoc mirum, nec Epistolas meas vos vidisse? Quinque earum Centurias edidi, & Septalius actu in numerum venitis. Amplius, Italo vestro respondi, quisquis hominum sit; sed respondi. Non merebatur. hoc cordati iamantē, & post responsum meum quiuis dicet: sed exempli interest retundi sic proteruos & fatuos, nec eos solū, sed (ex prisca formulâ) QVORVM OPE CONSILIOVE hæc scripta. Audio & alios ibi esse qui hunc Pelian velint recoquere, id est Tacitum necare: faciant, ego vltra non oppono, nec iudiciū præco, quod haud magis inferi docendo potest, quā gustus aut odor. Dij deæque! quā in animo isto suaue, vidisse me-

lora, nec secutum solum esse, sed præiuisse! Alij abnuunt: quid promouent? ille in bono & recto firmus

— *per obstantes cateruas*

*Explicuit sua victor arma.*

De Cardinali Borromæo, & eius in optima studio, volupe audire. quod autem quærit, de *lapide in aceruum Mercurij misso* (in sacris ita scribitur) non aliud arbitror, quàm ad morem veterem allusum, qui sic habet. Mercurius viarum præses, & Græcis verbis, ὁδὸς, εἰσὸς ὁδὸς, ὁδὸς, in biuijs aut triuijs effingebatur trunco habitu, & in lapidem rudem, quadratum, quos *Hermas* Græci vocabant. Ij signum erant & indicina viæ: atque vbi non illi, moris vt lapides aliquot aceruarentur, qui vicem eorum & vsum supplerent. Itaque pauci illi coniecti aut dispositi augebantur pietate an superstitione transeuntium: & Hebræus ille Sapiens nunc dicit, Beneficium aut honorem insipienti dare, assimile esse illi, si quis in aceruum talem lapidem velit iecisse. Nam beneficium quidem est, viatori puta: sed nemo imputat, quia dator ignoratur: tale in fatuo, cui beneficium si confers, perdis. Septalium conualuisse, triumpho & gaudeo, virum quem iamdiu habeo optimum doctissimumque, & melioris illius æui germen. Saluta, amplectere; ego te, & tu virtutem. Louanij, xii. Kal. Sept. ∞. MDCLII.

## EPIST. VI.

*Antuerpiam.*

HENRICO VWENO I<sup>to</sup> S. D.

**F**ILIOS tuos iam nunc apud me in leuiculo prandio habui, quos libens sanè video, & in ijs ipsum te. Placet vtriusque indoles & industria; etsi cum aliquo discrimine, quod in sermone faciliùs edam. Deum seruare eos tibi precor, virtuti & reip. crescere, heu quàm inopiâ virorum, aut certè consiliorum, nunc laboranti! Quæ fiant, omnes videmus; quæ futura, timeamus: & quæ facula bonæ spei allucet? Ego nisi tenebras & confusionem non video: atque inuitus vel in hunc labyrinthum sermonis venio, implexum, & exitus ignarum. Quæ sentio, dicere non lubet, & sine fructu sit: sileo, & philosophiâ meâ me inuoluo. Legi quæ amicus ille (tuus alter) ad te scripsit: quid censes?

censes? miratum me? nihil. Nota & præcepta hæc mihi sunt: & scio à quo fonte sumant. Ecce, hæc suggeri & doceri possunt: ridentur, ad ineptias & futiles subtilitates eunt, quæ ipsi *Ingenia* appellant. Ridere nos quoque possemus, si Pietas & Patria non agerentur: nunc ringimur; & quod vnum superest, frænum mordemus. Beati amici, quos interea ad beata loca mittimus! Ego hîc & alibi plusculos hoc anno: secuturus alacri gradu, cum euocare Imperatori meo visum. Vellem cum Schottio & Robiniano hæc altercare nobis in sermone liceret, sed non mœstis: paratis ferre & subire quodcumque iugum Deus imponit, sed Pietate semper saluâ. Insigne documentum, si vlla ætas, hæc dat, & (utinam fallar) dabit, quàm sine prudentiâ potentia inermis sit, & inefficaces manus habeat. Aula apud nos bisterque fuit: Aula. Aliud non habeo, videre & alloqui amicos ibi opto, hiems prohibet: saluere igitur iubeo, aliàs (Deus non inuidebit) videndos. Tuam saluto, & duos amicos, quos nominaui. Luanij, postrid. Kal. Nouembr. ∞. 10CII.

## EPIST. VII.

*Lutetiam.*

FREDERICO MORELLO S. D.

**S**VAVES mihi tuas, ita Musæ me ament. Nam silueras aliquamdiu, & ego pariter: quid mirum (in me quidem) ubi nubes hæc & mœstitia temporum impendet? Amœna aut amica omnia à nobis abeunt: pro virili quisque satagit tueri se, subsistere, nec aliarum rerum esse. Apud expertum loquor, & hæc Enyo Galliam quoque, & urbem vestram, infestavit: sed minus pertinaciter, & mitior Dea superuenit, & \* *ἡσυχὴν χάρισα* adspexit, & sibi vindicavit. O melior Galliæ pars, & animæ humanius, ut sic dicam, \* *ἡγεμονικὸν*, sic manete: & lucis aliquam spem nobis facite, à luce illâ vestrâ. Ominor, & fortassis \* *ἐκ ἀνθ. θείας* *ἐπιπνοίας*. Sed ad tuas litteras. significas *De Bibliothecis* te vidisse, & placuisse. Argumento, non ambigo: tractatu fortasse, quia auctorem amas. Nam \* *ἐμπαίξεν* te mihi, abest à candore tuo, qui nō habet istos \* *φανατισμὸς*. Ceterum, libellus exiguus: sed vel præiuisse in hoc ævo, & immani bonorum contemptu, nōne magnum est? \* *Μαλιδίως* fortasse, ut Homerissem: sed conscientia sufficit,

\* *quies  
grata*\* *pars præ-  
cipua,  
\* non sine  
divino in-  
sinitu.*\* *Illudera.*\* *fraudulen-  
tias.*\* *Frustrâ*



sufficit, & viderint qui delinquant. De Italo, faciundum semel fuit, & istos \* *παραβόλους* reijciendum aut reprimendum. Dij boni, quæ copia est? In posterum abstineo,

*Atque arma, defunctamque bello  
Barbiton hic paries habeto.*

\* *unum ex  
veris ami-  
cis,*

Te amo, & vtinam fruar \* *ἐνα ἴψ' ἀλυσθῶν φίλων,*  
— cuius sepectore Graia vetustas  
*Condidit, & maior collectis viribus exit.*

\* *in animum*

\* *amantem  
vadamus.*

Sit & mihi in eodem locus; in meo quidem, \* *δ' αἰῶνος* tibi erit: sed & Morantium adiungam & curabo, quia tuum, & faxo vt re factum dicat. Valeô optime, & *φιλέντα ἀντιφίλει.* Louanij, v. Kal. Decembres, ipso die quo tuas vidi. ∞. IOCH.

## EPIST. VIII.

PHILIPPO RVBENIO *meo* S. D.

**L**V BET adfari te mi Rubeni, in publicis priuatisque malis, & quibus tolerandis animus est, vtinam in corpore tamen sano. Audis ruinas nostras, & sonitus vel illuc te penetrarint: quid speramus, aut cui innitimur? Deo, nec præter illum nos iuuat. O vanas spes in nouâ dynastiâ! etsi optimos eos habemus, sed nescio quâ fati malignitate nihil adhuc in nostram rem factum. De fato, quàm de culpis loqui malo: & in id xui venimus, vt tangi eas nolumus; & verè cum Liuius, *nec remedia nec mala nostra pati possumus*. Quid ergo superest, nisi ad illum aspicere qui suprâ est, & cum poetâ dicere,

— *τὰ δ' αὖ Δὴ πάντα μέλῃσει*

Fiat, fileo, stilum aliò verto. Ad nos, mi Rubeni. & ecquid agis? quid in futurum destinās? nam in eo iam te esse vt decidas, ratio & ætas, sed & scriptio tua, dicunt. Deum veneror, vt cum duplici bono tuo fiat, interno externoque: si minùs, illo. Scripsi aliquid nuper, sed tibi & *ἀφράδως*: tecum habe, ruminare, & verbo veteri *LENTE FESTINA*. Si animum Philosophi induis, vt debes & indoles tua poscit, animū curabis eximie, imò tantum: cetera non decerunt affectuum modico, & iucundè clamabis,

— *Benè est, cui Deus obtulit  
Parcâ, quod satis est, manu.*

Longiùs

Longiùs si imus, extra terminos imus, & in vastum illud IN-  
FINITVM.

*Si animus hominem perpulit, actum est, animo seruibit, non sibi:*

*Sin ipse animum perpulit, dum viuit, victor victorum cluet:*

ait ille noster, altâ sapientiâ, etiam in focco. Ego de indole tuâ sic confido, vt etiam sine præmio bonum te futurum augurer, nec vel inter praua & prauos deprauandum. Et hercules de præmio, sepone in hoc æuo: quo Theognidis dictio vera est,

Ἄλγετό μὲν ὅτις μεγάλη θῆος, ὃν χετο δ' αἰδρωῶν  
Σωφροσύνην, χάριτες τ', ὃ φίλε, γλυῖ ἐλιπών.

Imus ad humilia, sordes, vitia; & qui formandis animis præfunt, quidam eò ducunt. O beatum me, qui mox hæc relinquam, & tutò spernam! Beatum & altero nomine, quòd in culpam non trahar, & consilijs aut actionibus publicis numquam me inferui aut communicauit.

Καλὸν δέ γ' ἔξω πραγμάτων ἔχειν πόδα.

Itaque eâ cogitatione & simili, quam Sapientia cumque mihi dictat, sustentor, — & meâ

*Virtute me inuoluo, probamque*

*Pauperiem sine dote quero.*

Quid si fugerem? bellum daret, & iam Miles ille incompotitus & ex professo (iusso non dicam) proteruius, itemque Seditiosus, noua nunc manus, eò impellant. De istis, scito ad quattuor milia & vltra iam creuisse; hostes iudicatos, nondum repressos; & omnia agere in agris nostris ac ferre. Si videas audiasque miseriam; patriam miserari velis nescio, an odisse. Hæc publica nostra sunt, & priuatim mihi etiam bella. Ille Italus, quisquis aut vbi fuit, me scædo & infulso libello petiuit: respondi, non vt regererem sordes, sed à me abstergerem. Fortiter feci, & ausim dicere, non reieci solùm hunc Andabatam, sed deieci.

Ὁ νόμῳτος εἰδείς, ῥήδιον γ' εἰπᾶν τόδε,

si mea modò legetis. Sed apud me, non meâ causâ, ingemisco. Heu, quo æuo viuimus? & cui vos surgitis? Sapere hortor, sed vobis: si aperitis, non inuidiam sed odium habituros. Timonis illa vetus secta publicè damnata est, & euauit: vereor vt aliquis reuocet, cum homines & iudicia hæc videt. Benè est, quòd non diu videat,

— *Et omnes vna manet nox*

*Et calcanda semel via leti.*

Calcauit iam noster ille Micaultius, ô vir probus & pius! qui lento & medicis quoque ignobili morbo obiit, ante paucos hos dies. Quis etiam? Vibrandus ille Anskema, plenus spirituum iuuenis, & qui pænè cum Alexandro *manu vnâ Orientem, alterâ Occidentem tangebatur*: obiit, inquam, populari morbo & *δυσφύμιον λοιμὸν* extinctus. Eamus; altum spiremus: in carceribus nostri cursus sistendi aut abripiendi. Etiam meus Euerardus Pollio, olim in contubernio, desijt viuere lentâ & pulmonariâ tabe extinctus. Ecce funera: ad viuos redeo, & Io. Wouerium nostrum auidè nimis exspecto. Per Batauos venire dicitur, securitatis an visionis causâ. Veniat, amplectar, & pocula libabimus memoriæ etiam absentium amicorum: inter eos tuæ, tuæ mi Rubeni. Fac idem,

*Nigrorumque memor, dum licet, ignium,  
Misce stultitiam consilijs breuem.*

De Senecâ scio exspectas: dico tibi, ne exspecta. Famæ litare conati olim sumus, nunc Quieti: & Seneca faciat suadeatque, si uiuat. In hoc theatrum aretalogi prodeât & chrestalogi; emanent qui sine fuco rem, non speciem, præbent. Quàm diffundor? cum præsentem secare sermones videor: & es animo: opto te sic affectum. Ita vale mi Rubeni. Louanij, vi. Kal. Nouembris, ∞. ICCCII.

## E P I S T. I X.

*Patanium.*

GVILIELMO RICHARDOTO suo S. D.

**R**ARO aut scribitis, aut ego quidem accipio: & video eamdem culpam, an casum, in meis litteris esse. Quid faciam? feram, vt multa in hoc æuo, non pro altis bonisque ingenijs, vt rem dicam. Vaticinari lubet. intra paucos annos, si sic pergatur, Doctrinæ melioris nomen Europæ subducetur, & barbaries ac fordes erunt, quas aui nostri viderunt. *Τῷ δὲ θεῷ τὸ μέλλειν*: mihi, vt bona teneam aut appetam, & immotus stem contra malitiam aut inscitiam ingruentem. Cadere, non cedere,

dere, possum. Sed heu illa ora etiam vestra! olim luxit, & radios  
vel in has oras sparsit: quid nunc? cum Pindaro,

\* Λαμπάδα δ' εἰς οἶος τε φέρεω

Υπὸ ἀγυμνασίας ἐπιπνύ.

\* Facere  
nemo ferre  
apertus, pra  
imperitiā  
hodie.

Pudet, cum lego quædam: quid vel illa nostri Lucij? etsi ego  
refutaui, verè — *apinas tricasque, & siquid vilis istis.* Et hæc  
illuc eduntur, leguntur, fortasse & probantur? ô murcidi, an  
murci, & ab omni honestiore militiâ iam soluendi. Sed ego ille  
alienus ab omni pugnâ, tamen refutaui, & mundo ostendi,  
quàm verè olim Hippocrates: \* Σφαλερὴ καὶ δὴ πῆταιος ἢ μετ' αἰδολεχίας  
ἰατρύσις. Etsi non αἰδολεχία hîc tantum, sed \* βασιγνία: atque  
ille fons præclaræ scriptionis. Quid tamen efficiunt? vt libe-  
rè dicam,

\* Præcep-  
ti labi fa-  
cilis, cum  
garrulitate  
confidentia.  
\* inviden-  
tia:

*Multa Dirceum leuat aura cygnum:*

atque illi tela non peruentura, adeo non læsura, spargunt. Qua-  
re igitur respondemus: non vt vlciscamur, sed vt emendemus:  
non aliter, quàm pueros compescimus lasciuiantes. Sed de Lu-  
cio videbitis: nec velim alium vtrique ὑπεραπιστήν mihi dari. Non  
Segetum illum nostrum, etsi offert: cui vrinam pro meo voto  
benè lauteque sit! Sed scribe semel, quid mali fati aut vitij il-  
lum premat: \* Καὶ μοι τῶτ' ἀγόρευσον ἐτήτυμον. — nam iuuenem, olim  
inter meos, amo. Fratrem in viâ esse, lætus audio: Deus ad suos  
& ad me ducat. Tu autem Bononiam? nec illuc pro spe aut vo-  
to fortasse omnia reperiēs. Tamen vel repertis vtere, & quod il-  
le ad Vlyssēm,

Εἴθιε δαυμόνιε ξείνων, καὶ τέρπειο ῥῖσιδε

Οἱ αὖ πάρεσι.

\* Atque  
hoc mihi  
offer vera-  
citer.

Me autem ama: quod non facies, nisi illa quæ à me amare per-  
gis, id est recta & honesta. Pompa ne te abducatur, vide. Loua-  
nij, xiiii. Kal. Sextil. ∞. I. DCII.

## EPIST. X.

*Antuerpiam.*

AVBERTO MIRAEO CANONICO S. D.

**L**ITTERAS tuas, & quæ inclusa erant, accepi; atque  
etiam excusationem, de raritate scriptionis. Scio non à neg-  
lectu esse, & mihi atque occupationibus meis dari interpretor  
libens.



libens. Sanè illæ crescunt, & obruent me, nisi recido. De *Ferreolo*, gratum, pergratum est, tales in Sacro ordine reperiri, qui & hæc nostra, veterum illorum Patrum exemplo, æstiment ac sciant. respondi. Mittes Antiquarium illud Carmen: si serium, quid nisi ineptiæ & animi error? sin experimentum tantum, abeat, nec per me notam aut laudem ferat. De *Antuerpiâ*, in sermone meminî nuper nos agere: in meis reperio memoriâ eius, anno Domini *MDCCCXXXVI*. Caroli Magni imperio: *Normanni Anduuerpiam ciuitatem incendunt, similiter & VVitthamemporium iuxta ostium Mosæ fluminis*. Ita Annales vetusti, sed incerti auctoris: nec antè memorari notaui equidem. etsi iam tunc aliquid magni fuisse, ex eo quòd *Ciuitatem* appellat, dicas. Iacuisse ab eo incendio aliquamdiu arbitror, sed tamen instauratam: iterumque eius mentio, in rebus Henrici III. apud Lambertum Schaffnaburg. anno  $\infty$ . *LXXVI*. Gozilo, inquit, *Dux Lotharingorum, cum esset in confinio Lotharingiæ & Flandriæ, in ciuitate quæ dicitur Antuuerpha*. Et paullò post: *Marchia, quæ dicitur Antuuerpha*. Vides Germanos paullò aliter ac nos pronuntiare, quod hodieque solet. Vides & situm eundem: siquidem Brabantia nostra tunc Lotharingia: denique vides iam tunc *Marchiæ* titulo insignitam. Ista nunc præ manu fuit scribere, alia à te (vt industria tua est) addes. De rep. circa nos nunc meliora. Timuimus certè, nec iniuriâ, Batauum validis copijs fucinctum. Vnde istæ vires? palàm est à se non habere. Vtinam res Gallicæ, & detectæ ibi insidiæ, non dent alterum nobis hostem! Deum precor hæc auertere, nobis intendere & seruare. Vale mi Miræe. Louanij, XIII. Kal. Sextil.  $\infty$ . *MDCCII. RR. PP.* Schottum & Heribertum saluto. Accepitne prior ille quæ ad Senecam misi?

## EPIST. XI.

Augustam.

MARCO VELSERO V. I.

**F**ECI quod volueras, etsi ego haud valdè vellem: scripsi, inquam, ad Masium, in re pecuniariâ. Quid tu autem censes? Tagum aut Pactolum nobis fluere? mera hîc inopia, & priuatim ac publicè (pudet dicere) mendici pænè sumus. Ego ille

ille animo diues, & Stoicorum dogmatis, in metallis istis delinquo, & de fide congiarij annui laboro. Ego, qui in gratiâ Principum & magnatum esse non diffiteor: sed sic laboramus, & diuturno isto bello afflicti sumus, an exhaustos dicam? Tamen Mafius (actor tuus dicet) benignè respondit, facturum omnia quæ in copiâ eius erunt: dolere tantum, quòd consilijs eius ante biennium aures non præbuiſtis. Nam tunc res laxiores. Iſta de re, quam ſolam rem multi cenſent. Carmen N. accepi, & à tuâ interpretatione probaui. Nudum ſi viderem, quid afficeret? ſed *inuidiæ victæ*, vt ais, *ſi hæc trophæa*, age, in porticu meâ aut portâ ſuſpendam: ſed non in *Senecâ*, ne erres. Eum differo, non omitto. numquam ſcriptorem illum & vnicum magiſtrum è manibus: non tamen ita, vt omnia publicemus. Reuerentia me æui & iudiciorum habet; eliminanda ſunt, quæ illi conſcribimus, & iſtis delegamus. Sed heus tu, vidisti ne qui ex tranſuerſo me petijt? vidisti, etſi diſſimulas: iudicij autem vel & conſilij tui copiam voluiſſem. At nunc ſerum eſt. nam reſpondi. hîc habes: dic vel nunc quid de vtroque videatur. Satin' ego pro ſano, qui non ſanum reſponſi honore ſum dignatus? Difficile in iſtis temperare: etſi vſque adhuc Europa dicet modèſtum me, imò & per-patientem, fuiſſe. Quàm multis non reſpondimus? quos vt infantes vagientes habui, & riſu non ſcripto componendos. Non probo iſtos, qui ad ſingulos inſultus ſe parant & exſerunt, & in gladiatorem pugnant: nec tu mi Marce, ſi te antiquorum hominum & morum noui. Philoſophi ſumus? tranſeamus. Chriſtiani? patiamur, alieni ab excetrâ illâ delictorum omnium ſuperbiâ & vindictâ. Sed ſcriptum habes, iudica. vincar aut vincam, parum eſt: cum Ariſtippo, *Ego victus abibo iucundius, quàm ille victor, dormiturus*. Etſi non poteſt hoc bonis arbitris: quem te cenſeo, & mihi fero. Adiuncta ad Delrium noſtrum eunt: perueniant, obſecro, te inittente. Martialem, qui ad te & tuos, vidimus: multa bona: voluiſſem ſtrictius quædam dicta. Sed ille cauſas ſuas habet: pro hoc æuo iuſtas, pro veteri improbandas. At ſcænæ etiam Roſcius ſeruiat, ſi viuat. Dij boni quàm longus ſum? quàm morem & ingenium meum migro? Amor eſt, in te iudicio ſuſceptus, & æternum, æternum, mi Marce ſeruandus.

dus. Si eadem tibi causa, idem fac, & vale. Louanij, xvii. Kal. Septemb. ∞. MDCLII.

## EPIST. XII.

NICOLAO HACQUEVILLIO S. D.

**T**VAS libens vidi mi Hacqueuilli, cur non antea? Decebat te, si vis rem dicam: & litteris etiam promptè adire eum, quem sermone soles. Sed cum fecisti, satis fecisti: in vnâ rehæreo, litteris Baronis Boncœuillij, quas tuis adiunctas scribis, & nullas in fasciculo vidi. Considera, perijsse nolim: & si est, sciat ipse non vidisse. Viri illius gentem, & ipsum amo, eoque gratum fuisset mutui affectus tesseram manum videre. De itinere tuo, Deus fortunet; itemque studia, quæ in ipsâ Galliâ (ita audio) amplecti & exsequi te, equidem probo; dumtaxat ut tu totâ mente hîc te dones, dum ætas tua & publica ista pax finit, bona nutrix artium, quarum Gallia vestra ab annis mille quingentis ferax & felix, inter Europæ prouincias, fuit. Si scias, mi adolescens, quantum in ijs momentum ad prudentiam, sapientiam, & vno verbo, veram felicitatem sit; fortius & arctius amplectare. sed crede nobis, & vanis sepositis hæc vera & solida amplectere, tuo & publico olim bono. Pompa & ambitio sæpè abducit, &, quod poëta ait,

— *nos vilis turba caducis*

*Deseruire bonis, semperque optare parati,  
Spargimur in casus.*

Sed excerpte te turbæ, paucis bonisque adiunge, & in tunica non lanæ aliquod filum, sed purpura (ut ille ait) esto. Hoc suadeo, hoc voueo mi Hacqueuilli: & ista si amas (neque enim aliter) me amare. Louanij, Kal. iplis Sept. ∞. MDCLII.

D. Legato parenti tuo S. & officia mea defero: idem D. Bani Thuano.

## TESTIMONIUM.

**Q**VI subscripsi testificor, NICOLAVM HACQUEVILLIVM, domi nobilem adolescentem, in optimis studijs artibusque deditum, hîc annos aliquot egisse, me vidisse & frequen-

tasse,

fortasse, ingenio eius & indole oblectatum. *Ut in viâ cœptâ longius per-*  
*gat, eius conatus, nostra spes est & votum: preces etiam apud externos,*  
*ut adiutum prouectumque velint. Naturam benignam reperient, inge-*  
*nium facile; faueant, dirigant, & ad proprium & publicum bonum*  
*(ita natus est) ducant. Hæc breuiter, & testimoniij fide*

I. Lipsius, Professor &  
 Historiographus Regius.

Lovanij, Kal. Sept. ∞. 1611.

## EPIST. XIII.

Mediolanum.

ERYCIO PVTEANO suo S. D.

**L**IBENS tuas vidi, quia ex interuallo: & saluere te didici,  
 & nescio an benè, bono tamen animo in ijs locis esse. Sic  
 oportet fato se aptare, & tranquillum, atque interiore animo hi-  
 larem agere, in omni sorte. De epistolis meis non visis, mirabar  
 iure, nec iure mirabar. Post tot menses non peruenisse? Sed tem-  
 pora & studia cùm cogito, & quibus rebus artibusque pretium  
 nunc sit, mirari desino, atque etiam nugari desino, id est hoc  
 agere publicè quod hætenus egi. *Sera est in fundo parcimonia*, ait  
 ille: sed non sapientia; & quandocumque ea venit, priora cor-  
 rigit; & fluctus nihil obstant aut incommodant, qui, etsi serò,  
 est in portu. Deum immortalem! tali æuo nos viuere? & nos  
 omitto: sed illuc, ubi alta & immota pax, & quod sequi vide-  
 batur, ingenijs artibusque honos; nihil in pretio, nisi pretium,  
 esse? Indignor, sed leuiter: in metâ sum, & laborent aut fata-  
 gant, qui sequuntur. Italus ille qui me tetigit, ego percussus: &  
 ius est. neque sapiens fileat, & proteruiam castiget, sed eo animo  
 quo solemus lasciuiam puerorum. Scriptum meum vidisse te  
 & Septalium velim, quem animo huic indui: & scio probatu-  
 ros. Quid vos? ipsos hostes meos, si quos vitio suo, non merito  
 meo tales habemus. Lubet fidenter loqui:

— mens altum spirat honorem

*Conscia factorum.*

Sed hæc talia, cogita quàm nos excitent, & ad alia porrò mit-  
 tant. Ill<sup>mo</sup> BORROMAEO te innotescere, gratum est; melioris qui  
 Prin-



Principi, & stirpe suâ digno. Septalium in morbo esse, & tali Saturnio morbo, triste: Iupiter & Venus potius respiciant, & optimum ac doctissimum virum publico seruent. Vibrandus Anskema, plenus spirituum iuuenis, & nuper inconsultò maritus, obiit ante dies paucos, tristi & populari morbo sublatu. Etiam Nicolaus Micaultius, ille meus, probus & pius, si quis Belga, sed lentâ & obscurâ tabe absumptus. Denique Euerardus Pollio, olim è meo contubernio: acre & arduum ingenium: & hunc pulmonis exulceratio absumpsit. Vides funera, sed priuata: quid publica dicam? Belgica tota languet, & inualefcunt qui religionem & imperium mutata volunt. Quid causse aut culpæ sit, malo scire quàm prodere: vos etiam auditis, & quàm non omnia hîc ex normâ aut more veteri,

*Quit & Arctois si quis de solibus horret.*

Quod in epistolâ tuâ pluribus exsequeris, non hîc refello aut approbo: coràm mallem, & iudicia tua audire, sed & formare. Illud velim & adsuadeam, ex Euripide:

\* Sacra faciam illis potius ipse, quàm ferox

*Irascor, & recalcitrè, homo cum sin. Diu.*

\* Admoto capite, & ne quisquâ exaudivit alter.

\* Οὐδὲ μὲν ἀν' αὐτοῖς μάλλοι, ἢ θυμὸν ἐμὸν

Πρὸς κέντρα λακτίζοιμι θνητὸς ὢν θεοῖς.

permitte enim leuiter hæc à me immutari & adaptari. Sed vt dixi, hæc talia incoràm mallem, & cum Homero

\* Ἀγχι γὰρ κεφαλῶν, ἵνα μὴ περδοῖαθ' οἱ ἄλλοι.

Septalij libros auide exspecto: tunc ad ipsum, nunc salutem plenis faucibus propino, itemque Sacco. Louanij, XII. Kal. Nouemb. ∞. ICCCII.

## EPIST. XIII.

*Mediolanum.*

IOANNI BAPTISTÆ SACCO.

**M**IRVM, & non mirum, te epistolam illam meam, nisi editam, non vidisse. Ordinarijs cursoribus tradita est, sed quid tam sollemne hodie, quàm fraus aut officij neglectus? Illud gratum, animum meum tibi conspectum esse: qui certè, mi Sacce, in te propendet, & amans cupit amari. Fac merenti. non eâ parte, quâ autumas, quasi Famæ te consecrem: non ea vis mihi, etsi voluntas: sed quia iam olim constanter erga te afficior, & addam eximiè, sermonibus scriptisque proditum, &

*proden-*

prodendum . Scisne autem, aliquem ab Italiâ ( nisi titulus imponit ) proteruiter mihi insultasse ? Sed caput sustuli, & manum exserui, & puto, æquis & iniquis arbitris, hanc quidem palmam retulisse . Vbi sumus ? inter quos Lapithas viuimus ? Innocentia mea orbi testata est, & industriam approbare quidem conatus sum : ecce conuiciorum plagis excipior, & pænè ad Tarpeium saxum vocor . Tacitum corrumpti . Dij hominesque ! nullum auctorum hodie ( fidenter loquendum est ) magis medicam, magis opportunam manum, à meâ sensit . Sed isti viderint, qui scribunt, qui legunt, qui fauent : ego, vt bonus bonis approber, nec transuersus agar ab hoc Calumniæ an Inuidentiæ cæstro . Philosophor nunc, & in Senecam, imò totam Stoam, aliquid molior : si Deus & Fatum emoliri dant & absolvere, ignauix me absoluet postera aliqua ætas . Vale Cl<sup>mc</sup> Sacce, & me ama . Louanij, ix. Kal. Decembr. ∞ . IOCII.

## EPIST. XV.

MATTHIAE HOVIO, *Archiepiscopo Mechliniensis.*

**I**LL<sup>ME</sup> ET REV<sup>ME</sup> DOMINE : Petiturus venio, quò non libens inclino, nec nisi consilij & monitis aliorum inductus, etiam medicorum . Multos annos iam tenuior valetudo corpusculum debilitat, quod sobrietate tamen, & dilectu aliquo ciborum, & exercitij mediocritate, sustento . Sed vsu iam didici, piscium solorum vsu, & parum alimonix sufficere, &, si quid prauum aut melancholici humoris in me, commouere . Equidem vsque adhuc Ecclesiæ S. Romanæ ritibus & præceptis libens, vt debeo, parui : & cum sensu etiam aliquo incommodi, Quadragesimalem in cibo castimoniam seruauim . Scio enim homini, Christiano præsertim, *summam felicitatis* ( vt Seneca ait ) *non esse in carne ponendam* : & scio etiam primogenios parentes nostros à Paradisi gaudijs per cibi voluptatem excidisse . Itaque rediri etiam ad illa, per Abstinentiam : sed iudicio tamen & prudentiâ temperatam . *Non enim per eam caro*, vt vir Sanctus scripsit, *sed carnis vitia sunt extinguenda* . Hac causâ ad te, summum nostrum Sacrorum Præsulem, confugio : & moderationem, aut remissionem, in ciborum abstinentiâ peto . Sed eâ lege, quam

Cc ipse

ipse mihi pono, vt non nisi in necessitate vsurpem, aut mihi indulgeam: id est cùm prostrate vires deposcere videbuntur. Ego, si impetro, vota pro salute tuâ & publicâ interponam, eò ardentius, quò magis & meam tibi, Ill<sup>me</sup> & Reu<sup>me</sup> Domine, referam acceptam. Louanij, 1111. Idus Febr. ∞. 15C111.

## EPIST. XVI.

*Andomaropolim.*

ÆGIDIO SCHONDONCHO V. R. S. D.

**C**VM abiisti nuper à nobis, corpore hoc factum; animo obuerfari, meo quidem, voueo & in tuo sic esse. Sed maxime in eo opus quod moliris, & cuius argumentum atque ordinem volenti ac lubenti mihi denarrasti: in quo seriò pergere te, atque feliciter finire, publicâ etiam causâ hortor. Enimuerò veteris æui *Admiranda* concepi animo, & partim stilo digessi, aliquid edidi: nostri & superioris huius, tuum institutum, ac iam debitum est: quare? suscepisti, promisisti. Aurem tibi vello, perge: educ è tenebris præclaros viros, & facta: propone in exemplum: da ipsis lucem, ne per incuriam nostram sit

\* *Equali*  
*in famâ*  
*viriutis*  
*amator, &*  
*hominis.*

\* *Εν δ' ἢ τῇ τυχῇ ἡμῶν κακός ἦδ' ἐὶ δόλος.*

Fructum, mihi crede, ea res amplum dabit: vis & famam? non spectas, vt tua pietas est, & aliena externis omnibus vita: sed & hanc spondeo, bonam & mansuram quamdiu Virtuti pretium erit. Industriam tuam noui, sed & stilum talibus aptum: illam exfere, hunc admoue, nec pauculis istis vitæ annis curas tuas circumscribe. Habes ab amico consilium, siue monitum interpretaberis: habes iamdiu affectum, neque nescis; tuum ex æquo mihi præsta. Vale R. P. Louanij, XVI. Kal. Mart. ∞. 15C111.

## EPIST. XVII.

DIONYSIO VILLERIO V. R. S. D.

**D**IVTIVS factum est, cùm tuas accepi, nec respondi: sed tuo exemplo (si vis verum audire) factum. Nam & tu remissior esse in scribendo soles: non in amando, hoc scio, & hanc de te fiduciam habeo; velim de me idem. An mutem, aut minuam?



minuam? augeam potius, si quis gradus ultra summum esse possit. Consistamus. Tardiores metamen in omni officio, vel ætate, vel valetudine, fieri sentio: nec molestè fero; & desinere appeto, vel desuisse. Sæculum video, & Honesti vix scintillas alibi reliquas: nihil nisi fumum & nugas, & ea quæ mœror est cogitare. Felicem me, qui cursum pænè decurri! Eram in Stoicâ Philosophiâ totus: scis quàm non pro Genio æui, quod vel nomen odit. Itaque mihi meditor & scribo. Inuitas me ad tuam domum. Scisne? si solus sum, haud frustra: iam adsim, & viuam & moriar apud animam amicam. Compedes habeo, soluar ipse antequam soluam. Duci Arschotano (quem solum generosi animi inter omnes proceres sum expertus) Carmen nuper scripsi, in HEVRIAM suam, petenti. Editum est, cum Iconismo eius Prætorij, quale id animo (nondum plenè in opere) destinauit. Ita me Deus, bellum & elegans, & Principe viro dignum erit, cum perfectum. Videbis, autiam (quæ eius in te benignitas) vidisti. Heus, est quod tibi soli significem. Rex Galliæ scribi ad me iussit benè seriò, ante duas trêse septimanas, & in suum regnum, loco & conditione quibus vellem, inuitari. Excusavi, & gratias egi. Iterarunt tamen, & vel ad otium, quale in Batauis Scaliger, vocarunt. Ego in sententiâ mansi, id est abnuui: nec lubet peregrinari ultra; lubet, ut dixi, ad metam ire. Melancholia est, inquires. Nosti veterem meum morbum, corporis tamen adhuc magis quàm animi: & nisi ipse me fallo, ea pars constat & valet. Te utroque opto, mi amicissime, & quod à puero fuisti in me esse. Louanij, postridie Idus Martij, ∞. IOCHII.

EPIST. XVIII. *Romam.*IOANNI BAPTISTAE BARONIO *suo* S. D.

**A**M O tuam satis crebram scriptionem. Satis, nimis non dicam; non, si in dies me compelles. Suaue semper à vobis aliquid, & de vobis audire: quos animo huic fideliter habeo insertos. Gaudeo ROMAM venisse, illam olim magnam, augustam, SUPER-ADMIRANDAM: nunc sanctam, religiosam, venerandam. Sed vel nunc vestigia magnitudinis suæ habet: quæ magis eminebunt, si cum vetustâ lectione cogitentur



simul & lustrentur. Inuideo vobis (cur mētiar?) quòd mihi non iterùm calcare ea loca fas: atque vtinam vel furtim liceat, & penè dicam, Geniali aliquâ machinâ eò transferri! Nam hîc nubes, tenebræ, horror, terror: & à rebus bonis honestis quæ squalor & solitudo. Partes alteræ inualescunt, viribus & consilijs: ipsa hæc schola desolatur, & metu aut tædio diffluit iuuentus. Ego me solor & erigo Sapientiæ studijs, & SENECA seriò habet: sed vereor, vt mihi. Quibus enim ista? & breui vel nomen ipsum LITTERARVM ludibrio aut contemptui erit. Magnus tamen & rectus animus, recta non deseret: non,

— *si tremendo*

*Iuppiter ipse ruat tumultu.*

Carmen tuum ad pontem Metauri fluminis scriptum legi, & amaui. Fac, fac, exserant se interdum & emicent flammulæ istæ ingenij: & pange si non alijs, tibi & mihi. Imò & Rubenio, & quem prædictum oportuit Richardoto: quod consortium tibi gratulor, nec vel vota melius donent. Itaque si illi hanc ætatem etiam Romæ, auctor vltro sum manendi: sin redeunt, non sum, & inclinem te redire, & in viâ tamen Germaniam videre. Domesticas tuas res, à fato optimi parentis, inspiciendas etiam tibi opinor. Sed, vt dixi, si illi manent, indulgeo: Deum precatus, vt apud te Sanitas maneat & Amor nostri. Louanij, Postrid. Idus Mart. ∞. I O C I I I.

Heus tu, Carmen & ego ad vos tres subitum scripsi: hîc habetis.

A D

GVILIELMVM RICHARDOTVM,  
IO. BAPTISTAM BARONIVM,  
PHILIPPVM RVBENIVM,

olim & nunc SVOS, sed iam ROMÆ sistentes,

Phaleuci.

**E**RGO vos habet illa magna Roma?  
Florens olim opibus, superba tectis,  
Lata ciuibus? urbium vrbs, & orbis  
Princeps? olim ea: nunc modestiores

*Inscribit*

Inscribit titulos, PIA atque SANCTA,  
 Et sedes adeò ipsa SANCTITATIS.  
 Verùm vos habet. ò meum dolorem,  
 Quòd non me quoque habet! licebat, imò  
 Libebat, sed & addam ego hoc, decebat.  
 Quid tamen tenuit? mala illa Parca,  
 Quæ filum mihi neuit, haud abire,  
 Quæ filum mihi neuit, hic obire.  
 At vos ò mea triga, dum fruisçi  
 Jam datur, facite: & vetustioris  
 Illa Urbis monumenta, Templà, Circos,  
 Arcus, Balnea, Porticus, Theatra  
 Cùm lustrabitis, hoc subinde votum  
 Interponite: DOCTOR ILLE NOSTER  
 ADSIT LIPSIVS! hoc iuuabit, & me  
 Alà hac visite cogitationis,  
 Alà vos ego cogitationis.

## EPIST. XIX.

Casaraugustam.

DOMINICO AVENGOCHEA I<sup>us</sup>

Senatori Regio in curià Aragonum.

**D**VPLEX à te munus accepi, amorem tuum eleganti epi-  
 stolâ oblatum, & libellum siue *meletw*, vt inscribis, doctri-  
 næ simul & innocentiaë tuæ verum testem. Vir Amplissime,  
 tanti Lipsius fuit, vt vltro sic adires? Humanitate me vicisti: af-  
 fectu non facies, vt omnia facias: & hunc tibi ex pari certè red-  
 dam. Atqui id ipsum te ab adolescentiâ pænè mihi aperis, &  
 Doctores tuos, & peregrinationes describis: illos egregios aut  
 primos virorum; has varias, & cum vtilitate iucundas. Quæ res  
 magis & ingenio limando, & iudicio dirigendo est, quàm istæc  
 locorum hominumque visio aut vsurpatio? nulla, neque vm-  
 quam sedentaria lectio aut diligentia hanc æquet. Gratulor sus-  
 cepisse fortiter, confecisse feliciter: & hoc gratulor, quòd virtus  
 tua & prudentia vocabant, eò à Rege maximo productum, ad  
 fastigium togati honoris. Quem honorem quòd homines im-  
 probi aut liuidi obtenebrare calumniarum nebulis conati sunt,

gaude. Conati sunt: tua clarior lux effulfit, nec probitatis tantum, sed ingenij; cuius telum, fortasse alioqui vaginâ condendum, in hac occasione acuiisti & protulisti. Atque illi ubi sunt? mihi perijsse de plano videntur; & iudex si addicar, non horam hîc moram faciam, ne censeam *AMPLIANDVM*. Confide, idem æqui bonique omnes alij: si iam non fecerunt. Et censio quidem illa, siue *ἐξέτασις*, bono & antiquo more apud vos vsurpatur: sed vt prudenter mones, cum temperie exercenda est, & malitiæ reprimendæ, non innocentie diuexandæ. At mea etiam scripta defensionis tuæ placuit inferere: id est, me honestare. neque aliter interpretor hoc iudicium talis viri. quod si ætas, aut melior propiorque mei inspectio, mutabit fortasse: at ne affectum hoc rogo, & hunc mihi integrum illibatumque serua; ita te ille *MAGNVS DEVS*. Louanij, xvi. Kal. April. ∞. *IOCHII*.

Breuiorem me ægritudo fecit: quæ hoc ipso tempore habet, & ab amore profectò est quod scribam.

## EPIST. XX.

LUPERCIO LEONARDO ARGENSOLAE. S. D.

**S**VAVES vestræ litteræ, addam etiam lætæ, parum suavi aut læto meo tempore aduenerunt. Neque enim inualetudo solum me, sed morbus habebat, & medici aut medicina in oculis: tamen rescribendum vel breuiter censui, abeunte Nunno Mendozio nostro, & Hispaniam suam, iussu Principum, repetente. Breuiter inquam, scribo: sed animo largiter: qui vos tales quomodo non amet? In doctrinam non affecti solum, sed eâ perfusi estis: me seriò & candidè (ita solet vestra natio) amatis; & ego non reponam affectum? Facio, liceret modò sapiùs, liceret propiùs vobis frui: suaue huic animo esset. Et, Deum immortalem! quàm tempora hæc turbida Amicitiam, id est Solem illum animorum, requirunt? Bella perseverant, titulo Ciuiliū tristia, euentibus parum fausta. Auditis, credo, & nobiscum doletis. Hæc æstas in metu est, ob hostiles apparatus: & opidum hoc nostrum iam in limite etiam belli: en quò ventum! Scitis sedem hîc Pietatis & Doctrinæ esse: periclitatur

cliratur vtraque cum illo minui in Belgis, non enim dicam perire. Sed hæc tristitia.

*Quæ procul à nobis flectat fortuna gubernans:*

aut Deus potius, vt piè magis loquar. Læta succedite. Lætum enim certè, quòd producis & nominas in eo etiam tractu amicos nobis, id est Doctrinæ: cuius instar aliquod in me (quid enim aliud?) amant. Inter eos Gabrielem Aluarezium, è Societate Iesu, de vnâ epistolâ nosse me puto, quam ante annos duos, tres, Andreæ Schotto benignè de me scripsit. Redamare me ferriò dicito: non eum falles. Idem de Doctore Bartholomæo Laurentio Theologo, Doctore Bartholomæo Morlanes I<sup>cto</sup>, quorum doctrinam prædicas, scribere me & sentire scito. Quid de Gabriele tuo, lepidissimo puero? hunc ego per te dissuauior; & in optimâ viâ pergere hortor, & ad candidam calcem peruenire. Fauco toto animo, & ad Patris & Patruorum exempla voco. Plura non licet. hæc ipse ægrè, & ægrum referent: affectu tamen valido & viuo. Louanij, xv. Kal. April. ∞. MDCLIII.

## EPIST. XXI.

*Tornacum.*

P. LEONARDO LESSIO, *Theologo Societ. IESV.*

**P**ERGRATA mihi scriptio tua, & cura mei, quod scire te scio, quia & affectum meum non ignoras, magnum, stabilem, & ære vel adamante firmiorem. Ideò & gaudeo, cùm mutua fieri video: & certè solatij vel leuamenti in hoc languore diutino egemus. Aquam aspersisti. Quamquam non sic extrema omnia apud me, vt fama illa prior dixerat: sum quem reliquisti, aut paullò deterior, sed valetudine scilicet vacillante & variante. Dies vnus matrem gerit, alter nouercam. Statui Antuerpiam excurrere, & aërem mutare, ac corpus commouere: quod vsu didici firmâdo mihi esse. Sed corpus attenuatum est, & vnus lineæ me hominem dicas. Naturæ tamen meæ illa bonitas est siue teneritudo, vt faciliè labatur, & lapsa assurgat. Vtinam te illuc videam, & amplectar, nunc medicum corporis, vt semper partis illius melioris! Intra triduum aut quatrimum, si vires non abnuunt, in iter me dabo. De Spadâ, non ausim etiam cogitare. Salutaris mihi illa aqua, sed neque nunc excussim,

tum,



tum, & faciem illam *δορυβώδην* nostræ fugæ. Quin potius videbo, quid peregrinatiuncula leuamenti dabit, & vigor hic Veris,

— *cùm tempestas arridet, & anni*

*Tempora conspergunt viridantes floribus herbas,*

an non & ego reuirescam? videbo, inquam: & tamen cum Pindaro sciam, *θνατὰ θεοῦ ἔλλαν μέλη, καὶ τελευτὰν ἀπέναντον γὰρ ὁππασόμενος*. Corpus hoc illuc it: anima, quò Deus & tu vocatis. O gratum mihi autem de precibus, te faciente, pro me cõceptis! Iuuabunt, imò iuuerunt, & meliorem me, si non firmiorem, reddent. Caput in illo est; de cetero,

— *improvisa leti*

*Vis rapuit, rapit quæ gentes:*

Tu vale mi Pater, breui oculis, vt spero, vsurpande. Louanij, Kal.ipsis Maijs, ∞. IOCIII.

Saluto ex animo R. P. Flerontinum, & P. Schondonchum, quem videbis.

## EPIST. XXII.

*In Rusciam.*

DEMETRIO SOLICOVIO, *Archiepiscopo Leopolitano.*

**P**OPULARES tui apud nos sunt, Palatini Sandomiriensis duo filij; mihi crede, hoc nomine gratiores, quò parentem & vicinum & amicum tuum significabant, atque hoc titulo mihi iam carum. Non blandior, sed te, non in Poloniâ tuâ solum, sed Europâ, inter eximios habeo, & rarum sidus in tenebroso isto, & quod veterem nobis squallorem minatur, æuo. O ex corde votum! adsim & conuiuiam talibus! sermones & iudicia misceam, doceam inuicem & discam! Fatum meum vetat, iubet inter bella & militares mores aut homines consenescere: si tamen hoc datur, & non Parca ante ipsum senium me tollit. Languor adsiduus dicit, & eò ducit: ac iam quidem fui ante duos menses ad ipsas fati portas. Tamen gradum frænauî, redire cœpi: sed nescio an non, vt Eurydice illa Orphei, reuocandus. Epistolas meas vltimas vidisse te censeo, & ad te quasdam: parabam totum *Senecam*, itemque *Philosophiam vnâ Stoicam*: vires abnuunt, & animosè cœptis languores isti intercedunt. Te autem, Ill<sup>me</sup> & Reu<sup>me</sup> Domine, longum valere bono Reipublicæ ex animo opto. Louanij, III. Kal. Iun. ∞. IOCIII.

EPIST.

EPIST. XXIII. *Cracouiam.*

BERNARDO MACIEIOWSKIO, *Episcopo  
Cracouiensi, Duci Seueriensi.*

**N**EPOTES tui cùm ad nos venissent, & sedem figere destinarerent in hoc, vt ita dicam, bonarum artium foro, & quadam panegyri: non indecorum putavi si hoc ad te scriberem, & simul de operâ significarem, quam illis in laudabili hoc proposito voui. Nam etsi publicè satis impediore lectionibus, & priuatim scriptionibus (è quibus quædam publici etiam iuris factæ sunt) tamen decerpendum aliquid temporis censui, quod horum institutioni, aut certè directioni impenderem. atque id Reipublicæ etiam adspectu, cui hi tales è primariâ nobilitate meritò destinantur. Sicut medicus libentiùs atque animosiùs operam impendit in Rege aut Principe curando, cuius salus salutis alijs esse potest: sic nos in ijs docendis, qui prodesse consilio atque operâ pluribus possunt. Progressum iam eos aliquem fecisse ego video, & idoneo Præfecto concreditos aut inspectori: vt porrò in hac viâ pergant, metæ magis & magis accedant, mihi, quamdiu in his locis erunt, seriò curæ erit, & pro ingenij atque otij mei copiâ adnitar. In quâ re non aliud equidem, quàm ipsos & Reipublicam, vt dixi, specto; præmij alterius neque appetens, neque (liberè dicam) egens. Tuâ tantum amicitia, aut certè beniuolentia, si mihi accedit, operæ pretium grande erit: quem ego Virtutis & Dignitatis causâ colo atque æstimo: Deum precatus, vt te Reu<sup>me</sup> & Ill<sup>me</sup> Domine, diutissimè Ecclesiæ & Reipublicæ velit esse saluum. Louanij, III. Kal. Iulias, ∞. MDCLIII.

## EPIST. XXIV.

GEORGIO DE MAGNA CONCICE MINSCHETZ  
*Palatino Sandomiriensi, Capitaneo generali Leopoliensi,  
Samboriensi, Medicinensi.*

**L**I B E R I tui ad nos, studiorum & animi excolendi causâ, venerunt: atque ea mihi occasio scribendi. Grati sunt, quia à longinquis illis oris, quia à tali parente & stirpe; grati à se  
Dd etiam,

etiam, quia inclinationem vel ardorem in optimas artes præferunt, quibus cœperunt imbui iam, non solùm tingi. Equidem tibi hanc talem stirpem, & ex eâ gaudium, gratulor: hortor porrò habere in his animorum gymnasijs, & quidem à te abiunctos, vt virtuti & doctrinæ magis iungantur. Sicut agricolæ, qui plantaria habent, nouellas stirpes trāsferre & transferere è natali suo solo in aliud solent, vt laxius lætiusque crescant: sic oportet liberos, non genitali solo affixos sterilefcere, sed in aliud aliudque translatos robur & incrementum fumere, & succrescere in Virtute. Nectamen longum hoc nimis esse siuadeo. & sicut qui ignem è viciniâ petunt, non illîc desident, sed accepto eo domum redeunt, atque ibi accendunt: sic istos censeo velut scintillas & fomites apud externos quærere, domi deinde accendere, & sibi alijsque allucere. Ita nati sunt, ita à te formati & destinati, vt ad Rempublicam admoueantur, & in magno ac laudabili illo Regno sint vtilia quædam membra. Deus hoc dabit: ego, quamdiu hîc sunt, adiuuabo & adnitar, & in viâ benè cœptâ dirigam, & manu ac voce ducam ad salutarem metam. Hanc fiduciam te mei habere rogo Ill<sup>me</sup> Domine: imò & consilij & auxiliij mei in aliis etiam copiam facturum, vbi copia quidem mea feret. Vale Ill<sup>me</sup> Domine, Regno, Regi, Tuis. Louanij, III. Kal. Iunias, ∞. IOCIII.

## EPIST. XXV.

CAROLO, *Duci Croyo & Arschotano.*

**I**LL<sup>ME</sup> ET EXCELL<sup>ME</sup> PRINCEPS, An non extra decori limites (da veniam) Ext<sup>ia</sup> tua abit, quæ etiam de valetudine meâ inquiri, & sollicitam se super eâ ostendit? Non sum tanti, vt tanti Principis curam merear: sed habere tamenuuat, & hoc etiam vinculo officia mea tibi adstrinxisse. Dicam igitur, quia petis, id est iubes. Paullò melior & commodior videor, sed animo magis, quàm corpore; & ne dissimulem, isto videor ad tabem aut marcorem paullatim ire. & vt apud Ext<sup>tiam</sup> tuam liberè me aperiâ, non inuitus ire: siue tempora ista, siue vniuersè sortem adspiciam generis humani. Tempora quidem ista, sic tenebrosa aut turbida, vt neminem

neminem paullò magis honesti, & vt sic dicam cælestis animi, delectent: imò vix viles & terreni isti subsistât, in adfidiis bel-  
lorum nimbis aut procellis. Et quâ meliorum spe? cùm finem belli habebimus, alia timemus quæ nō lubet dicere: & ad sum-  
mam, decretum cælitùs videtur opprimi Belgas, aut perire. Itaque an infelix ille, qui præsentia aut imminencia mala eua-  
dit, & in portum nauigat ab omni istâ tempestate tranquillum? Si etiam communem sortem vitamque, vt dixi, consideras: per Naturam suaue est viuere, per Rationem non insuaue mori. Vita quid est, aut quid amœni habet? Qui optimè de cælo lo-  
quuntur, cum mimo aut ludo comparant; qui intentiùs & se-  
ueriùs (addo & veriùs) cum carcere aut custodiâ assimilarunt. A natali nostro die, si inspicimus, lacrymæ & gemitus sunt; & cùm grandiores eorum pudet, suspiria & internæ curæ. Quis dies aut hora vna læta, cui non denæ aliæ, velut ex decreto, suc-  
cedant & excipiant? Sicut in mari fluctus semper est, etiamsi non tempestas: sic in vitâ motus & angores, etiam cùm non do-  
lores aut lamenta. Vera me dicere, etiam Ex<sup>tia</sup> tua, in illâ altio-  
re suâ fortunâ experitur: & quid censes homines iniuriæ & con-  
tumeliæ magis oportunos? Atqui in malis viuere, quæ vita est?  
& quis, cùm portum aut pausam Deus ostendit, refugiat, & eli-  
gat iactari? Non mihi ea mens est: qui didici obniti fortunæ,  
& constantiâ vincere: sed idem, Deum sequi, & cùm ad se vo-  
cat, alacri gradu, imò cursu, eò ire. Itaque, Ill<sup>me</sup> Princeps, nihil  
mali aut anxij morbus hic meus minatur, aut adferet: homun-  
cionem vnum eripiet; & Deus bone, quor meliores me & gran-  
diores? Tamen, vt in epistolâ & priuatâ scriptione maneam,  
clientem vnum Ex<sup>tia</sup> tuæ eripiet, fide & obsequio valdè prom-  
ptum, & heroïcis tuis virtutibus addictum. Hæc omitto, &  
Deo permitto: ad publica venio, quorum cura magis te spe-  
ctat. In ijs lenta omnia, nec adhuc læta: & nuper Fridericus  
Spinula ereptus, quod momentum in rebus maritimis habeat,  
non prompto alio successore. Triremium administratio, nostris  
parum gnara. E Britannîâ scribunt, vndecimâ huius Regem  
venisse Londinum, & illinc ad arcem Groenwitziam iturum,  
donec ad pompam coronæ publicitus imponendæ omnia sint  
parata. Magna scæna & splendor (ita ingenium gentis est) futura



videntur. Scribunt & Legatos Batauos iam appulisse, sed animi parùm lætos, nec in Rege hoc nimis sperantes. Quid sit in re, nescio: illud bonis auctoribus habeo, illum artificem simulandi & dissimulandi esse, si quisquam unquam fuit. Incendium Rodiensis vrbeculę non me admiratione affecit: illud de scintillis sic longè iactis, affecit: atque id sine vento. Genij his talibus interueniunt: &, vt in re nouâ aut prodigiosâ nequid mali augurij sit, Deum precor. Eumdem Ill<sup>me</sup> & Excell<sup>me</sup> Princeps, vt te columen nostrę Belgicę incolumem diu conseruet. Louanij, pridie Kal. Iunias, ∞. ICCCIII.

## EPIST. XXVI.

Tornacum.

DIONYSIO VILLERIO V. R. S. D.

**B**ALTHASAR noster iam apud te est, aut fuit, vt ex literis eius didici: & ergo ex illo certiora de valetudine meâ iam habueris; certiora, sed non lætiora. Quid nobis blandiamur? sum adhuc in valetudinario: & vt lumen, quod exstinguitur, flammulas interdum iacit; sic mihi fieri videtur. Velut refurgo interdum & exorior, sed fortasse lapsurus. Tamen nunc iterum satis bellè, & ridere mea Sors vidēbatur. Quid est? vitam noui, factam mori, & cupitor longæ illius numquam fui. Varronis illud placuit: *Non eos optimè vixisse, qui diutissimè vixerunt, sed qui modestissimè.* Hoc verbi postremini amplector: & certè Modum in omni vitâ, sed & Modestiam in animo amaui. Alij philologi aut litterati (audacter dicam, & examina) meo æuo, à vano multum traxerunt: ego strinxi, & interiùs adduxi; & ad vtilia aut profutura, non ad splendida aut famosa tantum respexi. Rarò scripsi, cui non sapientiæ aut prudentiæ, etiam vbi locus vix videbatur, monita aut præcepta sint inspersa. Hanc laudem mecum feram; & illam optimæ conscientiæ, publico elaborasse, nullius famam minuisse, aut per obrectatiunculas auctum meam iuisse. Amplius dicam: Pauci an nemo, meo æuo, singularia argumenta aggressi sunt, aut pertractarunt: ego feci, in Constantiâ, in Politicis, Saturnalibus, Militiâ, Admirandis: & sparsim etiam materias, quæ vsui aut oblectationi generi humano essent, disposui & ordine digessi. Ordine, quem  
in

in omnibus scriptis amaui : & super novos, atque adeò (an non superbum erit?) super veteres vsurpauì. Sed quò me animus rapit? ille, qui apud te esse autumat, & in sermone liberè, ac licenter etiam, garrere. Vale vir amicissime. Louanij, postrid. Non. Iun. ∞. 16311.

## EPIST. XXVII.

*Duacum.*BARTHOLOMAEO PETRO LINTRENSI, *Doctori Theologo.*

**A**NIMO magis, quàm verbis profiteor, gratas mihi tuas litteras, & affectum qui illas dictauit, fuisse. Ego verò tale nihil à te meritus, nisi occulto item aliquo affectu, quem bonâ fide testari possum reddere me pari, vel auctiori modo. Inuitas ad hospitium: libens vsurpem, si illuc veniam; imò iam nunc promitto facturum, si venio. Veniam autem? an ad alia & meliora loca Deus inuitat, quem Ratio & Necessitas audire me iubent? Videor deserturus hæc infima & terrea, ô optabili permutatione, si diuina benignitas ad illa supera me ducit! Quis, non dicam linguâ efferat, sed mente felicitatem capiat, vbi regnum est Diuinitas, & lex Caritas, & modus Æternitas? vbi vita non nisi gaudium, & sensus omnis in Deo defixus, in consortium felicitatis eius transit? O ego illuc Pietatis alis subuolem! ô ego tuis & piorum votis adiuuer, & illo velut vento adspirante perueniam, corporis id est terræ huius securus, quidquid eâ fiat. Pondus est, vinclum, imò carcer: & quàm multis Affectuum nexibus nos stringit? Auaritia, ambitio, libido distrahunt; & meas atque alienas catenas video, & quosdam pluribus ijs vinctos. Solue Deus, cùm visum, & in libertatem illam primam affere, tu, generis humani seruator & vindex. Vides Reu<sup>de</sup> & Eximie Domine cogitationes meas, nec inuitus apud te, aut indecorè promo, talium magistrum. Vt tamen de me aliquid toto, id est duplici parte, dicam: laboro, sed per incerto morbo. atque adeò morbus esse non videtur; fortassis ideò grauior, & cum discrimine censendus. Sto, ambulo (nam iacere hæc alacritas vix potest) tamen delinquo viribus & deficio, & nec animus munia sua satis vsurpat. Sicut in citharâ cùm nerui detriti sunt, aut dissident, etiam artifex, constante licet arte, non

cam exserit, & vitium ab instrumentis ducit: sic animo huic fit, per se prompto & gnaro, sed in dissonis chordis concentum non edit. Fero, & colo te & amo, & saluere toto animo cupio. Louanij, vii. Idus Iunias, ∞. MDCLIII.

## EPIST. XXVIII.

*Leodicum.*IO. CHOKIERO I<sup>do</sup> S. D.

**I**N languore me litteræ tuæ deprehenderunt, sed amor animi manumq; erexit ad breue hoc responsum. Ais in conuiuio te fuisse, atque ibi de comitijs Romanis actum, ac fuisse qui Sexagenarios etiam admitteret: cum quo scito me sentire. Quis enim credet illam ætatem à suffragijs exclusam, quæ à sententiâ in Senatu non reijciebatur, vbi de summâ republicâ res erat? At prouerbium vulgatum obstat. Non obstat, saniore sensu. Nempe sexagenarij non adaçti ad suffragia, liberi erât si vellet: sed & accedebant, si vellet: non aliter, quàm milites scribi poterant etiam quinquagenarij, & scribebantur cottidie, sed suâ voluntate. Profectò in tanto populo millia aliquot sexagenariorum erant, quibus corpus & mens valida; cur suffragium ijs adimeretur? Si factum, fieri non posset quin apud Ciceronem, aut alios, talis rei crebrior mentio, & quòd fraude aliquando euocati à Tribunis venissent, numero augendo. Lis, dico, aut controuersia super hac ætate interdum fuisset. Ego ita arbitror, nec loca omnia Festi, Nonij, Ciceronis aliter eumcunt. Noto etiam, hoc de Pontibus suffragiorum recens fuisse, & à C. Mario Trib. pl. latum: prouerbium ipsum puto antiquius, etsi alij huc trahunt. Habes breuiter meum sensum, habe & affectum semper in te inclinatum. Louanij, prid. Idus Iun. ∞. MDCLIII.

## EPIST. XXIX.

*Eodem.*PETRO ORANO I<sup>do</sup> S. D.

**A**H triste nobis mi frater, de tuo meoque fratre, an patre dicam? Nam utroque loco illum duxi atque habui; illo, ob affectum; isto, ob curam & directionem quam ab illo puer admodum in Vbijs accepi. Atqui abiit, & quidem cum à vobis



bis & optimâ matre seiunctus esset, cui luctum, scio, æternum reliquit. At tibi quid? luctum, sed ratione & robore vincendum. Ratione, sapientiæ mysta es; robore, vir es, & sexus fortem, & ut cum Senecâ dicam, perpericulum magis te fecit. Non diffundor ad plura solatia: aliâs apud te in simili casu feci, & iam recenter apud Billeum nostrum, magno vulnere percussus. Deus bone, quot funera ego cottidie audio, siue & video, ipse æger & medicorum sententijs iamdiu funus? Tamen perseuero, animi (si non corporis) firmus atq; alacer: & ut statua in basi, sic ego nixus sto in Prouidentiâ diuinâ. An non ab eâ decretum, quomodo & quando mihi hoc fiet? an non optimè, & ex vsu meo, decretum? Ita credere me par est; & si credere, non repugnare aut detrectare, sed volentem ceruices dare æneo huic iugo. Franciscum nostrum Romæ in omni modestiâ & industriâ agere, ab alijs accepi: nam inquiri, & cordi mihi est, atq; erit. Gaude, & in mortuorum mœstâ memoriâ, solatia hæc pete atque adhibe à viujs. Tot liberi, & iam nepotes etiam sunt: & domum ORANORVM fundatam, & validis columnis nixam, relinques. Inter liberos, meam Isabellam per te dissuauior: fac, ne me falle. Vtinâ coràm possim! volo iamdiu, & valetudo adigit: discrimina repellunt, & omnia vestra intuta. Vale Vir Cl<sup>me</sup>, & semper germanum in modum meus. Louanij, xvi. Kal. Quinctiles, ∞. IOCIII.

## EPIST. XXX.

Romam.

PHILIPPO RVBENIO suo.

**S**VAVE est rectè vos valere. Ego abire nuper minabar, neque nunc firmiter consisto. vires vacillant, & æstiu iusti immo-  
dici calores non sunt reparandis. Spadam inuitant aut mittunt multi: sed in auxilio incerto certa nimis pericula terrent. Sæpè, ita me Deus, te præsentem optauì, & propius si abesses, euocarem. Nunc fatis parendum est. Cœpi iterum legere, sed animo parùm vegeto aut alacri: nec de perseuerantiâ satis confido. Quid est? homo sum, ad finem eo, & cursum meum non sine aliquâ gloriâ peregi. Valere te & viuere opto, gemmam inter meos Belgas, quod vero præfagio iamdiu dixi. Ama me, ego te æternùm. Louanij, iv. Kal. Iul. ∞. IOCIII.

Prius-



Priusquàm has obsignarem, alteras vltimasque tuas accepi, quæ erant de titulo doctoratus. Hoc quoque gaudeo, & ex animo gratulor. Tempus vobis emanfionis prorogatum non inuitus audio, si non producitur. Æstatem hanc ego lubens donem, vltià non donem, nec censeam ex vsu esse. Quid nisi delectariuncula illic est, & sensuum atque oculorum occupatio? quæ ad animum referatis, pauca; & pauci, qui illi student. Magni etiam animi est, ac pænè addam felicitis, inter tot praua aut deprauantia, rectum stare, & manere in æquâ iudicij lance. Facio equidem, sed apud me: si promam, vix video fructum. Itaque Romanus ille Sapientiæ doctor, quem dare moliebamur, exire in scenam tardat, non plausu, sed pastoriciâ fortasse fistulâ excipiendus. Ille quidem

*Καὶ δυνάται φάσαι πικρὸν ἔπος, ἢ δ' ἔσοθ' ἰόθαι*

sed apud quos, aut quibus? Estisne amatores aut cupitores talibus, numero tot, quot Thebarum portæ? Græcarum illarum, non Ægyptiarum dico. Desino, Timonem non refero: te mi Rubeni amo. Postrid. Kal. Iulias.

## EPIST. XXXI.

Mechliniam.

NICOLAO OVDARTO suo S. D.

**C**REDO rediisse te è peregrinatione Gandensi, mi Oudarte: an non & illic Vriendtium vidisse? poëtam inter Belgarum primos, & cuius libellos editos missosque ab ipso vidi, & in multis equidem probaui. Ingenium facile, subtile, igneum est, dignum quod amemus & estimemus. Ego etiam nunc morbi, aut si mitius vis me loqui, languoris liber non sum: ideoque & cœpta mea iacent, nec Philosophicum illud ædificium absoluo. O arcem altam, munitam, securam in fortunæ insultus, quam è Stoicæ Sapientiæ ruderibus instituiamus! nec scio an exædificatam probabimus, molliori (cur rem non dicam?) & ignauiori huic æuo. Absoluemus tamen, nisi diutius languor impedit, per quem ego quidem nihil conor aut scribo. Tantum DE VESTA ET VESTALIBVS *Syntagma* dedi, quod Præfuli vestro & nostro visum est inscribere, vt rem sacrorum. Weerdus Senatoriâ dignitate, in soceri locum, auctus est: quod gaudeo,

gaudeo, & titulumhunc in familiâ nostrâ retentum. Etsi propriè mea LIPSIORVM stirps defecit, & ego vltimus sum huius gentis. Quid refert: stirps pereat, nomen ego propagabo (lubet animosè, & cum poëtâ loqui) — *ab ortu*

*Solis, ad Hesperium cubile.*

Publica tangere pænè reformido. Læta scribere non possum, mæsta non lubet: nec querelas quidem miscere super statu hoc rerum. Dicam vnum verumque verbum, & id animosè: in totâ Europâ, atque etiam Asiam & Africam addo, nihil pro veteri splendore & gloriâ geritur; neque consilijs & institutis, quæ obtinent, video gerendum. Quid gerant? ne capiūt quidem aut intellegunt sublimia, adeò non affectant. Vices hæ rerum temporumque sunt. & vt in anni decursu modò hiems æstasque est, & freta interiecta; sic in mundi & æui lapsu, lux, tenebræ, calor, frigus & quæ media inferuntur. Prudentia hæc videre est, sapientia ferre: & collum sponte submittere fatali illi iugo.

*Nam quantum hoc regnum est, quod regibus imperat ipsis?*

Vale mi optime Oudarte: &, vt omnia mutant, in amore constemus. Louanij, III. Non. Quinctil. ∞. IOCIII.

## EPIST. XXXII.

FRANCISCO MARIAE SAGRI ILLYRIO S. D.

**T**v verò non humanitatem meam require, sed fidem alienam, aut fortunam accusa, per quam factum vt litteras egotuas, præter has vnas, viderim nullas. An silentio dissimularem? non est meum, vtrique erga tales, non solum eruditione commendabiles, sed loco & habitatione insignes. Si enim rectè verba capio, Ragusia te habet ciuem aut incolam, nobilis Respublica, & quæ Barbariam à nobis diuidit; legibus & moribus polita. Itaque de neglectu tui suspicari omitte. nam vos tales amare ego didici, sed & officijs paria facere, quo fine valetudo quidem permittit. Quæ sæpè, imò plurimum, afflicta, manum conanti iniicit, & intercedit ijs quæ honestè aut comiter velim. At in animum ius tamen non vindicat: qui est, vir doctissime, pariter in te pronus, & iam nunc affectu & amore fideliter se iungit. Louanij, v. Idus Iulias, ∞. IOCIII.

E c

EPIST.

## EPIST. XXXIII.

Romam.

SERAPHINO OLIVARIO *Sacri Palatii*  
*Auditori, & Patriarchæ Alexandrino.*

**L**ITTERAS ad te mitto, vellem animum in ijs possem : sic tuum, vt cuiusquam ex interioribus, & toto asse amicis. Quæ caussa pignerauit? tua virtus & prudētia, in illo orbis theatro nota & prædicata: & propriè affectus in me tuus, diu me celatus, & qui ad Vestalis fauillæ instar in secreto pectoris tui, o quàm mentior? vrbis illius volui dicere, latuit: sed & sic mentior, ad me venit, sermo & facta tua aperuerunt, & didici non certiore aut fidiorē amicum in magnâ Româ mihi esse. Unde merui, vir æqui & boni scientissime? non merui: tua virtus & bonitas est, quæ benè mihi fecit, & dixit: ipsa sibi caussa, vt Deo in genus humanum amor & benignitas est. Sed de iudicijs factisque tuis (ita loquendum est) primus mihi bonum nomen MACARIVS indicium fecit: & postea PVTEANVS meus, qui te vidisse gloriatur & audisse. Obsecro, & PHIL. RVBENIVM meum cum GVIL. RICHARDOTO & IO. BARONIO noris, sed primum illum ingenio & doctrinâ laudabilem inter paucos. Probitatem & Modestiam addo, sine quibus hili non fecerim aut pili illa. Ecce pauca & prima verba. pauca, quia vt in angusto exitu aqua impetu veniens intercluditur: sic os aut stilus meus sistuntur ab affectu, qui impetu & calore erumpit. Agnosce, quæso: & agnoscentem iam amare perseuera, saltem illo amoris tui fructu. Louanij, XIII. Kal. Septembr. ∞. IOCIII.

## EPIST. XXXIIII.

Florentiam.

## CVRTIO PICHENAE.

**I**AM NVNC litteras tuas accipio, & ecce responsum. Te ego differam, veterem illum meum, & ante viginti circiter annos, cùm Viennæ esses, amicum? Sic appello, & quamquam non dextra aut sermo, tamen scriptio & litteraria ista, vt sic dicam, contesseratio nos iunxit: & fideliter iunxit, animi studij-  
 que



que non disparet, & iudicijs ad optima consentientes. Eò gravior ista nunc appellatio, etsi ex interuallo : nec mirum : nam & locorum interualla abiungunt. Vidisse te mea video improbulo illi rescripta : in quibus quòd te honestè nomino, affectui non dedi, sed iudicio, quod in animi penetrati de te concepi foueoque. Tuo merito ita debeo. pauci bona amare, capere, asserere idonei : tu inter illos naturæ & industriæ tuæ beneficio censeris. De dissensu alibi à me, nihil est : abite mancipia. liberi sumus, genere & sensibus : promere liceat, cum lege Modestix, & vt Inuidientia aut Acerbitas absint. Ego verò nec imperitiâ quorundam offendor : si simplex ea sit, nec de Calumniâ sumit. At mi Curti amo te pectore, melioris pectoris virum : nosse propius vnà tecum voueam, sed voueam tantum. Nam etsi Italiam reuifere mihi votum; intra illud maneo, rei experts, & triste Fatum Belgicæ meæ adstringit. Quid, quòd vxorium etiam vinculum, vt de te scribis, iam diu mihi est? Traho compedes, & longum aut altum subuolare ijs quoque vetor. Edidi nuper Epistolas; doluit (in occasione, & verè dico) quòd ad te cum plures dederim, nullas haberem, exemplaribus in migrationibus meis furto, casu, neglegentiâ amissis. Sum nunc in Senecâ, & Stoicis : illum & hæc dabimus illustrata, & ab obliuione vindicata. Nam Stœx quid præter nomen ferè notum est? Hæc agimus, decorè fortasse, in æuo grauiore, grauiora ista & sapientiæ studia tractantes. Valere te, & porrò me amare, atque etiam affari, opto mi Curti. Louanij, postrid. Idus Septembr. statim vt tuas legi, ∞. IOCIII.

Quæ notasti ad Tacitum etiam, vidi. Illud de Othone, *prætor polluebat*, minùs perplacet : alia in ipso Tacito consideranda sunt : neque nunc licet.

## EPIST. XXXV.

Veronam.

ANDREAE CHIOCCO V. C.

**D**A veniam, da veniam tarditati scriptionis : & quia medicus es, morbo hoc indulge. Scis quàm affligat & vires exhauriat lenta illa & verè *δ' ἀνία νῆσος* : cum quâ fatum mihi est conflictari, nec superare. Resistotamen, & iterum viriculas ali-



quas à superiore illâ deiectione sumpsi. Vis argumentum? etiam scribimus, edimus: imò iâ edidimus breue aliquod DE VESTA ET VESTALIBVS *συγγράμματα*, quod tamen malo te è secundâ editione, quam meliorem auctioremque paro, videre & donum meum habere. In istâ, adflavit me alibi morbus, quod agnosco, & emendabo. Sum etiam in SENECA totus, & ipsum & obliuiam illam Stoicam Sophiam dabo in lucem, quatenus in raritate scriptorum illorum licet, aut etiam opus est. Neque enim ambitiosè scribimus, & in Periergiâ quadam Polymathix laudem affectamus. Vtilia mi Chioce, utilia sequi, utinam assequi, mihi scopus est. Sed videbitis, & arbitrari breui vobis erit. At tibi, ô optime, quas condignas gratias pro affectu, atque etiam curâ mei dicam? Habebo facilius, & mente concipiam, quàm verbis promam. Consilia autem tua sana, & proba: & communiter vii ijs possum, singulariter haud facile est in absentia & diuulsione nostrâ. Quòd significas esse inibi amantes quoque nostri, gratum est, & Veronam totam magis amo, etsi vel à Scaligero olim vel à te nunc caram. Academiam illam amplector, quam sic attollis, & eius Principem Octauium Cepollam. quid M. Antonium Montanum? cuius ego patrem Clarissimum Medicum iamdiu manibus tero, & panè mente teneo, vnicum mihi ab annis viginti in hac interiore & occultâ inualetudine rectorem & ducem. Saluta, amabo te, & alios illustres viros quos adiungis, Comitem Augustinum Iustum, & M. Antonium Madium Equitem. Viuere me inter tales, & mitiore illo cælo, tu voues, neque ego abnuam: sed ætas & valetudo retinent, & vel Constantia mea, vel Fatum. Alioqui publicæ nostræ res *λυπηρά*, & vel fugæ metum faciunt, vel si honestè vis loqui, discessus. Ill<sup>mi</sup> vestri scripta ad nos non perferuntur: sicut pauca quæ Italia edit. Occasio mittendi si sit, libēs video, & plura tua mi optime, & doctissime, & prudentissime Chioce. Louanij, xvi. Kal. Octobr. ∞. MDCLIII.

EPIST. XXXVI.

Romam.

ANTONIO PERSIO.

**B**ENIVOLENTIAM tuam veterem erga me, quam nunc denique litteris testaris & aperis, sum amplexus equidem, vt debeo

debeo & soleo talium virorum, quibus votum & studium est me probare. Noui te iamdiu de famâ & nomine: etiam scripta tua quædam vidi, in quibus (etsi grauiora studia te vindicant) amorem & scientiam profiteris humaniorum istarum, id est veterum litterarum. Nec ab alio fonte amor iste tuus in me dimanat, qui videmur tibi in hoc genere supra plebem litterionum aliquid esse. Conati sumus, de successu hæc aut sequens ætas iudicabit. Quod autem scribis esse, qui tuum illud de Calidæ potu syntagma (mihi lectum olim & probatum) impugnant: non miror, vt cacœthes est huius æui, pænè dicam vnici ad æmulationes aut pugnas. Miror tamen in re tam clarâ & testatâ posse obduci, quod vel apud improbos colorem habeat Veritatis. Præter ea quæ ego in Electis notauimus, multa sunt quæ ad inferius vsque æuum mansisse morem euincunt: atque etiam apud exterâs & longinquoies gentes. De Essæis, in Philone Iudæo legas: *Vinum per illos dies non præbetur, sed aqua limpidißima, aliis quidem frigida,\* calida autem his qui inter seniores delicatius habentur.* \* *Οεφιδν δδ κρσ*  
*αρεσβυλα- των τοις αλεγοδαι- τοις.*  
 Et vides in delicijs fuisse, & tenuioris fili aut valetudinis hominibus propinatum. Quid autem? *Decoetam*, vt aiunt tui quidam refragatores? Ridiculum: & veteres probè hanc distinguere norant, & est ea inuenti recentioris. In Ammiano, Arriano, alijs, exempla alia sunt: pudeat adducere, & in Bacelos istos acrius pugnare. Habes meum sensum: habe & amorem, quem fideliter tuo repono. Louanij, postrid. Kal. Nouemb. ∞. IOCIH.

## EPIST. XXXVII.

Romam.

GVILIELMO RICHARDOTO suo S. D.

**P**OSTREMA tua scriptio melætificauit, verè loquor, causâ duplici. quod & redire ad nos haueres, tui certè cupientes: & quod bonum rectumque iudicium promeres, in toto genere vitæ. Non æstimas, quæ hodie multi, plurimi, pænè omnes, vanitates, fumos, fucos: ipsam virtutem amas & quaris, cui nati sumus & facti. Beatam mentem! & mox ab eâ vitam, si perseueras. Quidni autem perseueres? imò cum æuo consuminabitur Ratio, & magis magisque illâ duce, contemnenda fastidies, appetenda adhærebis. Iuuaret frui te, & hos

sermone ferere, & fructum legere meæ olim-institutionis. Et si Rubenium etiam illuc habes; fallor, aut paribus tecum iudicijs, & qui sequi possit (malè dixi) imò comitari, aut præire. Decurrite simul hanc viam, quò? ad sublimem illam Sapientiae arcem. O suaues meos hoc nomine in Senecâ labores! vnâ tamen re insuaues, quòd dare aliquid æuo debeo, & Critica aut Antiquaria miscere: sed modicè meherclè & parcè. Qui Senecam aut me eo fine leget, ne legat. Sed satis philosophiæ: priuatim valetudine mediâ sumus, publicè malâ. De Busco illo Ducis periclitabamur: nunc minus, vt videtur, præsidio inducto, sed ciue parùm volente. Adhibita tamen à Principe est comitas, & Theffalica simul quædâ persuasio, id est, \* *πειθαργυμ*. Ad corpus seruandum, membrum aliquod vri aut angi, iustè non improbemus. Sed heus, Baronius noster quid? manet, redit, an iam redijt? Sui illum certò expectabant hoc Autumno: ego nec ab ipso quidquam adhuc, nec de ipso. At tu, vt scribis, adde operam vt breui: cupio videre te, complecti, suauari. Louanij, III. Nonas Nouembr. ∞. ICCCIII.

\* *violenta  
persuasio.*

## EPIST. XXXVIII.

Montes.

IOANNI BUISSONIO *Consiliario, & Syndico  
Ordinum Hannoniæ.*

**A**DEUIT mihi Plouuierius, vtrique nostrum amicus, & litteras à te dedit, & de te quæ vellem nuntiauit. Quid autem magis velim, quàm valere te & me amare? Vtrumque dixit, & alterum istud etiam tuæ litteræ, quæ foueri à te amicitiae ignem asserunt, imò & ostendunt ipsæ ab eo calefactæ. Iure amote, & istam tuam canam & ANTIQVI MORIS atque æui virtutem. O mi Buißoni, quàm ab eâ paullatim abimus! quàm ad alia, & non meliora, deflectimus! vrit oculos atque animum meum audire cottidie, videre, cogitare. Ego vaticinium apud te liberè promam, breui fore vt Honestum & Bonum à nobis abeat; Fucus & Vanitas, addam etiam Prauitas, succedant. Quod tamen nostrum interea munus? pro nostrâ virili illa amare & asserere, & si non alijs, nobis tamen approbare, & nec latum vnguem à Decretis flectere quæ Virtus dictauit.



dictauit. Si publicè res aliò eunt, mœsto sed patienti etiam oculo aspicere: & opem ferre cum non possis, velle. Sicut qui in litore stat, & periclitantem in alto nauim videt, miseratur & votis adiuuat, nec se tamen in mare præcipitat: tale nobis, fauere humano generi, & vbi fas est iuuare; cum non, tolerare. Prouidentia (ad quam iure prouocas) gubernaculum rerum humanarum, aspicienda est; & flectendi ad eam non oculi solùm, sed animi, & ipsa voluntas aptanda, vt sequamur non queruli nec refractarij supremam illam & immotam legem. Ecce Reges hîc in terris & Principes hoc sibi vindicât, & districtè PARERE nos volunt, vbi constat ijs PLACERE: & diuina Potentia hoc ius non habebit? Habeat, & Sapiens in animo illud vetus fideliter impressum, DEVM SEQVI. Vides me ad Constantiam hortari, spem meliorum non proponere, nisi cum ad meliora illa loca, vnde venimus, ab hoc exsilio licebit redire. Fata aspera Belgas premunt, & prement, vt cursus & series ista rerum minantur. Nam etsi in obscuro ea Deus esse voluit, & tristissima etiam Spe semper temperare: tamen à causis istis secundis ad primam licet scandere, & quid ea minetur aut moueat ab his existimare. Sed omitto hæc philosopha, quorum domi tibi est silua: de nostrâ istâ Siluâ-Ducis credo vos iam audisse, & si quid minùs certò aut liquidò, Ill<sup>mus</sup> Dux denarrabit. Qui à corpore quidem valet, ab animo non nimis alacer, neque causas potes nescire. Magnum Principis illius ingenium est, in plerisque rectum iudicium: frigus tamen aliquod (pro sæculi nostri indole) æthereo illi igni optem. Hæc ad te liberè, & alia in sermone apertius: neq; apud amicum & prudentem virum quidquam sensuum meorum velem. In occasione fiet, si viuo: si non, Boni & bonorum amans morior, & apud te testor. Vale vir Clar<sup>me</sup>. Louanij, XIII. Kal. Decembr. ∞. IOCIII.

Seneca meus breui prodibit, ipse auctor optimus (& scio te talem habere) mea scripta ad eum non semper cuiusmodi vellem, & Valetudo aut Æuum vetant.



## EPIST. XXXIX.

PETRO COLINS S. D.

**S**ERMONES tui comes nuper & benigni, nunc facta. Mittis ad me aucupij tui partem: an venationem appellabo? Equidem gratias duplices debeo atque habeo, vel affectus tui causâ, quem non temporarium sed radicibus nixum ostendis, vel doni ipsius, quod nos refecit & pavit. A me quid mittam? affectum eundem: quem repositum apud me scito, & promêdum etiam, sicubi usus erit. Ampliùs, eundem ad filium tuum porrigendum, quem studiorum causâ hîc habes. Is me adeat interdum (coram ei dixi) appellet, & consilio vel directione meâ utatur. Crescant hi tales in parentum gaudium, in adflictæ reipublicæ bonum. At tu vale Vir ornatissime, & amaturum ama. Louanij, III. Idus Decemb. ∞. MDCLII.

## EPIST. XL.

*Augustam.*

MARCO VEL SERO.

**Q**UID hoc est, quòd iterum iterumque amicus ille nuntiat, Italos populariter in me (ita loquitur) coïre? Egône aut mea tanti? Et plures iam menses, imò plus anno hoc agunt: ô partum difficilem, & cui Vulcanus aliquis cum securi meritò accedat! quidni? ut profiliat noua hæc Minerua. Et quid tandem ista erunt? vetera, in Bembum aut alios dicacem me fuisse: toties refutatum, & res ipsa ac scripta mea cottidie euincunt. Pono in meâ gloriâ, nō fuisse mitius ingenium, linguam, stilum, inter litteratos. Atquin aliquid in meis etiam culpabunt. Faciant, & si iure, fauebo: sin aliter, quæ gratia aut gloria est? Et fac etiam prius esse. non ego, non alius, qui olim & nunc scripsimus, extra culpam omnem sumus: alibi aliquid maculat: cur in vno me puram puritatem eunt exactum? Lunam me, non Solem profiteor: tenui luce, nec purâ, imò nec propriâ lucere: & multa à veteribus, omnia à Deo habere. Risi nuper qui ad Tacitum scripsit, grandiusculum opus. Quid conatur? vulgatam omnem lectionem, etiam quæ palàm falsa aut spurca est,

est, tueri contra me: contra me? imò rationem, imò libros pri-  
scos & fidos, & aliorum scriptorum auctoritatem. Et sunt qui  
Paradoxa Stoïcorum rideant: hæc non videntur? Est alius, qui  
negat Aristotelem me legisse. Quid ita? quia non omne illud de  
Religione in Politicis, ex eo adstruxi. Ipse fecit, vt audio: atque  
adeò solam Catholicam nostram tenendam illo auctore osten-  
dit. Mi Marce, quis finis erit, si ad vana hæc capita aut sensus ver-  
timur: si Bacchis istis, liceat dicere, aduersamur? Do manus &  
tergum potius, & resoluam vnâ altera que plagâ. Scribant, la-  
cessant: qui tamen isti? hoc quoque liberè, nouelli Parides, qui  
pugnare possunt magis, quàm possunt. O Hesperia, misereor!  
&, paucos excipio, verè nunc nomen illud habes. At nos non  
ideò scribere aut edere cunctamur: lubet obnixum stare, & pau-  
cis ingratissimis aut malignis, benigniora Europæ elogia obducere.  
In his triumphamus, & lauream capite ac manu tenemus; non  
à liuore aut calumniâ eripiendam. Da veniam exultanti. non  
soleo: sed isti proteruuli & à Modestiâ deuij, me quoque extra  
viam, dum pello, leuiter abducunt: & comitor, dum commit-  
tor. Redeo, & fileo, & saluere te Germaniæ tuę magnū & lon-  
gum decus opto. Louanij, Idib. Decembr. ∞. MDCLII.

## EPIST. XLI.

IO. VERGERIO AVRANO suo.

**V**ERGERI mihi care, care Musis.  
An non dixero? cuius ecce versus  
Et sensu lepidos, & elegantes  
Verbis vidimus: atque eos bilingues.  
Nam linguâ patriâ, & simul Latinâ  
Scripti erant: quod amare & approbare  
Et vetus queat, & noua hæc Poësis.  
Maecte. tene ego censeam hæc minora  
Sic industriè habere? te seueræ  
Addictum Sophiæ, & libris sacratis?  
Quos tractas iuuenis, virente in æuo,  
Tali iudicio acrimonia que,  
Ætas vt tibi vel senecta cedat.

Ff

Vix

Vix lanugo tuas genas inuinbrat,  
 Barbatos tamen ipse ego magistros  
 Te laceffere, quid laceffere? addam,  
 Vidi vincere. perge porrò summa  
 Laudis tangere: sed Modestia vsque  
 Assit. sic tibi laus perennis assit.

Vides? tuus me amor & calor incendit, & versus adegit fundere, an versiculos? Verè istos. breues & leues sunt, etsi affectus in te largus & firmus. Quod bonâ fide, & veteri Gallico candore, habe dictum. Vale, in Musæo nostro, 111. Nonas Ianuar. ∞. IOCIIII.

### TESTIMONIUM.

**V**IRTUTEM qui amat, agnoscit; qui agnoscit, promouet, & gaudet plures cultores eius esse. Idè mihi grata indoles, & cum indole studium, IOANNIS VERGERII AVRANI Baionensis: quem à quattuor circiter annis in hac vrbe & Athenæo noui, optimis semper artibus operatum, & præsertim Theologia, cui Principi scientiarum sublime & subtile ingenium suum addixit. Quæ experimenta & pericula ego vidi? & nuper vtique, cùm vi. Kal. Maias de vniuersâ Theologiâ, in publico cœtu, solenni Disputatione respondit: sic promptè, argutè, firmiter, vt cum admiratione voluptatem gigneret in animis auditorum. Seria fide hoc testificor, & Deum precor prouehere hoc ingenium suo honori, reipublicâ Christiana bono, cui natum auguramur. Louanij, 111. Idus Maias. ∞. IOCIIII.

Iustus Lipsius Professor, &  
 Historiographus Regius.

### EPIST. XLII.

IOANNI AGUILARIO ALVARADO.

**L**IBENS ego te admisi, non vt ad tutelare ingenium, sed amicū, & iamolim in te animo affectum. Auunculum habes, virum inter claros clarissimum, & verâ virtute cōspicuum, qui hoc à me impetrauit, vt vos suos quoq; amarem. Feci equidem



dem feriò, nunc magis cum tu à te causam augendi affectus præbes. Epistola tua tota bonæ, & vt rem dicam, altioris, id est ætheræ illius indolis ac feminis est: ô mi adolescens, illuceamus, & per Virtutis ac Doctrinæ viam nitamur. Doctrinæ, inquam, & hanc adde. Nam neque consummata satis sine eâ ipsa Virtus est, aut certè parùm ornata, vel etiam instructa, ad suum vel alienum vsum. Vidésne arbores quasdam sine cultura crescere, & folijs lignisque luxuriare? sed alius fructus vix adest, & vmbra ac speciem modò præbent. At in cultis, & humanâ manu factis, in sitione etiam emendatis, vides vsum multiplicem, & fructificare, non solùm obumbrare. Quæso te, imitare. nomen tuum vide, ab Aquilâ est, alta & honesta pete: ætatem vide, apta institutioni & velut culturæ est, frui dum licet, ne Pœnitentia postea succedat, in quâ tu dolcas, alij rideant, occasione lapsâ. Clausula est, ego te amo & amabo, fauebo & fouebo quoque: sed si tu ipse te, & dignum geres sanguine, è quo ortum ducis. Nauigantes Cynosuram respiciunt: tu auunculum, non aberrabis. Vale, & cum nouo anno nouum impetum ad optimas artes cape. Louanij, Nonis Ianuarijs, ∞. LCCIII.

## EPIST. XLIII.

*Augustam.*

MARCO VELSERO.

**E**N ad Polam nostrum. quomodo nō meum, qui sic amat? Et si iudicium & veritatem requiro, & plures mecum. Ad te satis longam epistolam nuper dedi, super illâ Bononiensi factione. Crescat, sedeat & sileat, non magnæ mihi curæ est: vos pauci & boni, & gnari bonarum artium, me amate. Ad Senecam omnia Typographus iam habet: de *Pilis vitreis*, omitti tuum illud non debuit, raræ obseruationis. Sed pleraque mea ad illum, magis pro Genio eius sunt, id est Philosophia, quàm Philologa aut litterata. Sic decere & debere, mihi visum. Dum heri suauiter de te cogito, ecce Carmen effudit: lege, & verum affectum ama.



AD PERILLVSTREM  
MARCVM VELSERVM

II. virum Augustæ Vindeliciæ.

**M**ARCE, differeam, nisi inter omnes  
Quos amo, te ego amo. idque iure: siue  
Virtutem videam tuam, aut Amorem.  
Virtus, Solis ad instar, illa lucet:  
Nec tua modo Ratiæ, sed omni,  
Quàm lata est, Alemannia, & propinque  
Gallie, Italiaeque, Iberiaeque.  
Addámne ipsam Asiam? addere hanc quoque ausim.  
Et splendor tuus ora inhospitalis  
Ponti percutit, ipsaque vrbs Byzantis  
Te nouit simul & colit merentem.  
Quid iam porrò ego debeo? qui amorem  
Tam largum mihi candidumque defers.  
Certè debeo, quod nec ulla lingua,  
Quod nec concipere ipsa mens potissit.  
Ergo me tibi sisto mancipandum:  
En habe tibi, quidquid est eritque  
IVSTVS LIPSIVS, hoc ab auro in auum.

Louanij, prid. Kal. Feb. ∞. MDCLIII.

EPIST. XLIIII.

Romam.

PHILIPPO RVBENIO semper suo. S. D.

**I**NVITVS ad te scribo: ne mirare. Vos ego iam exspecto, iam  
occurro, iam brachia pando ad amplexum. Quid iterum à  
solidâ voluptate ad hanc imaginariam vocor? quid à veritate  
ad umbram? Venite, affamini, & sistite mihi tres vos illos meos:  
quos non dimisi, sed commeatum in tempus aliquod dedi. At  
Italia vos tener; quam hoc nomine minus amo, quia vos sic  
amatis. Redite. vis dicam? aut ad alios amores ego eo. Senesco,  
cane-

canefco : longum exspectare non possum, frui nunc aut numquam debeo : & fruamur, ita omnia votiua vobis Deus in reliquam vitam donet . Vsuram breuem ego posco ; sed tam hilaris, quàm ij qui ætates disponunt & promittunt. Venite( iterum dico) tres ad me rectà: si quis abnuìt, tu nihil excusa, & indulge vtriusque( nam & de te arbitror) amorì. Sic vale. Louanij, prid. Kal. Febr. ∞ . MDCLIII.

## EPIST. XLV.

I A N O G R V T E R O .

**L**IBENS legi, libens, de Politicis tuis Dissertationibus; age, vel ob hanc causam fac, vt os calumniæ claudamus, qui meros litteriones nos censent, nec alterius serix rei. O quàm errant! quàm diuina & humana in his veterum monumentis tractamus & indagamus! Sed cum vulgo frustra pugnes, & brachia in ventum iactes. Quæris, ecquid Taciti iudicium mihi rectum, qui Senecam & Burrum probare videtur silentes, ne iriti parricidium dissuaderent. Dico, non vniuersè hoc verum esse, & boni consilij virum, atque ipsum bonum, etiam non audiendum, optima debere effari. Cur nò igitur hîc Seneca aut Burrus? factum & personam cogita. Agebatur an Nero, an Agrippina imperaret. Eò enim ventum, & superstes illa mulier magni animi & gratiæ, Germanici filia, imperium pacemque turbasset, aut rapuisset: nec ipsa filio melior futura. Adde, quòd ad hoc æui non inter pessimos Nero: postea fræna exoluit: ideoque, vt fidi & integri consiliarij, statui eius priuato & publico ire debebant consultum. Ergo per tale facinus? absit: non suaserunt, siluerunt. id est, non approbarunt: sed vt inter mala, & quia longius Nero iuerat, quàm vt reuocari posset, hoc tolerandum censuerunt. Caput etiam, quod Tacitus non exprimit: tutò dissuadere non poterant, & in dissensu, illorum salus agebatur. Summa, in republicâ multa interueniunt, quæ priuatim iniqua, respectu alicuius publici Boni aut Quietis tolerantur. Tu plura dices, & inuenies: examina. De Senecâ, dedi operam vt Textus emendatus esset, actu iuuiisti. Cetera pompam non habent, fortassis vsum si quis quæret. De illo Atheo in Epistolis, diuinaisti. Gratulor tibi in Bibliothecâ luxurianti,

& à copiâ, vt scribis, pænè oppresso. Mihi ab alijs vacuo contingat, & vel sepulchrum sic esto. Sed, Dij boni, distrahimur, & ad alia raptamur. Tu bona & me ama, mi Grutere, idem constanter facturum. Louanij, Kal. Febr. ∞. MDCLII.

## EPIST. XLVI.

Lugd. Batavorum.

GERARDO BUYTEWECHIO suo.

**S**ATIS diu factum est cùm à te nihil audiui: eò gratiores istę postremę tuę litterę, etsi non grata omnia continebant. Illud certè triste de Vxore tuâ. quam in morbo, & tali morbo, id est Hypochondriaco aliquo esse, inuitus audiui. nam scio quale hoc sit, & quam leniri fortasse medicinâ aliquâ aut curâ possit, numquam vinci. At ego melius de tuâ etiam spero, nec in hac florenti ætate id genus omnino morbi esse: etsi vicinũ aliquod fortasse, & notis iunctum. Confide, Deus illi & valetudinem, & ex eâ tibi liberos dabit. Suaue fuit audire de tuâ illâ bellulâ, & opinor iam garrulâ: & mihi quoque desiderium sit videndi, & (verè dicam) suauandi. At quę spes vltiã est? ego senesco, & niues caput meum spargunt: & morbus iste tot annos atterens & exedens valdè vacuũ virium me concinnat & longę hîc morę spem non facit. Nec tamen etiam cesso. & breui *Manuductionis ad Stoicorum Philosophiam* libri tres, *Physiologia Stoicorum* totidem apparebunt: quidni dicam? non pro gustu aut sensibus huius æui scripta. Causas per te cogitas. sunt vetera, ignota, à scholis spreta: & solum fortasse fructum habeant illustrandi Senecę, cui equidem destinaui. Sunt enim velut prodromi, & ille consequetur. Iam Antuerpię essem, nisi casus equi tibiam meam afflixisset; sed iam ferè perfanatam. Scisne autem equum me domi habere, sed ex dono? Fit illud Aristippi, opinor: — *equus me portat, alit Rex*. De Doufę scriptis, vellem misisses. priora enim habeo: hæc credo consequentia esse, & non moueor si qua alia à nobis inspergit: nam & firmus ego in talia sum, & venia mihi facta legendi. Mitte igitur: ego ad te mea, cùm lucem videbunt. Quando autem Scaligeri optatus Eusebius inquire, & in occasione virum saluere à me iube. Exspectamus reduces Româ Richardotum, Baroniũ, Rubenium.

hunc



hunc postremum egregium virum, & Græcas Latinasque litteras perdoctum. Vale mi Buytewechi, & meus perseuera. Luanij, VI. Idus Febr. ∞. DCIIII.

Parenti utrique, sed & Tuæ, amicam salutem mitto. Scripsi & editurus sum, *Dinam Virginem Hallensem, eiusque Beneficia & Miracula*: pijs non displiciturum opus, quid vestri illuc alij dicent? Lipsium Bellerophontæo morbo agitari?

## EPIST. XLVII.

Veronam.

ANDREAE CHIOCCO.

**I**AM iam nunc tuas accipio, & lectis respondeo: vide quàm sim *ἀοκνος* amico paria reddere, quatenus valetudo quidem (nam occupationem non excuso) permittit. Rogas de acceptis Ill<sup>mi</sup> Cardinalis & Antistitis vestri AUGUSTINI VALERII libris? Accepi, legi, & vel ipso aspectu delectatus sum, hæc optimarum artium & honestioris famæ illis etiam magnis curæ adhuc esse. Quid, cum legi? affirmo tibi placuisse, & doctrinam & iudicium viri admiratum esse, in illâ dico dignitate, & multifariâ καὶ πολυποισίᾳ (satis scio) occupatione. Italia vestra vel hoc nomine etiam felix, quod tales quosdam, sed quosdam, in illo culmine habetis: nobis non nisi votis suspirandos. At legisse te mea *De Bibliothecis, & Dispunctionem* significas, & placuisse. Tamen in ijs de Politianis & Barbaris, atque hodie etiam, sed aliâ & vestrate linguâ esse. Mi Chiocce, non abnuimus de ingenijs in vestrâ gente (neque istæ *πυλωμένη* nos habet) sed ad artes veteres respicimus, & quas Græcia coluit Latiumque. Linguam vestram si excolitis, benè est: sed quo imperio ad alias gentes propagandam? quod in utrâque illâ, ut scis, fuit. Imperio dico, atque item Colonijs in orbem terræ missis. Fatorum aliquis orbis est, & surgunt illa, hæc cadunt: sed in linguis observa, vix tres obtinuerunt ab orbe condito spargi & dilatari. Nos quoque vestra legimus, capimus, & probamus: sed studium idem nonne Gallis est? & lingua eorum latius patet, certè communius vsurpatur. Cuique suum iudicium: sed cum Religione veteri, verâ, & Romanâ, stare Romanam linguam & coli debere, ego cenfeo: magis quia artium & scientiarum veterum custodem.



dem . Siquid in vestrà, Hispanâ, Gallicâ, boni aut venusti est; negabis etiam ab hac esse? cuius istæ filiæ, & per vim atque iniuriam, vt sic dicam, dominantibus Barbaris ex eâ productæ. Defino, ne videar quibusdam *φρονῶν ἐδὼν φρονεῖν*: sed non tibi, si te noui. De homine autē qui me *ὕβρισμα* fecit, nec nosse vos credo: ne nunc quidem ego. Italum se præscribit; ingenium, aut illud ingenium, καὶ μεγαλόνος vestræ gentis, non præfert. Quisquis sit, valeat, aut in Vespasiani illam Morboniam abeat. M. Antonium Bonciarium vel ex litteris noui, sanè insignem virum & ἀξίεπανον; plerosque alios ex lectione, quos iuisti nominatum. Inter eos iamdiu Torquatum Tassum, & Speroni quædam. Sed aliæ nobis curæ, aut auocationes: in otio, quod optem magis quàm sperem, libens istis vacem. Vale vir amice, & talis in me perseuera. Louanij, xv. Kal. Mart. ∞. ΙΟCIII.

## EPIST. XLVIII.

AVGVSTINO VALERIO S. R. E. *Cardinali* S. D.

**B**ENIGNITAS tua, tum item scripta quæ vidi, scriptio- nem hanc meam elicerunt, grati animi & virtutibus tuis meritisque addicti testandi causâ. Nam benignitatem quidem ostendisti, in salute semel iterumque ad me peramanter misâ; tum & sermonibus, quos honestos de me studiisque meis apud plures habuisti. Iam Scripta tua quæ publicasti, visa mihi beneficio Andreæ Chiocci Doctoris vestri Medici, qui ad me misit: & lecta mihi fateor cum fructu pariter, & voluptate, cui affectus & veneratio in auctorem se coniunxit. Quomodo enim non colam & amem virum in eâ dignitate, in eâ ætate, hæc studia sic industriè & feliciter tractantem, & ad posteros etiam ingenij sui monumenta propagantem? Colo, & amo: & vnum certè librum vel argumenti causâ, quia in eo CARD. BORROMAEVS describitur, ô magnus ille æui nostri (sic appellare liceat) heros! Eum ego semper suspexi, & virtutes extra ambitionem omnem admiratus sum: quas tu ita laudas, vt etiam imiteris. IVBILAEVM etiam tuum ANNVM perlegi; & variam in eo rerum noticiam, cum hominum locorumque descriptione, amaui. Sunt seria hæc scripta, & tui loci atque muneris:

neris: atque vtinam ætas (nam de voluntate non ambigo) ferat, plures ex hoc agro ingenij tui fructus prodire! Vt id possit, Deum rogo: & vt is te Ill<sup>me</sup> ac Reu<sup>me</sup> Domine, longum Ecclesiæ suæ seruet. Louanij, prid. Idus Mart. ∞. IDCIIII.

EPIST. XLIX. *Perusium.*

MARCO ANTONIO BONCIARIO,

*nimis, panè dicam, meo S. Dico.*

**N**E mirare exordium, mi Bonciari. iamantè sciebam te meum esse; sic esse, ex epist. tuâ didici, quam beneficio Andreæ Chiocci, insignis viri & Medici, iam nunc vidi. Tene tam effusè in laudes meas ire? nec apud me, vbi blanditijs locus esse possit, sed apud alium, quid alium? apud omnes sic effari & profiteri: nam edidisti, & vulgasti. Profectò motus mihi animus fuit cùm legi, non nego: & quamquã saluâ fronte pleraque non possum agnoscere, tamen suaue, suaue fuit à te tali hæc tribui,

*Ὡς νόος ἐν τῇ δεξιᾷ περὶ τοῦ ἐδ' ἐν ἀεικλῆς.*

Etiam hoc testificor, te sic in mea intima iudicio indagasse aut peuetrasse, vt ipsi mihi notior non videar, quàm tibi. Quæ hæc sagacitas tua est? quis super omnia candor? Iam verba pensitata, & sensus sic maturi, fidem apud alios astruant, quam apud me non habent. Et mihi tamen hic fructus: quis? excitari & erigi, & vt generosi equi, plausu hoc tuo & fauore acrius ad cursum impelli. At non in fastum attolli, mi amice. noui me, & impurum aut imbecillū illud in me hominis; & vt Iunonia auis, cùm plumas adspexi, ad pedes oculos demitto. Sed ad te nunc animū mitto (vtinam totum me possim!) eterno, eterno tecum vinculo, vt cum me altero hæsurum. Louanij prid, Id Mart. ∞. IDCIIII.

Scripti item ad te ante dies xv. & misi Augustam Vindeliciam ad M. Velferum.

EPIST. L. *Lutetiam.*FRANCISCO HARLÆO *Abbati S. Victoris S. M. D.*

**E**T ex sermone cognati tui Harlæi, qui nobis adfuit, & clariùs ex tuâ scriptione affectum didici, quem acrem in me

G g

præfers,

præfers, amore Virtutis & Doctrinæ excitatum, quarum scintillas in me (utinam lumen!) annotasti. Nam & me amare ea profiteor, & crescere cultum cum ipsis annis: quanto magis video alia hæc vana, leuia, nihili esse; sola hæc firma, solida, æterna. Itaque meritò & tu ad ea adspiras, & non simplici ac nudâ, vt sic dicam, Virtute contentus, ornatum & velut purpuram adiicis Doctrinæ. Benè est, perge. hæc eminendi & prælucendi via est, quò tua te indoles, & maiorum splendor atque exempla vocant. Meam autem amicitiam quòd appetis, in promptu est: vel vltro iungar, quoscumque tales repperi: & vt magnes ferum, sic me honestior indoles consensione tacitâ & συμπαθεία trahit. Ergo sequor, manum do, fidei & amoris non fallacem. Louanij, III. Idus Maias. ∞. IOCIIII.

## EPIST. LI.

*Augustam.*

## MARCO VELSERO V. I.

**E**RRATVM. nondum vt STOICA nostra videris? sed erratum, aut peccatum (non enim definitio) ab aliis quibus commisi: ego te inter primos habere fructus istos acridulces (da verbo veniam) ingenij mei volui: habere, & censere. Fac vel nunc. Musicum illum Etruscum vidi nuper, è tuo dono, & miratus sum ingenium, dij boni, acutum! Sed ego quàm non sim ad hanc scientiam, publicè sum testatus, & est vitium naturæ meæ. In Senecâ, hæc talia non nimis inquiri: quod ille egit, hoc ago, & ad mores eo. Et quia pompam hæc scriptio non habebit, fortasse & famæ minus, vt hodierna sunt iudicia: sed & ea alibi corrigenda aut dirigenda sunt, & in veterem limitem boni vsus reducenda. In N. affectum amo, cetera mecum intelligis & arbitraris. Stanislaum Balam, de cuius affectu in me scribis nobilissimi viri, amo & te velut inducente admitto atque amplector: & gaudeo atque Europæ gratulor tales in eo tractu viros esse. Mirum, mirum, Sarmatiam sic excultam hodie, vel supra Hesperiam vtramque (gnarus dico) esse. Omitto litteras, quæ id mihi dicunt: sed sunt & fuerunt in hoc ipso loco nobilissimi iuuenes, qui vagantur & lustrant incensi cupidine doctrinæ. Nostri homines aliter, & veteres Cimbri (Becani hæc affertio)

fertio) ad Cimmerias ignorantiae tenebras eunt. Sit is quoque inter bellorum ciuiliū fructus. *Dina* nostra *Hallenfis* excuditur. Quid tu ad talia? inquires. Inò decuit, & animolibuit ad pietatis hanc aram facere, cui primò nati sumus: & reliqua secundas in hac scenâ partes agant. Mi Vellere saluere te cupio, & me amare: te inter paucos, perpaucos nostri æui, iudicii atque animi rectum. Louanij, XIII. Kal. Iun. ∞. IOCIIII.

## EPIST. LII.

*Romam.*EMANVELI PIO S. R. E. *Cardinali.*

**M** Antonius Bonciarius ( ab amico tibi nomine ordien-  
 • dū est ) cū sæpè mihi & de virtutibus tuis, ingeniq.  
 præstantiâ, & litterarū ac mei amore, ex fide scripsisset: cultum  
 & simul affectum erga te in animo isto genuit. quem in digni-  
 tatis tuæ incremento cohibere vltà non potui, non item debui,  
 quin erumperet, & tibi se sisteret, probandus, vti spero, & ad-  
 mittendus. Candore quidè hoc mereor: vt alia mea, quæ beni-  
 gnè attollere te audio, omittam. Venio igitur gratulaturus pur-  
 puræ hunc honorem, veteri, & ab ipsis Imperatoribus familiæ  
 tuæ, non nouum: quem ipsum nuper quoque tenuit Rudolfus  
 Pius Cardinalis Carpenfis, ille in exemplū genitus virtutis, do-  
 ctrinæ, elegantix, & omnibus in ijs numeris absolutus. Nihil  
 veræ laudis extra gentem tuam quære: illa suppeditabit, & mul-  
 tâ luce vndiq. circumfundet, etsi, iam nunc in eâ lucet. Nam e-  
 minens hæc tua indoles, & sublime cultumq. ingenium, Ponti-  
 ficem hunc optimum maximum aduerterūt, vt te vltro elige-  
 ret & in sacrum Senatum adscriberet, quò non nisi apices & de-  
 cora prouinciarum adspirant. Sit felix bonumque factum, emi-  
 nus, sed corde, acclamo: & me tibi do, dico, Ill<sup>me</sup> & Reu<sup>me</sup> Do-  
 mine, seriò clientem. Louanij, IIII. Idus Sextil. ∞. IOCIIII.

## EPIST. LIII.

*Antuerpiam.*LYDOVICO NONIO *Doctori Medico* S. D.

**D**IVAM nostram placuisse tibi, pietatis tuæ in illam est,  
 fortasse & in me affectus. Nam à stilo aut ingenio meo



leuiter accessit, quod commendaret. gaudeo tamen grata hæc esse (nam & ab alijs sic accipio) & excitor ad similes scriptiones. Similes dico, id est Historicæ: & tu me eò vocas valdè inclinatum. Itaque iam nunc edo *Monita & exempla Politica*, in quibus quid nisi florem historiarum excerpo, & huic scriptioni velut proludo? Deus si vitam mihi seruat, illuc ibo? firmior sim modò; nam iam à tribus mensibus, mi Noni, valdè virium & vigoris interni vacuus sum factus. Te in Hispaniâ illustrandâ pergere, gaudeo: & in Marciani Capellæ loco (inspexi & inquisiui) à tuâ correctione nihil muto. Vera & necessaria est: etsi tentabam illud *vniversa* inuertere, sed non successit. Quæris super Strabonis loco de *Balearium laticlaviâ tunicâ*: & meretur quæri. ego autem simpliciter ita accipio, vsos primùm *παυσήμοις χιτῶσι*, quas Romani senatores vsurparunt, sed paulò aliter. Nam Balears, opinor, in lino, non in lanâ; & ab ijs haud dubiò Hispani sumpserunt, sic propinqui. Sanè de istis in Liuius est lib. xxi. vbi de pugnâ Cannensi: *Hispani linteis, prætextis purpurâ tunicis confutuerant*. atque in eadem re Polybius dixerat *χιτωνίσκος πορφυρέος*. quid eæ aliud sunt quàm *tunicæ laticlaviæ*: sitamen purpura ea in clauos distincta? Hæc ad Liuium olim notabam, & Strabonis locum adiungebam: tu iudicabis. Publica valdè me suspensum habent, & video certamen omne in Flandriâ cernendum. Hostis copias auxisse, instructu xisse dicitur, & rectâ ad nouâ expeditionem ire. nos quid? quod tu scitissimè à tuâ arte, in Vaterno aut Lethargo sumus, nec excitati excitamur. Ades ô Deus; & patriam, aut certè religionem tuam, vindica & tuere. Vale, mi Noni. Louanij, xi. Kal. Octobris. ∞. MDCLIII.

## E P I S T. L I I I I.

Vrbînum.

SEBASTIANO MACCIO DVBRANTINO  
Viro Perillustri S. D.

**L**ITTERAS ad me dedisti triplici notâ infignes, amoris, benignitatis, doctrinæ. Amorem ipsâ scriptione profers, & finem habes vt meum elicias: quid elicias? tuo iure poscas, qui debetur tali viro, & sic amanti. At benignitatis iam tuæ est,

est, quòd in laudes meas stilum admittis: cur autem tam effusè? Stringe vir optime, nec affectui tuo habenas omnes laxa, quas iudicij tui rectitudo adducit & coërcet. Ab illo enim, nō ab isto (ego ita censeo) hę laudes. & vt per aquā qui videt, maiora omnia videt: sic qui per fauorem iudicat, attollit. Equidē ampla illa non agnosco: Deus ille Delficus veteri monito aurem vellit, & me ad me mittit. Denique doctrinā ipsa scriptio tua p̄fert, & acre eius studium: atque huius fructus, SOTERIDEM tuam: quam vt videre mihi sit rogo, & mittere licebit viā, quam in imā chartā subscribam. Sed ad amorem redeo, quem vt magis probes, sine vllō riualitatis liuore (nec enim verus iste habet) alios adiungis & nominas, qui me tecum amant. inter eos Franciscum Mariam Sancti Angeli Comitem, virum genere & dignitate primarium, itemque Bap̄istam Guarinum Equitem, Felicem Paciottum Philosophum: & quid dicam, nisi suauiter affici me, & velut titillari, talium ingeniorum approbatione vel affectu? Rependo vicem: vtinam & vocem aliquando possim, & pasci sermonibus ac dissertationibus, dirigi iudicijs eruditissimorum virorum! Olim optaui, & conatus etiam sum inferre me Italię vestrę nouum ciuem: Deus & Principes mei vterunt, & patria etiam manum iniecit, etsi abiturienti. Quid enim apud nos, nisi assidua, & quidem calamitosa, bella? Pax ingenio scriptisq. meis magis faciebat, & excitari per illam ac produci vtraque hęc potuissēt. Sed quibus ego iam verbis vtar, vt benignitati Ser<sup>mi</sup> Principis FRANCISCI-MARIAE RVVEREI Vrbinatium Ducis, respondeam? Quam tu in me & mea promissis: neque insperatam, vt verum fatear, quia inclytę illi familię proprium studia artesque fouere atque amare. Sed quòd eam extra Italiam etiam mittit, id fortasse nouum, sed magno & capace illo ingenio dignum, quale describis: & quod instar solis aut velocissimi sideris, omnia statim obit ac lustrat. Legi ab eo scripta nostra, votū est; probari, supra votum: fruor tamē & excitor, neq; aliter erigor aut attollor. Habes ad epistolā tuam, sed voluntate meā breuius: quia languor, an morbus dicam, manum & stilum alligat, qui iam tres menses me habet. Deus, si ita expedit, sanum me reddat, te seruet Vir Perillustris. Lo-  
uanij, xiii. Kal. Octobr. ∞. lcciiii.

Si quid ad me placet mittere è tuis scriptis, ægrè id potest per Cursores ordinarios, nec nisi magno impendio: at potest bis anno per mercatores, qui Francofurtum eunt. Ad Moretum illuc si mittis, id est, ad Plantinianā tabernam, rectā & tutō ad me ibit.

EPIST. LV. *Pinciam.*

*Domno FRANCISCO QUEVEDO Viro Perillustri.*

*Dij tibi dent animos continuentque tuos.*

**P**ATERE enim & me versu ordiri, & tuo illi *παρρησιᾷ*, quem scitissimè (sed cum nimia laude meā) præponis. At ego tibi animos istos opto perpetuos: animos, sic in me affectos; animos, sic omni doctrinā & virtute perpolitos. Ita enim ab aliis audio, qui & propius tenorunt, & scripta varia viderunt: quod nobis non datum, ad quos vestra ægrè deferuntur, nec nisi ex destinato missa. Rarum in istā nobilitate tuā decus. quod non tibi magis, quàm patriæ gratulor, quam is atque ibis (diu enim viue) illustratum. Mea *DE VESTA* quòd legisse te scribis & probasse, gaudeo: mallet eadem videres aucta & notis illustrata, quæ propediem vulgabuntur. Sunt enim in manibus Typographi: & efficiam ut vel me mittente possis nancisci. Nunc *SENECA* vester me totum habet, ad quem *STOICAE DOCTRINAE* excerpta præmisi. Non enim cesso, Vir Perillustri, etsi tempora apud nos ferrea, nec artibus istis sed Marti facta. Vos quoque auditis: auditis, an & sentitis? Contage enim mala nostra vos tangunt, & opes ac miles vester hîc exhauriuntur aut consumuntur. Scripsit ille olim, de Troiâ: — *Commune sepulcrum Europæ Asiæque*. Ego de Belgicâ dixerim, quæ ab annis iam pænè quadraginta florem militiæ ab Europâ aduocat, & consumit. Medere tu Deus, & hunc nouum mihi amicum tuere. Louanij, VI. Idus Octobr. ∞. MDCLIII.

EPIST. LVI. *Gades.*

*IO. BAPTISTAE SALASARIO.*

**A**B vltimis Gadibus (vt olim opinio erat) litteras ad me venisse, si non gloriator, gaudeo: & non responso te solùm, quod



quod petis, sed amore dignabor. Idque doctrinæ tuæ merito, & incensi studij, quod scripture hac profiteris. De meâ autem doctrinâ, vel ut tu, sapientiâ, nihil equidem assenserim: imò animus hic sibi conscius repugnat, nec ventulo isto eleuante à terrâ se tollit. Sum homo, sum ab humo, in eam ibo, & fama ipsa mea haud latè vagata circa hanc peribit. Dum sumus hîc tamen, suaue est altius & melius aliquid agere, & quod bonum proprium Stoici censebant, prodesse. Hoc sine scribo, edo: hoc sine & istas ad te mitto. Quærebas duo prius de sensu versuum Ouidij, quibus suadet puellas adiri opportunè,

*Sive dies fuerit natalis, sive Kalendæ,*

*Quas Venerem Marti continuasse iuuat.*

De Natali, scitum est: dubitas, de Kalendis istis. quas ego cen-  
seo Apriles fuisse. & quare puellis gratas lætasque? quia tem-  
pus tunc anni ad lusus inuitat, & aperit stricta aut clausa.  
Ipse idem poëta in Fastis, & ipsis illis verbis:

*Et formosa Venus, formoso tempore digna est,*

*Utque solet, Marti continuata suo est.*

Sed & vulgò colebant tûc Venerē matronæ, puellæque. Idem:

*Ritè deam colitis Latia matresque, nurusque,*

*Et vos, quis vitte longaque vestis abest.*

Quia & sacrum eo die Veneri fuisse, præter poëtam, Macro-  
bius tangit Saturnalium primo. Opportunus ergo amoris dies, Cap. xii.  
ipsa Venere præsidente & conciliante. Alterum quæsitum, in  
versibus:

*Junge tuum domina, quâ licet usque, latus.*

*Et bene, quod cogit, si nolit, linea iungi.*

Quæ hæc linea? Alij alia: ego de Circo sermonem esse scio, & in  
eo sedilibus. itaque accipio *Lineam*, ipsum ordinem subsellio-  
rum, velut lineis descriptum & discretum. Erant Cunei, inter  
cuneos Viæ, & media Subsellia, lineis suis diuisa. Qui ergo in  
vnis subselliis sedebant, iungi necessariò debebant: nec decli-  
nare fas vel antrorsum vel retrorsum, aut lineam migrarent.  
De tali lineâ, in Martiali etiam versus, me interprete:

*Omnis habet sua dona dies, nec lineâ diues*

*Cessat, & in populum multa rapina cadit.*

Manifestè dicit, missilia in omnes sparsa, atque etiam *lineam*  
*diui-*



*diuitem*, id est Subsellia senatorum siue Orchestram. nam distinguit à populo & popularibus statim. Isto etiam sensu iterum Ouidius:

*Quid frustra refugis? cogit nos linea iungi.*

Nam Circensibus viri & fœminæ mixti spectabant olim. Suspicetur fortè etiâ aliquis, lineas è ligno antepositas aut admotas, quibus firmarentur suæ cuique sedilia, & vt fas inniti, nec prioribus sessoribus incommodare. Sed hæc suspicio: ista veritas, me ex vnâ epistolâ te amare, & idem perpetuum à te optare. Louanij, ix. Kal. Nouembr. ∞. MDCLIII.

## EPIST. LVII.

*In Poloniam.*

SIMONI SIMONIDAE.

**L**ITTERAS tuas, & quod librorum adiunctum fuit, nimis libens legi. illas, ab humanitate & affectu mei, quem spirabant; istos ab eruditione variâ, quam præferebant. Ego mi Simonide, vt de affectu dicam, pretium laborû meorum censeo à talibus amari: id est à doctis, bonis, quorum inter apices te pono. vt fama mihi non dixerit (quam & hîc habes) vnum illud carmen tuum in *Imagines Zamofchianæ diætæ* approbet: quod, ita me Deus, eruditum, antiquum, suaue est, & numeros ac phrasim Catulli ac veterum illorum habet. Maeste! spondeo tibi, paucos in Europâ esse (& est ingens poëtarum copia, vt apum) paucos, inquam, qui meo quidem sensu sic scribant. Iam illa Stoïca, quàm putas ipso titulo & argumêto blandita esse? quid cùm cœpi legere, tam multa è Græcis Latinisque, & remotis etiam auctoribus petita: sic adaptata & nexa, subtiliter explicata: quàm putas, inquam animo affectum & motum esse? Amo illam sectam, & conatus sum producere, vt vidisti: sed hanc Logicam partem reformidauî penè tangere, vix otij, certè non languoris huius mei. Gaudeo illîc factum à Bursio, & sic eruditè factum: à Bursio, an vis me magnum illum Herœum vestrum inscribere, quod vix vlla ætas credat? Virum in tor, & tam arduis occupationibus, regni Atlantem, sustinere & has litterarias curas ac lucubrationes posse? Diuinum ingenium dicendum est, in admirationem æui, vix in exêplum (quis enim imite-

imitetur, vel ausit?) datum. Diu nobis viuat, quem toto animo suspicimus & colimus: diu tu tali patrono felix, mi Simonide, floreamque viue. Louanij, vii. Idus Nouemb. ∞. IOCIII.

## EPIST. LVIII.

DAVIDI HILCHENIO, *Regi Polonia à Secretis.*

**S**ILENTIVM, vti scribis, fuit ab interuallo grandiore: quid mirum, in his locorum interuallis? Animo meo te nō excidisse, hoc ingenuè & fideliter testor. Amo & ingenium tuū, & virtutem. Neq; hanc, mihi crede, coitio ista inimicorum aut calumniarū decolorabunt: splendorem addent potiùs; & vt ferrum ab attritu, sic illa nitescet. Esto quod es, boni fortiq. animo, & qui bonam causam decet. Habes tutorē vt video magnum Zamosciū: sub Herōis illius scuto quem timeas? non omnes Dolones aut Sinones. Tua etiam Apologia apud æquos aptosq. iudices abundē te suspicionū, non solū criminum, purgat: mihi quidē sic visum. Quod autē inuitas me, vt aliquid ad Herōem illum, feci, & tu vide vt audacia nostra benè cedat, culpam in te alioqui transfutura. Ego virū iamdiu amo, miror, colo: sed quā occasio declarādi fuit? neq; verecundia aut modestia mea temerē irrumpunt. Si viam mihi mittendi tutam & prōptam præscribitis, non omittam officiū. sed ab eā laboro, neq; cursores nostri publici in Sarmatiam solēt penetrare. Mag<sup>ce</sup> & Nobilis Domine, saluere te animo opto, & erectum atque alacrem esse. Stoica nostra legisti? conducent. Louanij, v. Idus Nouēb. ∞. IOCIII.

Hieronymus Ferrerius, qui apud vos in militiā vixit, Italus, & mihi notus, nuper hīc subitō obiit è defluxu catharri. Frustrā reducem expectetis.

## EPIST. LIX.

*Duacum.*

BARTHOLOMAEO PETRO LINTRENSI

*S. Theologiæ Doctōri.*

**A**MPECTOR precationem, quam de more, sed affectu quodam singulari, mihi facis in auspicijs noui anni. Amplector, & largiter ac puriter eandem repono. Deus tibi

Hh det

det quæ voles; & nil nisi bonum ac salutare, scio, voles. Verè auidisti de *Diuâ Sichemiensi*: atque eam iam concinnaui, & ad Typographum misi, priùs tamen auctoritate nostri Antistitis Mechliniensis comprobandâ, quod in Miraculorum propagatione S. Synodus fieri mandauit. Ego sanè libens tales scriptiones obo, & sine molestiâ obo: siue animo, siue Diuâ ipsâ subleuante, & recreante. At mali aut morosi quidam, & prauè sapientes, non occultè deterrent aut improbant: tamquam à narrationibus patum certis, vt aiunt, & opinione sæpè nixis. Non debere talibus obsolefieri auctoritatem nostram, siquam habemus. Dissentio. & aut istis fides sua certa apud me, & bonos est: aut quid adferent, cur antiquioribus eam præstem? Sunt testes, sunt examina, & quæ in profanâ historiâ minimè adhibètur: & huic tamen credo; diuinis tantùm refragabor, & assensus mei ostium claudam? Prauitas est: & hi tales per cuniculos subuertūt arcem religionis nostræ, quæ miraculis est superstructa. Sed viderint: mihi certum pia, recta, vetera sequi; & asserere etiam, pro ingenij aut stili viribus, quas Deus dedit. Reu<sup>de</sup> & Eximie Domine, precationem itero, & hunc atque alios annos felices agere te exopto. Louanij, xiiii. Kal. Febr. anni ∞. I. C. V.

## E P I S T. L X.

Antuerpiam.

BALTHASARI MORETO suo.

**L**EGI tuas, & Amici illius, litteras: & in vtrisque aliquid sum miratus. In tuis, quòd ægrè & velut retractans hoc ad me deferres, tamquam triste: in illius, quòd vt rem seriam habuit, & à tali auctore, quem constat mihi non esse. Noli autem tu mi Morete, si meum affectum vis seire, & eundem induere, hæc talia nisi risu excipere: & quid aliud merentur? Sunt Epigrammata, leuiora non *Pennâ* meâ, quam carpunt, sed plumâ: & addo, sunt inscita, sine sale aut Venere; ac meum nomen tolle, nemo leget. O digna, quibus ille auctor inscribatur! quem hæcenus amicum mihi habui; sed hominem scio, & posse mutari. Si facit ob talem causam (nam priuatim nulla est): nã ego & affectum tempero, & iudicium muto, quod perhonestum semper de illo tuli. Quem scripto eo lasi? quem vel



vel leuiter tetigi? Religionem meam aperui: & Nerones iterum sint, qui vetent? Noua sua ferri volunt, & armis id pugnant: nobis non licet vetera asserere, & æui suffragijs atque orbis approbata? Atqui leue, & me indignum scriptum est. Si à tali affectu carpunt; non veniam, sed gratiam debeo: sed quæ credam? Scio esse in ijs locis, qui magno emerint omnem famam veterem me decoxisse, & L I P S I V M inter oblitterata, aut & damnata, nomina esse. Tamen leue est. Itâne? non res talis, nobis qui piè sanctæque de diuinis sentimus: non stilus ijsipsis, qui subsannant & illudunt. Hoc scriptum, audi me, & ipsi intellegant, æuum feret cum aliquot alijs, quæ bono generis humani scio me edidisse. Fremat Calumnia, & Liuror palleat: ego ab his talibus famam, imò & gloriam, imò & claritudinem, apud posteros habebō; & ero, cum omne istorum nomen & factio non erit. Sed de Epigrammatijs insulsis, parum est, nec merentur non dicam responderi, ne legi quidem, aut certè iterari. Quid si libelli prodeant? & prodibunt, aut æui huius, & seclæ illius proteruiam ignoro. Sed tam ego eos contemnā, si à talibus & tales sunt, quàm versus: quòd si grauius aliquid, & par in arenam venit, dignum cum quo componar, videbō, & pro re decernā. Pugnare equidem semper refugi: sed vbi opus erit, tam virum ostendam, quàm duobus illis olim aut nuper, qui non lætantur me prouocasse. Palmam de me vsque adhuc quis tulit? Neque iactare libet: sed noui me & alios: & in bonâ hac vtique causâ, veniant cum Hectore Achilles, non subducā. Istæ quidem pilæ, & velut homines scænei, qui nunc in circum iacti sunt, non valent ad irritandum, qui ludibria hæc & deliria (vt rem dicam) noui. DA LEONEM. Sed ad Amici litteras. tu illi hunc sensum meum scribe, & præsertim de auctore: quem certò reperiet alium esse. Istæ sordes non sunt ab eâ Seplasiâ. Salutem etiam adscribe, & à me amorem. D I V A M SICHEMIENSEM iam acceperitis, mittente Oudarto: cudite, vt iterum malis malè sit, & viuat honos cultusque illius, quem omnes prauī (mirum, & certum) ab omni æuo eunt imminutum. Heus etiam! quod ille Amicus suadet, vt poëtæ vestri aliquid meam vicem reponant: per Deum, ne fiat. Ego mihi sufficio, nec Teucer ille sum, qui clypeum desidero Aiæcis.



Sileamus nunc quidem, & magis feria agamus. Vale mi amice.  
Louanij, Nonis Febr. ∞. 15CV.

## EPIST. LXI.

Bruxellam.

PETRO PANTINO. V. R.

**E**T ego insidijs capiar, quas ipso te monente fas mihi vitare? Græcorū Morychus sim, aut siquid ἀνθέσσειν cogitatur. Hoc sine, non venio, & vel numquam videat me Bruxella. Extra iocum. honore aliquo externo & imaginario, nec meâ sed litterarum causâ, si affectum me Princeps volet, admitto. sin onus adiungitur, imò si munus, respuo, & vel fugâ declino. Mihi tam certum & firmum, hoc statu rerū, res extremo digito non tangere, quàm ad extrema rerum aliquando ire. O amici, \* βουαν in hoc consilium adfertis, ego & \* αἰσίου velim. Ille, quem vos suspicitis, pleno pectore in rem meâ sapit: & addo famam, quam alijs studijs inculpatâ, ne, obsecro, nouis polluamus aut obscuramus. Sit aliquis, vel in exemplum, qui quietē, Musas, se amet, & Numen colat: vana aut vulgata seponat, aut (si superbū non est) spernat. Quid apud te verba facio? ad te redi, & affectum omitte: idē suadebis. Vide \* ἀρχοντας, vide \* ὑπάρχοντας: tu aliquid rei, aut spei etiam melioris, per me expectes? Marius Celsus, & Suetonius Paullinus sim: de quibus scio quid Tacitus scribat. Magna Respublica, tu me tene, communis Patria, Dei hominumq; ciuitas: ô pulchrum, in eâ locum ordinemq; habere, & inter illos Classicos censeris! Quod superest, \* μή μοι γοργίλει κεφαλὴν: nam bonâ tuâ veniâ, Belgica, es aut eris. Vno verbo, fatis obsequamur: neque huc ego natus aut factus sum: \* εἰ δὲν ὑπὲρ τὸ λήϊον. Oudarto etiâ meo hæc scribo, quem scio inter insidiatores iam diu esse. Sed de primâ tuâ scriptione, Bruxellam sic citò, vt destinaueram, non venio. Est libelli munusculū, quod dedicatum Principi offerre volebam: sed nō venit. quid si, cū venerit, per te facio? Nam fugio iam Bruxellam venire, aut valetudo potius me vetat. Utinam tu cū Oudarto huc! facite me cōpotem huius voti, & in cēlo me collocare. Salue mi vir amicissime, cum alterotali Oudarto nostro. Louanij, statim à tuis lectis, vt eram affectus, & spiritus (non nego) plenus. post. Non Febr. ∞. 15CV.

EPIST.

\* beniuolentiam.  
\* providentiam.

\* imperantes.  
\* administratos.

\* Ne mihi  
Go geneū  
caput..  
\* Nihil super filium.

## EPIST. LXII.

*Mechliniam.*GAVGERICO RIVIO *J<sup>ro</sup> & Advocato, Suo.*

CERTE enim te Meum appello. nimis affectus clamat, qui in verbis tuis elucet. Sed pone, aut sepone metum: meliusculus sum, etsi vires non recepi. Brevis illa concussiuincula planè me vacuum earum fecit. Oudartus apud me est, tui amans: quem & scis me esse, ac semper fore. Vale, inter primos vidende, cum illac (Deus donet) transibo. Louanij, Kal. April. ∞. IOCV.

## TESTIMONIUM.

LECTVRIS S. M. DICO.

GAVGERICVM RIVIVM iamdiu indoles, industria, & denique doctriua, ac virtus maximè, mihi conciliarunt: quæ omnia nota perspectaque annorum aliquot consuetudine habeo, & talia ea esse apud omnes EX ANIMI SENTENTIA testor: Me delectauit, & in auro haud fertili nimis talium eminere visus est, & dignus esse quem aliis ostenderem: ostenderem? imò & serió commendarẽ, si qui illa priora amant. Viri magnates, & quibus Respublica, atque eius splendor, cara sint, imprimis curare debent, & seculi hæc ornamenta fouere ac producere, in huius & futuri seculi vsum. Ego rogo eos facere, hunc amatum mihi amare, & in occasione alleuare atque adiuuare. Stirps ista melior irriganda & attollenda est, vt fructum floremque proferat: proferet autem, spondeo, si illud fiat. Louanij, Kal. Quintil. ∞. IOCIII.

I. Lipsius Professor, &  
Historiographus Regius.

## EPIST. LXIII.

*Neapolim.*

IO. ANDREAE PROCHNICIO

*Legato Ser<sup>mi</sup> Regis Polonie S. D.*

DICIT, & serió mittit, quam ipse non habet. Nam ego (ô vir amice. & quomodo non sic appellem?) iam à duo-

Hh 3

decimo

decimo die in acerrimo morbo fui, qui panè abstulit, & melioribus locis sedibusq. dedit. Noctu acer Paroxysmus me inuaserrat, & videbatur Apoplexię genus aliquod esse. Ecce triduo post amicissimæ tuæ litteræ, & opportuna munera, quę ipse Io. Wouerius meus ad me tulit. Sum recreatus, fateor, ab ipsâ beniuolentiâ tuâ, quam sic puram, fidam, magnam in me ostendis: & quædam etiam munerum, vt armillam illam ex Alcis vngulâ, statim consilio medici, & proprio affectu, brachio indidi, non dimissurus, quamdiu vita quidem erit. Accepi & annulos, & quosdam ex ijs collo suspendam, & cordi admouebo, in quo te datorem meritò iamdiu inclusi. Si vita mihi erit, an non palàm ostendam? *ingratiſſimus mortalium* sim, nisi faciam, & dignus eâ notâ, quâ Sulla Athenienses inussit. Multa vellem, nondū possum, nec vires suppetunt: alia Wouerius pro me dicet aut scribet. ego te affectu alloquor, atque vtinam amplectar, ô amicū pectus! Vale. Louanij, vi Kal. April. ∞. Iocv.

EPIST. LXIIII. *Romam.*

ASCANIO COLUMNAE S. R. E. *Cardinali.*

**F**ATEOR aliquamdiu à scriptione & officio meo, sed inuitum, abstinuissē: neque alia caussa, quàm peregrinationis quæ ab Vrbe te remouit, & in eas oras misit, ad quas litteræ nostræ haud tam faciliè quàm affectus & memoria commearent. Certè enim hæc retinui, & veterem illum cultum, fideliter virtutibus tuis & meritis deuotum. Itaque vt aura aliqua nos adflauit aduentus iterum tui in Vrbein, ad sacra hæc Comitia; & fidem statim habui, & hac scriptione testari gaudium tui reditus & consignare fidem & constantiam meam volui in te colendo. Atq; vtinam etiam vel ætas vel valetudo mea tulissent, vt coràm me aliquādo in dominâ eâ vrbe sistere, & vultu ac sermone, quę dico, probare potuissē! Suaue fuisset, & cogitatione ipsâ recreor; sed eādē mox deijcior, cū video irritum illud, & nil nisi votum futurum. Quod tamen à me non possum, habeo è domo meâ & interiore amicitia insignem iuuenem Philippum Rubenium, qui coràm præstabit, spero, & totum me reuelabit, & Ill<sup>m</sup> D. Tuæ dabit dicabit. Adspirat enim ille

Romam:



Romam: & quamquam mihi in docendi munere successorem, vt ingenium & doctrina eius sunt, destinaram; tamen visa ea vrbs sic cepit, vt frænum dare huic desiderio non possimus, & vitam non solum agere, sed ponere in eâ velit. Neque vltra retineo. cur enim Theatrum hoc virtuti eius inuideam? imò commendatione etiam adiuuò, & ad te, Ill<sup>me</sup> Domine, si commodum est, mitto. Audio Bibliothecam instructissimam & animo ac stirpe tuâ dignam parasse: non est fortasse in Europâ aptior ad hoc aut maius aliquod munus. Doctrina varia est in Græcis Latinisque, stilus in utrâque oratione, prosâ & versâ, elegans, & famæ etiam producendæ, notitia antiquitatum & historiarum: quid mores? ipsa suauitas, ipsa probitas, & qui experietur aut noscet, vera me dixisse agnoscet. Neque enim aliter apud talem Principem debeo, & ita Rubenium meum amare ac producere, vt me & famam meam amem. Sed certus sum quicumque iuuenem possidebit, gratiam mihi tradenti habiturum, & plura aut certè distinctiora, quàm dixerim, inuenturum. Et quamquam de Bibliothecâ iniecerim, re scilicet studijs eius aptâ, potest tamen & in litteris scribendis aut concipiendis operam decorè & vtiliter nauare, & variè cultum factumque ingenium varia obire. Hæc ego Ill<sup>me</sup> & Reu<sup>me</sup> Domine, ante omnes scribenda ad te censui, & peccaturus videbar, si gemmam hanc vt sic dicam adolescentis alteri offerrem. Si tamen ratio aliqua est quæ nunc non admittat, commendatum certè notumque esse cupio, & honorem interdum habere vel adspectus tui vel affatus. ILL<sup>ME</sup> ET REV<sup>ME</sup> DOMINE, Deum oro seruare te longum Ecclesiæ & Patriæ, atque etiam in Patriâ, velit. Louanij, Kal. Aprilis. ∞. IOCV.

EPIST. LXV. *Romam.*SERAPHINO OLIVARIO S. R. E. *Cardinali.*

**V**OTA nostra & bonorum Deus audiuit, & ad dignitatem euexit, quæ virtutibus & meritis tuis iamdiu debebatur. Animo hoc gratulatus pridem sum: nunc & scripto, cui materiem etiam Philippus Rubenius noster dabit. Nosti iuuenem, & vidisti Romæ: atque vtinam interiorum eum totum, & bonam  
egregij



egregij animi noſſes! Græcè, Latinè, inter paucos doctus eſt; ſtilo utroque facilis, & vel ad veterem elegantiam in verſu; hiftorias & memorias veteres nouit: & quod caput mihi quidem, iudicij in plerisque omnibus puri & directi. Mores ſunt, vno verbo, quos vel in filio (ſi Deus dediſſet) optem. Quorſum iſta? Ad Romam veſtram iterùm adſpirat, etſi me, non abnuo, refragante. Nam ego hîc illigare eum, & in Profeſſione mihi ſufficere deſtinabam; & iam cû Principe agere cœperam, imò & impetraram. Quid tamen eſt? intemperanter Vrbem amat, & nescio quis Genius eò vocat: bonus, vt ſpero, ſi vos tales fauetis & iuuatis. Atque hoc Ill<sup>me</sup> & Reu<sup>me</sup> Domine, fiducia tui in me & litteras amoris, peto. Commendaui equidem priuatim Ill<sup>mo</sup> Cardinali Columnæ, vt à Bibliothecâ ei eſſet: ſed litteras eas ſuſtineri volui, donec de tuo conſilio rē inſtituerem: & aut illuc aut aliò iremus. Rogo iterùm, dirige & gratiâ atque auctoritate tuâ nos iuua. Ego ſpondeo optimâ & Romanâ fide, non ſolùm pro opinione tuâ, ſed ſupra Rubenium futurum, & vſui atque ornamento eſſe poſſe, quicumque rari adoleſcentis hoc decus habebit. Dabis autem veniam ſic liberè & reuelatâ fronte hoc petenti: iam dixi, fiducia amoris tui (de quo alij ad me) factum; & addo notiâ virtutum tuarum factum, quas cû tam multas habeas, fieri non poteſt quin & in alijs ames. ILL<sup>ME</sup> ET REU<sup>ME</sup> DOMINE, voto duplici claudio: altero vt Eccleſiæ diu ſis ſuperſtes; altero, quod animo concipio, ore non promo. Louanij, Kal. Aprilis. ∞. Iocv.

## EPIST. LXVI.

*Mediolanum.*

ERYCIO PVTEANO ſuo.

**I**N grauiffimâ tempeſtate morbi fueram, cû Beemdius tuas dedit: neque emeſſi etiam, portum tamen propiùs ſpecto: ſi ille non erat verè portus, quò ibam. Homines ſumus, & ibi quies. Epidigma tuum Hiftoricum vidi: valdè placuit à robuſto & vegeto ſtilo, nec cenſebam te ſic aſſurgere. Plura modò fuiſſent: & cur non etiam in digniore argumento? Litteræ tuæ quædam ad amicos quæclas præferunt, & nauſeare illâc videris. At lentè & prouidè agendum eſt, mi Puteane, & ſumendi  
pro

pro temporibus affectus. Alia mereris? fateor, sed rectis iudicijs, quæ istud æuum in nostrâ re non habet. Si solus sis, facile migres, & pedem aliò inferas: nunc comparem habes; solatium, sed & impedimentum. Rogo te iterum; lentè, & mecum philosophare. Belgia aut Germania non donet, quod istic habes. Sed etiam æmulos, inquires. Et credis hîc non esse? vetus & magna fama vix sustinet: quid nouella & assurgens? Si mihi liberè & remoto velo te pandis, consilium non deerit, & auxilium quâ potero. Confide interim, & Deo & te nitere, & animum pro ingenio habe: id est, magnum & altum. \* *Στέργε* \* *Acquiesce præsentibus.* donec Fortuna alibi sinum pandit. Louanij, VII. Idus April. 60. 1607.

Postquàm scripsissem, tuas nouitias accepi, & Tesseræ tertias. Sunt sanè bona & arguta in ijs: sed iudicium, aut consilium potiùs, non muto; & laudem mihi à maioribus pete. DIVAM nostram acceptam ibi, benè est, & debet in Italiâ: quid censes in Batauiâ? Vapulo, & scripta in me & libelli; etiam è Galliâ nunc, neque hominis indocti, vt apparet. Nosti partium factionem. Nos Batauo aliquid reposuimus in fine DIVAE SICHEMIENSIS, quæ iam editur: de Gallo, videbo. Et si litigare scis quàm nos abhorremus: sed obijciunt ea, quæ religionem & famam meam tangunt. O æuum, in quo bonis modestisq. multa ferenda sunt! Quomodo? *stomacho Ciceronis*; non enim licet *animo Catonis*. Tibi etiam suggero, & fer, & feruorem ingenij aut ætatis compesce. Laxa autem omnia in mei amorem v. Idus April. anni scripti.

## EPIST. LXVII.

Insulas.

FLORENTIO VANDER-HARIO, Canonico &amp; Thesaurario.

TVAS & Legati litteras accepi, & illis quoque respondi, vt hîc videbis. At tuas caras habui, non solum quia primas, sed quia amicè & prudenter scriptas. Duo earum capita. prius de excursionem meâ Lutetiam: & huic rei stimulos vel incitamenta adfers. Quid tamen opus erat, si valetudo fræna mihi laxaret, cum sponte propendeam & iamdiu animo illuc

Ii

adspi-

adspirem? Sed reuerà vltimus iste morbus ( de quo audisse te video) sic me afflixit & deiecit, vt fuscipere longiusculum paulò iter non audeam, vacuus virium, & leui momento fortasse collapsurus. Alioqui Lutetia quomodo me non trahat? quomodo non ille, qui sic amanter inuitat, & quem tanti facio? Sed & momentum, fateri debeo, tua scriptio habeat; quæ omnibus illicijs illis & blanditijs suggestis, oleum in hunc ignem, vt sic dicam, addit. Sed differre debeo, & spe me pascere, ac cogitatione interea loca atque homines illos vsurpare. Caput alterum, de aduersario illo in Diuam & me scripto. Cuius auctorem adhuc quæro: sed quicumque sit, consilio tuo nimis acquiesco, de silendo & contemnendo. Et sunt tamen, etiam graues & pij viri, qui aliter volunt, & velut classico me excitant ad pugnandum. Sed cùm naturam meam, cùm ipsam rem, cùm finem fructumque video, inclino quò tu ducis. Natura sanè mea mitis & tranquilla est, vehementiori omni affectui aliena, & ab ingenio meo deferar si irasci velim aut litigare. Respondi quibusdam, fateor: sed comiter, non acerbè, & commissionem aut ludum magis dicas, quàm pugnam. Non est meum Thyestæo more, quod hodie obtinet, furere aut sæuire. Deinde ipsa res, vti tu verissimè, quid est? duplex, vel in me, vel in Diuam. Hanc Theologi vindicabunt, aut potius iamdiu vindicarunt. Quid enim ille homo adfert, quod non à triginta ampliùs annis refutatum? At in me quæ dicit, duo item sunt: quòd & Tullius sim & Iulianus; siue caussam deferuerim, & religionem. De caussâ, parum est: numquam in eam me dedi, nec publicè aliquid attigi, quod scio te quoque scire. De religione, ab annis triginta tribus, id est omni maturiore meo æuo, constans & firmus in istâ fui: nec vel in Bataviâ, id est inter medios aduersarios, vacillaui. At in Adolescentiâ meâ volunt aliter. Primùm, scito illos augere & fortiter mentiri, præsertim quod ad scripta: in dictis aut factis, siquid in communi Europæ motu titubaui, abeat, & *hinc æstimemur* (ait ille) *cùm sumus nostri*. In alienâ religione, in æstu adolescentiæ, inter blandientes aut terrentes, facile fuit in speciem culpæ venire, si non culpam. Ad Prudentiorem aliquem, id est tui similem, appello. Denique fac me respondere, & hæc omnia



omnia obterere ac profligare: quis finis, aut fructus erit? Finis? imò principium litigiorum: & pro vno meo scripto tria rescripta. Gaudent homines his pugnīs, & præsertim in nomen aliquod illustre, quale benignior Fama fortasse mihi dedit. Fructus autem, ille ipse quem dixi, odia & pugnae. Non enim illos meliores ita facimus, aut causae nostrae amiciores: cōtrā est, & alienamus. Quid autem bonos? de me scio & sentio, offendimus, & superbiae aut contumaciae taciti nos damnant. Heus, heus, Christiani sumus: sacerdotes pacis, ut Tertullianus ait: & siquid peccatum est, pænitere malimus quàm defendere. Hæc mea mens est, & erit: in quâ suffragium me tuum habere, Vir Reu<sup>de</sup> & Clar<sup>me</sup> gaudeo: tu me inter amicos & clientes. Louanij, xvi. Kal. Sextil. ∞. IOCV.

## EPIST. LXVIII.

*Bruxellam.*IOANNI RICHARDOTO, *Præsidi.*

**T**ERTIA hæc consolatio est, quam scribo: & me verba pænè deficiunt; an non te animus, in tam assiduo & repetito Fortunæ ictu? Non opinor, ut tua prudentia est: quæ & robur sumpsisse iam ab usu debet. Tiro aliquis miles ad primum vulnus collabitur, veteranus sine motu sanguinem suum spectat. Et quid mirum, si consideras, Fortunam in te vires suas sæpè experiri? materiam habet, & numerosam florentemque familiam Deus tibi dedit. Tela in vnum alterumque missa, aberrant: vbi turba est, lædunt etiam quem non petunt. Fortunæ causam agere videor, Ampl<sup>me</sup> Domine, tuam ago: quia vnum alterumque si tulit, habes in quos spes tuas reclines, & solatium in omni luctu petas. Ecce proles reliquas, ecce tot nepotes! benè fundata domus est, rarefcere potest, extinguī (nisi inopinabili aliquo fato) non potest. Et vis robustum vnum solatium promam? Cogita tam multos non habuisse. Olim inter vota erat, & legibus munerata felicitas, tres liberos sortiri: quid? plus bis tres etiam nunc potes (& longum opto) numerare. Et addo, quòd tuus iste qui periit, ascitus in familiam tantum, gener non filius, amore non sanguine iunctus fuit. Quid, quòd nec ipse totus periit? prolem è carissimâ filiâ tuâ tibi, nobilissimæ familiæ



germen relinquit. Adolefcat, & te ac matrem magis magisque oblectet. At pater ipse quomodo perijt? vt militari viro, & stirpe illâ dignum erat, in acie, in armis, & spiritum suum patriæ ac Principi impendit. Patienter me audi; habes etiam in quo glorieris, etsi tui isti casu. Ecce duos iam è tuis, filiû ac generum, pro publicâ salute panè dicam immolasti. Certè consecrasti; & à tam honesto fine, piâ causâ, non solum in memoriam hominum, sed ad beatas sedes æternâ fruituri gloriâ iuerunt. Hæc te solentur: & quid addam? timidum in tertio filio reddant, quò meus quidem timore te vocat. Antonium nostrum, qui vnicum Richardorum fulcrum, propago, semen, subtrahe ab incertis istis belli; & satis sit gloriæ vel fidei, Martem duos iam pignerasse. Hoc te rogo, & simul paullò post cogitare de honestâ eius copulâ, & nouis gaudijs hæc ad præterita mala obliterare. Apud te, spero, audiar, & modum dolori prudentia tua ac ratio dabunt: dies apud filiam, cuius primis affectibus cruda hæc auulsio accidit, & frustra suadeamus non lugere. Mulier etiam est: te fortes & viriles curæ decent, te Respublica & Princeps vocant, neque otium indulgent mœrori. Mane in hac statione, quam Deus assignauit, Ampl<sup>me</sup> & Nobil<sup>me</sup> Domine, & diu in ipsâ vitâ hac mane, publico bono. Louanij, iv. Kal. Septemb. ∞. IOCV.

## E P I S T. L X I X.

CAROLO PHILIPPO RODOANO *Episcopo Brugenfi.*

**L** I C E N T I A T V M hunc nostrum, & Canonicum tuum abeuntem à nobis vt animo & fauore prosequor ita commendatione meâ comitari, iterumque sistere Reu<sup>me</sup> D. tuæ volui. Ostendisti iam animum, & deuinxisti illum ac me beneficio: rogo vt exhibere eundem porro digneris, & beniuolentiâ tuâ meritum complecti. Certè à me præcepta illa siue monita habet, Deo & diuinis piè operari, Antistiti suo obsequi, cum collegistranquillè & modestè versari. Confido facturum, & Ecclesiæ vtilem futurum. Audio Pœnitentiariam, quam dicunt, vacare; quæ de more dari Canonicis affectis solet. Si iudicas hunc idoneum, audeo commendare; sicutamen vt totam eam rem prudentiæ tuæ meritò permittam. Deum rogo  
Reu<sup>me</sup>

Reu<sup>me</sup> in Christo pater ac nobilissime Domine, diuturnum te in Ecclesiâ & republicâ, atque vtinam meliore æuo, esse. Louanij, prid. Kal. Septem. ∞. IOCV.

## EPIST. LXX.

*Romam.*

LVDOVICO BECCATELLO.

**D**VPLICI nomine & epistolam tuam caram, & ipsum te habeo; priore quòd me, altero quòd & Rubenium meum sic ames. Quod vtrumque ex epistolâ tuâ cum didicirim, meritò grata accidit: & in vtroque vt perseueres, te rogo. Nam & ego certè affectum hunc iam in te indui, & fide ac candore, quem Amicitia debere scio, seruabo. Sed de Rubenio, & ipse tibi debet, ac coram vel soluer, vel certè agnoscet; quòd te sic promptè & industriè agente, in familiam Principis illius viri venerit. Et quamquam res auctoritate Ill<sup>mi</sup> Seraphini peracta sit, tamen te quoque affectu & dexteritate illâ contulisse, & scimus, & fatemur. Enimuerò benè fecisse tam bono & merèti viro (Rubenium dico) nō pœnitebit te vnquam mi Beccatelle: & si vitam Numen ei largitur, sparget & ipse ingenij sui lumen, & ad externos ac posteros diffundet. Fiat, voueo. Sed illud me etiam in epistolâ tuâ delectauit, de Cardinali Palæoto, beatæ memoriæ viro: in cuius familiâ egisse te scribis. quem ego viuum colui, & amari ab eo me sensi, & defuncti nomen etiam apud me est sanctum. Fecisti iacturam in eâ morte dicam, an non fecisti? Transijsti enim in huius viri domum, quem ego inter primos Europæ esse scio, & cuius benignitas in me quoq; affectum largiter ostendit. Vt diu frui possis, meum votum est, & vt inter nos amemus. Vale vir R<sup>de</sup> & Nobilis. Louanij, viii. Kal. Octobr. ∞. IOCV.

## EPIST. LXXI.

*Perusiam.*

M. ANTONIO BONCIARIO S. D.

**R**ISI in epistolâ tuâ, quâ Laconisimum voues: & quid dicam? imitari te virgines, quæ formosæ, modestiâ quâdam formam optant, & tacito sensu sciunt & gaudent se habere.

bere. In te est, mi Bonciari. certè in hac epistolâ sic illum exprimis, vt exemplum esse Laconibus possis : & quod palmam poscit, argutias & Veneres Atticas vnâ mîsces. Me ducem facis? Fateor cædi me à meo milite, & in meis castris. Sed ad rem. Legi quæ de Ill<sup>mo</sup> Legato Cardinale scribis, valdè in me amica : nec pudor meus passus, neque ratio erat, silentio hæc me præterire. Scripsi igitur ad ipsum, & curæ tuæ erit vt videat: quid etiam? vt probe hanc animi mei declarationem, puram, sine fūco, sine ambitu, qualis mūdi ille status est super nubes. *Stoïca* nostra vidisse te non nolo, magis approbasse. Idem in *Monitis* : quæ plus fortasse prompti, vt sic dicam, fructus habent : sed *Stoïca* examinata ad Virtutem ducunt, directâ iudicio quod Pietas formauit. Accessit nunc & meus *Seneca* : & iure mirabar, siquid post multos & magnos illos possem. Potui, & ad scripta ac Notas meas appello. Etsi nihil in ijs quod circulum, id est populum spectet : breuia & adducta sunt, nec nisi examinanti laudanda. Te aliquem lectorem, non è pullatâ turbâ, poscunt. At ego deinceps etiam tuum amorem : hoc magis, quod frui diu fortasse non erit; ita valetudo hæc præcipitauit casu nupero : at tuam ego firmam opto, ô Italię tuæ (patere me sic loqui) *Homeræ*. Louanij, postrid. Idus Octobr. ∞. I. C. V.

Scisne Epistolarum tuarum libros ante annum in Germaniâ recusos? Vides iudicia, & confide de famâ.

## EPIST. LXXII.

HENRICO VANDEN EEDE, cognato suo.

**I**AM ANTE triste fatum optimæ matris tuæ acceperam mihi cognate, & in animo meo senseram dolorem. Mihi crede, iacturam fecisti in tali parente, tam industriâ, probâ, piâ, & tui amante. Quid tamen est? communem legem habere in oculis oportet, & illi ac diuinæ voluntati non refragari. Omnes eò imus, & ordine non sine variamus. Benè etiam, & magna vobis consolatio (tibi ac sorori, dico) quòd piè vixerit, assidua in sacratis occupationibus, precibus, locis: vt fiducia esse debeat receptam eam ad beatas sedes, in quibus diuinâ visione fruitur, id est omni felicitate. Hoc speramus. & precibus eam magis quàm




quàm lacrymis prosequere : ita facturus pij filij officium, & quod ipsa à te ambit. Ceterùm ab illâ etiam oculos ad te reflectes, & vitæ ac studiorum cursum moderaberis, vt eius & amicorum voluntas tulit: hoc est, ad Virtutem simul & Doctrinam ibis. Non propone tibi ambitionem aut quæstum è studijs, qui plurium hodie finis: sed prudentiam propone, & conformationem ingenij, ad publicos & priuatos vsus. Adiunge deinde finium finem, honorem Dei, & tuam salutem. Hæc obiter nunc moneo mi cognate, vberius aliquando in sermonibus facturus, cùm res tuæ ferent ad nos redire. Nunc animum à luctu compone, & ad vetera studia dispone; & memoriam tamen & exempla optimorum parentum (nam & pater talis fuit) in animo habe, & imitare. Louanij, postrid. Non. Octobris. ∞. Iocv.

## EPIST. LXIII.

*Bruxellam.*

PETRO PANTINO V. R. S. D.

**P**RO chartis meis nummos à te accepi, & quidem probos, veteres: adeò non gratus solùm, sed promptus es, & statim tibi visum *ἀντιδῶναι*. Laudas editionem Senecæ, modum & formam, & chartam: sed quàm mallem ipsas Notas, & quæ à me, non Typographo, essent! Mallem dico, si merui: neque aliter. Et scio in frontem quædam tenuiora videri: sed examinata fortasse pondus habeant, aut certè vsum afferant lectori. Denique illustria quædam & à nobis esse, post multos & grandes cēsores, id quoque, *ἐδὲν αὐτὰ λαζονόμοι* , dicam. Sed tu, & qui potestis (pauci in Belgicâ) iudicium feretis. In publicis percussit equestris clades iam nuper accepta ad Rhenum: etiam Principis morbus, etsi remisisse nunc, imò dimisisse, dicebatur. Audiisti-ne & classem iterùm ex Hispaniâ aduentare? si non aliam, aut maiore instructu, & addam consilio, quàm hanc priorem: vbi menseorum est? Nam hoc quidem planè videatur \* *ὅς ὑπὸ πόρτα- \* Sua sub*  
*λον*, quod Græci tui dicunt. Vale V. R. & nobis care. Louanij, *sustem.*  
Idib. Octobr. ∞. Iocv.

EPIST.



## EPIST. LXXIIII.

BONIFACIO BEVILAQUAE S. R. E. *Cardinali,*  
*Legato Umbriae.*

**G**ALLICAM audaciam vide, & hominem, nisi de nomine fortasse ( & hæc tua benignitas est ) notum, ad te scripto adeuntem : sed à causis, ut meus animus dicit, iustissimis impulsus. Dignitas tua est, quam scimus ; genus, opes, & quod caput est, virtutes : ijsque cultum nostrum merebare, & quamquam in silentio, venerationem. Sed accessit in me benivolentia, quam M. Antonius Bonciarius, merito rarioris doctrinæ carum mihi nomen, aperuit & litteris affirmavit : quæ vocem siue stilum istum elicit, & sistere me velut coram iussit. Quid dicturum? quod facerem, si adessem; sed vultu, oculis, toto gestu affirmatiùs; me nomen inter cultores tuos profiteri, & rogare admittas, fide & officio nemini vel veterano cessurum. Sincerè, & sine moris aut eui nostri verbis, sum animo & affectu inter tuos clientes : gaudebo recipi, & magis, si usus aliquis mei esse ( quæ sperem in tam longinquis locis? ) esse inquam potest? Scripta & libellos nostros non improbare te audio, & in manus interdum sumere: honos mihi est, & addam, stimulus mihi est, ad decurrendum porro hunc cursum, quem vos plausu & favore incitatis. Sicut histrio, aut alius actor, gaudet coram Principibus viris specimen operæ atque artis edere : sic nos spectari à vobis, quid approbari? Testor hoc igitur, & gratiam hinc consigno, & quod antè dixi, officium deferò & cultum. Louanij, postrid. Idus Octobr. ∞. IOCV.

## EPIST. LXXV.

*In Castra.*

IOANNI GAVERELLIO *1<sup>to</sup> & Judici Legionis.*

**Q**UOD in feruore illo rerum memoriam mei retines, gratum est: & merui in parte, amore meo tui. Scribis distinctè quæ adhuc euenerunt, & sanè læta : atque initia iacta esse, & velut fundamenta melioris Fortunæ, ego tecum spem concepi. Duce[m] ipsum nostrum video, bonæ Famæ auidum, Deo

&

& Regi addictum, intelligentem, diligentem: cui nihil desit, si occultâ æmulatione quorundam à Rege ipso (quod abominor) non deferatur. Scis factiones in potentiorum Aulis, suspiciones, delationes: neque semper recto iudicij oculo res aut homines æstimatos. Si tamen ista spes & fulcrum nos deserit; ego nihil video nisi funus nos esse. Placet, bellum translatum in hostilem limitem: & diu sic oportuit: non honoris & decori solum causâ (quia turpe est, tam potentem Regem & Principes, non inferre bellum, sed propulsare & defendere:) non, inquam, ideò tantum, sed quia sic expedit, & nil nisi clades in nostris finibus expectemus. Multa considerata in eâ re, quòd hosti subsidia belli imminuimus, nobis augemus; quòd militem alacriorem, & animi fidentiore, habemus; quòd distinemus illorum copias, & ad multiplicem sumptum & impendia adigimus; denique quòd ferociam illorum atterimus, & docemus suis timere. Mihi ita videtur (& puto in opinione non falli:) si biennium tantum, in illorum finibus copias habemus, cum disciplinâ, & à seditione expertes; hostes valdè frangimus, neque aut ipsorum, aut occultæ aduenticiæ vires subsistent. Sed hætenus confusio apud nos, bellum aut rebellio inter nos quomodo non partes illorum erigat & attollat? Quòd si classis deinde, bonis viribus & naualibus socijs instructa, ab Hispaniâ accedat: mihi crede, nō inclinationem solum, sed finem belli videamus, & seditiones à nobis in ipsos ire. De Regum occultis consilijs, aut pactis, nihil dissero: omnia tamen me fallunt, aut Rex Britannicæ amicus illis esse non potest, qui regna tollunt; non item Daniæ, & quicumque magnitudinem suam & securitatem amant. Sed longius eo, capiatur Wachtendonck, tum Meursia, & Cracouia; denique alius transitus in Rheno fiat; res illorum in arctum eunt, & Fortuna quæ risit, vultu vertet. Marchioni dumtaxat robore opus & fortitudine animi, contra occultas fraudes: & sciat multos esse, qui bellum belli causâ gerunt; qui dolituri sint in deuergio rerum, & ubi plena victoria ad nostros ibit. Hæctabes in ciuili diutino bello: intelligat, & se muniat, & felici pede porrò ad gloriam eat. Vale mi Gauerelli. Louanij, v. Kal. Nouembr. ∞. I. DCV.

## EPIST. LXXVI.

*Antuerpiam.*HENRICO VWENO I<sup>to</sup>.

**F**ILIVM tuum vidi, & amplexus sum, & porrò amplectar: ita affectus meus in te poscit, ita adolescens ipse meretur, & magis magisque merebitur cum ætate maiore. Spero patri similem futurum, atque vtinam supra patrem, te volente! Quòd Senecam nostrum probes; parum est de nostro, id est quæ ego attexui; sed valdè cupio & hortor vt ipse auctor placeat, optimus Dux, si quisquam veterum, ad bonam Mentem. A naturâ eò duceris, cape directorem contra vulgi iudicia & voces, quæ sæpè interpellant. Significas ad primarium iustitiæ tribunal te vocari, & iam audiueram: sed competitorem habes, quicum scio non libenter te concurrere, & pænè malle vinci. Vis meum iudicium? Gaudeo te vocatum, & laudo Senatores recti sensus: opto Princeps eò eat, & homines muneri, non hominibus munus donet. Benè factum, quòd ad Præsidentem modestè, & in eam sententiam scripseris: hoc satis est, cetera Deo & Principi permitte. Tuus honos fortasse agitur, res non agitur: & illo augente, hæc minuetur. Scis, quid dicam. Sed puta & constantiam tuam & æquanimitem spectari: nos in te vertimus oculos, & videbimus ambitio, an respublica ducat. Si illa, dolebis in repulsâ: si ista, facies quod olim Cato, & vel pilâ eodem die ludes. Non enim reuerà tu, sed illa repelletur: & hoc vir sibi, & donis à Deo, fidens cogitabit, tempestiuum nondum esse ad-moueri. Ad rempublicam optimi & seuerissimi sapientum, imprimis Stoïci nostri, mittunt. quid ni? animal societati natum, ratione & consilio præditum, & quibus plures potest debetque iuuare. Hoc magis, cum institutio & doctrina, & addam, vsus accessit: quæ omnia in te, mi VVene, scimus esse. Itaque tu te idoneum ciuem patriæ dedisti, & in promptu ac velut procinctu es, si vocat: vltro ingerere, non modestia, non mos item volunt. Amo autem valdè, quod de magnâ republicâ & mundo, pro intimo meo sensu addis. Ita est. ò illam colamus, si ab hac minore spernimur: & quanto grauiores, atque etiam suauiores, curas habebimus? Venient in conspectum diuina & humana:

nec



nec de terræ glebâ, aut stillicidio, ius dicemus; sed cælum, aër, terra, maria, & quidquid Geniorum aut animantium hæc colit, considerationis & arbitrij nostri erunt. Tollere in hunc currum potius, & in ætherem subuola; quàm sellam aut tribunal ascendas, vbi cùm sederis & caput tolles, videbis quàm in humili eris. Satis philosophiæ. quàm modestè tractari & haberi, præsertim à vobis patribus familias volo, & cogitari etiam quos in terrâ habetis & relinquitis, à Deo datos. Non renuntiat ijs curis philosophia, sed temperat: tu fac, & me ama. Louanij, III. Idus Nouembr. ∞. IŒCV.

## EPIST. LXXVII.

GASPARI DIEMENO.

**A**B epistolæ tuæ lectione voluptatem, admirationem, iram etiam concepi. Omnia hæc vno tempore? vno. Voluptati fuit amor, quem seriò & candidè præfers, & verbis ita exprimis, vt animo huic imprimas, & persuasus sim non vulgariter à te amari. Admirationi, ipsa scriptio: à taline talis? Mercurialium te virorum censebam, & sic profiteris: ego Censor titulum mutem, & Musicis ac litteratis iure adscribam. Profectò non libasti in iuuentute hæc studia, vt coràm dicebas, sed combibisti, & è pleno eorum pectore manant quæ scribis. At hoc ipsum est, quod Iræ fuisse dico. tène ad me venire, & sic callidè tegere & dissimulare? O vulpio, non impones postea: veni, veni, & amplectar te & vinciam, & sermonibus tuis suauius, atque etiam diutius, fruam. Non, inquam, sic vt vnum aliquem τῶν τυγχόντων, vel accipiam, vel dimittam. Nam amare te deinceps certum est, mi Diemene, & scriptis amorem fouere, ac factis, vbi opus aut vsus, testari. Hoc dextrâ istâ fideliter scribo, & do eam animi huius testem. Iam ad tuas litteras. Scribis de bulbis quibusdam selectioribus mittendis: fac te quæso, & voluptatem hanc meam, quâ pascor, in!true vel auge. Post libros, duæ sunt auocationes, vel solatia: Hortus, & Canes. De fructibus autē ab Hispaniâ, nihil vrgeo: tantùm, nec illos ingratos vxori fore à nouo amico. Habebis & à me breui donum magnificum, regium: quod illud? opidum totum, &



LOVANIVM nostrum, quod iam typis cuditur, intra paucas septimanas mittam. De nostro ibi Villerio (nec enim amare desij) porrò curare perge, & ne magis in præceptis etiam ruat. Siste, si non potest reduci. Quòd Senecam habeas, & ames, ò quàm gratum! Mihi crede, non est auctor aut dux certior (de profanis loquor) ad bonam mentem: da te illi, & Mercurio tuo Mineruam istam iunge. Sensum meum interiore tibi dicam. amo valdè hoc genus vestrum, quì curas externas internasque misceris, & vulgi bona istis veris solidisque temperatis. Non alia vita Pomponij alicuius Attici, & veterum illorum equitum Romanorum fuit. Vale, & litteræ etiam tuæ me adeant, donec tu iterum, & culpam dictam purges. Louanij, prid. Idus Nouembr. ∞. IOCV.

## EPIST. LXXVIII.

*Tornacum.*

## DIONYSIO VILLERIO.

**S**ENECAM accepisse te gaudeo, magis approbasse. Nam quid te celem? In hac ætate ingrauescente, in continuâ inualetudine, timere de iudicijs incipio, & ne scripta mea non sint pro famâ priore. Tu aliter dicis, & cum cygno me componis; benè est, si affectui hoc non dones. Ordines Brabantiae scribi ad me iusserunt, gratum sibi fore si de Historiâ patriâ cogitarem: & suscipienti liberalitatem suam promittunt. Quid tibi videtur? nondum respondi, & tamen inclino: imò sçõte iam me cœpi ad ista dare, vt videbis in LOVATIO nostro. Quod Duci Croyo & Arschotano inscripsi, & per occasionem nuptiarum istarum (aliter numquam) conscripsi. Quibus nuptijs an & tu intereris? Ille me serio vocat, & iubet: sed alibi paruero, hîc valetudo vetat, & pompa minimè Lipsiana. Malim apud te mi Villeri fabulari, conuiuari, ambulare. & fiet, vbi Ver primum carceres aperiet ad excurrendum. De publicis equidem filui, & quamquam te excitante, etiam fileo. Quid enim magnæ rei, aut vel spei, possum? Nos in limite assultamus, & hæremus: & vereor vt lentè perrumpamus: & sic quoque bellum inexplicabile habeamus. Longiùs enim progredientibus maiora & munitiora occurrent. Ego in veteri sententiâ maneo, de classe: & sine eâ finem

nem aut inclinationem in ñ fore huic bello . Sed classẽ mei sensus atq; arbitrij velim, non qualem Iberia nobis misit, aut mittit. Nam & nunc in eo esse dicuntur . Multi aliquid ab occulto consensu Regum sperant, quibus placere vix possunt qui regna tollunt: sed lentum est, & multa interueniunt quæ impediunt, aut mutant . Interea Austriaci clades magnas in Turcico limite accipiunt, & tota regna perdunt . Austriaci? imò Christiani. nam commune profectò periculum est ab immani illo hoste. At nos cessamus : etiam ego, & te valere iubeo mi Villeri. Lo-  
uanij, Idibus Nouembr. ∞. lccv.

## EPIST. LXXIX.

*Antuerpiam.*

AVBERTO MIRAEO V. R. S. D.

**C**VM apud me esses, optime Miræ, inter varios & delatantes sermones, de Historiâ patriâ locuti etiam sumus, ad quam illo ipso tempore Ordines me inuitabant. Dixi tibi statim promptè me suscepturum : & quid negarem magnæ parenti meæ, id est patriæ ? Laudem eius & vetera facta propagemus: & ostendamus exteris, neque barbaros nos, neque in militiâ aut pace inglorios fuisse. Hæc magnitudo & potentia, quæ nunc est, & animos exterorum percellit aut viit; tota ferè à Brabantia est, aut certè augmentum & culmen ab eâ habet. Ergo libens scribam : & decere hanc ætatem meam videtur, ad propria magis quàm aliena stilum vertere: ac si quid prudentiæ aut iudicij à naturâ, vellectione, vel etiam vsu habeo, in Historiâ promere, quam licet Practicam philosophiam vocare. Alibi alia dicuntur, aut suadentur; hîc exercentur, & præter exempla sententijs iudicijsque notantur aut suggeruntur. *Siquidem debent* (ait vetus Historiæ scriptor) *ea poni ab Historiographis, quæ aut fugienda sunt, aut sequenda.* Ita est. neque clarius speculum morum, morum? etiam Fortunæ, & variæ sortis rerum, quàm in hoc æui theatro: vbi præmia pœnasque bonis siue improbis obserues, vbi constantiam aut robur ab alienis exemplis sumas, siue cùm in aliquo ea esse admiraris, siue cùm abesse indignaris. Et dic fodes, nōne hæc melius scribere, quàm nugatori alicui aut sycophantæ rescribere? Nam patere me hîc affectui

tuo frænum aliquod dare, qui nuper incitabas ad respondendum. Læsit enim Diuam & te, inquebas. Diuam? non potest: illa est extra ictum. Me? nec id quidem: sagittas in me misit, sed in aëre hæsuras, nec ad animum istum peruenturas. Miseros nos! si talibus configi necessum habeamus, quoties illi Massage-tæ aut Scythæ iaculantur. Cur non sic appellem? imò omnibus barbaris immaniores sunt, qui nos modestè, grauius, & sine cuiusquam iniuriâ scribentes inuadunt, & laceffunt. Atqui iniuria est in religione dissentire. Itâne? & cò ventum? Illi nouitij, & nuper nati (nec ipsi negent) regnum capient, & veteranos possessione iustissimâ pellent? O L I B E R T A S, quam præscribunt, & proquâ armantur! Indignor hæc fieri, & mecum boni: sed mederi aliorum est, & à responsione nostrâ frustrâ id speres. Irritabimus. sicut ignem qui gladio fodit, scintillas in se plures & stricturas elicit: tale in istis; cæde & dissipâ, acrius insurgunt. Est hoc ingenium contumaciæ, subijci posse, non domari. At enim quæ famam tuam spectant obijcit. Quæ illa? Ienæ fuisse. Publicè dudum sum fassus. Quid etiam? Orationes ibi habuisse. Vel vicens, non nego. Tales illas improbas & impias. Hoc nego, hoc pernego: & palàm editâ Epistolâ ostendi falsimonias istas meras esse. Tamen iterum aiunt. Quid ergo me vis facere? ora ijs claudere? non possum. Parum cauti aut probi sunt, vt rem dicam, qui attendunt: & occultè cupiunt aut esse tale aliquid (nouimus ingenia) aut simulant ambigere, vt in Arenam me proluciant, & voluptati eorum pugnem. Ego faciam? apage, honestior sum, non violò edictum Augusti. Possum alioqui, fateor:

\* Et mihi  
sunt hæc,  
sunt &  
mihi scura  
rotunda.

\* καὶ μοι δέονται ὅτι, καὶ ἀπείδεις ὁμολόεσαι

& ostendi, vbi res aut vsus fuit: hîc non committar, & cum his, quos nullâ meâ gloriâ vincam. Vno verbo, & breuiter. In freto illo adolescentiæ (nam hæc obijciunt, & ab annis triginta quinque circiter repetût) in illo, inquam, æstu ac feruore ingenij aliquid fortasse inconsideratiùs dictum, aut factum: quid iam est? Ex veteri sententiâ, *Hinc æstimemur, cùm nostri sumus*. Postquam curæ alienæ non fui, cùm solidæ mentis, steti in solido: cetera Pœnitentia defendat. cuius portus ex facili hanc cymbam admittet, quæ Reges, Principes, Ecclesiæ ipsos apices non exclusit.

En



En ineam vitam à tot annis ! vbi vacillat, aut fluctuat ? Neque nescio quorundam hodie prauam sapientiam esse, frigus præferre, medios agere : vt de ijs Homericum illud iure efferas :

\* Τυδείδῳ δ' ἐκ ἀνθρώπων ποτέ εἰσι μετείν :

mihi displicuit. Factis, scriptis, dictis ostendi, \* *Vetera nouis, & quieta turbidis antehabere* : quid amplius poscunt ? Inimicitias conciliaui: etiã nne lites, & quidem perpetuas, volunt ? Nam hic finis non sit, & oriantur *Tusca iurgia*, quod vetus verbum dixit. Ama me, hæc omitte: de *Diuis* nostris securus, quæ fremente impietate viuunt, & noster in Numen cultus. Louanij, postrid. Idus Nouembr. ∞. 10CV.

\* Tydidem  
hand nosse  
viris in  
partibus  
esset.

\* Tacit. II.  
Annal.

## EPIST. LXXX.

*Mediolanum.*

IO. BAPTISTAE SILVATICO S. M. D.

**L**IBROS à te accepi, etsi non litteras: quid etiam ijs opus erat? nam ipsa Præfatio epistola est, quâ labores tuos (vtiles & doctos, ita me Deus) mihi dedicatum is, & nomen meum tuâ etiam luce illustratum. Ita sentio, ita accipio: & quamquam in hac ætate ambitioni alienior, gaudeo vel in testimonio vel in beniuolentiâ, quæ vtraque erga me promissis. Remotus à vobis sum locorum spatij: atque vtinam nunc propior sim, & Pegaso aliquo possim subuehi! videres mi Siluatice in vulcu, oculis, voce affectum erga te; & tuo merito susceptum: qui non, vt alij, elicere amorem meum, sed pignerare voluisti. Obligor, hoc fa-teor: pande viam quâ resoluam, videbis Ingrati dicam scriptum mihi iure numquâ iri. Dum id fiat, affectu gratus certè ero, & te in animi isto sinu geram & fouebo: tu quæso, quem vltro amplexus es, ne dimitte, & litteris me appella. quoniam eâ, in hac locorum intercapedine, sermonis vicem debent possuntq. obire. Fac, & te rogo. Louanij, xii. Kal. Decembres. ∞. 10CV.

## EPIST. LXXXI.

*Antuerpiam.*

BALTHASARI MORETO suo. S. D.

**R**EMITTO, quæ misisti. De numeris in *Icone Heuerlea*, videbo si pictor poterit: & dubito, quia breue est tempus. Parum



Parum refert: præcipua modò sint notata & incisa. Censes tu tam accuratè hæc examinari? Vtinam faciant! & magis illa, quæ scribimus; & semper candidè, ac bonâ fide. Hanc quoties in multis requiro? Occasio & caussa est, cur dicam. Incidi nudius tertius in nouellum librum, in quo mei perhonorifica mentio: sed alibi nota, *Lipsum Orchadas & Stæchadas insulas confundere*: quod non puto vsquam in somnio me fecisse. Alij etiam obliquè aliquid: *Vir doctissimus in Tacitum*. Non tu censes me esse? neque ob elogium, sed auctorem. Quære tamen, notam aut vestigium non reperies in meis scriptis. Talia plura peccant, & præsertim isti nouelli, & vt sic dicam, multei Critici: qui feruent, qui erumpunt, & laudem suam alienam criminationem censent. *Adde, quod Lipsius non vidit*. Quis tibi dicit, non vidisse? & iudicio fortasse, cum satis testium esset, omisit. Sed non viderit: quæ culpa est, aliquid non fecisse? Omissum hîc potest esse, non commissum: nec magis culpandum, quàm si à te exigam & confiscam, in Homerum non scripsisse. O vanitates, ô ambituunculas! At ego ad hæc talia sileo, & filui; & magno anjmo ostendo tales iniurias vel calumnias intra me stetisse. Est quidam, qui in Scholis, vt audio, materiem etiam me fecit, & in verba ac litteras, quid? accentus etiam inquirat. Ille ipse, vt rem magnam, ter quater in scriptis iterauit, *Lipsum censuisse tesseras frumentarias è plumbo, aut tali metallo, fortasse fuisse*: ô flagitium! è ligno, inquit, fuerunt, & Dio dicit. Dic ô bone, vbi hoc Dio? Ille de tessleris ludorum asserit, nusquam de istis: & diuersa sanè ratio est: cur vt geminum aut idem obiectas? Cur etiam obiectas? nam ego disertè scripsi, *potuisse & è ligno esse*. Ecce in his talibus docti & arguti sumus: vetus simplicitas vbi es? *Sceptici* olim sectam fecerunt: faciant nunc *Psectici*, & magna manus erit. Ego illud seriò posteros rogem, siqui mea aut aliena legent, vt etiam conferant; nec fidem statim habeant, hoc aut illud obiectanti aut refellenti. Aliter sæpè scripsi, & mente aut verbis alijs, sæpè & non scripsi. Et fac, age, in tam varijs opusculis meis & materie aberrasse: quid magni, aut noui est? Fecerunt veteres, nouitij isti magis; & in Criticis certè, ac diuinatorio genere, parè est necessum. Sicut ij qui rete iaciunt, sortem exspectant, & sæpè truncum aut lapidem, pro pisce adducunt:

ducunt: tale in istis. opinio imponit, & addam cupiditas aliquid præter alios dicendi, aut iudicandi. At in scriptis meis stili aut argumenti, ut *Constantiâ, Politicis*, talibus, audacter dicam paucos nœuos aut nœuulos esse: si sunt, culpari nih il abnuo, imò & mulctari. Quidquid est (& hoc sine scribo) modestiam amo & teneo: numquam ad rescripta veniam, nec remedia amabo periculis peiora. Quisquis me carpit, vel hoc ipso sentiat bono viro iniuriam se fecisse. En, mi amice, pluscula, quæ calor iste scriptionis subiecit: tum & cogitatio de quibusdam, quos in hoc genere non stare scio & auferri. Nominasti, nec repero: sapiamus, & pro dignitate litteras tractemus. Vale. Louanij, XII. Kal. Decembr. ∞. IOCV.

EPIST. LXXXII. *Mechliniam.*

NICOLAO OVDARTO.

**Q**VAESTOR hodie denique ad me misit (anteà absurdè responderat) pecuniam aliquam paratam fore, mitterem vxorem. Fiet iam à prandio. Quod ad historiam patriæ, non miror illum vestrum haud nimis probare: quia nec institutum fortasse meum nouit; atque ego ista nouitia nunc quidem non tangam. Diuisi in duas partes. veteres nostros Duces; tum istos Austriacos, qui à Maximiliano successerunt. Vsq̃ue ad illum, quid periculi aut suspicionum est? imò pleaque laudum plena, & generosi ac minimè Tiberiani imperij quod sine fūco aut metu denarres. Ego, cum Deo dicam, in scriptis cautionem & prouidentiam, si quisquam, habeo: & in hac certè ætate, & statu etiam rerum, habebo. Sed res gestas fideliter posteris tradere, diuinum si non præceptum, exemplum est; & Moyses aliq̃ue Pontifices aut sacerdotes, pace ac bello fecerunt. Vide libros sacros. Quid etiam regius Vates? *In memoriâ æternâ erit iustus: iniustus autem cum maledictione & ignominiâ recitabitur.* Hi sunt stimuli bonis Principibus, frænâ improbis: & fuere ab æuo, atque erunt, nec vlla sæuitia tollet aut abolebit. Equidem inclino in hac ætate, quæ aliquid prudentiæ habere debet, & potest scriptis inspergere: atque ego Historiam veram & legitimam, ipsam esse prolem & fœ-

LI

tum

tum Philosophiæ censeo, quod prisci illi scriptores dicant. Nam isti nouitij meras nugas agunt, & vmbram pro re habent. De Riuiro, spero: te amo mi optime Oudarte. Louanij, ix. Kal. Decembres. ∞. Id. ev.

## EPIST. LXXXIII.

Antuerpiam.

I. O. W O V E R I O. meo.

\* Desit  
scribere &  
vivere in  
anno ∞.  
CCLXXIII.

**G**AUDEO, gaudeo, melius iam tibi esse. Sit longum, sit post me ætatem, & in te viuam. Quid destinaueris de Imagine meâ, & adscriptione, vidi. An intercedam? non faciam: do fræna affectui, & in me Honestum à te amari orbis sciat. Si non ego tantus, quid refert? esse volui, & in bono conatus etiam sufficit, cum occasio deficit aut facultas. Prochnicij illius ardentem etiam animum agnosco, & videbo vt liquore aliquo infuso non exstinguam, sed alam. Intra duos aut tres menses sermonis copia inter nos erit; & aut ego ad vos veniam, aut te istuc inuitabo. Tum de eo quod suggeris, alijsque. Sed heus, his diebus fui in scriptore superioris, nec \* remoti nimis æui, *Matthæo Parisiensi*, qui Historiam Anglicam scripsit, industriè & inquisitè, si non eleganter aut scitè. Sed multa in eo bona & libera iudicia: mireris, si legas. Vnum, quod volui ad te referre super studijs hodierni æui:

„ *Papa considerans (Innocentius Quartus) liberales artes iam in  
mechanicas penè fuisse conuersas, propter lucrum; vt verè possit dici  
de Philosophiâ,*

„ *Prostat, & in pretio pro meretrice sedet:*

„ *& quòd iam ferè omnes scholares, intactis Grammatices rudimentis,  
Auctoribus, & Philosophis, ad Leges properant audiendas, quas con-  
stat non esse de numero artium liberalium. Artes enim propter se appo-  
tuntur, Leges autem vt salaria adquirantur. Imò etiam, vt omnibus li-  
quet, adolescentes ætate & scientiâ satis simplices, ex quo nouerunt in  
paucis Sophismatibus, perstrepentibus palmis congarrire, cathedras  
ascendunt magistrales, vt nomine illo usurpato tumeant eleuati: &  
facti venerabiliores, sine fundamento scandunt ad culmina celsiora:  
cum melius esset & utilius; Scholarum prius imbui experientiâ, & sic  
transcendere ad præmissa.*

Addit



Addit deinde, *Papam elegantem super hac re epistolam scripsisse*, quâ remedium adferret: sed eam non intexuit, quod doleo, & velim vidisse. Examina, te autem quæso, verba illius Monachi: putes de suo, an nostro ævo scripsisse? Sanè eò ventum est, mi Woueri, vt omnis vetus doctrina logi sint, & desipere censeantur qui sectantur. Robore opus est contra iudiciorum hos fluctus, & clauo recti iudicij, qui dirigat inter vndas obstantes. Ordines patriæ mecum agi iusserunt de Brabantia Historiâ scribendâ: neque abhorreo, & vtiliter ac more veteri fortasse possim. Tamen nihil etiam addixi, & *ἔτιχα*. Vale mi optime. Louanij, III. Kal. Decembres. ∞. 16CV.

EPIST. LXX XIII. *Neapolim.*

IO. ANDREAE PROCHNICIO,  
*Legato Ser<sup>mi</sup> Regis Poloniae.*

**S**I vlla epistola ex animo scripta est, hæc erit: rogo te audi. Accepi & legi tuas (binæ enim fuerunt) quibus, præter beniuolentiam, etiam beneficentiam adiungis, & munera mittis à sui pretio, sed quanto magis ab animo æstimanda? Lectis tuis litteris, non aliud subiit mihi, quàm exclamare, O amicum pectus! ô animum præsci & aurei illius æui! Et rem dixi. Quis hodie virtuti & doctrinæ aut affectum aut pretium hoc ponit? Et habeo amicos tamen fateor, atque etiam beneficos: sed officijs nempe prouocatos. Dete autem, quid ego priuatim merui, nisi quia publica beneficia tibi inscribis, & alienum æs tuum facis? Sed profectò magis deinceps animus hic meus & affectus se exferent, & posterius scient talem virum vixisse, talem in me & Litteras ac Sapientiæ studia fuisse. Hoc sine iam nunc concepi, quod publicabo, si Deus vitam in paucos menses mihi donat. Sed ad tuas litteras. Scribis te illa & illa mittere, distinctè: nondum habeo, & via longa est, & prædonibus etiam ac periculis exposita: sed tamen vt si habeam gratias ago, & referam: quia non ipsa munera, sed animum pendere soleo & referre in acceptum. Edidi iam denique *Senecam*, & Summo Pontifici nostro inscripsi: vt vel sic orbi cõstet, quem caput Religionis in orbe esse velim. Diu me tenuit, & grande ac diffusum fuit, addo



& intricatum, præsertim si *Stoïca* nostra adiungis. Illum per Wouerium meâ manu inscriptum mitto : missurus & hæc, si scirem non habere. Publica nostra paullò meliora sunt, per diligentiam Spinulæ. At vobis in Poloniâ omnia plausu & lætitiâ personant, partim ob nuptias, partim ob victoriam de Sueco insignem. Deus longum sic esse velit, & te, Ill<sup>me</sup> & Reu<sup>me</sup> Domine, valere & viuere, vel in æui exemplum. Louanij, postrid. Non. Decembres. ∞. 1500.

## E P I S T. L X X X V.

*Moguntiacum*

STANISLAO KRZISTANOWICIO S. D.

**A**MOR tuus V. C. & dona grata. Ille, quia à tali, id est amando & æstimando : istæc, quia talia, & pretium profectò ac bonitatem in se habent. O pulchra illa olim mei Demetrii ! ô pulchriora pænè dicam magni Zamoscij ! Semper mihi ille vir inter Europæ lumina ; nunc magis apparet, cùm in vltimo illo effato, vbi simulatio & ambitio cessant, tam claris certisq. verbis solidam probitatem, veram pietatē expressit. Exosculatus sum voces & sensus ab omni vanitate & pompâ suum reuocantis, in priscis moribus, in priscâ religione, cõfirmantis. Quàm forte illud, quàm sanctum ! *Non nasci satius, quàm in hac non mori.* Dicam iterum, sciui semper & habui Zamoscium inter prima virorum : nunc magis certiusq. habebo, & à paucis verbis vltimis ad primam lineam eum ducam. De filio, opto imbibere hæc præcepta aurea, & illinc petere vitæ exempla. Sanè pater docuit quid litteræ & doctrina possint, vbi in bonam naturam cadunt : & quàm viles eæ ad pacis belliq. artes. Epistolam meam ibi editam non nimis gaudeo : & displicet exēplum. Munus libri gratum, & remuneror ecce, si non pretio, affectu pari. Ama me V. C. egote deinceps. Louanij, 111. Idus Decembr. ∞. 1500.

## E P I S T. L X X X V I.

*Antuerpiam.*

IOANNI WOVERIO suo S. D.

**C**R E D E mihi optime Woueri, animo meo malè factum est, cùm audiui iterato te vulnere percussum : & in illo fratre,

fratre, qui familiæ velut columnen erat, & quem noui à probitate & industriâ, atque ideò amo. Doleo tecum: quid ergo? etiam iaceo, aut, quod tu, langueo? Absit mi amice: erigere mecum, & ne supra humanam sortem aliquid velis aut tentes. Quid vis? hominem Deum esse. Soli illi æternitas: nos ex quo nati sumus, non dicam mori possumus, sed morimur; & omnis hora, omne momentum ad metam illam ducit. Alijs est alia, si tempus spectes; eadem, si finem. Et quod tempus? rideo cùm cogito. discrimen est dierum, mensium, paucorum annorum: & pone plurimos, sæculum dices. Quàm breue istud? quàm citò abiit, quàm citò aliud aduenit? Sed minuti animi, & qui magna non cogitant; qui Naturam rerum, quod caput est, non peruident; hæc habent in magnis. Pueri Saturnalia celebrant, & Reges aut Antistites imitantur & agunt: breue ludicrum est, & nos ridemus; sed illi sic amplectuntur & æstimant, vt longus annus sit, donec dies ille illucescat. Quid non simile facimus? nati sumus; spes & vota disponimus, in vxorem, in opes, in honores: & dum scæna instruitur, ecce Mors superuenit, & obliquo oculo ridet & interrumpit. Ita est. illâ damnamur; & cui nasci contigit, restat mori. O nostra imbecillitas! Homeri versum Pyrrho Philosophus in admiratione & ore semper habebat istum:

\* Οἷν περ φύλλων γηυσὶν, Τήδε δὲ ἔανδρῶν.

\* Talis vi-  
ta atq;  
hominum  
est, quantis  
foliorum.

Meritò nihil potuit aut verius, aut euidentius dici, in hanc sortem. Vides arborem illam quæ vere primo folia induit? Pulchra est, & viret, & umbram, & speciem gratam sui præbet: quid tamen est? mox ventus aut ictus folia pauca decutit, tum æstus aut siccitas, denique hiems omnibus spoliât & nudat. En humanū genus! virent, vigent: ille atque ille moritur, morbo, vi, fraude, & cùm hiems senij superuenit, omnes naturæ lege. Miseras nostras narras, inquires: ego solatia exspecto. Iam accipe, & feria. Non dicam illa ex Epicuri delirio,

*Post mortem nihil est, ipsa que mors nihil:*

hoc sapienter & piè dicam, *Mors intermittit vitam, non eripit: venit iterum, qui nos in lucem reponat dies.* Agnoscis Senecam, sed Christianum eius sensum (quò verba ducunt) etiam adde. Quid est hæc vita? nihil, nisi ad illam aditus & præparatio, illam

Sirabo lib.  
xv.

illam æternam, beatam, & cui vni vita hæc viuit. Sacra tibi non ingero, protrita sunt: sed Brachmanes illi Indi, veteris Philosophiæ, censebant; *Vitam habendam esse, quasi conceptorum in vtero statum; mortem autem, partum in veram vitam, & felicem quidem ijs qui rectè sint philosophati.* Est mira sententia, & ex arcanis nostræ religionis prompta. Quid hæc vita? velut formamur in vtero, & præparamur ad illam æternam. Itaque Mors nomē tantum est nobis: & illam timeat, qui non sperat viuere post mortem. Audis hæc mi Woueri? admitte etiam: & vis aliquid pro caueâ: Cogita abiisse amicos, sed & habere te hîc amicos. Parêtes omitto, aliosque fratres: en consortem vitæ & rerum duxisti vxorcem: & (vt alios fileam) me inter amicos habes, cui solatium, con filium & auxilium es: & à me eadem expectes. Cur, quasi conclamatis rebus te abijcis, & istuc oculos non reflectis? Ille abiit? nos supersumus: erige te vel nostrâ causâ, & scito in hac graui iâ ætate, & dudum valetudine, vsum mihi tui esse. Sincerè dicam, patientius ego diem meum expecto, quia te superstitem destino, & eorum etiam quæ post mortem volo curatorem. Hoc cogita: & sicut Seneca noster de Paullinâ, *ego tibi valetudinem meam commendem:* & scito in hoc iuvene senem etiam viuere, cui fatum sine culpâ non acceleres. Hæc ex animo scripsi: animi & corporis vires tibi reddi, Deum precor. Louanij, Idib. Decem. ∞. 1600.

Ad Prochniciū nostrum has mitto, qui valdè de te etiam amicè scripsit. An non Senecam vnâ placet? & quomodo resoluiam me vinculo isto beneficiorum, quæ indies accumulât? O virum ab aureo æuo! Iam nunc parata est *Centuria Epistolarum selecta*, quam, siquid mihi continget, in arcâ meâ reperies à te edendam, & illi ex meâ destinatione inscribendam: quod sine fraude rogo te facere, itemque nullâ epistolâ insertâ aut immutatâ. In Præfatione dic, quæ ego deberem.

## EPIST. LXXXVII.

FRID. TAVBMANO S. M. D.

**P**LAUTVM tuum veteres nostras delitias accepi, sed nunc tuum, nouâ & decorâ istâ facie à te perpolitum. O gratum acceptum.

acceptumque donum! non dicam dolo. Certè industria & elegantia simul ingenij tui in concinnando hoc Opere sic apparèt, vt alij omnes, qui conati, ad tuam accuratorem & lucem lusciosi videantur. Non percutio te palpo: ne verere: expers eo more sum, & apud amicum amicè, id est, verè loquor. Debeo tibi pro hoc dono & dicatione: & quid verbis opus est? cum ipso Comico;

*Ego tibi omnia facta cupio, cupiamque quæ vales.*

Sed dic fodes, quis iste facer & Germanicus liber est, de quo peruiam memoras? Vidi equidem annò, nisi fallor, editum, sed Anonymum, qui calumniosè & inclementer multa in me dicit. Talis iterum aliquis pilum inijcit? contemno: & delirent, sæuiantque isti laruarum pleni homines, stabula malitiæ & lumina audaciæ, non hilum me concutiunt; & susque deque habeo, quod scribant, non scribant. Modestiam natura mihi conciliauit. à vitâ abire cupiam, cum ab hac abibo. Quid meus SENECA, quam quietum de istis me esse iubet! huic ego infistam credere potius, & res alias præ Sapientiâ relictas habere. Quem tu Senecam in breui, me mittente, videbis, & habebis in fronte amicitiae tesseram inscriptam. Nundinis proximis fieri, neque antè video tutò posse. At tu homo hominum in illo tractu litteratissime, quoniam hoc Plautinum negotium sic sub manus successit, adde porrò operam consimilem, & in alio argumento vel scripto iuuentuti benè consultum eas, & optimas artes productum atque illustratum. Præsens igitur & posterum æuum debeat, & nos melius nati aut facti fauebimus, & plausum, vires, animosque addemus ad candidam calcem currenti. Delphis hoc tibi dictum credito, & dicentem ama. Louanij, Idib. Decembr. ∞. MDCV.

EPIST. LXXXVIII. *Mediolanum.*

FREDERICO BORROMAEO S. R. E. *Cardinali.*

**I**AM deniq; seriò intellexi ex benignis tuis ad me litteris consilium quod vsui publico suscepisti, neque tale & tantum id esse animo præsumebam. De Bibliothecâ suspicabar, eaque selectâ & simul copiosâ: sed addis etiam Collegium, atq; id noui gene-



generis, in quo non iuuenes, sed grandiores alantur, & qui facti aptique iam sint scriptis, consilio, voce alios iuuare vel docere. Sanè iamdiu est cùm hoc institutum apud me approbo : atque adeò publicè aliquod testimonium dedi, in laudando & aperiendo Musèo Alexandrino. Nam & illud viros admisit tantum & habuit, vel benè meritos iam de republicâ litterariâ, vel merituos. Itaque utrâque manu & toto animi sensu consilium tuum approbo, & gratulor hunc animum, & Deum rogo successum & fructum pro eo esse. Erit autem si legibus bonis firmisque institutum tuum alliges : sine quibus diffluet ; & vt te viuo maneat, functo metuendus est lapsus aut ruina. Ego in similibus sæpè vidi fraudes aut frigora, quæ interueniunt, maximè à Conditoris morte : & ad cauendum, omnis opera danda, vt electio fiat prudens eorum, qui simillimum tui animum & iudicium adferre post te possint. Nam, mihi crede, in prioribus vix ego laboro, & prudentia tua actorum faciliè instituet ac gubernabit : postuma cogitanda sunt, & vt maneat institutum, & vt idonei beneficio tam grandi fruendo eligantur. Idonei, inquam, & quantus hic fructus, si tales? Vnus alterque quot præfentes & posteros iuuare poterunt, & præluce insigni aliquâ doctrinæ face? Atque huic rei, etsi grandiores illæ scientiæ principatum tenere videantur, Theologia, Iurisprudentia, Medicina : tamè paucos è prioribus eligam, nullos ex vltimâ, quia vulgo satis grande pretium vel æstinatio ijs est, & commodis excitantur. At non idem in linguarum litterarumque scientiâ, non item in Philosophiæ : quarum artium, quæ verè pabula animorum sunt, & grauiorum item illarum adiumenta vel fundamenta, suadeam rationem & adspectum maximè te habere. Negliguntur passim : & quis exitus erit? barbaries & tenebræ, quas magno opere discusserunt boni prouidiq̃e maiores nostri ; vtinam nos faciamus, vt ne frustra ! Sed tu facies pro tuâ parte Ill<sup>me</sup> & Reu<sup>me</sup> Domine : sequantur duo, tres, in Europâ, ô magnum breui & diffusum lumen ! Enimuerò sæpè miratus sum, cùm tam multa passim Collegia aut Scholæ instituuntur pueris aut iuuentuti formandæ : neminem adhuc fuisse, qui propriè sollicitus esset & curaret de doctoribus : sine quibus cui vsui omnis illa institutio est ? Speciem non rem habet, & multi in  
cursu

curfu sunt , pauci ad metam veniunt & verum studiorum finem. Cauendi prospiciendique ratio aut hæc est , quam inis, aut nulla: & ipsi eligendi, alendi, formandi sunt , qui forment. ILL<sup>ME</sup> ET REV<sup>ME</sup> DOMINE, Deum rogo prosperare conatus tuos tam laudabiles, te ipsum firmum & validum diu superesse ad consummandum. Louanij, x. Kal. Ianuar. anni noui instantis ∞. IOCVI.

## EPIST. LXXXIX.

*Augustam.*

MARCO VELSERO V. I. S. M. D.

**S**ENECAM nostrum à te acceptum, & verè acceptum, id est gratum, fuisse gaudeo. An non esset scriptor optimus viro optimo? Quod ais desiderare quosdam reliqua: pauca sunt, & hodie mos obtinet reliquatores esse, imò conturbatores. Detur venia, aut certè mora aliqua, valetudini: & fortasse altera editio dabit. Sunt & in illis libris, quæ volenti haud peribunt. At tu de elogio debere profiteris. Et sic loqueris? iudicio, dicere debebas: & ideò nihil debere. Mihi crede, vt si iuratus in Senatu sententiam dicerem, sic dixi. Amote iamdudum mi Velsere, sed affectus illam animi lucem non obtenebrat. Sed heus, est quod communi litteratorum nomine commendemus, vel petamus. Andreæ Schotti, magni amici nostri, PHOTIVS Latinus iamdiu apud vos est, & quando ipse lucem, nos eum videbimus? Certè inter paucos ille scriptor meretur: qui solus tot clarissimorum ingeniorum monumenta à fato eripuit: toto dico fato, & saltem nomina & scriptorum velut membra seruauit. Quàm multos ille legit, ex ijs elegit, & vt sic loquar, deflorauit, quos nosse nobis aliter non esset? E sacris, profanis; tractatoribus, historicis, oratoribus, poëtis; & nihil est in Græcâ omni litteraturâ, aut vt veriùs dicam, librariâ, quod ille vir non libarrit. Pulcherrimus mos in mensâ legendi, vel audiendi: sed iste pulchrior vtilliorque, annotandi, censendi, excerptendi. PHOTIVS fecit, & qui ad nos peruenerint solus. David Hæschelius vester, & vestris etiam auspicijs, Græcum primitus & variè atque industriè castigatum dedit: sed nosti quò ventum sit ignariâ aui, pauci hæc legunt aut capiunt, & nisi Latina addantur,

M m

pænè

pænè dicam non dedisse. Ergo A. Schottus, vir bono publico natus, allaborauit, & Latinum totum dedit, & tibi commisit: ecce iure te flagitamus, fac quod soles & natus es, rem publicam vel priuatæ tuæ damno iuua. Mi Velsere, da hanc operam: etsi quàm trepidis & pænè desperatis Europæ rebus? Pannonia, & iam Illyricum finitimum, sollicitos nos habent:

*Quò pondus istud verget? vbi ponet minas?*

Vbicumque, stemus; & in Honesto firmi, omnem Fati vim excipiamus, imò vincamus, id est feramus. Vale. Louanij, posttridie Natalis Dominici, anno ∞. IOCV.

## EPIST. XC.

IOANNI MIRAEO *Episcopo Antuerpiensi.*

**M**ERITO scriptionem istam amplector, tam benigni animi, & à tali viro, testem. LOVANIVM non displicuisse significas, & hortaris porro ad patriam Historiam vniuersam scribendam. Magnus mihi stimulus, fateor, vel ab auctoritate tuâ, vel à iudicio: & sentio sponte hunc animum meum inclinare, in magnam parentem, vt debet, affectum. Cùm tamen vacillantem valetudinem video, cùm etiam sæculum & iudicia (neque enim omnes MIRAEI sunt:) frigus aliquod subit, & pænè resisto in cursu, cui carceres iam video apertos. Nam & ipse collegi quædam, & Comes Baussigniacus tradi quædam iussit, etsi adhuc per alias manus oberrantia; & R<sup>ma</sup> D. tua offert Dinterum suum, magnum adiumentum ad rem emoliendam. Videbo an D. Prælatus Parcensis hîc sit, & tradet eum: si non, rogo verbo vel scriptiunculâ velis admonere. Ego sine iactantiâ proferam, posse me & stilum & iudicium ad historiam adferre, atque eam veteri more & exemplo scribendam. Si ex vsu & gloriâ Patriæ est, Deus mihi vires donet, te autem, Reu<sup>me</sup> in Christo Pater & Domine, longùm Ecclesiæ atque eidem Patriæ nostræ seruet. Louanij, v. Idus Ianuar. ∞. IOCVI.

EPIST. XCI. *Gracium.*CAROLO *Archiduci Austriae, Imp. nepoti & pronepoti.*SER<sup>ME</sup> PRINCEPS,

**P**LACVIT humanitate istâ in me vti, vt non solùm salute impertiri iuberet, sed etiam manu tuâ eam consignaret. O benignitatem ab alto animo! & cui vnum fontem video, amorem erga res honestas & Doctrinam. Dignus ille tali Principe, tali stirpe. Si audaciam me sumere vis, quam ætas grandior donat, sic perge magnæ spei Princeps, & cum Pietatis studio (id primas habet) ista iunge, quæ menti lumen infundunt, quæ clariùs res videre & arbitrari faciunt, quæ hominem supra communes istos homines tollunt. MAXIMILIANVS Augustus inter proavos tuos exemplum præbeat, qui audire semper doctos aut percunctari, qui ipse legere, scribere & commentari solitus: idque æuo illo, quo caligo adhuc ferè in Germaniâ, nec clara ista fax litterarum satis illata. Doctores, Dei beneficio & Parentum tuorum, habes ad vtraque omnium maxinè idoneos: obsecro, vtere: & hoc iuuentutis tempore fructus velut in horreum collige, quibus reliquum æui suauiter fruarè. Significas & à nostris libris non abhorrire, & Discipulum meum profiteris: ô magnum mihi & gaudium, & honorem! equidem scripta mea publicè prodesse multis (eo fine pangimus) cupio & voueo: sed Principes etiam legere & affici, super modestiam voti mei est. & tamen gaudeo meritò, si fiat. Nam è Principe erudito scio quantus in vniuersam rempublicam manare fructus aliquando possit. Vnus peritus gubernator nauem regit & seruat, vnus Imperator exercitum: tale in vobis, & vnus prudentia ac virtus populo est salutaris.

SER<sup>ME</sup> PRINCEPS, hæc pauca expressit mihi humanitas tua: benignè interpretare, & ab eo profecta scito, qui est SER<sup>ME</sup> gentis tuæ, & priuatim TVAE SER<sup>TIS</sup> deuotissimus cliens. Louanij, IIII. Idus Ianuar. ∞. IOCVI.



## EPIST. XCII.

*Antuerpiam.*

BALTHASARI MORETO.

**H**EM, hem, quid hoc est mi Morete? gratiæ conciliandæ ego illa scripseram, & affectui in patriam testâdo: aliorum vertit, & inuidiam aut cauillos (vt tu quoque audis) LOVANIVM mihi cōcinnat. Quâ culpâ aut merito? rogo te audire paullum, & æquâ iudicij librâ pensitare. Parcè enim, neque omnia dixisti, inquit. Libens fateor, neque hîc neque alibi omnia dicere amo: selecta tantum & præcipua: & credo tamen insignia pleraque ad laudem (is finis noster fuit) attulisse. Panegyrica quædam, vt sic dicam, ista scriptio, non propriè Historica: & hoc stilus ipse dicet, qui florem, colorem, non vigorem solum habet. Et vbi tamen historiæ locus fuit, in pugnis, in seditionibus; à lege eius abisse me non censeo, imò vel iuxta veterum exemplum tractasse. Atquin alia nos etiam habemus, aiunt. Aiunt, proferant & applaudam: si tamen pondus habent, & rei momentum aliquod addunt. Sed non dissimulo, quosdam esse qui curiosos & peritos se simulant, sed Pythagorico quodam exemplo tacitos: & minantur aut iactant assidue edere, nihil edunt. Edunt? nec communicant quidem edentibus: & siquid petis, obliquo oculo, aut renidentes, abnuunt: & Pluris sibi esse; denique, Sibi esse. Per me habeant, premant: nos non premant, qui siquid notitiæ nostræ esse potuit, iuimus perquisitum. Petrus Diueus triginta, opinor, annos, aut circiter, à ciuicis hîc Regeſtis fuit: vidit eadem excussitque Io. Molanus Theologus eximius, idemq. historiarum cupiens & sciens. Hos consului, Annales vicinarum etiam gentium adjij: quid vltiâ volunt fecisse? In Vestalia illa secreta penetrare nō potui, nec inuitis ædituis excutere Capitolas istas Flauissas. At quædam etiam aliter dixi. Sanè sequi me turò in plerisque dictos auctores censui: & siquid erratum, veniam illis mihiq. vnâ operâ peto. Mihi etiam seorsim, quòd appropriatum hoc opusculum (in occasione illâ, vt tu optimè scis, Nuptiarum) nec limam aut exactiorem curam admisit. Itaque in numeris corrigendum alibi erat: postea factum. Poterant & accuratius vel vberius

vberius quędam de Lotharingâ vel Brabantiâ dici: & à me exigunt. Iniqui! & nōne melius aptiusque in suo loco ea dici? Et profiteor apud te ac clamo, animum mihi tunc fuisse tractandę Historię Patrię: eoque, ex consilio multa omiſſa, aut certę dilata. At, inquiunt etiam, familias nostras veteres parum distinctę rāgis: ipsum opidum haud annosum satis facis. De familijs; meum non est, faciant \* γενεαλόγοι, quorum hodie manus est, & huic studio vel \* ἀετιργας operatur. De vetustate; si erro, doceant, & bono auctore aliam æuitatē ostendant: fauebo. De nomine sanē non abnuimus, non item de conuentu aut digniore aliquo loco: & palām hoc \* scripsi: sed nihil etiam nunc magis \* δολρον ἢ δὲ πιδανδῖ occurrit, quām hunc ambitum & clausuram origine illā esse, quam dixi. Quid verbis opus? aliud, inquam, doceant, & sileo: aut si non, ipsi sileant. Quod ad fabellas aut opinionunculas attinet; sciant nos exteris posterisq; ista, & idēo firmiter, scripsisse: sciant etiam, neque apud ipsos populares nostros scēnum omnes esse. Incalesco, & melius est desinam. alioquin & illi accurrent, qui singula Collegia describi, etiam ipsas alimonias (nostro sermone *Bursas*) desiderēt, imō iam desiderauerint. Heu Lipsi, heu Lipsiane stile, quō vocamini? Otium agere, aut certē alias res agere melius, nec ad plebeia argumenta aut iudicia vltra venire. Audis? audio: & cum Homero,

\* Ἡ δὲ δὲ μοι κατὰ θυμὸν ἀείδην φαίνετο βελή.

At ex istis, mi Morete, vides quo p̄mio scribimus: & alibi fortasse in gratiā, domi frigemus. Sic solet, fero, & Genium meę patrię (si Deo visum) elegantiore votis exposco. Louanij,

III. Idus Ianuarias. ∞. IOCVI.

# EPIST. XCIII.

*Mechliniam.*

PETRO PECKIO *Consiliario.*

**B**ENEFICIUM sanē mihi tribuisti missione nouitij huius libri ē Galliā. quem ego historicis an politicis magis accensēam, sententia hærēt. Vtraque habet, & flore præterea sermonis aspergit; qui omnem seueritatem recreet & diffundat. Non sic veteres, fateor, & magis restricti atque accisi sunt: & tamen delectat, docetque hæc vbertas, & meo iudicio gratiam

atque vsum suum habet. Sunt in quibus fidem tamen requiras, & partium studium aut adulationes deprehendas: ignorantiam etiam aut alucinationem interdum in externis. Sed interdum; & compensat alijs virtutibus. Ego pro vsurario libro, libellum hunc ecce mancipio mitto, à me donum. Levis res & scriptio est; & cum leges, animaduertes calamum alas habuisse. Nam quid dissimulem? Serio hoc argumenti numquam cogitaueram: alio fine aliquid in Aduersaria conieceram: & incidit vt in nuptiis istis (rogatus eram) concinnarem, & vulgarem. Prædico, vt remissiore animo ac iudicio legas, nec acrimoniam tuam vbique adhibeas, aut meam requiras. Sunt tamen, præsertim vbi materies fauit, in quibus ad altiore stilum assurgo, & historiæ veteris faciem conatus sum referre. Auctores mihi quidam sunt, vt in rebus Brabantiae idem faciam: ego delibero, & ætatem meam & valetudinem, sed & sæculum in alterâ lance pono. Sæculum, nam quàm pauci hæc capiunt, siue legunt? Quò igitur pondus verget, nescio: & verum fortasse tempus dicet. Tu vir Clar<sup>me</sup> & Prud<sup>me</sup> vt me ames, qui te serio, rogo. Louanij, postrid. Idus Ianuarias. ∞ IDCVI.

## EPIST. XCIIII.

HENRICO HALMALIO V. N.

**L**EGISSE te Louanium meum libens audio: etsi cum in tales manus venit, vellem accuratiore limâ perpolitum. Nam verè dixi, & subitum & festinatum etiam, ob instantes Nuptias fuisse: atque ideò ingenuè fateor, aut quædam mihi non dicta, aut aliter dicta. Sed medebitur aut supplebit siue sequens Editio, siue ipsa Brabantiae Historia, si tamen ad eam ire & pergere valetudo patietur. Alia quidem res (hoc tibi spondeo) non auocabit, & vltimos istos annos Patriæ libens ibo consecratum. Quod cum fiet, non omitтам rogare te, vt id quod sponte & benignè offers, re exsequare, & me subsidijs tuis & apparatu vario instruas, in communem vsum. Scio iamdiu te industrium & sedulum conquisitorem atque inquisitorem talium fuisse: potes igitur re, potes & consilio ac directione nos iuuare. Coràm, vbi Antuerpiam nostram venero, plura & distinctius



stinctius licebit: nunc Nobilis & Clar<sup>me</sup> Domine valere te, & nos amare, opto. Louanij, postrid. Idus Ianuar. ∞. IOCVI.

## EPIST. XCV.

Antuerpiam.

ANDREAE SCHOTTO V. R.

**N**ON indelectatum te *Louanio* nostro, benè est mi Pater, & gaudeo in tuo iudicio: sed plebeię apud nos voces nō sic consonāt, & ad nugas suas aut ineptias multi me conuicio trahunt. Cur vetustius opidum non fecit? cur familias illas veteres non inseruit? meam cur omisit? Quid collegia? hæc nominat, illa transfilit: deniq; priuati vellent & suum alibi nomen legi. Hęc pati necessum est eum, qui res in omnium sensibus oculisq; scribit: & ista cogitatio non nihil à Brabantia rebus me absterret. Noui ambitionem multorum, qui se aut suos volunt esse argumentum. At altior animus Historico esse debet, & caussam æui agere duplicis, eius quod fuit, & quod erit. Illud vt ex vero repræsentet; hoc vt vtilibus narrationibus, siue monitis interdum, instruat, nec ad vana aut futilia, & pueriles animos oblectatura, declinet. Videbo vt modum teneam, si opus aggredior, & scribam ex patrię, ex historie, & meâ dignitate. Adulari, calumniari, nugari non lubet. Hactenus Musas virgines habui, non prostitui pretio aut pellaciâ inductus: perseuerabo honesti animi, recti iudicij (Deus adiuuet) esse. De Cantipratano benè mones, & iam vidimus, & corrigi in alijs exemplaribus iussimus. Sanè sciebam discipulum Alberti Magni fuisse: sed properat̃ia & calor, quę in hoc opusculo adhibita penè necessariò, mentem obnubilant, aut certè manum faciunt delirare. Sunt & alia quædam, in quibus nuto, aliàs corrigenda. Felix Recitatio veterum, & aduocati in consilium amici: nunc deserūt, & Typographia nec pœnitentię locum; aut si illi, non emendationi relinquit. De Idolo Hallensi, lumbos nugatori impio frangam, si fustem, id est calamum fumo. Sed adhuc tempero, & inhibeo, & Modestiam ingenit̃am vsurpo. Caueat à calore. P. Leonardus noster etiam illuc dimidium nostri habetis, remittite, aut (si aura admittat) me habete. P. Rectorem & illum saluto. Louanij, ad lumen vespertinum, xvi. Kal. Febr. ∞. IOCVI.

EPIST.



## EPIST. XCVI.

IOANNI MIRAE O *Episcopo Antuerpiensi.*

**I**N amici causâ breues has litteras scribo, quem mihi institutio (discipulus enim mihi fuit) & morum probitas, & magis constans pietas, commedarunt. Is est Io. Hemelarius gente Batauis, insigni ingenio & doctrinâ: sed qui patriam deseruit maculosam & infectam. Romam igitur se contulit, & cum ad Ecclesiasticum ordinem adspiraret, à S. Pontifice impetrauit Canonicatum in vestrâ Ecclesiâ Antuerpiensi, in locum defuncti Iacobi Antonij: defuncti, inquam, in mense Pontificiæ collationis, vt scribit. Itaque ius putat clarum & certum esse, petit tantum insinuari R<sup>mæ</sup> D. tuæ, & significari qualis esset. Reuerà spondere audeo gratum acceptumque futurum R<sup>mæ</sup> D. tuæ & Collegis: ita non solum dotes habet, quæ ornamento sint, sed mores suaues & mites, qui delectationi. Nihil tribuo affectui, Reu<sup>me</sup> in Christo Pater & Domine, Deum testari possum: quem rogo & veneror, vt te talem Antistitem Ecclesiæ & nobis diu velit superesse. Louanij, IIX. Kal. Februar. ∞. IOCVI.

## EPIST. XCVII.

*Bruxellam.*IOANNI RICHARDOTO *Presidi.*

**E**T iterum iterumque Fortuna te petijt, & vix cicatrix à priore ictu obducta est, aliam plagam inflixit? O sæuitiam! accusare eam libet, & tecum dolere: si tamen hoc remedium sit, habere comites in querelâ aut dolore. Præstaret qui alleuarent & erigerent: & iam conor: sed dicta aut monita vbi reperiam? Solita consumpsi, & eadem dicere nec ex decoro, nec ex more meo, possum. An vnum hoc nouum, & magni animi, succurrit? in Fortunam Fortunæ exemplo repugna. Pertinaciter te incurrit, nec dignitati, nec ætati tuæ parcat: indue ite pertinaciam; & non ratione solum, sed irâ quâdam honestâ pedem in eam firma. Quid tibi vis? ideo destinator vincendus, quia non vicisti? Hoc ipso sumo animos, & prior victoria de sequenti spondet. Nepotulum amisi: sed antea liberos, in paruâ hunc ætate:

ætate: antea plenæ ætatis & roboris, & qui propinquam de se spem, aut præsens gaudium, dabant. In isto quātulum perdidit? Flos, non fructus fuit: vix etiam flos; & in paucis non mensibus, sed diebus, natum amisi.

*Monstrarunt terris hunc tantum Fata:*

atque ecce, firmum solatium, si attendis. Fata, inquam, dederunt, eadem abstulerunt: quid iuuat, aut decet queri? Non iuuat, quia non mutabis, semel abiit: nō decet, quia lex à Deo est, in quem impius qui repugnat. Ille firmiter sanxit, quidquid natum est mori, & alternante tempore ac vicibus mori, senes, viros, iuuenes, pueros: nullum discrimen est, & cæca illa Dea per omnes furit, & datum ius exercet.

*Poma vt in arboribus pendent, sic corpora nostra  
Aut matura cadunt, aut citò acerba ruunt.*

Vetus poëta hoc scitâ & verissimâ imagine scripsit: auellimur, deiicimur, sponte cadimus, & hæc omnia ex fatali lege. O pareamus Deo, imò assentiamur! & hoc Christianum pectus decet. Sed ante omnia vrgeo quod tetigi, paruulum hunc fuisse. Vix limen vitæ ingressus erat, & ablatus est: id est, vix habuisti. In alijs grandioribus reminisci licebat facta aliqua aut verba laudanda, siue amanda; in paullò etiam grandiusculis iocos, blanditias, gestus, & quæ parentum affectus exosculatur & notat. Quid in isto? spem modò ostendit, germen & propago futurus vetustæ ac nobilissimæ stirpis, si Deo visum fuisset: sed non est visum, quid contra æternum cursum molimur? Nondum gaudia alia ex illo erant: vix oculo, aut tenui risu matrem, non dicam auum, agnouit: quid ergo firmæ aut solidæ iacturæ est? Excute ipsum te, videbis vmbra & imaginem adhuc amasse. Si initio concepti fœtus parens abortisset, minùs doleres: eadem ratio valeat, & infirma adhuc proles non gignat dolorem aut desiderium firmum. Hæc ex communi etiâ Sapientiâ: quid illud ex Christianâ? Puram hanc animulam, & omnis adhuc labis expertem, an non palàm in pura & beata illa loca misistis? Ne reuocate: ipse doleat, & tot periculis, addam etiam curis molestiisque, iterum exponi. In spem eos educamus bonam: sed quàm sæpè fallacem? Optimè nati, quàm degenerant, nec gaudium aut decus (vt lenissimè loquar) suis do-

Nn                      nant?

nant? Dehonestamenta maiorum multi, propudia publicâ : & exempla in isto atque alio ævo videmus. En, in certâ securitate, in gloriâ, in gaudio nunc agit : ponite spem metumque, & applaudite potius ac suspicite sublimatum. Oblectare parentes poterat, nunc iuare : precibus eius votisque locus est, & apud Numen fundit. Enimvero apud te, non loco magis quàm prudentiâ Præsidentem, etiam hoc solatio utar. Vide non dicam Belgicæ, sed Europæ, hodiernum statum : quid læti aut firmi posteris polliceris? Sunt turbæ, erunt turbæ; mutationes priuatæ & publicæ; & nisi Deus pacatiore oculo respiciat, exitia statuum & rerum. Quis in talia libenter suos educet, aut mittat? Sunto & maneat, quos Deus dedit, habituri suam sortem : alios voto ne adsciscamus, imò gratulemur euocatis. Hæc apud te breuiter, Ampl<sup>me</sup> & Nobil<sup>me</sup> Domine : & vides quò fiducia me impellit? Ipse solatij iam compos, filiam tuam solare, sexu infirmam, & grauiore ictu percussam : & verba robusta aut ex corde profer, aut ore adsimula & vultu. Debes illam erigere. maritus non est, nec alius affectus propior : patrem illa spectat : siamas, fac ut per te vires recipiat animi corporisque, quod opto. Vtrasque, Ampl<sup>me</sup> & Nobil<sup>me</sup> Domine, etiam tibi. Lo-  
uanij, XII. Kal. Martij, 1661.

## EPIST. XCVIII.

PAVLLO V. PONTIFICI O. M.

**B**EATISSIME PATER : Accepi BREVE, quod S. V<sup>RA</sup> dignata est mihi scribere; & ipsum, ac benedictionem, interiore mentis gaudio & omni veneratione sum complexus. Inter suprema beneficia, quæ Deus mihi contulit, hoc recensebo semper, quod à Vicario eius manauit. Hortatur me in eo S. V<sup>RA</sup> ut stilum & ingenium ad ornandam Ecclesiam, & magnitudinem eius propagandam, velim conferre : quod ego velut diuinitus imperatû fuscipio, & promitto S. V<sup>RAE</sup> me operam omnem huic rei daturum, quam valetudo mea tolerabit. Incalui enim meritò ab hoc stimulo, & ostendam paterna admonitio quantum apud verè filium ponderis habeat & robustæ auctoritatis. Etsi, BEAT<sup>ME</sup> PATER, iamantè hunc ani-  
mum

num cœpi ostendere, & publicè militem agere in Ecclesiæ castris. Nam scripsi & emisi hoc anno libros duos, priorem quo MIRACVLA & laudes DIVAE VIRGINIS HAL-  
LENSIS continebantur; alterum, quo DIVAE SICHE-  
MIENSIS. Non possumus aliâ re, credo, efficacius frange-  
re & calcare hæresim, quàm hoc Miraculorum fulmine: vbi  
non verbis, sed factis disputamus, & impudentissimorum et-  
iam oculos atque animos perstringimus istâ rerum maiesta-  
te. Si dignum censuissem donum, quod oculos S. V<sup>RÆ</sup> subi-  
ret, misissem ad arbitrandum, & saltem promptum & aper-  
tum meum pro Religione studium conspiciendum. Quod  
porro etiam dignatur scribere VESTRA STAS cogitaturam se de  
Pace publicâ procurandâ, & bellorum apud nos motibus se-  
dandis, ego eam flexis mentis genibus iterùm precor. Necessi-  
tas postulat, & discrimen grande quod toti Ecclesiæ (ita loqui  
audeo) tramontanæ imminet, si Hæresis & Rebellio limitem  
hunc Belgicæ perrumpunt, qui adhuc resistit. Resistit, sed va-  
lidè concutitur, & vicini etiam aliqui Principes oleum in  
hanc flammam conferunt, priuatâ æmulatione aut spe, uti-  
nam auctoritate S. V<sup>RÆ</sup> comprimendi! Atque utinam etiam  
fidâ inter eos pace, arma contra communes & Ecclesiæ hostes  
vertant, felicius & gloriosius triumphaturi! Sed hæc Sapien-  
tiæ vestræ, cui cælestis ille Spiritus semper adsistit, & inspi-  
rando dirigit, dispicienda & gubernanda permitto, precatus  
ab illo longæuam tuam Ecclesiæ præsidentiam & tutelam, at-  
que ego,

BEATISSIME PATER,

tuam sanctam mihi benedictionem. Louanij, III. Kal. Mar-  
tias. ∞. IOCVI.

EPIST. XCIV. *Leodicum.*

HADRIANO FLERONTINO I<sup>ro</sup>.

**T**RISTEM, inquis, nuntium adfero. Certè tristem, &  
magnum in animo isto ictum. Ita Carolum Billæum  
amissimus, rarâ laude, prudentem, pariter probum, pium,  
& vno verbo, optimum Aulicorum? Amissimus nos ami-  
cum,



cum, vos præsidium, Princeps consilium: & mihi crede, faciliùs reperietur qui locum subibit, quàm implebit. Ecce mortalitas! Scripseram ad eum ipsâ horâ, quâ tuas accepi, epistolam, quâ de filio promebam quid videretur: scripseram, & statim disco non esse ad quem scripsi. Vis & aliud philosophiæ? amare eam soles; & ut sapias, ama. Intraui coenaculum meum ambulaturus, & in cogitatione super Billéo meo defixus. Conijcio oculos in vitreas, quæ octodecim, ut scis, locum illustant: atque ibi amicorum aliquot nomina & insignia, amoris vel domini monumentum. Conijcio; & statim animum tangit, illum atque illum mortuos esse. Numerare incipio: & ecce undecim ex inscriptis Parca viuorum numero expunctos mortuis adscripsit. Hem quid hoc est? intra annos nouem? Progredior etiam in atrium adiunctum: sex fenestras numero, & è donatoribus quinque fatum suum obijisse. Vides, inquam, quàm dense morimur? Atque isti ex amicis tuis Belgis: quid in in exteris quot amisisti? quid ex ignotis quàm multi cottidie pereunt? innumerus hic numerus. Solari me cœpi: & quid in vno dolemus, vbi tam frequens vel assidua iactura est? Huc nascimur: & ipsum nasci, est non nisi partus in mortem. In caucâ te claude, ferro & ære conde:

*Mors tamen inclusum protrahet inde caput.*

Cogitemus mi Flerontine, & præiuisse amicum nostrum, quò certo gradu sequimur: non error abducet, non vis subducet. Benè precemur mortuo, & gratâ mente ac linguâ, cum vsus, memoriam eius prosequamur: — Τὸ γὰρ γέρας ἐστὶ θανόντων, ut ille ait. Vale, & me ama: parentem etiam tuum, & Timpelium Canonicum à me saluta. Louanij, Prid. Idus Martij, ∞. 10CVI.

Patruus tuus Prouincialis heri in prandio mihi aderat, & multa locuti super Billéo eramus, & de litteris communiter mittendis. Ille inter primos dolet, scio.

IOANNIS WOVERI Antuerpiensis  
ad æquum & amicum LECTOREM  
in IVSTI LIPSI V. C.

Orationem de CALUMNIA

P R Æ F A T I O:

**M**LTIMAM hæc pagina epistolam tamquam suam expectabat. subtrahi tamen istam nemo æmulus tam indignabitur, quàm boni omnes exultabunt, Calumnie crimen, parvis hodie & magnis commune ingenijs, protrahi, imò prosterni. Quod quamvis vitium neque novum, neque veteribus insolens, in ætatem nostram influxerit; tantò tamen iniquius nunc exercetur, quantò caritatis & divina legis præscriptum scelestius violatur. Amicos enim (immensa eruditionis Afer scripsit) diligere omnium est, inimicos autem solorum Christianorum. Sed aduersus istos ita vindicta hodie obtinuit, ut nec presenti planè narrationi desint, qui pro laudibus criminationes, pro beneficijs iniurias etiam amicissimis reponunt. Ah! vel tali furore plebeiam furere scurrilitatem, utinam Erebi ipsis furiis placuisset! nunc augetur immensum hoc dedecus primaria claritudinis designationibus; & litteræ olim ornamenta ingeniorum cum Sapientiæ ancillarentur, ita auctoratæ ad has pugnas accedunt, ut à paucorum libidine insaniaque si æstimentur, nihil obset, quo minus vanitatis & inhumanitatis nouis nominibus innotescant. Inuisum meritò bonis vitium, quod homini seipsum eripit. Nec feris inter se bella sunt; nec, si forent, eadem hominem deceant, placidum, proximumque diuino genus. Auget præterea remediorum desperatio sic præsens hoc malum, ut nec mecum calumnia abstinentiam à se impetraturos arbitrer, qui recidiuæ iniuriæ malignitatem citius ostendunt, quàm vomici huius morbi curationem admittunt.

tunt Religiosè enim dicent; pro Epistolâ non bonâ fide Orationem editam. Sed his, ne interni vlceris purulentiam obijciam, dico; integrum esse, vt primum apud Saxoniæ prætorem dicam scribant, Jenensis, sed non germanæ fidei declamatoribus; quibus ad calumniandum tantum otij superfuit, vt iniuriosiores LIPSI O esse non possent, nisi infantia suæ macie, totoque inuidiæ pallore, bonam chartam malè commacularent. Tamen & operæ quoque huius vt compendium faciant; satis ipse olim noster maximè, vegrandem hancce, apertiſſimisquæ mendacijs instructam expunxit iniuriam. Cum hoc quoque satis conslet, neminem non modò melioris, sed vel sani sensus esse, qui scholasticorum plumbeas has paginas cum illius componat; qui vnus temporibus nostris monetam aurei eloquij in vetustatis incude sic finxit, vt non immeritò optimorum iudicio habitus fuerit (vti Symmachus alibi scripsit) IVSTVS heres veterum litterarum. Nam nuperam illam putidissimi liuoris inscitiam, solâ dignam miseratione iudico, quâ quispiam latinè parum LIPSIVM, nec aptis satis imaginibus cælestis ingenij opera texuisse, ostendere cœpit. Sed quoniam illi homini insanire, & in omnes passim incurrere doctos, tralatitium est; ego reponere oraculum maximi naturæ Mystæ solum hoc possum: Homines quosdam vt venena nasci, qui nullum aliud abominati spiritus præmium nouere, quàm odisse omnia. Tu contrâ amare optima, & sic LIPSIANA, beniuole Lector, perge; ac salutare istud aduersus calumniam eiusquæ carcinomata quasi alexipharmacum accipe, & vale.

# IVSTI LIPSI DE CALVMNIA ORATIO.



DE Calumniâ dicturus hodie, & hoc quidquid est vitij in lucem protracturus sum. Tu DEVS qui bonitas, candor, amor totus es, dirige & præluce mihi aduersus inimicum tibi vitium; & mentem ac linguam moue, vt generi humano innocentiam instillem, & in vitâ, dictis, scriptis probitatem, pacem & caritatem. Calumniam hîc definio occultam læsionem, imminutionemque alterius in sermone aut scripto, mixtam fraude. dicta ea est à caluendo, quod prisco verbo frustra habere & decipere significabat. Omnis enim calumnia mentitur & fallit, vt mox dicam, & mendacium aut fucum auctorem habet. Græci *ἄλογον* dixere. item appositè, quod quasi traijciat ac penetret, & noxio linguæ suæ telo defigat. Finis scilicet illi primus, fallere; quod Latini considerarūt: vltimus, lædere; quod Græci. Ovi tiorum vitium! & tamen quod hodie crebrius est? quod cum maiori perniciæ coniunctum rei priuatæ & communis? Addo etiam, quod neglectum magis à nouis scriptoribus & antiquis? Quare cùm nemo studiosius paullo, quod sciam, de illo aut in illud dixerit, ita spero vt tractatio eius non solum fructuosa futura vobis sit, sed nec mihi ingloria: qui primus ingredior aperire id & diffundere stilo. De istâ igitur tria hæc dicam. Quàm fœda sit: Quàm perniciososa: Quomodo cauenda. Hæc singula dum subtrilius paullo & vberius persequor, quæso vos Auditores, adhibere mihi non aures solum sed animos: & vela hæc, vt sic dicam, orationis meæ, Zephyro beniuolentiæ vestræ afflate atque dirigite.

Et fœditatem quidem Calumniæ, quo clariùs vobis argumento ostendam, quàm istoc duplici? Quod & in fœdissimas ea personas cadat: & quod fœdissima sit ipsa. Personas quidem triplici hac notâ insignes, Viles, Ignauas, Loquaces. Viles: adeò verè



verè à me dictum, vt negem, non dicam bonam, sed mediocriter bonam altamque indolem, vñquam hac labe fuisse aspersam. Vetus, & nostrum, ætuum excute. non aliter leges, videbis, audies; quàm tristes quasdam malignasque naturas, quas fidere suo Saturnus afflauit, alijs inuidentes, sibi diffidètes, pronas ad hoc viti um & factas. Viderisne minutos illos canes & degeneres, qui hospites allatrant, feras non tangunt? tales deteriores isti hominum, qui lædere tantum innoxios nati & vexare. Nati, inquam, quia reuerà ad hoc virium ita vergunt & inclinant, vt quies ijs nō sit nisi alijs inquietis. Tum Notâ alterâ, Ignauos feci. quid clarius? prima scintilla & fomes Calumniæ otium est: nec vñquã aut vacabit aut lubebit in alienas res inquirere, quem suæ distinebunt. Apud desides & ignauos mala Diua habitat, & apud eos sedem posuit sui regni. Negat quispiam? Forum & Basilicas nostras paullisper adeat: in quibus vberissima cottidie calumniarum seges feritur, non nisi ab istis quibus vñum hoc opus est, Ambulare & Fabulari. Publicâ illic & priuata vapulant: Princeps, & administri peccant: alius hoc fecit, alius hoc dixit: denique nulla de quoquam fabula est, quæ apud eos stet, vt cum poëtâ dicam, talo recto. Atque hæc si periti ipsi rerum facerent, minùs indignarer. nunc homines non solum ignauissimi, sed & ignarissimi, rebus ijs calumniando semiscent, ad quas cogitatione & sensu non pertingunt. Vt in naui nemo vectorem ferat qui nautas moneat idemtidem aut culpet, ipse interea imperitus manum non dicam clauo admo- uere, sed remo: ita meritò importuna nobis & molesta vascula hæc inania; quæ maximè tinniant, & liquoris minimum habent. Denique Nota tertia, Loquaces. & quî potest aliter? Naturâ hoc lingulacis insitum, vt non multa solum loquantur, sed mala. Siquis vestrûm adfuit indomitis istis, & quibus, vt Pindarus ait, os sine fræno: nōne præcipuus illorum sermo, non solum de aliquo, sed in aliquem est? certè. Audita enim & non audita efferunt, quæ vera, quæ vana. & vt in Iudææ lacu Asphaltite nihil mergitur, sed supernatât omnia iniecta: sic in istorum pectore nihil conditur, superfluunt imò effluunt cuncta. Et quid alijs parcere eos credas? nec sibi. quoniam huic morbo id quoque proprium, vt si in alienos dicere nihil habeant, in suos dicant,

dicant, atque adeò in sese. Vt in longâ fame, corpora nostra alimento defecta, ipsa se depascuntur: simile euenit in istis.

Atque ecce personas habetis, quibus gaudet & afflidet Calumnia: quod ordo nunc iubet, producam ipsam. & quidem in vero suo vultu. Omne ego vitium detestandum & fœdum fateor: verùm hoc eximiè. quod non solum in fœdis, sed natum & conflatû è fœdis. Poëtæ Chimæram suam è triplici corpore fingunt: sed fingunt. hæc ipsa res est, & ad hoc monstrum Calumniæ constituendum cœtus & mixtio concurrit trium vitiorum. Nam architecti eius præcipui & quasi parentes sunt, Mendacium & Inuidia: Curiositas autem nutrix. Cogitate ipsi, quàm bella hæc proles sit, à bellâ hac vitiorum trigâ. Mendacium inquam, ei pater. quidni? quod animat scilicet & inspirat omnem Calumniam; quæ iaceat, nec vitam aut sanguinem habeat sine illo. Quis calumniator simplici vero contentus vquam fuit? quis ficum, dicere ficum? nec potest quidem. quia aliter vim nocendi non habeat, nec finem suum assequatur nisi abeat extra veri fines. Itaque auget malitiosè omnia & attollit: atque vt conuallium ille sonus, quem Echo dicimus, pro vnâ voce acceptâ duas tresque reddit: sic iste geminat visa & audita. Verbulo de quopiam questus sum? grauiter accusasse me dicet. Leue aliquid notauit? carpsisse omnia. Ambiguum sermonem habui? quod deterius est, eliget. & ad summam, quod medici de cucurbitis dicunt quas corpori affigunt, non nisi prauum eas vitiosumque sanguinem educere: veriùs de isto ego, qui adtrahit ad se non nisi mala. Atque vtinam adtrahat tantum! sed sæpè à se addit & inspergit: & vt dicta, vt facta refert, quæ nec in somnio nobis cogitata. Sicut aranæ casses & filamenta mirâ arte è suo corpore gignunt: sic iste fraudium argutos laqueos suopte ingenio nectit. Iure igitur Mendacium ei pater: sed mater etiam Inuidia: quæ in illo maligno ingenij vtero concipit, gestat, parit denique hanc infantem. E moribus & factis calumniantium quis id non approbet? Rarò enim in viles & sui similes telum hoc armant aut exerunt: sed in eos quos virtute, doctrinâ, aut quâ aliâ laude alios vident anteire. Athletæ in cursu, non eos respiciunt quos reliquerunt, sed intendunt saltem in priores: sic Calumnia dirigitur in meliores. In ludis olim & are-

nâ obseruatum fuit, tauros purpurâ & rubore maximè concitari, qui tamen pulcherrimi sunt colorum: simile in istis licet dicas, quorum virus prouocat ipsa virtus. At postremò Curiositatem etiam, Nutricem Calumniæ addidi. verissimè: quia scilicet fouet & nutrit hanc puellam quæsito vndique rumorum & sermonum cibo. Tolle eam à Calumniâ: quid poterit? imbecilla, ieiuna, vacua sedebit: & quæ nocere velit potius, quàm possit. Nam hæc est quæ materiem suppeditat, quæ domi numquam, foris semper, imò in foris habitat; omnium ædes, omnium animos penetrat; vigil assiduè & sine somno. Hæc rumores passim colligit: & Heus tu da dexteram. ecquid noui? in Aulâ quid fit? Qui status in Angliâ? quis in Galliâ? Titius quid agit, quid Seius? Talia ac plura scrutatur atque excipit: numquam tamē plena & satura. sed vt pædidum ac membrum scabiosum fricari semper vult: sic ista sermonibus, & præsertim asperis malisque, assiduè scabi. Nec verò aures solum huius prurientes & auidæ; sed acres quoq; & acuti oculi. quos cum semel aperuit, quid ea non videt? etiam quod non videt. Quid non scrutatur? aperta, & operta. Tiberium Imprem eâ oculorum indole fuisse ferunt, vt noctu pariter atque interdum cerneret: de hac appositè dixerim, quæ etiam ea quæ in tenebris & solitudine geruntur explorat? Domum tuam claudis? penetrabit. Linguam contines? pectus inspiciet. Homines fugis? ipsa te inueniet. & vt muscas atque eiusmodi minuta animalia nullâ curâ submoueas: non item vllâ cautione istam. Hæc Curionum illa gens, quam poëta Comicus scitè depinxit:

*Qui res alienas curant opere maximo:*

*Qui omnia se simulant scire, nec quidquam sciunt:*

*Id quod reginæ rex in aurem dixerit,*

*Sciunt, quod Iuno fabulata est cum Ioue.*

*Quæ neque futura neque sunt facta, tamen sciunt.*

Atque ex his palam videtis, quanta tœditas sit Calumniæ. quæ in turpibus, quæ est turpibus: quam Mendacium genuit, Inuidia peperit, Curiositas educauit.

Agite, sequimini me ad Perniciem: quam alterum velut spatium esse volui mei cursus. Quod tamen priusquam ingredior, reficite paullisper animos, & mecum respirate.

Perni-

Perniciem ego in Calumniâ Validam & Variam inuenio: quantam nec in vllò (verè hoc, non oratoriè dicam) vitiorum. Validam ideò: quia Acutè imprimis & Occultè lædit: Variam, quia in plerâque omni re, & plerosque omnes. Singula hæc breuiter videamus. Acutè dico lædere. & mecum sacer ille Vates, qui exclamat: *Dentes eorum tela & sagittæ, & lingua eorum gladius acutus.* Nec longè à mente aut verbis diuini viri hic Spartanus: qui interrogatus de gladio, *Satisne acutus esset? Acutior,* inquit, *Calumniâ.* videlicet hoc significans nullam è chalybe aut ferro aciem esse, quæ conferri possit cum acie hæc linguæ. Quid enim ea non tangat, aut tactum non penetret? vt fulminis subtilis illa vis omnia peruadit: sic hæc quamuis seposita & clausa perurit. Idque eò efficacius, quoniam Occultè, vt addidi, & ex insidijs id facit. Quî vites telum, quod nec vides? Tempestatem nobis nubes denuntiant, incendium fumus, hostem explorator: at subita & improuisa perniciēs est à calumniante. Minari eum credis? blanditur. Hostem præferre? amicum. & ea ipsâ linguâ quæ te fauciat, verborum prius, imò & laudum illecebris demulcet. Vt scorpiū si manu teneas, ludere paullisper videtur, mox ferit te obliquâ caudâ: tale imò amplius in isto est, à quo cum lædi nihil timeas, iam læsit. O fraudem detestabilem! & ex oraculo ab Historico meo scriptum, *Pessimum inimicorum genus, laudantes.* Venena mihi nuda & aperta porrige, vitabo: si cibo aut vino callidè mixta, quî possum? non aliter de Calumniâ censeo: quam bono iure dixerim, Mel venenatum. *Hostem aduersum,* ait egregiè Sallustius, *deprimere homini strenuo haud difficile est: occulta pericula neque facere, neque vitare, bonis in promptu est.* Itaque Validam ab eâ perniciem esse (primò à me positum) satis vobis liquet: nunc quàm Varia eadem, audite. Lædit enim & tangit in plerâque omni re, vt dixi, & plerosque omnes. quod sanè eximium in Calumniâ adnotes, & præter fortem aliorum vitiorum. Quæ noxam nocere non negauerim: sed quid nisi vnam? sed quid nisi vni alterive? Nempe libidinosum me fac: duos impuritate contaminō. Pone avarum: tres, quattuor, pecuniolâ defraudo. Ebriosum cense, vnus aut alter obuius verbera manuum mearum excipient aut linguæ. At in Calumniâ res habet aliter: quæ in omnem ætatem, sexum,



ordinem debacchatur; calamitas publicâ, & Phaëthon quidam, vt sic dicam, orbis-terræ. Quis tam felix aut sapiens, qui iactet ab eâ esse liber? nemo. Paratum enim strictumque liuidum illum dentem in omnes habet: sed tamen in eos maximè, qui magni. Quicumque, quacumque in re, excellit: hunc it depressum. & vt ij qui ruere ædificia volunt, columnas primò subtrahunt: sic hæc cui perdere genus humanum libido sit, perdit eos quibus innixus publicus hic status. Prudentes, probos, doctos, hostes omnes habet: & eos modò criminationum machinis violentè concutit, modò suspicionum cuniculis callidè subuertit. Varios igitur lædit: sed & variâ in re lædit. nec quidquam homini carum acceptumque est, quod non eripi, certè imminui, videas per calumniæ technas. Te opes delectant? si potest, exuet. Alium honores? priuabit. Amici quempiam? hîc verò vim suam artesque exeret: & Lælium à Scipione, Pyladem ab Oreste diucllet. Iam quid rerum humanarum carius famâ: quæ iure est bonis, ante bona omnia & ipsam vitam. Nam hæc vtraque caduca & fluxa sunt: & opes quidem ante nos sæpè, vita nobiscum semper abit: nomen autem & Fama æternant; eaque sola, cum non erimus, hîc erunt. Atqui hanc, vnicum Sapientum thesaurum, purissimam vitæ gemmam, appetit calumniator assiduè; & subtrahere aut maculare conatur omni fraude. Virtutem enim ipsam quia lædere nō potest (summum in nobis propriumque bonum:) hanc lædit; splendorem, lucem, & quasi imaginem virtutis. Et quid de hominibus queror, aut rebus humanis? Proh summe DEVS! nec tibi quidem parcit, & tuo cælo. In rebus enim diuinis & religione inuenit iam quod exagitet; per quod nos, imò te lædat. Tua enim illa vox decretumq. est; tua sanctio, **ABDITA MENTIVM CAELESTI MENT I RESERVANDA**; nec pectoris huius fibras pulsandas cuiquam aut referandas, nisi qui eas fecit. At Calumnia aliter. & passim iam (ô labem nostri æui!) oculos, linguamque illuc conijcit, & adyta interioris huius templi scrutatur & calcatur. Ille in religione parum purus est, ille parum fortis, tertius parum apertus. Et quid iam superest, nisi vt palàm & per præconem animi nostri sensa citentur ad Calumniatorium hoc tribunal? Homerus ille, me quidem iudice, non vatum solùm sed homi-

hominum( de profanis loquor ) semper-Princeps, Aten quam-  
 piam deam finxit : à quâ in populos deriuatæ omnes noxæ.  
 quo fabulæ inuolucro calumniam eum tegere & tangere vo-  
 luiffe tam mihi certum,quàm loqui me nunc & spirare. Nam  
 ita describit,

*Perniciosa dea ( verba eius presè interpretor ) qua omnes  
 offendit :*

*Quæ terram non tangit, incedit autem per capita virorum :*

*Quæ Jouem ipsum læsit.*

Per vestram fidem , vllũsne pictor artifice suo penicillo, aut  
 orator vbere stilo, clariùs expressiusque signauerit germanam  
 Calumniæ formam ? non opinor . *Quæ omnes*, inquit, *offen-*  
*dit.* nõnne hoc ipsum est quod doceo, passim & omnes ab  
 eâ lædi ? *Terram non tangit.* certè. rarò enim in viles aut hu-  
 miles incurrit : sed, quod addit, *incedit per capita virorum :* id  
 est, summa petit, & summates. Denique *Jouem ipsum lædit.*  
 quippini ? siue quia diuinis quoque actiones calumniatur &  
 carpit, siue quod iam dixi, nec religionem immunem habet im-  
 probi sui dentis . Atque hæ noxæ illæ sunt, quas priuatim ad-  
 huc ludit. verè ludit : si cum ijs cõpares, quas publicè patrat &  
 in Principum aulis. Hic enim ei sedes : hic admissis equis lasci-  
 uit & currit, vt in suo circo. Non mihi fas singillatim perse-  
 qui : ( tempus vetat : ) breuiter hoc accipite. Quidquid frau-  
 dium, oppressionum, scelerum vsquam aut vmquam in aulis  
 fuit : id manasse ab hoc capite, ab hoc fonte . Alexandrum  
 illum Magnum in tot amicorum neces quid nisi Calumnia  
 impulit ? Socratem vitâ, Rutilium ciuitate quid nisi Calumnia  
 expulit ? Tiberios, Caligulas, Nerones , & tot portenta tyran-  
 norum, quid nisi Calumnia peperit ? & ne vetera tantum co-  
 gitemus : hoc, hoc, miserrimo tempore, fugas, clades, cæ-  
 des, & maria calamitatum quas patimur, natæ primò non  
 nisi ab riuis istis in Aulâ calumniarum . Doletis hære in  
 reip. visceribus discordiarum hæc tela ? Calumnia iniecit . Ar-  
 dere tot iam annos facem hanc ciuiliū bellorum ? Calumnia  
 accendit . Nec quidquam malorum videmus aut vidimus,  
 quod non ab hac scaturigine diffusum . Populi in reges, reges  
 in populos, non aliâ re excitati primò atque irritati sunt, quàm

hoc linguario flabello. ut maria suâ sponte quieta vento intumescunt: sic Principes naturâ sepe boni aut mites, per incendiarios istos inardescunt. Perniciem igitur Validam, & Variam, in Calumniâ nunc habetis. quam Christiani nostri veteres præclare intellexisse mihi videntur, cum patrem omnis vitij, in id ipsum vitium, monstrum inquam illud ab inferno, Græca voce Diabolum, id est calumniatorem, propriè dixerunt: arbitrati scilicet, nocentissimum hostem, non alio nocentiori nomine potuisse designari. Nec minùs indomitam eius vim legistatores prisca considerarunt. qui cum vitia cetera legibus aut poenis coercerent: huic uni, quod miremur, apertos carceres & velut liberum campum reliquerunt ad nocendum. Ite enim per omnes hominum gentes: fallor; aut nullam mihi dabitis, ubi vitium hoc legum freno aut sanctione comprimatur. Apud Athenienses quidè multa pecuniaria calumniatoribus fuit, fateor: apud Romanos frons ijs inusta K litteræ notâ: sed nemo erret; non istis meis susurrionibus, dumtaxat illis qui in iudicio & publicâ accusatione calumniabantur. Quid ergo? aut tam cæci illi, ut perniciem hanc non viderint: aut tam fatui, ut visam approbarint? Nihil horum. sed scienter & iudicio vitium extra poenam habuerunt, quod esset extra medicinam. Mediocribus omnibus repagula sua sunt: communi alicui diluvio qui aggeres resistunt? Orbem terræ Calumnia inundavit; hæret & habitat in pessimæ huius naturæ medullis; nec iam inter culpas censetur, sed in ores. Quid facerent? opinor, quod prudentes & pudentes medici, qui nec cancro manum temerè admouent nec tabi. Itaque mali magnitudo & diffusio asseruerunt hanc in libertatem: nec comprobata ea, cum desperata est.

Sed ne longiori oratione me fatigem, vos detineam: flectere hanc navim ad portum incipio, & venio ad tertiam, ultimamque partem, quæ est de Calumniæ cautione. Quam si quis ita accipit, ut immunem tutumque ab omni calumniâ futurum se speret: nã ille errat, & exigit à me quod non est virium humanarum. Prodeat, non dicam Thales ille alumnus Sapientiæ, sed Sapientia ipsa: numquam eum dabunt. Quid ergo est? duos tantum velut clypeos suggerere possum, qui vim aciemque eius incurrentis frangant & retundant. è quibus priorem,

rem, Innocentiam; alterum, Patientiam appello. Innocentiâ inquam ante omnia te muni, quisquis effugere vis malæ & hiantis huius diuæ morsum. Nam certè qui vitâ integri, linguâ cauti, actione modesti: quid ab eâ timeant? Vt locis læuibus & politis ægrè sordium aliquid adhærescit: sic maledictum sedem vix inuenit in vitâ puriore. Itaque sæpè tegmen hoc profuit: mentiar tamen, si dicam semper. Ciceronem scio scribere: *Vt ignis in aquam coniectus continuò resinguitur: sic falsum crimen in castam vitam.* Vtinam tam verè, quàm disertè! quàm multos enim vel purissimæ & pænè supra hominem vitæ Calumnia læsit, & lædet? & efficaciter læsit: adeò vt sanguinem omnem ab ijs succumque duxerit bonæ Famæ. Nec miremur. Calumnia enim, vt docui, mendacio ferè grassatur; & id tutò: quia apud iudicē vnum; & qui non quærit plerumque, sed credit. Itaque rem hanc præ magno Oratore vidit melius magni Regis adulator & copria: qui idemtidem monere solitus, *Quidvis in quosvis esse confingendum.* Vt enim, aiebat, *vulnus maximè sanat, manebit tamen cicatrix.* Pestilens, sed, ita me Deus amet, ingeniosum dictum: & cui origo, atque item fides, ab ipsâ nostrâ naturâ. Insitum enim plerisque hominum, non solum patulas sed etiam credulas aures delationibus habere: & id magis, si ad læsos ea pertinent, aut lædendos. Et cum semel aspersus sis, vix est vt plenè eluas hanc labem. Suspicio inquam manet, vbi non crimen. Ergo altero etiam clypeo meritò te muniui: quem Patientiam dixi. Eius vim & vsum hunc esse volo, vt calumnias quas vitare non potes, fortiter & erectâ seruire feras. Varronis argutum olim dictum fuit de malâ coniuge: *Ferendam eam, aut tollendam esse*: tu vsurpa in pessimâ hac viperarum, & tolera, quod non tollis. Feras autem? imò & spernas. Vt bonus & animosus miles leuia & circum galeas crepitantia tela contemnit: sic vir robustus & sapiens dicteria. Quid enim tibi tollunt? Famam? bona ea semper erit apud bonos. Virtutem aut Sapientiam? non subiacent ea arbitrio humano. Denique cum omnia carptores isti fecerint, dixerint: vero altoque animo clamabis, *Omnia mea mecum porto.* Quòd si infamiæ tamen specie moueris: bene, si verâ; sin autem falsâ, quid ad te? Ne applica tibi, non eam habes. Diogenes ille Cynicus altæ sapientiæ vir, & qui non vicit solum



folùm hominem, fed exceffit, dicere folitus cùm turbæ fubfan-  
narent: *Illi me rident? ego non rideor*. Tu idem fac: & dicta illa  
omnia fiue fcommata fic audi, quafi iacta in alienum. Nemo  
ab iftis conteritur aut contemnitur, nifi qui antè fe contempfit.  
M. Cato, Romanus ille Socrates, in os percuffus à quodam,  
cùm idem fatisfaceret deinde & deprecaretur: *Non hercules*, in-  
quit, *animaduerteram*. O eximium & fupra viros virum! qui al-  
tius meliusque putauit non agnouiffe iniuriam, quàm igno-  
uiffe. Et verò, fi iudicio examinamus, quantula ifta funt, quæ  
nos turbant? rerum plerumq; nihil, fed verborum aliquot nu-  
gæ: quorum maior etiam pars conftat vitio interpretantis. No-  
li ea intelligere, perijt conuiciatori contumeliæ fuæ fructus. Hæc  
vera, Auditores, hæc folida in Calumniam arma funt: non illa  
quæ vulgus vfurpat, reponere & vindicare. Vt in viâ, fi canis aut  
equus luto me adfpergat, non excandefco ftatim & viciffim in  
illum regero, fed potius me purgo: ita hîc faciendum, & omnes  
ifti pro caniculis aut equuleis habendi, qui non iudicio fed im-  
petu & proteruiâ lædunt.

Sed iam defino, & complico, vt fic dicam, Orationis meæ ve-  
la. Tria hæc audiftis, Fœditatem huius vitij, Perniciem, Cau-  
tionem. Oro, obteftorque vos Auditores per Deum immorta-  
lem, fpernite à vobis longiffimè hanc peftem; nec à linguis fo-  
lùm, fed ab auribus etiam veftris. Peccat enim hîc non modò  
qui dicit calumniam, fed qui excipit: & vt ferrum ignitum tan-  
gere fine noxâ non eft, non item affiftere amburentibus hifce  
linguis. Blandiuntur & infinuant, fcio: verbis comitatem, vul-  
tu amorem præferunt. vos mihi credite: afpides illæ funt, &  
venenum fuum inspirant fopiente quodam & fallente morfu.  
Quod ad ipfos attinet, nihileos moneo. voueo & imprecor  
cum Dauide potius: *Muta fiant labia dolofa, quæ loquuntur ad-  
uerfus* IVSTVM.

FINIS.

CENSV-

## C E N S U R A.

**H**AEC selectarum Epistolarum Centuria, ex supremis panè lucubrationibus IVSTI LIPSI V. C. collecta, & in ordinem digesta, quòd virum Clariss. pridem creptum, Orbi restituat, & quàm magnus semper inter Magnos fuerit, luculenter ostendat; meritò typis excusa, diuulgabitur. Actum Antuerpiae, XII. Kal. Iulij. ∞. 16CVII.

Laurentius Beyerlinck Antuerp. S. Theolog. Licentiat. Librorumque Censor.

## P R I V I L E G I V M C Æ S A R E V M.

**R**VDOLPHVS SECVNDVS diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatia, Sclauoniæ Rex, Archidux Austriæ, Dux Burgundiæ, Stirię, Carinthiæ, Carniolæ & Wirtembergæ, &c. Comes Tirolis, &c. Nostro & Sacri Imperij fidei dilecto IUSTO LIPSIO gratiam nostram Cæsaream. Postquam inter alia, quæ DEVS immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, ut tanquam Dij quidam splendescere in terris videantur: rem sanè præclaram sequæ dignam illi præstant, qui diligentem iis ipsis in litteris ac disciplinis operam ponunt; præclarissimam verò & Reipub. vtilissimam, qui eas ita excolunt, ut aliorum menti docendo, scribendo lumina præferant, eosque ex ignorantia tenebris quasi manu educant. Quos excitare, quos amare atque animare, ad dignitatis nostræ munus, ad quod Diuino vocati beneficio concessusque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Litteris possint, acceperimus, insignes te animi ingenii que tui dotes tibi à natura infusas à primis temporibus ætatis tuæ ita litterarum ac disciplinarum studiis excoluisse atque exornasse, ut olim iuuenilibus adhuc annis præclara florescentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituissti, dum vetusta Latine antiquitatis rudera in nouam subinde structuram singulari artificio eleganter conuertis: ad exquisitam adeò & raram doctrinam, quæ magnam de te apud doctos quosque viros opinionem excitauit, peruenisse, eamque variis abs te libris acri & graui cum iudicio scriptis atque in lucem editis ostendisse, ut in eo quod tam feliciter tractes descriptionis genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue verseris, flores colligere, concinnare, quibus Lectores mirifice recrees, & eorum pectus ad prudentiam probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patrociniòque nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro priuilegioque te & Typographum tuum aduersus quorumcumque fraudem, qui lucri causa, quod fieri solet, eadem excudere aut typis imitari fortè velint, munitos cupimus. Quamobrem pro auctoritate nostra Cæsarea decernimus, statuimus, veramusque, ne quis Typographorum, Bibliopolarum,

aut

aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq; ac Dominiorum nostrorum hereditariorum fines, triginta annis proximis à primo editionis die computandis, absque tuo tuorumve heredum consensu audeat: Hac autem lege addita, ut tria ut minimùm cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, eum non solum eiusmodi libris, tibi, heredibusve tuis, auxilio Magistratus, vbicunq. reperti fuerint, vendicandis, priuari, sed triginta etiam Marcharum auri puri mulcta, cuius semissis quidem Fiscus nostri Procuratori, fraudis vindici; alter verò semissis, tibi heredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscunque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiàmve exercent, ne quemquam hoc Priuilegium nostrum impunè violare, spernere aut negligere patiantur: Sed, si quos contumaces compererint, constituta à nobis mulcta, eos puniri & quibuscunque modis coërceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti, Anno Domini Millesimo, Quingentesimo, Nonagesimo secundo: Regnorum nostrorum Romani decimo septimo, Hungarici vigesimo, & Bohemici itidem decimo septimo.

*Subsign.*

RVDOLPHVS.

Iacobus Curtius à Senfftenaw.

*Ad mandatum sacre Cæsareæ M<sup>ti</sup> proprium.*

Io. Baruitius.

*Additum sigillum Cæs. M<sup>ti</sup> in cerâ rubrà.*



SVMMA PRIVILEGII REGIS CATHOLICI.

**P**HILIPPVS Dei gratia Hispaniarum, &c. Rex Catholicus, diplomate suo sanxit, nequis IUSTI LIPSI Historiarum in alma Vniuersitate Louaniensi Professoris, & item Historiographi sui libros quoscumque, à Censoribus legitimis approbatos, præter ipsius, hereditumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has Inferioris Germania ditiones importet, venalesve habeat. Qui secus faxit, præter librorum confiscationem, triginta marcharum auri puri illatione mul'tabitur. Vti latius patet in litteris, datis Bruxella, XIV. Febr. M. D. XCVII.

Signat.

Verreycken.

SVMMA PRIVILEGII REGIS CHRISTIANISSIMI.

**H**ENRICVS Dei gratia Galliarum & Nauarra Rex Christianissimus, singulari priuilegio sanxit, nequis per Vniuersos Regnorum suorum fines, IUSTI LIPSI, quos vel hætenus edidit, vel in posterum editurus est libros, excudere intra decennium præter voluntatem ipsius possit. Qui secus faxit, præter librorum confiscationem, ter mille florenorum illatione mul'tabitur; vti latius patet in litteris, datis Parisiis, XIII. Iulij, M. DC. V.

Signat.

Perrochel.

**T**ibi IOANNES MORETE, pro amicitia quæ mihi cum Plantino (heu, quondam meo) & Plantinianis est ac fuit, tibi, inquam, permitto, vti EPISTOLARVM mearum CENTVRIAS typis tuis excudas ac diuulges. Nequis alibi alius præter te, cupio siue iubeo, ex lege quam magnus Cæsar & Reges dixerunt.

Iustus Lipsius.

SVMMA PRIVILEGII PRINCIPVM BELGARVM.

**A**LBERTVS & ISABELLA CLARA EVGENIA Archiduces Austriæ, Duces Burgundiæ, Brabantiae, &c. Serenissimi Belgarum Principes, diplomate suo sanxerunt; nequis IVSTI LIPSI Historiarum in almâ vniuersitate Louaniensi olim Professoris, itemq; Historiographi & Consiliarij sui libros quoscumque, præter Martinæ Plantinæ viduæ & Balthasaris & Ioannis filiorum Ioannis Moreti p. m. voluntatem, vlllo modo imprimat, aut alibi terrarum impressos, in has Inferioris Germaniæ ditiones importeret, venalésve habeat. Qui secùs faxit, confiscatione librorum & aliâ graui poenâ mulctabitur, vti latiùs patet in litteris, datis Bruxellæ, XVII. Ianuarij, M. DC. XI.

Signat.

*S. de Grimaldi.*

Et in Concilio Brabantiae,

*I. de Buschere.*

ANTVERPIÆ,  
EX OFFICINA PLANTINIANA,  
APVD VIDVAM ET FILIOS  
IOANNIS MORETI.

M. DC. XI.







SPECIAL	87B
PA	20914
8545	V.3
Alb	Bound w/
1602	87B 21857
V.3	21864
	22265
	22273
	22304





JUSTI LIPSII  
OPERA

ANTWERPÆ

1602